

吴江区档案局 编
吴江区方志办

垂虹识小录

 广陵书社

图书在版编目（C I P）数据

垂虹识小录 / 沈卫新主编；吴江区档案局，吴江区
方志办编. -- 扬州：广陵书社，2014. 8

ISBN 978-7-5554-0144-5

I. ①垂… II. ①沈… ②吴… ③吴… III. ①区（城
市）—地方志—苏州市 IV. ①K295.33

中国版本图书馆CIP数据核字(2014)第204195号

书 名 垂虹识小录

主 编 沈卫新

编 者 吴江区档案局 吴江区方志办

责任编辑 顾寅森 庄 莉

出版人 曾学文

出版发行 广陵书社

扬州市维扬路 349 号 邮编 225009

<http://www.yzglpub.com> E-mail: yzglss@163.com

印 刷 江阴金马印刷有限公司

开 本 889 毫米 × 1194 毫米 1/32

字 数 210 千字

印 张 7.875

版 次 2014 年 8 月第 1 版第 1 次印刷

标准书号 ISBN 978-7-5554-0144-5

定 价 56.00 元

（广陵书社版图书凡印装错误均可与承印厂联系调换）

校注说明

《垂虹识小录》成书于清末民初，未有刻本，只有民国初年抄本，藏于南京图书馆，且作为吴江的一种县志收录于《中国地方志集成》之《江苏府县志辑》中。《江苏旧方志提要》著录为：

垂虹识小录八卷附科第考 / (清) 费善庆纂·一抄本。——此志以吴江著名于世的垂虹桥为志名，虽题为“识小录”，实是吴江县志(费氏自序正称为“吴江、震泽志稿”)。《中国地方志联合目录》著录为 6 卷，附注记事至同治三年(1864)，今苏州市图书馆所藏卷 6 以下 3 卷页码各为起讫，未题卷数，应分别列为 3 卷，其中卷 7 记事止于光绪三十三年(1907)。

在清雍正年间，清廷析吴江地置震泽县，民国元年，撤销震泽县，合并为吴江县。该志自序称“吴江、震泽志稿”，说明是吴江、震泽两县的合志稿，类似于成书清代的光绪《常昭合志稿》、乾隆《昆山新阳合志》，也是时代的产物，应该说这是唯一的一部吴江、震泽两县的合志稿。

费善庆(1858—1939)，字福堂，号伯缘。晚患眼疾，故又号盲叟。祖父费山寿，名友棠，一作友堂，字山寿，以字行，清吴江震泽人。是一名悬壶济世的医家，著有《急救应验良方》《急救喉证刺疗合编》等。善庆年二十补学官弟子，与邑

中诸名士交。在郡应紫阳书院课，在邑应松陵、笠泽两书院课。五与乡试不中，以附贡终。晚晴尝任县商会理事，又任育婴堂副董事。民国后，相继任市议会评论员、农会评议员、田业会副会长等职。平生喜欢藏书，著述甚富，主要有《永思录》、《玉壶山馆备忘录》7卷，《华萼草堂杂记》、《报秋轩诗文稿》、《垂虹杂咏》1卷，与人合辑《垂虹诗乘》10卷、《松陵女子诗征》10卷。其中表弟薛凤昌著《邃汉斋文存》中有《费伯缘家传》，生平事迹述之颇详。

《垂虹识小录》8卷，末附《江震科第贡举考》不分卷、《松陵费氏诗集》2卷。此志卷1地理类：镇市村、水、山、公署、坛庙祠宇、古迹园第、寺观、墓域、灾异禎祥；卷2人物、列女、旧事；卷3人物、方言；卷4~6人物；卷7古迹、河道、桥、杂记、寺、塔、人物、书目；卷8杂记、人物、列女。全志内容较为错乱，前后有重复，如卷3就出现了三个相同的条目“陆朗甫”，只是文字略有不同，类似的还有卷4有两条“朱长孺”目，卷3、卷4均有“吴汉槎”目，显然是不同来源的资料没有经过整合造成的。从这一点来说，这部志书确实是一部未整理完成的志稿。

但是因为该志稿是辑录型著作，因此上述瑕疵丝毫不影响其存史价值，原因是它保存了许多非常有价值的资料。如转引辑录了吴江两部失传乡镇志稿《韭溪志》《震泽备志》中的一些资料，在《史惟则传》中，《垂虹识小录》转引《韭溪志》的文字云：“弟怀则，唐末进士。宋兴，曹彬荐，召掌史局，亦工书。后进三品秩，赐绯鱼袋，不受，隐于浮屠。卒谥静宪。”在记载“慈云禅寺”时称：“在震泽镇东，周九亩，建于宋。中有浮图五成。”并以《震泽备志》作注：“或云：吴赤乌中，慈云公主建，高十一丈，一名七井塔。相传初建时土尝坟起，有异人过，命穿其地，得井七而塔成，故名。今三井尚存，一在寺

左偏，一在慈云桥东祠山庙，一在东方丈花台下。”进一步说明慈云禅寺的修建始末。还有卷6中的《逼试》一则，记载了太平天国开考试士之史料等。从该志稿保存的许多已佚方志的信息和文献资料，以及比较罕见的太平天国开考试士史料来看，具有很高的史料价值，值得整理挖掘。

目 录

校注说明	1
垂虹识小录卷一	1
太湖震泽辨	1
都崙说	1
置县不始于钱镠	2
镇市村	2
山 水	4
公 署	5
平望巡厅	7
松陵书院	8
坛庙祠宇	8
古迹园第	11
寺 观	13
墓 域	14
灾异祲祥	15
垂虹识小录卷二	18
汉	18

五代	18
宋	19
元	20
明	21
列女	27
旧事	29

晋 / 29

宋 / 31

垂虹识小录卷三 42

吴静之 / 42	顾仲光 / 42	沈宗海 / 43
沈子由 / 43	顾一贯 / 44	徐伯鲁 / 44
顾道行 / 44	沈子芍 / 44	沈季玉 / 45
周秀华 / 45	赵蹇卿 / 45	张异度 / 46
周季侯 / 46	叶仲韶 / 46	叶季若 / 47
赵任卿 / 47	周长生 / 47	盛子裁 / 48
吴日生 / 48	赵涣之 / 49	任以行 / 49
任遂初 / 49	苏寅侯 / 49	顾茂伦 / 50
张梦周 / 50	唐子珊 / 51	赵咒生 / 52
盛敬之 / 52	倪元镇 / 52	吴廷用 / 53
史明古 / 53	吴禹畴 / 53	赵半江 / 53
叶廷缙 / 54	盛斯徵 / 54	周行之 / 54
徐孝女 / 55	徐少岩 / 55	樊祥伯 / 56
陈海霞 / 56	赵平章 / 56	陈养波 / 57
李思曾 / 57	干文传 / 57	槃庵禅师 / 58
徐双桥 / 58	吴少谷 / 59	吴诗庭 / 59
潘稼堂 / 60	陆元珍 / 60	袁朴村 / 61
沈君服 / 62	沈恒斋 / 62	沈君山 / 62

- | | | |
|----------|----------|----------|
| 沈高陵 / 63 | 沈四明 / 63 | 沈默斋 / 63 |
| 沈培福 / 63 | 张雪窗 / 64 | 王云舫 / 64 |
| 朱游初 / 64 | 李彦平 / 65 | 顾徐氏 / 65 |
| 卜孟硕 / 66 | 朱白民 / 66 | 沈范氏 / 67 |
| 张建瓴 / 67 | 张祖槐 / 68 | 朱长明 / 68 |
| 程穆甫 / 69 | 杨列欧 / 70 | 陶锡蕃 / 71 |
| 金云栽 / 71 | 费策云 / 72 | 费秀生 / 72 |
| 费伯瀛 / 73 | 陆朗甫 / 73 | 徐虹亭 / 74 |
| 陆朗甫 / 74 | 姚吴氏 / 74 | 赵山子 / 75 |
| 计甫草 / 75 | 吴汉槎 / 76 | 徐电发 / 76 |
| 陆朗甫 / 76 | 王元芝 / 77 | 蔡卫川 / 77 |
| 方 言 / 78 | | |

垂虹识小录卷四 81

- | | | |
|----------|----------|----------|
| 张渊甫 / 81 | 杨硕甫 / 82 | 顾仲容 / 83 |
| 吴汉槎 / 83 | 吴仲廉 / 84 | 某节妇 / 85 |
| 沈 韶 / 85 | 周季侯 / 85 | 某主簿 / 87 |
| 俞羨长 / 87 | 郑 媪 / 88 | 周秀卿 / 88 |
| 朱长孺 / 88 | 史仲彬 / 89 | 叶陶氏 / 89 |
| 朱长孺 / 90 | 朱不远 / 90 | 潘力田 / 91 |
| 朱节妇 / 91 | 徐烈女 / 92 | |

垂虹识小录卷五 108

- | | | |
|------------|-------------|-----------|
| 鸚鵡报德 / 110 | 尼 案 / 111 | 董梦兰 / 111 |
| 顾瞻麓 / 112 | 午梦堂集 / 112 | 费元衡 / 113 |
| 平波台 / 113 | 圣寿寺钟记 / 113 | 沈陆氏 / 114 |
| 王顾氏 / 115 | 费孝女 / 116 | 第四桥 / 117 |
| 徐梅村 / 117 | 王载扬 / 120 | |

垂虹识小录卷六 127

垂虹识小录卷七 148

- | | | |
|------------|--------------|-----------|
| 十八保 /148 | 鲈乡亭 /148 | 书院场 /148 |
| 龙 穴 /148 | 文星阁 /149 | 岫山楼 /149 |
| 松 厅 /150 | 园林杂记 /150 | 流觞小榭 /150 |
| 一花园 /150 | 翠娱堂 /150 | 望湖楼 /150 |
| 芳草园 /151 | 桥 /151 | 城内河道 /151 |
| 浚长桥 /151 | 仙 迹 /152 | 寺 钟 /152 |
| 同里古迹 /152 | 苏州水利同知署 /152 | |
| 梳枕桥 /153 | 团圆山 /153 | 社 仓 /153 |
| 罗星洲 /153 | 东溪桥 /153 | 仁济道院 /153 |
| 逼 试 /153 | 粮蛮子 /154 | 折 漕 /154 |
| 青草滩主人 /154 | 复 社 /155 | 陆 叟 /155 |
| 随 春 /155 | 同 里 /155 | 才思敏捷 /156 |
| 垂虹钓雪 /156 | 分 湖 /157 | 湖 异 /157 |
| 顾 墟 /157 | 殊胜寺 /158 | 三高祠 /158 |
| 华严塔 /159 | 平波台 /159 | 八 测 /159 |
| 桃 墩 /160 | 震泽古柏 /160 | 桃源洞 /161 |
| 棺 怪 /161 | 怪 物 /162 | 布袋和尚 /162 |
| 潘吴逸事 /163 | 秋灯会 /163 | 徐虹亭 /164 |
| 吴汉槎 /164 | 叶仲韶先生 /167 | |

垂虹识小录卷八 173

同治时江震阵亡各员名略 /175

江震殉难义民 /179

吴宗汉 /180

松陵费氏著述存目 191

费氏节孝贞烈附	192	
费桂生少尹枕经楼诗古文集序	193	
江震科第贡举考	195	
松陵费氏诗集卷一	212	
翼民公诗 / 212	伟文公诗 / 213	岳钟公诗 / 213
儒珍公诗 / 213	洁斋公诗 / 215	可斋公诗 / 216
虚谷公诗 / 216	静斋公诗 / 217	孙如公诗 / 217
西屏公诗 / 218	声和公诗 / 223	绍堂公诗 / 224
绍古公诗 / 224		
松陵费氏诗集卷二	225	
二峰公诗 / 225	楚江公诗 / 227	春卿公诗 / 227
硕甫公诗 / 227	麋生公诗 / 228	莲溪公诗 / 229
岐生公诗 / 229	绶堂公诗 / 230	廉卿公诗 / 230
呦笙公诗 / 231	莲舫公诗 / 232	龙笙公诗 / 232
式卿公诗 / 232	桂卿公诗 / 233	绶笙公诗 / 233
子实公诗 / 235	□□公诗 / 236	顾淑人诗 / 236
吟芝硕人诗 / 236		

垂虹识小录

(清)费善庆 纂辑

陈其弟 点校

垂虹识小录卷一

太湖震泽辨

孔氏以太湖为震泽，非是。《周官》：九州有泽藪，有川，有浸¹。扬州为具区，其浸为五湖。既以具区为泽藪，则震泽即具区也。太湖乃五湖之总名耳。凡言藪者，皆人资以为利，故曰藪以富得民，而浸则但水之所钟也。今平望、八尺、震泽之间，水弥漫而极浅，与太湖相接，而非太湖积潦暴至，无以泄之，则溢而害田，所以谓之震。蒲、鱼、莲、芡之利，人所资者甚广，亦或可堤而为田，与太湖异，所以谓之泽。他州之泽，无水暴至之患，则为一名而已。而具区与三江通塞为利害，故二名以别之，此非吴越之人不知，而先儒皆北人，但据文为说，宜其显然失之地理而不悟也。宋叶梦得《避暑录话》。

都囿说

吴江县田地，有几都几囿之别。“囿”字即古“鄙”字，《说

1 九州，不同时代有不同州名版本，一般以《禹贡》为准，则为冀州、兖州、青州、徐州、扬州、荊州、豫州、梁州、雍州。《职方氏》详细记述了各州地表水资源分布和利用情况。它把地表水分作泽藪、川和浸三种。泽藪是湖泊和沼泽，川是有通航便利的水道，而浸则是有灌溉作用的水体。

文》：方美切。今人误作“图”，音兼有作图者。或云每里册籍，首列一图，改名。然虽有此义，而吴江田地之用，实“畺”字。修志者以俗有“图”音，乃援此义而漫加一“口”，直作“图”字，将令千百年后知吴江之有都图，而不知吴江之有都鄙，其得为信史乎？袁栋《书隐丛说》。¹

置县不始于钱镠

志载：县建于五代吴越王钱镠。按，唐陆广微《吴地记》云：唐代税吴江县茶盐酒等钱三万六千二百六十九贯一百文。《元史地志》云：唐以来为县，元元贞元年升州，则吴江县之名不自后梁始矣。《松陵人物汇编》。

镇市村

震泽镇，在县治西南九十里。唐开元二十九年，湖州刺史张景遵即其地设震泽馆，而震泽之名始见于志。五代属吴越忠国军，宋属吴江县。绍兴初，为皇畿近地，设巡检以镇之。镇之名，自此始。元元贞元年，吴江例升中州。户五万至十万者为中州。明洪武二年，仍改县而镇属如故。本朝因之。雍正三年，析吴江西偏地置震泽，乃改属焉。沈眉寿《震泽镇志》。

八坼，离县治东南二十里，塘自北来至此向东而南，向西复南，俨似弓形。唐范正传治水，劈河而直其路，斥土为二，故名八坼。俗作尺，误。至今上下两塘俱塘字圩，地当南北要衢，居民稠密。鼎革后，非复当日之盛矣。而《坚瓠集》载：妃发

1 袁栋，号漫恬，吴江人。是书杂抄小说家言，参以己之议论，亦颇及当代见闻。原序拟以洪迈《容斋随笔》、顾炎武《日知录》，栋自序亦云摹仿二书，然究非前人之比也。

委地八尺而名。此说附会。《松麈燕谈》。

筒村，由吴家港南去有筒草庵，宋时建。

梅里，在湖浦西。浦，一作墓。地多古梅，故名。

同里，在县治东十里，唐初名铜里，宋改为同。吴骥云：旧名富土，以其名太侈，乃析田加土。未知孰是。地方五里，有巡检司。元时为吴江子务，明改税课局，未几革。室宇丛密，可方州郡。

庵村，在同里东五里。

莫舍¹，初名石舍，即绮川。

周庄，为宋迪功郎周君失名。收获设庄之所，故名。镇有贞丰桥。又名贞丰。初系村落，自金二十相公和扈跽南渡，侨居于此，人始稠密。元季，沈万山之父祐由南浔徙居东垞，始辟为镇。国朝康熙间，东西二栅俱成闾阖。镇属元和十之八，西偏属吴江十之二。

芦墟，距松陵五十里。梁太学博士顾野王子安饶、安文卜居于此，遂有北顾里名。前为武陵溪，详吴江《嘉泰桥记》，明成化三年立石。按，《顾氏谱》：北顾里及东顾村、西顾村，缘宋秘阁校书顾亨避兵陈思，后子姓繁衍，散居村落，遂以名其地。杨维桢《游分湖记》云：北芦墟，旧名北顾里，前有武陵溪。

黎里，去县治东南四十五里，东西距三里半，周八里余，民居稠密，沿街有廊，不需雨具，繁阜特盛。

盛泽，去县治南六十余里，居民以绵绫为业，户口万余，诸镇推为第一。

梅堰，在十九都，去县治西南五十里。

双杨，在十一都，去县治西南八十里。

1 今吴中大道东段有莫舍桥，莫舍就在此附近。此处原属吴江地界。

山 水

邑本无山，惟横山一隅，其东面为楞伽山。吴山一角。洞庭两峰，远浮天际，吾邑凭高眺望，岚影可人，故前人指为胜概。徐达源《黎里志》。

吴山，俗称吴山嘴，距县治西北二十里。由横山东岭迤逦而南，将尽入界，复开障东南。

庞山，在南津口石塘对岸，地形隆起，实非山也¹。里人悉业蔬圃，朝出晚归。谚云：“庞山背，驮日月，其人辛苦；石里口，吞日月，其人健讼。”

庞山湖，在南津口庞山下。产芡实、莼菜，村民占利，水口日隘。

菱湖，在谢里村。上承庞山水，下流入新湖。今淤为田，名菱荡田。

白蚬江，在周庄镇西北，袤九里，广如之。北通陈湖，西南俱属吴江。有急水江自西北至东南横亘其中，即古之东江也。相传此江波浪最险，曾有异人来言：“江底有九泉，某日某时有红虾九浮于水面，以铁柱从虾浮处钉下，可以塞此泉。”里人如其言，果验，得为安澜。然遇风逆，辄不能行。

南白荡，本名张矢鱼湖，在北厍东。袤广三里，水清而味冽，以之酿酒，胜他处。相传湖底有酒缸罗列云。

分湖，去县治东南六十里，南至嘉善境，北为松陵之墟湖。是湖两界中分，南北相等，故名。湖西北有古墓，墓上二树，俱可十围，老蔓枯藤萦绕其上。二树相去五六尺，下根相连处如瓢罍，中空上缺，泓然储水，寒暑不涸。

1 《百城烟水》云：“余视庞山土塍中高边下，俱由老圃耨成，以泻流雨潦。仿佛冈阜，实非天然。其下即庞山湖。”

莺脰湖，去县南四十里。太湖南分纳荻塘，全纳烂、车、黄、穆、急五溪之水，潴而为湖。湖东南为桑盘土地祠，后下有巨潭，广二三丈，曰桑泉。土人取以酿酒，味甚甘冽。

荻塘，自湖州府城东至平望镇一百二十五里，即运河堤岸也。晋太守殷康所开，后太守沈嘉重开，名吴兴塘。唐开元中，乌程严谋道重开荻塘。贞元时，刺史于頔重筑，又曰頔塘。汪曰桢《南浔志》。国朝雍正中重修。自东汛至政安桥。里人张姬纂记。

震泽河，即运河。国朝嘉庆十三年，知县黄翼堂、巡检郭浚浚。河源于湖州之天目山，由荻塘经乌镇之南浔镇东一里入震泽界，水东北流三里至曹村，又东南入赋溪，其北流入徐家漾，至思范桥会赋溪水入河。自思范桥又东十里入双杨河，又北流自大港，东潴为牛娘湖及唐白漾。又北十里入太湖。府志。

章练塘，在县治东九十里，吴孙权造战舰于生衣镇，于此张纛练水军，后人误张为章。属长洲。今分县隶元和。华亭者居多，吴江不及千家。

公 署

吴江县治，在吴松江滨。宋因五代钱氏之旧，宋末治毁于兵。元元贞元年，王柔重建。二年，县升为州。公堂内有《州官题名碑》。至正七年，知州那海重修，前有宣诏、颁春二亭，内有无讼堂、百花亭。明洪武二年，州复为县，知县孔克中增广廨宇。建文间，知县蒋奎建川堂及中和堂五楹。嘉靖中易扁曰“观我”。正统元年，知县某重建谯楼，桂宗儒记。成化七年，

王迪重建榜廊。十四年，冯衡修后(廨)¹。堂后有河名中河，河上有桥五，中桥北为后廨。国初，湖寇入城劫掠，县治悉毁。县令以下赁民房听事。顺治七年，唐增即观我堂址建公堂，前立仪门，后为私宅。十二年，吴就恒²设东房于堂左。十四年，雷珽³建两廊吏房，设架阁库，又筑耘松亭于内廨。康熙四年，刘定国重建樵楼。五年，建旌善、申明于门外甬道，又建公余少憩堂于内衙，并布昭嘉绩石亭于大门外之东，其西为震泽底定亭。十七年，林鼎复重建牧爱堂。十八年，郭琇成之扁曰“忠爱”，董闾记。四十五年，陈九睦于内廨建清远堂。移耘松亭额于左。雍正元年，叶前建二堂于忠爱堂后，徐永祐扁曰“得步堂”，后为县圃。咸丰十年，粤匪窜扰，毁于兵燹。

丞厅，旧在县治西南。明初，移县治内，有治农、清军、管粮三丞。明季缺裁。国朝顺治二年毁，僦民舍居。雍正间，以后四保入官屋改建。乾隆五年，移盛泽。七年，即吴公书院改建。

主簿厅，旧在县西。国朝顺治二年毁，僦民舍居。乾隆五年，丞移盛泽，即丞厅改为之。

典史司，明初在县治内幕厅西北，后移幕厅后。国朝顺治二年，僦民舍居。雍正十年，知县赵轩临移建县治仪门外西，前明为尉厅，在县东九十步。

震泽县，在吴江县治北一里。雍正二年，析吴江县地置县。八年，即济农仓废址改建如制，邓圭记。乾隆四年，刘士观建楼于堂东。

同里巡厅，初在洞真观西。国朝康熙四十一年，巡检刘衡珠始置西柳圩，地一亩七分九厘，建瓦屋三间。雍正丙辰，沈

1 “廨”字原阙，据《乾隆苏州府志》补。

2 《康熙吴江县志·知县表》云：“吴就恒，字立斋，太谷人，己卯副榜贡。”

3 《康熙吴江县志·知县表》云：“雷珽，字笏山，井汧人，辛卯举人。”

以铍集贳详请建门堂内宅，共二十一间，以后历有增设。乾隆五十三年，添建仪门，立福地祠于东偏，王曾翼记。

分湖巡厅，本在芦墟镇，宋元明因之。国朝康熙中，刘度重修。后以事稀，于乾隆初迁驻黎里，僦民舍居，在作字圩。所辖嘉善陶庄，本邑黄溪、八坼、下塘及莘塔等处。

震泽巡厅，旧署无考。明洪武四年，巡检李进即酒醋局废址建于新兴桥北。俗名庄桥。天顺六年，王纲改建通泰桥西。万历四年，夏濂重建，吴秀记。国朝因之，分县后隶震邑。

平望巡厅

平望营都司，驻城内，在县治东，近城。千总驻平望。

筒村巡检司，在筒村。宋设，元因之。明初，移置充浦。雍正四年裁。

太湖水利同知厅，在同里。雍正中建，乾隆初移驻东洞庭厅，废。

儒学，在东门外长桥河北，即宋开江营址。国朝雍正三年，析置震泽县，遂为吴江、震泽两县学。乾隆五年，江令陈王言修。九年，江令丁元正、震令陈和志重修大成殿。五十八年，按察熊枚修。道光四年，邑人黄有熊修。咸丰七年，经理洒扫会¹王□□²重修。

忠义孝悌祠，在明伦堂西南。

节孝祠，在泮宫门外西。

土地祠，在泮宫门内西。

吴江教谕宅，在尊经后。久地僦民舍居。

1 洒扫会，是由县政府差役组织的公益团体，主要负责修缮等事，费用主要来自庙内香火及一些富商巨贾捐献。

2 名字原阙。

震泽训导宅，在忠义孝悌祠后。

松陵书院

笠泽书院，在下塘街。乾隆十一年，知县陈和志建。

震镇义学，在泰安桥。雍正十三年，邑人倪兆雕捐田创建。后学废，田亦无考。道光九年，里人徐学健等又倡建义学于保赤局，张履为记。

同川义学，在稭字圩。乾隆十二年创建，置朱姓地三亩，为屋二十间。二十九年，里人王士增葺，知县沈名揆记，学名同川书院。

平望义学，在殊胜寺，亦倪兆鹏捐建。乾隆十一年，里人赵日新等改建螽斯港。嘉庆十二年，赵筠重修，李福记，学名艺英书院。

盛泽义学，在西庙内，倪兆鹏捐建。乾隆九年，里人姚重英捐资创镇西栅。咸丰九年，王元相凿放生池于其中，学名松陵学舍。

黎川学舍，在染字圩。康熙五十四年，里人陈时夏等创建，周一亩五分，有楼曰凌霄阁，西有学古轩，通谓楔湖书院。

黎川义学，旧在中市大庙内。雍正十年，知县赵轩临即五显堂改建，凡六间。

坛庙祠宇

先农坛，江在东门外位字圩，震在西门外梅里村。雍正六年，奉敕建。

社稷坛，在北门外柳胥圩。即俗称书院基。两邑合祀风、云、雷、雨、山、川、城隍，坛在东门外南湖圩，两邑合祀。

城隍庙，在县治北一里。元明前为昭灵侯庙，祀唐刺史曹王明。《寰宇记》：吴江有曹王庙，即唐太宗十四子也。调露二年¹，授苏州刺史，善飞白鸟迹书。今福善寺额、通元石像皆其迹也。先天二年，敕立祠于松江，殿基下有石盆，尝有黄蛇盘于其上，揭而视之，得大铲、大斧各一。《卢志》：庙在县治东四十步，城隍神也。梁开平三年，淮兵围吴，钱镠祷有应，修之²。以事奏闻，四年，敕封昭灵侯。元符三年，重修立碑。县志：宋元间，俗传侯为城隍，故名城隍庙。元大德三年，改名衍庆昭灵观，而城隍之称如故。明洪武三年，知县孔克忠别建城隍于后湖北³，即今庙。旧庙乃止称昭灵观，后废。县境各乡镇又有庙凡十余处，皆土人所建也。庙建于洪武初，至国朝顺治十五年，敕赐广佑王封号。康熙四年重修，内有共怡园，知县龙铎筑，地隶震泽，两邑合祀。

文昌殿，在邑庙河南、雷祖殿左侧。殿南有文星阁。震在震署内，乾隆二十九年，知县赵德基建，署东南有文昌阁，后移西门外文昌道院。院系西门外赵氏于乾隆初建，道光二十三年，里人董荣椿、费延洪、王□□⁴增建文星阁于东南隅。

刘猛将庙，在县治左侧弄内，祀宋将军刘锐。按：锐相传为名将锜之弟，号扬威，尝封吉祥王。而《宋史》锜传不载。又谓鄜王光世弟，亦无考。惟《六安州志》则又直指为锜，且云：宋理宗四年，以驱蝗示灵异，因加封为神。

太湖庙，俗称松陵庙。在垂虹桥南，祀太湖之神。嘉庆十六年，诏苏、湖二州祭佑民衍泽太湖之神，神姓王，名天英，明之长兴县人。前志云：神即水平王，由来已久，宜仍称松陵庙。

1 调露是唐高宗年号，调露二年为公元680年。

2 《乾隆苏州府志》云“尝再修之”。

3 《乾隆苏州府志》作“孔克中”“后河北”。

4 名字原阙。

按：古水平王旧传后稷庶子，佐禹平水有功，立庙平水岭。宋庆历间，知州胡宿奏列祀典。俗传郁使君，非也。

三高祠，在江南雪滩上。道光末，知县左仁重建。咸丰十年毁。光绪间，吴仁杰等移建西门外文昌道院东南隅之鮎香亭¹。

震镇东岳行宫，在镇西。初建无考。明万历年间重建，国朝嘉庆十三年重修。

震镇文武宫，旧在守贞庵。嘉庆十六年，里人倪唐珠舍泰安桥东地，即倪氏家庵，名圆净。一作延福。

文昌阁，震镇在分水墩。乾隆三十六年建。道光二十年，里人徐学健等重修。平望在小九华禅寺，道光十□²年建。芦墟在东栅水渚中，乾隆十五年，陆氏、郁氏创建，道光二十一年重修。

史忠献公祠，在黄家溪，祀明徐王府宾辅史仲彬。康熙三十五年，总督范承勋题建。

周恭肃公祠，在北塘，祀明吏部尚书周用。天启三年建。

吴孝子祠，在弦歌巷，祀明全孝翁吴璋。万历二十三年建。

沈太常祠，在铁局巷北，祀明户科给事中赠太常寺少卿沈汉。

赵半江祠，在震泽县治前，祀明成化进士江西按察司赵宽。五世孙荫为太湖县守备，明季死于寇难，赐谥节愍，祔祭祠中。

三贤祠，初名爱遗亭，在垂虹桥北，祀明尚宝司少卿叶绅、四川布政司参政吴岩、湖广按察司副使沈岱，乾隆十年重建。

1 《民国吴江县乡土志》作“鮎乡亭”。

2 原阙。

周忠毅公祠，在永定桥东，祀明御史赠太仆寺卿周宗建。崇祯二年敕建。国朝乾隆四年给帑修。

周相国祠，在吴江县治东北，祀明大学士周道登。康熙二十五年，其曾孙缵曾请于巡抚汤斌建。

凌公祠，在黎里上丝圩，祀明太常凌信，嘉庆七年重建。

谢程山分祠，在邑庙西，祀明江西诸生谢文洵。道光八年，裔孙宗素迁居吴江，遂分建。

杨忠节公祠，在芦墟泗洲寺，祀明杨解元廷枢。乾隆九年建。按，邑志称：忠文系门人私谥。乾隆四十一年，赐今谥。

任先贤祠，在同里稻糠圩，祀当阳侯任不齐。乾隆四十九年重修。

金文简公祠，祀兵部尚书金士松。乾隆五十七年建，在下塘街。

周宫傅祠，在黎里，祀工部尚书周元理。乾隆六十年建。

王先儒祠，在墓域之东，祀晓庵先生王锡闾。道光十七年，里人沈润等创建，张履记。

杨观察祠，在积善弄口，祀鄞县知县杨炳春。恤赠道衔。光绪初建。

古迹园第

醉眠亭，在松江，宋李行中无晦建。李本湖人，徙居松江，高尚不仕，以诗酒自娱，治园亭号醉眠，苏辙有《题吴江李行中醉眠亭诗》。

快风阁，在庞山湖滨，旁无邻舍。明万历间，邑绅邀邑侯冯任冯字重夫，慈溪人。载酒泛湖，移舟至此。冯曰：“平湖如镜，远山若黛。若于此建文昌阁，邑中科第不绝矣！”遂捐俸倡建，供文昌其中。阁后有池，池上作桥，以通出入。阁旁建厅事三

间，为游宴地。邑人复建大楼五间，为冯公书院。国朝康熙十八年上元夜，雷雨中火燎无存。

濯缨矶，在澄溪桥畔，与新杭市相近，俗称莲花墩。朱荇村逢源《粉榆谚考》云：“是元人遗迹，水落时，石上见‘濯缨矶’三大字。”又龚耦影昇《送友至武林诗》：“莫辜矶畔水，相待濯缨归。”按，《谚考》无刊本，张鲈士元有《谚考序》，见《嘉树山房集》，然亦非全帙。龚集亦未刊。仲盛志。¹

陈黄门侍郎顾野王宅，在三里桥西，为野王著《玉篇》处。今名顾墟，祠即其宅。初甚卑陋，国朝增建两庑门楼，嘉庆十六年修，周兆基、顾日新有记。

一株松，在唐家湖滨古墓上。墓莫详所自，盖数百年也。大三十围，高百尺，远视成壶形，口鼻皆俱。今即以一株松名其地。按，寄园所载，杨硕甫遇一叟，姓松名来，即此。硕甫归瞿忠宣之丧，虞山素有松仙祠，后遂以硕甫配食焉。翁广平述。按，此树于道光初萎。

松化石，本顾大典谐赏园故物，自括苍移来，肤理鳞拆【坼】，宛如松干，为诸石之冠。园入国朝已毁，石亦倾圮。嘉庆间，裔孙子寿从广东归，移石于邑之文昌宫。子寿首作诗，同人俱和。《玉香阁诗稿注》。

且园，在黎里，上舍陈兆凤所筑，中有耦杏山房等胜。顾汝敬有《且园游记》²。

月湖丙舍，在姚田。赠南昌府通判王梁所筑，有白华堂、深柳书堂等胜，沈德潜记，张鹏翀绘图。

鸭漪亭，自建三贤祠后，袭音称爱遗。嘉庆初，训导沈沾

1 《乾隆盛湖志》云：“濯缨矶，在雁湖东北，与新杭市相近。按，濯缨矶四面皆水，是元人某遗迹，有石刻隶书三大字，没于水涯，水落则见，明万历年筑澄溪桥，取置圯下，今具在焉。后改名莲花墩。”

2 《且园游记》见《嘉庆黎里志》著录。

霖暨兄汝霖、弟邦荣筑别业于祠侧，有怡怡堂、浮玉草堂、养鸭阑、荷池、竹圃诸胜，沾霖自为记。

果堂，在城西濠，征士沈彤所居。

秀野草堂，在唐湖滨，布衣张世炜居。

澹虑园，在平望镇，贡生汪栋筑，李果记。

南村梅圃，在马赋，编修倪师孟别业，张鹏翀绘图。

切问斋，在芦墟，巡抚陆燿所居。

居易堂，在同里，兰州道王曾翼世居。

寺 观

无量禅寺，俗称三天门，在南门外。建置详志。乾隆四十六年，僧际秀重建真武殿，邑人倪万斌等建文星阁，又即天香阁址改建观音殿。自是，宏开梅芳，覲天相继。住持次第修举，创立斋堂，建罗汉殿于殿西。每岁新正十日，张挂吕律所绘十八尊者像。中有香余堂，亦极宏敞。

大悲殿，在北门外大有桥堍。初建无考，殿西素有湖山挹秀阁。道光末，里人俞岳增建袖山楼、姜白石祠。

玉清洞真观，在同里籍字圩。俗称大庙。周十亩余。宋建。明万历初，陈王道修。崇祯初，陈绍文捐饭僧田五十亩，孙承恩筑石岸。国朝乾隆五十六年，建东岳殿，任兆麟记。时有神蛇显异，半体白章，三月乃伏。嘉庆八年，改建雷祖殿。十四年，僧道兴募费重修。

翊灵道院，在北秘圩。俗称北观。乾隆五十年，改关帝殿为消灾殿，增建文武阁。

慈云禅寺，在震泽镇东，周九亩。建于宋。中有浮图五成。或云：吴赤乌中，慈云公主建，高十一丈。一名七井塔。相传初建时土尝坟起，有异人过，命穿其地，得井七而塔成，故名。今三井尚存，一在

寺左偏，一在慈云桥东祠山庙，一在东方丈花台下。见《震泽备志》¹。乾隆五十三年，里人增建钟楼，凿况钵池。道光十六年，周荣等修。

墓 域

晋东曹掾张翰墓，在二十九都南役字圩。按，《屈志》所载，《沈志》驳之²，引《吴地记》及《吴郡续图经》云：张翰葬横山东五里。坟亡，然今弥陀港南役圩上现有祠墓，惟碑文漫漶不可读。张大纯有诗。《分湖小识》。

唐钱王墓，在麻溪口柏字圩。相传吴越王第四子葬处，其地有钱家桥。

游击杨将军墓，在二十八都舍月甲圩，今地名杨坟。邑志作里亦圩，误。《分湖小识》。明万历末，里人沈贞斋去土为田，得石碑，上镌“游击杨公之墓”，周之道有诗。

御史周相墓，在二十九都西房圩。按，《府志》：相字君弼，吴江人。嘉靖八年进士，仕河南参议。《屈志》云：御史巡盐，升陕西副使。《扬州府志》云：周相于嘉靖十年任盐法御史。《分湖小识》。

闺秀叶琼章，字瑶期，一字小鸾，墓在大富圩宝生庵后。按，《湖隐外史》：宝生庵左有一小冢，女史莲侣所葬，年二十

1 《同治苏州府志》著录“《震泽备志》二卷。（《人物续志》作十二卷，误。）”，又云：“沈金渠，字汉甫，少颖悟，善属文，为诸生，有声。继乃肆力于诗，高华典贵，一以新城为宗。著《震泽备志》《乙卯编》以存文献。厥后沈眉寿偕乌程纪磊成《震泽志》，多取资焉。（《震泽志》参《续诗征》）眉寿，字子绥，少孤，秉生母教，狷介力学。所为志计十四卷，谨严具史法，同时为镇志者皆不能及。”

2 《屈志》即屈运隆纂《康熙吴江县志》，《沈志》是指倪师孟、沈彤纂《乾隆吴江县志》。

卒。叶绍袁曾题其圻，予尝过小鸾之墓与莲侣之冢，榛莽荒秽，几于莫辨，惜无人为之表碣。后阅虞部《自撰年谱》载：崇祯十三年十二月二十五日，移世僮、世儻、昭齐、琼章四棺，权厝于宝生庵荷花池之北址。盖此时实未葬也。叶肇昉《榆庄杂录》引证高祖方《邵公日记》：琼章生于万历四十四年三月初八日，歿于崇祯五年十月十一日，年十有七岁。越五十八年，康熙庚午正月十七日，横山公葬无后兄嫂姊侄于大富圩关帝庙后，是日，方邵公同去送葬，琼章坟乃始确。

国朝高士杨艺墓，在雪湖滨羌字圩。

先儒王锡阐墓，在十都镇西后浜，王济志。道光七年，里人倪林、沈眉寿立碣，张履记¹。十七年，巡抚林则徐倡捐重修。

灾异祯祥

宋祥符元年九月，苏州吴江泛溢坏庐。《宋史·五行志》。两浙转运使章祐，一作站。賑恤吴江、海盐、华亭等处，并请蠲田租。人不失所。《松江府志》。

绍圣元年秋，海风害民田。二年夏秋，震。

元符二年冬，水。

大观五年八月，水。

绍兴十三年三月望，大雪盈尺。二十九年，大饥。

元至大元年，水，大饥，賑之，蠲夏税。四年，大水，无秋，賑之，免漕粮四之一。

明洪武元年闰七月，免吴江被灾田租。《太祖本纪》。六年，饥。八年，大旱，免租；十二月，水，賑。

1 “记”字据《道光震泽镇志》补。

永乐五年，大有年。十三年，旱。

宣德七年秋，大有年。十年秋，大有年。

正统二年秋，大有年。四年七月，大风，拔木杀稼。八月，水，溺死男妇甚众。六年秋，大有年。

弘治七年，大水。金尹洪勘灾，向民泣曰：“民伤已尽，可重伤乎？”以全灾上闻，得允。至今谈者德之。《水考》¹。八年夏五月，免秋粮，又免夏税十之三。十月，再赈之。

万历三年九月，水。十二年秋，有年。十四年秋，大有年。十九年夏，大水，溺人数万。秋七月，海溢。二十九年夏，淫雨伤麦。三十一年秋，有年。三十六年，大水，无秋。庄元臣有《浚行苦雨诗》，上巡抚《救荒议》。

崇祯十四年，大旱。诏漕米改兑麦折三分。庄世芳有《忧蝗赋》。十七年夏，大旱。

大清顺治四年，大饥，米石银四两。十年六月，大风雨，海溢，平地水丈余。

康熙元年，岁大稔。二年，夏旱，秋淫雨，下田多淹。三年秋，海溢。四年秋，如之。十二年，豫蠲。十三年，地丁正项银两之半。十六年正月朔，雷。十七年四月，地震，水大。十八年正月朔，震电，夏旱。自五月至八月，飞蝗伤稼。二十六年，大水，秋螟食禾。十一月，诏豫蠲。二十七年，应征钱粮本年未完者亦悉豁免。三十六年正月朔，雷；秋，大水。三十七年七月，大风，拔木，平地水丈余。四十年，大稔，米石银八钱。

雍正元年夏，旱；六月十八夜，星陨，蠲银米有差。十年七月，大风雨，海溢，平地水丈余，岁稔，蒋士潯有《救饥民议》。十二年四月，大雨雹，损麦苗。

1 沈啓《吴江水考》。

乾隆十九年六月，大雨水。二十七年七月，大风雨，积经月，下田尽淹。二十九年正月丁巳，地震；五月己卯，地又震。三十年正月甲寅，地震。五十四年，大水。五十五年十二月壬戌，大雷电。

嘉庆二年，黎里染字圩耆民钱悦文寿一百岁。十年春，里中殷户平糶，张以智有《纪灾诗》。十五年四月初二日，大雷电，雨雹。

道光十六年秋，南至杭州，北至镇江，人家墙壁上一夜之间都书“快行好事”四字，大如斗，不知所由。二十七年十月，地震。

咸丰五年十月辛丑，地震。七年夏，鲜血坠地，皆在屋内，或数点，或一片，色微殷，粘腻而腥；七月，蝗。九年五月，大雨伤禾，田中出虫，名曰稻鳖。

垂虹识小录卷二

汉

庄忌，会稽吴人也。有高节，善词赋，亚于相如。作《哀时命篇》。子助，事具《汉书》本传。按：庄氏后避孝明帝讳，改为严氏。今忌墓在邑西南境烂溪之傍，号为严墓村。郡、邑二志皆误以为助墓。考《嘉兴志》：助墓在郡城天宁寺后，忌墓在嘉兴县新城镇。今助墓在寺后者，碑记尚存，而新城镇之忌墓，莫知其处。以地图考之，严墓在新城镇北仅数里，旧为秀州，则其为忌墓也，明矣。《吴郡志》有严助，颇略。《姑苏志》详而皆不载其父忌，岂以布衣轻于侍中耶？

五代

史惟则，字天问，工八分飞白书。唐以八分名家者四人，惟则与韩择木、蔡有邻、李潮也。其先溧阳人，五代时迁吴江，

历集贤院学士。《钱志·艺能》¹。宋兴，匿平望之堆字小湾。翁《平望志》。墓在吴城下。《图经续纪》。弟怀则，唐末进士。宋兴，曹彬荐，召掌史局，亦工书。后进三品秩，赐绯鱼袋，不受。隐于浮屠，卒谥静究。《韭溪志》²。

宋

谢景温，字师直，皇祐己丑进士，历官权刑部尚书，知郢州，徙知河阳。按，邑志：希深子三：景初、景平、景回。而《宋诗纪事》云：温，绛次子，字师直。则绛有四子矣。姑列此，以俟考。《松陵诗征前编》。

莫大猷，字廷嘉，绮川人。其先世居湖州，号月河莫氏。有名濛者，以工部侍郎使金，不屈。见《一统志》。大猷，绍圣中以荐仕至浙东常平司提干，累赠朝请大夫。子子文。《石湖志》云：子文父宁，赠朝请郎。疑大猷别名宁耳！《猷集》。

1 此乃指钱霭纂《康熙吴江县志续编》。《道光平望志》云：“或问平望诸志与钱霭《续县志》皆有史惟则兄弟列传，今子删之，何也？余按诸志，惟则溧阳人，仕晋为集贤院学士，工八分、飞白二书，唐以八分书名者四人：韩择木、蔡有邻、李潮与惟则也。宋兴，以曹彬荐诏起之，惟则匿平望之堆字小湾。弟怀则，唐末进士，仕集贤院学士，以曹彬荐召掌史局，赐绯鱼袋，进三品秩，不受，隐于浮屠，卒，谥静究。余谓此当是五代时人，与盛唐之史惟则同姓名者，然岂有姓名同、官爵同、书法亦同乎？即皆同矣，而与韩择木四人齐名，仍是盛唐之史惟则也。如果即盛唐之史惟则，至宋初尚存，已有二百余岁矣，此必无之事也，其谬本不待辨，但不知此说何自而来。又考《宋史》，曹彬平蜀回，太祖询官吏善否？对曰：‘军旅之外，非臣所闻也。’固问，始荐随军转运使沈伦廉谨可任。则知彬不敢以荐人为己责矣，兹惟则兄弟皆云以曹彬荐则尤谬也。”

2 《光绪平望续志》著录作“《韭溪志稿》，秦廷宝撰”。《同治苏州府志》云：“秦廷宝，字秋原，诸生，家韭溪。咸丰庚申，贼既陷县城，同时吴江之同里镇、黎里镇并举团练，皆相持数十日。韭溪地尤僻，农夫数百家，唯秦氏世读书。廷宝率其乡人为守御计，曾杀贼八、贼酋一，夺旗一。至五月十日，贼来众，乡人皆溃，廷宝受重伤投水死。”

盛文韶，字景声，一字景成。绍定己丑进士，官上饶知县。殷增《诗征前编》。

孙锐，字颖叔，咸淳七年举于乡。宋亡，遂不复出，隐居平望之桑盘村，有林泉之胜，时时赋诗寓意。今所传者，有《耕闲集》，盖宋之遗民也。《猷集》。

赵时远，字无近。一作无逸。号渐磐野老。隐居平望之桑盘，与孙进士耕闲为莫逆交，工诗，兼善小画。同上。

柏深山，盛泽人。今白漾湖滨有百嘉桥，旧名终慕，系深山于宋季承亲未竟之志而建。邑志《孝友传》未载。本仲孙机《盛湖志》。

元

庞朴，字夷简。其先单州人，高祖谦孺，官太常博士。宋南渡，游寓湖州时，邸戚竞寓骚扰，移居松陵。朴少负才名，贾似道聘为西席，不赴。锢不得试。元兴，诏征为翰林院修撰，奉敕修辽、宋、金三史。同官多北人，欲统金附宋。朴曰：“昔曹魏不附蜀汉，元魏不附齐梁，此《纲目》所以重大统也。今元继宋统，近接汉唐，远追三代，若承金统，近接辽矣。辽以上，无可继者。”总裁脱脱不从，遂解组归。郑元庆《湖录》。

陈和甫，失其名。吴骥《蒙庵集》曰：“予观松陵陈氏所藏《先世孝行卷》，为之感叹不已。盖其先和甫处士以孝闻于乡，在元延祐中，慈母患风疾，不能言走，四方求医莫治，遂刲股为糜以奉之，复祷于神，精诚所感，疾遂愈。父客燕京，疾笃，处士驰往，吁天乞以身代。其卒也，徒步数千里，函骨归葬。缙绅之士，咸嘉其孝行，形诸歌咏，名声籍籍，惜无当路之援，竟弗沾一命之禄以卒。然自延祐丁巳以至于今，彼公卿达官之贵且富，非不炫耀于当时，苟无忠孝以垂于后，则其身名俱

丧，不啻炤朽而焯灭矣。今陈氏由和甫而下，累叶相承，至云孙宗明昆季三人，才行卓然，能世守先业。天佑善人，信夫！《猷集·孝义》。

徐仁荣，字德刚，秋泽村人。宋阁门宣赞舍人应勤之子。至元二十一年，辟授崇德州学正，重建庙学，擢翰林国史编修。致仕，徙居嘉兴之新溪，卒年六十。《猷集》。

王朝臣，字熊翁，盛泽人。泰定甲子进士，官太子司经。《诗征前编》，下三人同。

陆居仁，字信卿，至顺辛未举于乡。

潘如珪，字琰之，至顺辛未举于乡。至正辛巳再举。按，钱舞丹曰：元制，举人会试不试录者不入官。再试于乡，是科温林第一，朱公迁以二十八名殿榜中间，孔暘、王仲文、高禄卿、潘如珪四人皆再举。

奚士龙，吴江州人。至正二十四年，见吴学鼎新，慕义割私田九十亩有奇，归学以供饷廩。《猷集·孝义》本杨循吉《纪略》。

叶齐贤；《诗征前编》，下四人同。钟虞，字安期；顾逊；朱斌，字文质，号存吾，至正癸巳举于乡。

周德，字峻德，号寿一。先世山阴人，元季婿于烂溪张氏，因家焉。五传至恭肃公用，以进士起家，遂为松陵望族。

明

薛穆，字公远，号淡园。博学工诗文，善楷书，尤精墨竹。洪武初，以人材授柳州州判，卒于官。《诗征前编》。

华幼武，字彦清。工诗，有《黄杨集》。始居无锡，以贵雄于乡，其后宅毁于火，迁居吴江，吟咏不废。当明之季，富户类多徙濠。幼武独以《上中山王诗》得免于祸。《静志居诗话》。

徐衍，字仲易。洪武己未，以人材荐授工部主事。有《仲易诗钞》。《诗征前编》。

崔远，字永年。洪武间，以人材官安福县丞。同上。

徐民望，字南溪，周庄人。洪武初，沈万三因事被逮，多所株连，人情汹惧，谓欲诛尽贞丰居者。南溪奋然欲拯此一方民，不避铁钺，叩阍哀请。太祖嘉其志，温旨慰劳，赐玺书五字云“尔是好百姓”，民得以全。由是世为粮长。《贞丰志》¹。

葛德昭，二十九都人。洪武中，以人材授刑部员外郎，与同官十七人俱上章辞禄。弟德润，与沈万三连婚姻。是时“四葛”“四沈”名驰江左。子芳，亦以人材授礼部员外郎，后皆坐党祸死。《献集》。

沈贵，字仲华，人以万三之弟，故称万四。初居东垞，继迁白蚬江滨之黄墩港，属吴江县。贵不事生产，曾作诗讽其兄云：“锦衣玉食非为福，檀板金樽可罢休。底事子孙长久计，瓦盆盛酒木棉裘。”后隐终南山，不知所终。《周庄志》。

徐正，字惟中，世居镇西吴江县之江泽村。据《徐氏族谱》载：中山王弟孟清之玄孙。正统六年辛酉举人，七年壬戌进士，与韩襄毅公雍乡榜同年，甚相契合。官至刑科给事中。英宗北狩，正主丧君有君之议，与王文等谋立景帝。迨上皇夺门复位，与于忠肃公谦等同被害。同上。

马忠，字克诚。景泰二年，以贡为高州府通判。时境内多事，忠在戎马间颇有劳绩。致仕归，进阶奉议大夫。有司举行乡饮礼，忠在宾位二十余年。弘治末卒，年九十四。《献集》。

王贵，字玉川，元太子司经朝臣曾孙。天顺七年癸未，由人才荐举通经官、左春坊司谏。性端直凝重，不为权贵所右，九载不迁。归田后杜门息影，益肆力濂洛关闽之学。为诗文，

1 即章腾龙撰《贞丰拟乘》。

多关涉世教。教人平易切实，随事指点。尝谓人曰：“鸚鵡以舌受羈，木铎以舌自毀。口舌之为祸不一。”或问佛家生死轮回，公曰：“祖宗即是前身，子孙即是后世。”居家淡泊寡营，惟以读书勉其二子。著有《玉川书塾问答》二十卷行世。《盛湖诗萃》。

庞鏞，字汝声。性好施予。成化十七年，邑中大水，鏞出粟千斛赈之。弘治五年，又水，复出粟二千斛赈之。抚按嘉其好义不倦，以事闻，命有司榜其门曰“旌义”，复其家。《猷集·孝义》。

夏诚，字纯夫，吴江人，锦衣卫籍。正德间，中顺天府乡试，任武城县令，爱民甚笃，因忤上司，遂归老于家。旧民到京者，怀其德惠，怜其清苦，莫不以财帛助之。垂老得子。后有继其政者，甚丰敛，县民于途中劫之，子女至被害。《松塵燕谈》¹。

钱卿，字廷佐。正德己卯举人。周白川曰：“居士弱不胜衣，而操笔缀文，千言立就。”家无费而轻予好施，士大夫之道出平望者，投刺谒见，设餐授馆，无倦色焉。《诗征前编》。

严仁，字子春。明自嘉靖以前，役务烦重，吴江尤甚。仁承役不避，知县喻礼重之。每遇歉岁，出粟贷乡农，弗计偿否。晚年居陈湖滨。文徵明、陈淳辈乐与之游。其歿也，徐师曾为之铭。任兆麟《续志稿》²。

赵祚，字敬延，号东川。嘉靖甲午举人。有《东川集》。

周式南，字仲翰，尚书用三子。嘉靖戊午举人。刚直不阿，以高才负望，为墨吏易可久所齟齬，赍志以没。以孙宗建官御史，疏白祖冤。崇禎元年，孝节先生伏阙请全恤，得以忠毅公

1 《同治苏州府志》作“吴元相《松塵闲谈》三十卷”，本志在别处亦作“《松塵闲谈》”。“闲”“燕”在吴方言中音近，当据正。下同。

2 即《江震续志稿》。

赠官，追赠太仆寺卿。著有《夷贞集》。

王锡命，字天宇，号文泉，盛泽人。嘉靖壬戌进士，历官江西右参议，年三十六即乞终养归。平生折节下人，不谈人过。性好吟咏，冬夏一编，杜门不出者三十余年，年七十卒。有《葆光阁集》。

张朴，隆万间高士，工画，颇能诗。居梅里村，地多梅花。邑令徐公元尝看梅来访，屏驺从，倾壶觞，日暮，列炬前导，人折花一枝以归。茂宰风流，升平盛事，今不可复睹矣。《愚庵小集》。

张尚友，字益之，基之子。为诸生，精《春秋》之学，事父纯孝，尤以气节自励。张居正夺情，詈且沮者竟夕。为文疏通尔雅，有唐宋大家风。所著《存笥集》，钱谦益为序。子世俊，字孟舒，为人孝友狷洁。周顺昌逮系，出入橐篋无所避，人尤难之。《牧斋初学集》。

周应偁，字声仲，号起白，尚书用曾孙。万历辛丑进士，官宜春县知县，治尚清肃，片言决狱，绅不敢干以私。会入覲，途遭悍仆酖毒而死，家难内讧，几有覆巢取子之恐。公子文衡，孝廉，始收拾公之诗文刻之，曰《摭芳圃集》。《诗征前编》。

宁祖武，字仲先，有《迂公诗草》。按：仲先昆弟三人，伯绳武，万历癸丑进士，官大理评事；季接武，字穉先，万历戊午副榜，考授通判；仲先则布衣蔬食，以诗史自娱，不乐仕进。《诗综》以季之官移于仲，谬也。《诗征前编》。

王顺扬，字敬怀，号恭斋，国学生，左春坊司谏贵孙。性慷慨，兄商于淮，遭窃千金，恐贻父忧，如数偿之。万历庚申，岁饥，邑宰派令平糶，公以东南一隅自任，使诸圩自举公正数人，给以信筹，十户以一人为保，十保以一人为总保，每总各具一册，设厂充字圩，凡两月，称颂者无异词。邑宰晏公清上其事，部议优叙，授七品冠带。生平耽于诗，有《潇洒独吟

编》，文相国震孟为之序而行之。《盛湖诗萃》。

潘凯，字岂凡，号仲和，检讨耒父。敦内行，工诗文，究心经世之略，为诸生，连试第一，与于复社，娄东张受先、德清章日炯亟赏之。章以女归凯，既而知吴江县事，凯深自退匿，未尝干以私。惟于清赋额、疏水道，事关民利害，则建白行之。明亡，弃诸生不出以终。著有《平望志》《本草类方贻全》。《松麈燕谈》本《曝书亭集》。

杨桢，字贞木，号湘云。博学，工古文辞，常言：“平望一隅之地，川原风物，皆堪纪载。前辈如陈克礼、曹孚相继辑志，惜乎不传。”于是奋志纂辑，设局于悟珠庵。综核故实则潘凯任之，采访则史册、赵秉彝，订补则沈潜，校书则李云。取裁《姑苏志》，莫、徐二邑志，以至《图经》、子史、断碣残碑，靡不孜孜搜剔，凡再阅寒暑而成，识者称善焉。

钱可，字无可，诸生，尝馆于唐藩，以试事入都，遂与汤俊民友善。归而进俊所作于王，王深嘉赏，即聘俊民为其弟晋师。后俊民为陈督府某书记，从征流寇，卒于三原路次。先生亦归，家居以老。《诗征前编》。

陈绍祉，字孝将，号耐庵，新乡令鸿孙。诸生，交游皆天下名士。世居城东之仙里桥，遭乱后，隐于乡，地名方尖。其内兄鞠通生作《古轮台》一阕，以方壶为咏赠之。性好种菊，有柴桑之高致。沈启文撰传。

汤德新，字云山，号勉斋，诸生，宁曾孙，礼部儒士。为人正直，有古君子风。博综经史，识古今成败，兼阅历世务，料事多中。晚岁杜门习静，如深山枯衲，与世相忘，年八十余卒。《盛湖诗萃》。

史坤生，吴江人。举义黎里，后被收。营帅见其左腕刺“尽忠报国”字，因杀之。彭孙贻《甲申亡臣录》。

钱昌，字继升¹，居保障港。崇祯八年拔贡，授通判，不就。是时天下多盗，而含山盗最桀恶。昌家饶于财，一日有二人踵门，云：“奉主命贷银数千两，必得以返。”询之，乃含山所遣也。昌劳以酒食，好言慰之，曰：“银不能卒备，幸缓数日，当赍至山中。”其人约期而去，昌念曰：“盗无饜时，不如以家之有募士守御，庶几全吾乡里。”因具状请于官，得便宜从事，乃立格募兵。岁方饥，闻者先后至。家有大木仆地，昌言于众曰：“能举此木者几？”未几，有崇明武生黄扶摇等四人至，皆黄姓，号曰“四黄”，遂令训练曹伍，里人吴彦康等亦别集丁壮自卫，皆听昌指麾。含山盗恶昌负约，率其党至，钲鼓喧阗，若甚可畏者。里中武生皆持兵，彀弓指之，盗惶骇，诡云：“吾曹欲往木渎取粮，不过假道贵邑，何纷纷为？”昌使谓之曰：“尔既无意侵掠，何不藏尔兵器？”盗不得已，举兵器敛之。昌纵兵奋击，盗歼焉。久之，盗有沈胖者，乘大舟，拥黄盖，驻野泓荡，声言欲为含山盗报讎。昌兵少，力不敌。时职方主事吴公易以两都失守，倡义起兵，有众数千人。因抵职方，借兵与舟师二百，而黄扶摇等率之以归。昌侦胖船设炮，患之。遣人伪乞丐，至丐食，潜以盐卤滴炮中。及胖发炮，皆不起。昌用炮坏其船，遂获胖。先是，扶摇献计，谓来必乘舟，舟必蔽以苇席。若用棉附箬，而灼膏射之，则糜烂矣。从之，于是盗船尽焚，烟焰四起。李膏药者，胖党之勇也。昌与搏战，几殆。有许某，斩膏药，遂悬其首溪桥。昌乃徐讯所获诸盗，杀其素为盗者，赦其胁从者。顷之，盗复夜入里中，不遂。自是，不复至。闽藩闻昌名，使以礼聘，昌谢不往，而吴职方败走。大兵购之急，迹及昌，昌与吴彦康皆被逮。提督吴某再

1 《乾隆苏州府志》作“季升，嘉兴学，九年拔贡”。《乾隆震泽县志》作“字季升，北麻人，嘉兴籍”。

三诘问，昌有辞得免，并彦康亦免。昌与弟威，皆能文。威自有传。丁酉榜祸，威与吴兆騫同谪宁古，昌亦牵连，至京师，病卒。《嘉树山房文集》。

仲时锁，字孺育，盛泽人。乙酉兵至，执令薙发，示以刃曰：“此发受诸父母，岂可断乎？”遂被戕。同时有邵世俊，邑诸生，好习武，命其弟世定奉母避乡间，挺身出斗，死之。仲盛志。

翁逊，字仲谦，一字研石，居城西门外。性高洁独行，一意岁俭，不能糊口，终日啜水而已。或招之食，谢不赴。尝曰：“耐饥易，耐俗子难。”惟徐介白、顾茂伦饷之方受。好吟咏，所居湖浦草堂近江枫庵，与诗僧指月善。没后，指月藏其遗稿，茂伦卖古琴殓之。《诗征》。

杜熙揆，字子亮，号端丞，伟孙，诸生。以高材雅望推重一时。乱后，隐居浚溪，绝迹城市，种柳若柴桑，而无待于乞食；诵经若鲁望，而不至于忍饥。斯可为隐士法矣。《诗征前编》。

列女

萧兰徽，史鉴副室，黎里人宗女。柔婉，精女红，事舅姑及女君无违礼。鉴家毁于火，氏拮据摄内事十有八年，卒，鉴为作传。

崔孝妇，乌程黄庭畹女。十五失母，执礼如贤丈夫。十七嫁吴江崔文友，舅姑皆称其孝。姑疫将死，窃割股肉和药，姑饮讫即愈。越五日，其子澄始知之而哭。孝妇掩其口曰：“此非合理事，毋使人知。”他日，姑死，妇哭失音不能言，累月始复。孝妇父母墓地为贵家所夺，力不能抗，营地迁葬，遂幽愤死。年四十九。祝允明述。

沈媛，字文淑，瓚女，适周应愿子、诸生邦鼎，有《挽甥女

叶昭齐琼章诗》。媛女周兰秀，字弱英，亦工诗。《诗萃》。

沈兰英，诸生浚源女，适卜舜年。工诗善书。孀居后，曾寓虎丘，葬夫于上方山。值世乱，旋里。所著诗册散佚不存，年七十三卒。《百城烟水》。

范氏，孝廉吴邦相妾，年二十四主卒，氏抚孤守节，历尽艰苦，教子焕成万历丙辰进士。崇祯改元，焕请于朝，建坊孝子祠北，封太孺人，卒年六十有九。

柳是，本姓杨名爱。字如是，一字靡芜，自号河东君，居盛泽归家院。丰姿逸丽，工诗，作画得褚薛法。崇祯戊辰，昌言曰：“吾非才学如钱牧斋者不嫁。”庚申冬，学士筑“我闻室”以迎之，号河东君。尝衣儒服，与宾客谈论，学士呼为柳儒士。生一女，嫁毗陵赵氏。及学士故家衅起，柳以一死全其家。《诗萃》。

徐佛，原名翻。字云翻，小字阿佛。性敏慧，能琴工诗，善兰柳。如是尝师之。由嘉禾随其母居盛泽归家院，四方名流扁舟过访，无不倡酬。尝作《秋怨诗》以寓意，后归烂溪周某。周爱其妩媚，呼为欢喜佛。未几，周卒，遂削发为尼。《盛湖诗萃》。

张倩倩，沈君庸妻，为宜修之姑之女，美而慧，无子女，乃女宜修之季女小鸾教育之。年三十四卒。工诗词，作且弃去，小鸾记忆其数首。宜修为作传，诗即附传中。

李玉照，君庸继室，亦能诗。年二十五，夫亡，守节三十八年。康熙十八年卒。以上二则本《古夫于亭杂录》及省志。

董如兰，字畹仙，孙志儒妻。工吟咏，有《安素斋稿》。《诗征》。

汝氏，可起女，适诸生李森。二十夫亡，抚嗣子教之成立，孝养翁姑，守节三十余年。康熙四年卒。

张氏，赠待诏基从孙女，朱继儒妻。崇祯己巳，年二十五，

朱客死，无子，张抚伯子虹为后，日夜事纺绩刀尺，遣虹就学。迨虹举癸卯乡试，而张勤劬犹故。康熙乙卯卒，年七十一。

吴炎妻张氏，偕其子发遣就道，至京师齐化门，仰药自杀，时康熙二年。

包抡妻朱氏，乙酉八月，抡死于兵，朱年二十九，抚二女一侄，纺绩自给，苦守三十七年，康熙二十年卒。

王杯存子熙彦，方议聘简村陈氏女，遽卒，女誓死守志，卒于家。

叶舒崇女，适教谕金之璜。康熙五十五年，之璜卒于署，叶扶柩归葬毕，自经死。

皇甫贞姑，嫁月余，夫疾笃，姑吁天求代。夫死逾年，绝食而卒。宗族以贞姑称之。

香娘，吴易妾，艳于姿，工诗。日生殉节，为官军所获，求死不得。主者欲收充下陈，香娘泣曰：“我相公每饭不忘故君，妾何忍负之？必欲见辱，有死而已！”主者肃然，不忍加以刃，遂听其所之。入一草庵，削发洁身，老于柳胥故里。《南叠绎史》。

旧 事

晋

谢邈之为吴兴郡，帐下给使邹览，乘樵船在部伍后。至平望亭，夜风雨，前部伍顿住。览露船无所庇宿，顾见塘下有人家灯火，便往投之。至，有一茆屋中有男子，年可五十，夜织蒲。别床小儿，年十岁。览求寄宿，此人欣然相许。小儿啼泣欷歔，此人谕止之，不住。览问：“何意？”曰：“是仆儿，其母当嫁，悲恋故啼。”将晓，览去，顾视不见向屋，惟有两冢。行

逢一女子乘船，谓览曰：“此中非人所行，君何故从中出？”览具以昨夜所见事告之。女曰：“此吾儿。实欲改适，故来辞墓。”因至冢号咷，不复嫁。《录异传》。

范正传，字西老，顺阳人，进士。唐元和四年，刺史湖州。时官河从平望驿至吴县界，淤塞，舟不能行。正传疏请凿开，民称惠利。《湖州府志》。

大历初，李处士籛秋游龙宫，闻《芷秀药华》之词，志载此曲，世已不传，明高启曾戏为补之。按，乌程闵声亦载此事，中有《芷秀药华》，原词曰：“芷秀兮药华，若有人兮江之涯。载荃桡兮维桂楫，骖蜺轡兮曳蚪车。朝涉余兮洞庭，夕整驾兮若耶。采蘅杜兮寄远，指湘水兮为家。鼉宫兮贝阙，蹇将留兮心恍惚。捐琼佩兮宝璐，遗明珠兮海月。降帝子兮下湘娥，吹参差兮扬素波。扬素波兮何极，渺思君兮无聊。”

吴郡沈元愴、沈杰等，以兵围苏州，刺史皇甫绩频战不利，杨素率众援之。元愴势迫，投南沙贼帅陆孟孙，素击孟孙于松江，大破之，擒孟孙、元愴。《北史·杨素传》。

三高亭，范蠡居首。有人弹之云：“吴江三高，即越之范蠡、晋张翰、唐陆龟蒙也。范蠡，越则谋臣，吴为仇敌，假扁舟五湖之名，居笠泽三高之首，况当无边胜地之上，著此不共戴天之雠，其视菰菜莼羹、敝屣名爵、笔床茶灶、短棹江湖者，岂容与之并驾临风、联镳钓雪耶？”刘清轩诗云：“可笑吴痴忘越憾，却夸范蠡作三高。”宋陈郁《话腴》¹。

治平中，钱忠道过吴江，爱其风物清佳，留恋不能去，终

1 书名全称“《藏一话腴》”。《四库提要》载：“郁字仲文，号藏一，临川人。理宗朝充缉熙殿应制，又充东宫讲堂掌书。始末略见其子世崇《随隐漫录》中。世崇载度宗尝赞郁像，有‘文窥西汉、诗到盛唐’之语，宠奖甚至。岳珂序称其闭户终日，穷讨编籍，足不蹈毁誉之域，身不登权势之门。然刘埙《隐居通议》有度宗御札跋，惜其下访陈郁父子之卑陋。”

日讽咏游赏。遇一小女子，小舟独棹于烟波浩渺间，忠悦之，作诗赠女子，其警句云：“满目生涯千顷浪，全家衣食一纶竿。”女得诗，携归，呈其父，盖隐沦客也。喜忠此诗，遂以女子奉忠箕帚，泛舟同入烟波，不知所终。《青琐集》。

宋

张文潜之父，尝任三司检法官，以亲老求知吴江县。将之官，名公多作诗送行，而吴正悉、王中甫较工。吴诗云：“全吴风景好，之子去弦歌。夜犬惊宵少，秋鲈饷客多。县楼疑海蜃，衙鼓答江鼉。遥想晨凫下，长桥正绿波。”王诗云：“乍被轩綏宠，新辞计省繁。三江吴故国，百里汉郎官。烟水莼芽紫，霜天橘颗丹。优游民政外，风月即清欢。”张文潜《明道杂志》。沈彤云：“文潜父知吴江，旧阙。”

陈尧佐在吴江，有诗云：“平波渺渺烟苍苍，菰蒲才熟杨柳黄。扁舟系岸不忍去，秋风斜日鲈鱼香。”晋陵蒋仲舒《尧山堂外纪》。张文潜云：“陈文惠‘西风斜日鲈鱼香’，当用‘乡’字。”《松江诗话》云：“鱼虽不香，莼以姜橙，往往馨香远闻。故东坡云‘小船烧薤捣香蠹’，李巽伯诗云‘香蠹何处煮鲈鱼’，‘乡’作‘香’，未为非也。”余谓作者正不必如是之泥。刘梦得诗曰：“湖鱼香胜肉”，孰谓鱼不当言香耶？但此“鲈鱼香”云者，谓八九月鲈鱼肥美之时节气味耳，非必指鱼之馨香也。张右史之说既已失，而周知和复强引苏、李二诗，且谓“莼以姜橙，往往远闻”，亦谬。“鲈鱼香”比之“鲈鱼乡”，更有神韵，与识者参之。宋王楙《野客丛书》。

松江鲈鱼，长桥南所出者四腮，天生脍材也。味美肉紧，切下终日，色不变。桥北近昆山，大江入海，所出者三腮，味带咸，肉稍慢，迥不及松江所出。宋孔平仲《谈苑》。

杜诗云：“黄鸟时兼白鸟飞”，黄鸟，莺也。白鸟，鹭也。

见《诗》“振鹭”注：“蚊亦名白鸟。”《月令》：“仲春之月，群鸟养羞”，注：“白鸟，谓蚊蚋。”又《金楼子》：“齐桓寝，谓仲父曰：‘一物失所，寡人悒悒。白鸟营营，饥而未食。’遂开翠纱之幪，进之。”东坡云：“不怕飞蚊如立豹”，又《随白鸟过垂虹诗话》引前证，谓：“白鸟为蚊，因吴江多蚊耳，不知正谓鹭也。上句云飞蚊，何用更说。”宋桐乡朱翌新仲《猗觉寮杂记》。

吴江长桥焚于庚戌之岁。绍兴四年甲寅，新桥复成，县令杨同谋新之。始未尝委一吏料一夫，但命十僧分干。始谋兴工，亦俾诸僧分谕上户，往往出赀为助。震泽王闾、朱勗之党，乃积逋数千缗，连券百纸，请同自督之。同笑曰：“此逋，岂可督也！”徐命闾坐，取火焚其券。同以台疏，言扰民罢此。闾噤之。张端义《贵耳录》¹。

宋时有特奏名者，开宝中，诏礼部阅进士及十五举尝终场者，赐本科出身，谓之恩科。淳祐中，邑之同里有魏汝贤为特奏名状元，人不知特奏之义，谓为副榜者，非也。《同里志》本袁栋《书隐丛说》。

乾道六年六月八日，雨霁，极凉，如深秋。遇顺风，舟人始张帆。过合路，居人繁夥，卖鲈者甚众。道旁多军中牧马，运河水泛滥，高于近村地至数尺。多岸皆车出积水，妇人儿童竭作，亦或用牛。妇人足踏水车，手犹绩麻不置。过平望，大风暴雨，舟中尽湿。少顷，霁，止宿八尺，闻行舟有覆溺者。小舟扣舷卖鱼，颇贱。蚊如蜂虿，可畏。九日，晴而风，舟人惩昨日狼狈，不敢解舟，日高方行。自至崇德，行大泽中，至

1 宋代笔记集，台湾商务印书馆 1983 年出版的《文渊阁四库全书》本作“《贵耳集》”。作者张端义（1179—1248 后），字正夫，自号荃翁。原籍郑州，居苏州。端平元年至三年间（1234~1236）应诏上三书，得罪，被谪韶州。少读书，兼习技击。工于诗，近于江湖诗派。《贵耳集》共三集，多记朝廷轶事，兼及诗话，亦有考证数条。有关诗人、文人的评述约一百则，占全书的十分之四。

此始望见震泽远山。午间，至吴江县，渡松江，风极静。癯庵竹树益茂，而主人死。知县右承议郎管锐¹、尉右迪功郎周邛来。县治有石刻曾父清公《渔具畷诗》，前知县事柳楹所刻也。《渔具》比《松江倡和集》所载，又增十事云。托周尉招医郑瑞诚，为统、绌诊脉，皆病暑也。市中卖鱼鲈颇珍贵。晚，解舟中流，回望长桥层塔，烟波渺然，真若图画。宿尹山桥，登桥玩月。陆游《入蜀记》按：游通判夔州，入蜀经此。

王荆公《送人宰吴江诗》曰：“当知耕牧地，往往茭蒲青。三江断其二，涪水何由宁。”皆吾东南之人所不可不知者。明叶盛《水东日记》。

近岁浙右涪²水，田野流离可念。震泽小寺壁间一诗云：“民力久已竭，天乎不见怜。三年两遭水，十室九无烟。田没官征赋，家贫子卖钱。秋风江上路，忍见渡头船。”周密《浩然斋雅谈》。

完颜亮窥江之时，步师李捧建谋欲断吴江长桥，以扼奔突。时洪景伯知平江，以为无益，奏止之。德祐之际，朝臣亦建议断桥于吴江者，又断北关之板桥者。呜呼！疾已入于膏肓，且投肤革之剂，亦只取识者之笑耳，尚忍言哉。周密《癸辛杂识》。

吴江长桥七十二碁，作桥者僧从雅，总其役，崇敬率众，以给其费。居士姚行独任劳以终事，经始于泰定乙丑二年二月，期年而成。后九年，州守的斤海牙作巨阁，奉观音像于上。《辍耕录》。

予尝见《落水兰亭》一卷，乃五字不损本。今吴中分湖陆氏所藏，而赵彝斋之物也。彝斋，宋宗室子，讳孟坚，字子固，

1 《入蜀记》作“管锐”。

2 涪，古同“荐”，再，屡次，接连。

居嘉兴之广戍。此帖本姜白石旧藏，后归霁川俞寿翁。彝斋从寿翁易得，喜甚，乘夜返棹，至升山，大风覆舟。彝斋浅水中手持此帖示人曰：“兰亭在此，馀不足介吾意！”因题八字云：“性命可轻，至宝是保。”同上。吴元相云：按此则《落水兰亭》在元以来为吾邑旧物。

张士诚据平江路，筑城平望，欲窥嘉兴。元以杨完者守之，士诚兵屡败，不敢逾平望。完者之功居多。后以他将易之，嘉兴遂失守。《嘉兴志》。

洪武六年，郡守魏观修孔子庙学，吴、长洲、昆山、吴江四县好义者助其役，而吴江独多。大成殿、两长廊、灵星门，葛德润葺；明伦堂、两庑、六斋、前门，宁璇葺；尊经阁、先贤诸祠，桥亭庖湢之属，吴江令许茂郡县志表作“庄”。率李庾等八士葺。灵星门之前，旧为吴江宁开园，势蹙迫。开以其地六百尺尽归文庙，因得辟门于前，以临南衢正地势焉。《宋学士集》。

松陵驿丞郑温，因明初设制科，凡九流杂职暨僧道俱得与宾兴¹之典。正统壬戌中式，联捷春闱。《尧山堂外纪》。按：郑温，丰城人，正统六年任松陵驿丞。

松陵驿丞甘某，洗马江朝宗之婿，刻私印曰“翰林东床”。时有桂廷珪者，尝馆锦衣门达家，印曰“锦衣西席”，一时传笑以为的对。《琅琊漫抄》。

穆素徽者，名妓也。初暱吴门袁箏庵于令，后从吴江沈同和，皆赵鸣阳为之牵合，故袁銜之著《西楼记传奇》以讥沈、赵，而沈亦作《望湖亭传奇》嘲之。所称袁麻子者，箏庵面麻

1 宾兴，周代举贤之法。谓乡大夫自乡小学荐举贤能而宾礼之，以升入国学。科举时代，指地方官设宴招待应举之士，亦指乡试。

故也。袁因此事上闻，褫衣衿¹。顺治乙酉，苏常绅士投诚者，倩袁作表赍呈，因得议叙为荆州守，不问府事。有监司语之曰：“闻公署中有三声：弈棋声、唱曲声、骰子声。”袁曰：“闻明公署中亦有三声：天平声、算盘声、板子声。”监司大怒，揭参²曰：“大有晋人风度，绝无汉官威仪。”由是落职。箠庵极工词曲，所著传奇有《金锁记》《长生乐》《玉麟符瑞》等名。顾畴【丹】³五《笔记》。西楼在西门外西濠之末，即大杏树左侧，予外家叶氏曾居之。乾隆间，楼毁于火。吴元相《松麈闲谈》。

天启丁卯十月大水，太湖中浮一巨木，里人神之，即为梅里创为庵，以奉刘猛将。度之正可得一殿具，凡四柱三梁，俱析巨木为之，故皆方。其余析木作窗户檐扉，无一杂木，因名曰独木庵。《百城烟水》。

某氏顺治乙酉八月为盗所掳，过吴江震泽镇时，镇民持砖石、登底定桥，欲击贼，而见氏系于舟，相顾不忍下。氏大呼曰：“公等何不急击？”于是砖石齐发，氏与贼俱糜烂死。吴江徐崧吊之曰：“妾身誓不同匪类，兵燹堆中促战声。但愿眼中看贼死，妾虽粉骨也如生。”《浙江通志》。

顺治间，开浚浮玉洲桥下，得石井栏一，上镌“永和四年”字。《书隐丛说》。

吾邑庞山湖莼菜最胜。三四月，鲈鱼虽不四腮，落花时，味极肥美。析脍作莼羹，别有风味。至秋，则无取也。张季鹰之言，本托辞耳。康熙三十八年，圣祖南巡至吴江，有吴县邹毅仁宏志居东洞庭，其祖舜五，万历间倩张君度绘《湖中采莼图》，陈眉公继儒、葛震甫一龙诸人作诗咏之。宏志种莼四盎，

1 褫衣廷杖是古代的一种刑法，是指脱掉犯人的衣服，用一个一头扁一头圆的棍子，在大厅之下责打。在明朝时使用居多。衿，古代衣服的交领。

2 揭参，弹劾。

3 据《民国吴县志》改。

作《贡莼诗》二十首，并舜五《采莼图》走献行在。上命还其图，收莼送畅春园，令宏志入书馆。书成，授山西岳阳县，时目为莼官。《松麈燕谈》。

乾隆壬午春，有人于分湖获一小鼎，其质磁也，其色如玉，径三寸许，有世所传八仙于其上，其人重之，藏家庙中。久之，忽闻室中有声，清泠彻耳，殊非箫管笙簧比，举家惊异，徐而察之，则声自鼎出。于是，益加珍重焉。无何，若人之妇遽疾，问于术者，乃言：“尔家必有神物。”归语诸妇，妇曰：“是不祥物，盍弃之？毋以是为我累！”因将八仙悉皆剥落，音乐之声由是寂然，而妇病亦适愈。时池亭叶华川曾作《分湖小鼎歌》以纪其事。《文竹山房诗稿小序》¹。

邑庙西费氏一婢，携小主嬉门外，忽失帽所缀珠。主妇诘之，婢无以对，遍觅无踪。主妇捉杖指詈之，婢恐捱楚，逃入庙内宫中，匿门下。夜将半，见卫侍灯烛辉煌，导城隍至门，启而入，卫侍退去，婢恐，不敢声。无何，闻宫内问：“何外有生人气？”夫人对：“无他，此西邻费姓婢匿此也。”俄门复启，一女侍出，呼卫卒传城隍令：“检索费姓遗珠。”须臾来白：“右邻某家母鸡食之，尚在肠内，未坏也。”女侍随扃门入闾，城隍笑曰：“婢但不谨耳，非婢之罪也。”婢历历听之。天既曙，婢趋至家。主妇怒未息，婢告所闻，主妇不信，左右请验之，即向邻索鸡，掺割之，珠果在也。此事长老常言之，故录之。《雨窗述闻》²。

叶鹤舟进士逢金未第时，尝于秋初游虎丘，月明人静，独步上山，坐千人石上。有顷，一女子冉冉从剑池中出，古装珊珊，心知为鬼。女近前，相去丈许，复退，如是者三。鹤舟乘

1 《文竹山房诗稿》，清叶昉升撰。

2 本志下作“《雨窗杂闻》”，吴元相传中又作“雨窗述问”。《同治苏州府志》作“《雨窗杂志》一卷”。

其退，狂奔下山，汗浹不止，遂病疰。乾隆己酉，试礼部，疰忽止，即登第。《斯是室杂识》。

湖滨湾家舍农者朱善韬，素养蚕。嘉庆丙子，蚕上簇后，共成一被茧，若平展一卧被，然下得蛹斗许，称之，茧重一斤。先是，宅前有柿一树，偶施斤斧，辄不利。至是，善韬以煮茧艰薪，手斧劈之，一枝中有“状元”二字，瘦硬如鬣书者，两面字痕，正背如一，远近传观。善韬取余薪煮茧，无他异。其字枝今藏平望吴某家。《雨窗杂闻》。

嘉庆初，湖滨南埭有邱氏弟兄，皆农家子。甲贫无业，老大不娶。乙娶磨豆腐家，遂与女叔启肆苏郡。一日，叔与一人忿争交毆，乙助以拳，其人竟死。廨甲执乙之官，将下狱。甲闻之，诣郡探信，谓弟曰：“吾穷鰥，弟年少有室，不可死。死则邱姓绝矣！”乙难之，甲谓守隶曰：“击某死者邱大也，弟何与？”遂哀泣守者，怜其诚，竟释乙系甲。翌日，官鞠问，甲自承，欣然就狱。定讞，流关外。郡肆左右咸叹其义，有赠金送行者。甲至关外，以所赍贖少作营卖，积金数百，寄弟，令买田自营度。后十余年，遇赦归。又十数年，死。同上。

周静甫孝廉居北门外，道光乙酉，忽患狂，时平时止。后从枫桥针治归，病大作，家人禁闭之，未数日，竟破关逾屋出。逮晓，索之，立水死矣。颈上隐隐有红缕，若刀划然。究莫知其死状。其未死前夕，妇朱氏梦至城内，闻城隍决人心，往至庙前，见棋【旗】杆末悬二人首，血涔涔，有纸条标曰“周知”二字。妇惊，遂觉。越夕，周死。时黎里有富人某买一妾，与妻异居，无何，妻猝病死，有姬涤妻故裙襦，微见血痕，窃窃私议。妻母家疑为毆毒，诣邑兴讼，周为之保。某破家营理，狱未决，妻表弟某复控诸大吏，大吏别遣员勘验，实未毆毒死。讞遂定。此一事起于疑似，而妇尸惨蒸，某家破败，皆一牒之

始。周其以此欤。同上。按，富人陈姓。

道光三年，大水，江震劝捐赈贷余钱千缗。时学宫颓漏，邑士子请以余钱修葺。越年而成，庙饰焕然。七年丙戌，大成殿供桌前砖上有白蚁数千百聚结，啮成树形，枝干槎桠若珊瑚状，赵君子林用纸图之，以志异。同上。

道光壬午乡试，吴江沈春波于寓中梦有人扯之，同去看榜，久之，无所见。睹两火鸟翱翔空际，不知所指。至揭晓，邑荐三人：姚叔仪凤赓、连青厓鹤寿、沈笑山超然也。凤与鹤超然空中，梦悉符矣。吴元相《雨窗述闻》。

道光二十三年冬，王家庄烈妇沈程氏为夫弟所戕最惨，而报官时，其家讳言夫弟有兽心，诡以借钱不遂启衅，以致误伤殒命。县令萧据以详司廉使，已知其实，发府提讯。氏母年已六旬，到案备质，仍执原词，盖恐污女名也。问至十三次，案未定，母大恸。同寓有老幕，询其故，谓曰：“若下次再问，但云我女惨死如是，贞烈可知。彼行凶者，我不知其何心也。”如其言，官即令具结先回。提凶者严诘，尽吐其实，遂以斩立决定案，竿首于其间里，人具呈公请，随案奏旌烈妇，建坊于浹港扇，因题其坊曰：“礼严通问甘珠碎，义守靡他比柏坚。”呜呼，烈妇亦可瞑目于九原矣！

吾邑鼎甲，在国朝止榜眼二人，又皆寄籍。康熙壬辰，徐亮直侍讲葆光，吴县籍；乾隆癸丑，陈远雯，预宛平籍。道光庚子，殷述斋学士寿彭，以本籍中传胪。《松麈燕谈》。

北圻下塘张王荡滩有大王庙，相传俱由张士诚得名。荡有风最险，庙亦灵异。咸丰三年，江邑汤字圩土棍陆孝恒、孝忠兄弟聚众大王庙，抗罢租粮，谋为不轨，白昼抢掠。入其党者，纳钱若干，给予议单。有顾胡子名庆荣，书写用大王庙图记。其别村庞耀采、宋大良等，又各自分首从，以听

孝中¹等调遣。先是，震邑三四都有苏宪章，梅堰有武生沈梅岑等，俱各拥众滋事，拒捕戕差，焚毁震令坐船及巡检衙署。署震令姚铤于四年春带兵赴乡，拏获宪章等八人，梟示致江邑。陆孝中等闻，畏惧，贿通门丁崔姓洋四百元，将该村生员王仲修之退妾送于江邑贺令际云²，于是贺令竟置不问。平望绅董设计用素恃凶横之胡六喇啣等，于鱗鱼浜开设赌场，四散排列枪船，诱致匪类。至月余，陆之党羽头目尽在场中，潜令枪船直捣其巢。孝恒、孝中仆首就缚，遂解苏。垣梟示，余党遂息。越四年，震邑有七十二圩半之事，小户悉以枪船运米，各树白旗，名曰白旗帮。

漕船水手凶悍性成，自海运后，所有水手本难位置。江邑贺令因上海警报，即募水手护迁眷属，遂编充内壮。凡索赃未遂之案，令库书费熙堂率领往提，掳掠奸淫，无所不至。有阻之者，辄拔刀乱斫。雪港富户陈姓，因案传讯。费熙堂同水手二百余人持刀开枪，将陈姓贖财抢劫一空，掳去妇女二人，囚禁勒赎。其余被抢财物及伤人者，不可胜数。以后邑令遂不能制，致有杜大富一案。各省捐输军饷，官吏视为利藪，侵吞不少。即以江、震两县而论，绅民共捐制钱七万余串，而由县解司者仅二万三千串，经总督怡良访闻，于四年六月初，委道员戚贞、编修冯桂芬催提，仍抗不续解。所吞之数，二倍于所解之数。两邑如此，他邑可知。

咸丰三年春，粤匪陷江宁。浙抚黄宗汉奏请于江浙接壤处先严防堵，委我邑仲观察孙樊主其事，遂驻兵胜墩，修筑敌楼，加高数尺，树以旗帜，运河内打桩设卡，堆积木排，覆以营帐，炮门向北。船自北来，尽为寒心。兵虽不多，水陆军容，

1 上文作“孝忠”。

2 《同治苏州府志》《光绪吴江县续志》均作“贺际运”。

昔第耳闻，今始目睹矣。

四年端午，邑庙演剧，有浙江平阳兵过境，知有剧，亦哄至，与本地团勇争坐看台，彼此不下。平阳兵军器随身，即露刃相向，团勇亦喝众持刀与抗。一时，台下男女奔驰，素居城内者，直逃至城外不止。此吾邑见刀兵之始也。按：团勇皆粮船水手，是日闭关罢市，次朝带兵浙江守备赴江邑，索取凶手。水手等于县署头门架起炮台，欲行轰击，守备遁。邑令贺馈浙营洋二千元，饰称兵民打架误伤，行文完案。

十年四月十三日，苏州省城陷，巡抚徐有壬殉。后赐谥庄愍。二十四日，吴江县城陷，江、震两知县以下官弁，俱先走匿，惟城守韩眉寿于二十三日午后御贼于夹浦，至夜，贼退。及清晨，大队至，遂溃。后韩保守黎里，六月初八日，镇陷，死之。

邑中结党聚赌者曰道兄，不知始于何时，道咸间尤盛。严墓沈三，震泽吴连生，盛泽孙七、朱法大、法二，平望胡六喇喇，黎里汪道明、卜小二，北厍梅刺三兄弟，龙泾朱大，周庄费老玉，各拥众数百、枪船数十，各霸一方，势横甚。及贼至，竟受长毛伪职，与贼往来，贼至如宾，民赖以安。孙七子金彪，号少相，曾入武庠，设立保卫局，馀皆效贼。所为需索、火药、油火、巡更等钱，莫敢谁何。孙金彪号召多人，擒法大、法二斩之，声势大振。诸道兄皆走却，见孙氏至辄避去。于是，孙氏枪船遍苏、松、嘉禾间，贼亦畏之，目为老鼠船。费老玉子若卿，亦有胆略，头亦时毛时光。巡抚李鸿章至上海，亲履地势，知规复苏、禾，须水陆并进，枪船来往轻利，可济炮船之急，遂收用孙、费二人。恢复后，俱得官。

同治二年六月十三日，程学启以水陆各营，与戈登常胜军，由九里湖进，恢复同里。戈登亦由花径港遽逼北门，船出庞山湖，遇同里败贼，尽获其船。于是，城外之贼皆尽。

十四日，整队至城根，贼开门降。学启与戈登受之，遂复吴江。知县沈锡华亦即入城。戈登归昆山，学启令副将何安泰、张志邦各率五百人驻守城中，参将阮炳福驻东门外三江桥。十六日，嘉兴援贼数万麇至。十七日，直逼东南两门，张志邦出南门绕贼后，何安泰率所部击贼前，阮炳福坚守三江桥，断去路。以贼所置东门上大炮轰贼，贼乃溃。学启复令阮炳福水师两营扼万顷桥，当嘉兴；陈友升两营扼城西北夹浦口，张光泰水师护之，当苏州；安泰、志邦仍驻城中，为固守计。二十四日，贼由平望复犯同里，陈东友扼庞山湖，不能前。别股贼犯东门，何安泰败之。夜，贼来益众，水师不支，贼入同里。至二十九日，安泰、志邦共击退之。上海叛夷白齐文，率外国流氓二百人投苏城贼，屡至夹浦相扰，友升、光泰败却之。

三年夏秋间，杭州、江宁次第肃清，红旗报捷，重庆升平。伏念恢复之始，全赖吾邑一战而捷，城虽弹丸，横截其中，苏禾贼不能兼顾，遂以失势。由是而翦其翼、捣其巢，则吾邑一城之所系重矣。吴越王钱镠特于吴江置县筑城，有以哉！

垂虹识小录卷三

吴静之

吴山，字静之，尚书洪子。正德三年进士，除刑部主事，累升都御史，巡抚河南。时河患为甚，于是相度利害，著《治河通考》十卷。历官刑部尚书。时翊国公郭勋怙势作威，公独陈其不轨，应论死，不报。会勋病死，上怒，以公论讞后期，诏免官，即日就道，卒于利国监驿，年七十三，葬梅里村，祔其父洪墓。弟岩，字瞻之，与兄山同登进士，初授行人，迁工科给事中。正德九年，乾清宫灾，公条上视朝、讲学、建储及斥养子番僧、罢边中市，凡数十事，言甚切。十三年，疏请召还部臣督民逋者，又乞遣大臣治东南水利，上从其言。迁四川参政，卒葬邑西文奎圩。

顾仲光

顾昺，字仲光，正德十三年进士，授将乐¹令。地杂戎伍，犷悍难治。公至，申明约束，皆畏戴之。入为刑部主事。时

1 将乐县，为福建三明市辖县。三国吴景帝永安三年（260年）置县，因“邑在将溪之阳，土沃民乐”“东越王乐野宫在是”，得名“将乐”。

方议大礼，公上疏，与张、桂异，坐夺俸¹，乃以母老请改南京，迁汝宁知府。俗好伎刻²，公镇以静化。大行后，引疾归。先是，公去将乐，士民颂德不置，乃立碑县庭及建顾公祠以祀焉。

沈宗海

沈汉，字宗海，正德十六年进士，授刑科给事中。诏蠲四方逋税，公以民间已纳者多饱吏橐，请已征未解者，作来年正课。又言：“籍没奸党数千万资，请悉发以补岁入不足之数。”皆报可。嘉靖二年，以灾异指斥时政。尚书林俊去位，复抗章争之。张寅大狱起，法司皆下吏。公言：“祖宗之法不可坏，权幸之渐不可长。大臣不可辱，奸贼不可赦。”遂并收系除名。家居二十年，筑别业于筒村，曰南庄。卒葬柳胥村。隆庆初，赠太常少卿，祠在铁局巷。

沈子由

沈岱，字子由，嘉靖十七年进士，授南京工部主事，改北刑部主事，历升郎中，出知绍兴府会稽、新昌、萧山三县，田与赋左，为平其额，民称便。巡抚朱纨严海舶，公议海禁前后凡十二事，上当事。迁湖广副使。督抚侍郎张岳讨黑苗寨，属公纪功，官兵多纵杀邀赏，公令获生口与斩级同，全活无算。竟坐知绍兴时事罢归，筑室仙人山，以著述自娱，卒年七十八，著有南厂、南舡二志，《牧越议略》《吴江水利考》及家居诸集。

1 《康熙吴江县志》云：“昺持论与相孚敬不合，疏上，夺俸归。”《乾隆吴江县志》云：“昺上疏，不肯附张璠、桂萼，坐夺俸。”

2 伎刻，褊狭刻薄。

顾一贯

顾曾唯，字一贯，嘉靖三十二年进士，除金华令。地故倚郭，里甲困于供亿，公悉裁冗费。性廉明，庭无留狱。倭寇温台，公督民兵守要害，倭不敢犯。县学故隘，为买地拓之。迁御史，巡按广西，奏请安南贡使之久留境上者、宗室有犯法者，辄抗章劾之。自是，豪右屏迹。以大父年高，请告归，年四十九卒。

徐伯鲁

徐师曾，字伯鲁，登嘉靖二十六年会试榜。越六年，始廷对，赐出身翰林院庶吉士，授兵科给事中。时严嵩事把持言路，公念母老，乃移疾归。辟书舍南湖上，讲习如诸生时，足迹不入城市。岁时伏腊，还谒家庙，一见妻子而已。覃思著述，皆翼经证史。著有《周易演义》《礼记集注》《文体明辨》《大明文钞》《吴江志》《南湖集》，凡数百卷。卒年六十四，有司祀之学宫。

顾道行

顾大典，字道行，昺孙。少颖悟，读书过目成诵。喜古文学，又善绘事。隆庆二年，举进士，为绍兴府教授，历南京吏部郎中，迁山东副使，改福建提学副使。悉心衡文，不受请托，忌者中以考功法，谪禹州知州，自免归。所著有《清音阁集》《海岱吟》《闽游草》《园居稿》。

沈子芍

沈瓚，字子芍，万历十四年进士，选刑部郎，历江西按察僉事。未二年，移疾归。公天性过人，设立义庄赡族。庶叔祖

陷大辟，力出之。复分产，殖其家。师死，经纪其丧，复迎其媪养之。有年家子坐疑狱，几入死。时县令刘时俊，性严峻，绝请托。公告以诬，令立出其人，而露章报曰：“使百姓闻吾过也！”起广东佥事，入境，病卒，年五十五。著有《静晖堂集》。

沈季玉

沈琬，字季玉，万历二十三年进士，历官东昌府，擢山东按察副使。值年饥，盗起。公赈民、除盗，置常平仓，立义冢。明年，麦大熟，乃乞致仕。晚耽禅学，布袍蔬食，屏居吴山，从窗隙度饮食，家中子弟罕见其面，人谓其清操不减吴隐之。年六十一卒。

周秀华

周祝，字秀华，恭肃用孙。入太学，授太常寺典簿。学文于冯开之，与王百穀、汤若士为诗友。游王龙溪、袁了凡之门，闻性命之学。晚筑室太湖之滨，架木阁以居。崇祯十三年卒，年八十六，私谥孝康先生。

赵蹇卿

赵士谔，字蹇卿，万历二十九年进士，授会稽令。政务清约，捐俸浚淤浦四十里，溉田万余顷，民以赵公浦名之。税使者妄指富顺永昌有金矿，将开采。公以宋诸陵所在，力持不可。在任七年而内召，四迁至考功司郎中。时韩浚欲斥刘宗周，公力保，得免。寻擢右佥都御史，巡抚宣府。旋引疾归。平生笃于伦纪，周宗建被逮，不避纒骑远迎之，且捐资以助。卒年七十一。著有《宣抚疏稿》《蹇卿集》。

张异度

张世伟，字异度，移居郡城来远桥东寿宁巷。性慧，善文。幼丧母，朝夕上食号恸，塾中生皆为流涕。祖基歿六十年，公表暴其遗行，得赠官、立祠。万历十四年，举于乡，累试不第，谢公车，卜吴门之淶水园，诛茅灌畦，却扫诵读。当道荐举贤良方正，力辞不就。邦邑有大利害，必先自公发之。为古文，取裁韩、柳。所著《自广斋集》行世，卒年七十四。其歿也，家无余资，司李倪长珩往赙，乃得发丧。私谥孝节先生。

周季侯

周宗建，字季侯，家骆驼桥南，尚书用曾孙。万历四十一年进士，除武康令，调仁和，以卓异擢御史。天启改元，夏四月，京师大雹。公疏：“当燠而雹，害正不诛，兹谓养贼。”遂纠忠贤目不识丁，衷怀叵测。疏入，阁臣叶向高救得免。客氏再入宫，公复疏争，语尤危切。诏夺俸，又疏纠给事郭巩欲尽逐善类。帝怒，复以向高救，夺俸。忠贤将遣刘朝分率内操，诸中官巡视榆林，如边议既定。公疏陈内官典兵有三不可、九害状，忠贤益衔之。工部主事曹钦程诬劾赃罪，得旨削籍。复与周起元被诏狱，坐赃银万三千两，榜掠无虚日，死狱中，六年六月也，年四十五。崇祯初，赠太仆寺卿，特祠，诏归返银五百两，后追赠忠毅，祠在北门内小仓桥。

叶仲韶

叶绍袁，字仲韶，家汾湖上，有午梦堂。少负隽才，工诗赋。天启五年进士，选南京武学教授，迁虞衡主事。念母老，遂乞养归。与妻沈宜修，具菽水邀亲欢。宜修字宛君，副使琬女，生五子三女，并有文藻。一门之内，更相倡和。无何，母

及妻女相继歿，幽忧憔悴，杜门萧然如枯衲，后弃家为僧，号粟庵。辑一时死节诸臣事，未就而卒，年六十。

叶季若

叶绍邛，字季若，绅四世孙。天启五年进士，授行人，考选监察御史，巡按广东。值海盗刘香老作乱，公悉心筹画，灭之。又巡山西，有邢老虎者方肆毒，公檄文武，同心剿御，歼之。十一年，京师戒严，诏廷臣举堪督抚者，公承诏举中书舍人陈龙正，时称其知人。进太仆寺卿，升大理寺卿。以母施氏年高乞养归，母歿后又数年而卒，年七十七。著有《按粤疏草》《按晋矜疑》行世。

赵任卿

赵荫，字任卿，谔从子。以武举为金山营把总，被劾革职。崇祯九年，流寇犯安庐，巡抚张国经拔为守备，屯太湖。十年二月，贼东下，公提兵御之，至鸡飞滩，遇贼三百骑，击却之。返奔抵通，湖贼以百骑来山前挑战，公力拒之，手刃十余贼，射杀贼渠数人，以众寡不敌被执，不屈遇害，年四十余。事闻，赠指挥同知，世袭总旗，仍于太湖祠祀。国朝赐谥节愍。

周长生

周廷祚，字长生。崇祯初入都，请其父宗建恤典。时郭巩以宗建被逮，实由己发，因托所知，属公无言，当以一第及万金相报。公曰：“父讎，即死不避！富贵可饵我耶？”遂疏劾巩，得拟辟。时法以许显纯、田尔耕、崔应元先世军功上拟，后公赴法司堂，大叫曰：“此辈惨毙诸忠，尚不拟辟，岂尔辈犹贪重贿耶？”法司悚然，皆正典刑。私谥孝节。

盛子裁

盛王赞，字子裁。崇祯十年进士，授兰溪令。值皖寇窃发众万人，公使人持檄谕以恩信，争缚首恶以献。十三年，将入覲，计三载赎醵得四百金，尽以葺陂塘之圯废者。及见，上言：“南粮诸事俱报，可复任。”后有不快于公者，构之。巡抚王范劾其偏执乖张，调去。士民拥留，不得行，乃微服潜归。时朝臣倪元璐、范景文、郑三俊等交章荐公，上将大用而北都变作，戎政尚书¹张国经举公，请补东阳。至则先验冤狱，悉去之，乱乃定。后以母丧去官，湖滨兰溪人立祠祀之。鼎革后，祝发为僧，卒年六十五，葬横山。

吴日生

吴易，字日生，尚书山曾孙。崇祯十六年进士，未就选归，与同邑赵涣、史元等试剑谈兵，慨然以经济自任。甲申三月，闻京陷，公愤甚，大书其门曰：“复讎讨贼春秋义，报国忘家日月心。”阁部史可法荐授兵部职方司主事，参军淮上，奉檄催饷归里，遂与孙兆奎等教习水师，为进援计。唐王闻之，授兵部右侍郎，总督江南诸军事，进兵部尚书。鲁王亦授公兵部侍郎，封长兴伯。丙戌，公至嘉善，大兵猝至，公被执至杭州，总督张存仁欲降之，不屈，戮于杭之草桥门。临刑，再拜曰：“今日臣之事毕矣！”时年三十五，葬柳胥村。公无子，妾阿香同被执，以死自守，皆敬礼之，归栖公墓旁以终。

¹ 戎政尚书，明代职官名称。永乐初，由尚书或侍郎、右都御史为协理京营戎政，掌京营操练之事。

赵涣之

赵庚，字涣之。崇祯十六年进士，知瓯宁县，有惠政。丙戌六月，闽中初举乡试，公为同考官，迁行营礼部主事，改文选司。国变后，居天台国清寺。辛卯冬，来吴江，至穆溪，遇风，舟覆死。

任以行

任光裕，字以行。生而膂力绝人，好韬略。与吴琬善，少游太学，尚志节。当明末造，流寇肆掠，乱民蚁附，所至处，城邑一空。公遂应总督孙傅庭募隶麾下，为材官¹。寻授忠靖校尉，讨闯贼于南阳，屡立战功，斩获无算。后猝遇贼，被害，骂不绝口，年三十一，时崇祯十五年也。国朝乾隆四十一年，奉旨入忠义祠。

任遂初

任世德，字遂初，补诸生。天性孝友，抚侄如己出。中岁丧母，过哀，遂瞽目。尝举“志士不忘在沟壑”二句以励其子大训，卒成名臣。乙酉，大兵南下，被执不屈，绝食死狱中，年七十二。适大训方擢湖州知府，道闻湖州已纳款，父殉节，乃假称丐者，负父尸出，葬庞山湖东原圩祖茔侧。

苏寅侯

苏兆人，字寅侯。工诗。乙丙间，在闽抚张肯堂幕府。肯

1 材官，秦汉始置的一种地方预备兵兵种。材官将军，武官名，始见于西汉，掌兵事。曹魏、西晋置材官校尉，东晋复置材官将军，南朝宋、齐时隶起部尚书及领军将军，梁陈属少府卿，掌土木工程之事，战时亦领军。

堂由鹭门入翁州【洲】¹相鲁王，公自中书舍人晋仪部郎。辛卯九月初二日，翁洲破，公晨起，谒肯堂，示以《绝命词》，且云：“事竟至此，兆人请先。”肯堂颌之。俄顷，肯堂呼其阖门²以次毕命，乃自投缯。梁尘甫动，一卒趋告曰：“苏仪曹死庀下矣！”肯堂取卮酒至兆人尸前而祝之曰：“君其侍【待】³我！”复归，死雪交亭中。鄞人取亭中骨，分男女纳两瓮，瘞之补陀之茶山⁴，公骨亦附焉。国朝赐谥节愍。

顾茂伦

顾有孝，字茂伦。少负才任侠，游华亭陈忠裕子龙之门。陈死国难，公亦谢诸生，隐居。为人閤爽，长身玉立，善谈论，喜交游。家钓雪滩，陋室蓬门，四方宾至无虚日，公倾身揽接。明末，吴中诗集多渐染钟谭，公与徐白、潘陆、俞南史、周安、顾樵辈主持风雅，以唐音为宗。所选《唐诗英华》盛行于世，诗体为之一变。继有《五朝诗选》《明文英华》。雅好汲引，寒素赖以显扬。故虽布衣诗穷，而名闻海内。

张梦周

张廷璜，字渭臣，号梦周，世居吴江。先世有捐私财，缮城西隅六十丈，城得完。即公十世祖震也。公幼颖异，其叔祖晓江先生决为远到器，年十八，以家累舍举业，幕游浙皖鲁豫间，当道以公素谙例案，工翰札，争相延致。咸丰壬子，佐理河工。明年，发、捻二逆分窜江南北，公以县丞投效军营，为

1 据下文及《道光苏州府志》改。

2 《道光苏州府志》作“阖门二十七人”。

3 据《道光苏州府志》改。

4 《道光苏州府志》作“鄞人闻性道入翁洲，取亭中骨，分男女纳两大瓮，合瘞之补陀之茶山”。

袁甲三所深赏。奉委凤颖，劝捐捻饷。月余，得银三万两，粮赖不匮。随剿出力，历保至知县，俟补缺。后以同知补用，赏换翎顶。癸亥，署浙绍山阴县事。初下车，即却送署钱月百千文。送署钱者，衙役釀资供署中食用，沿为随例。公曰：“身任邑宰而仰给于若辈，欲使不剥民，得乎？即不剥民，独无内愧于心？”急革除之。邑邻萧山贼氛未靖，防御抚绥及善后各事宜，无不悉心筹度得宜。绍郡故多习法家言，遇事好讼，公必讯虚实，不使自兴灭，立判无累，讼风稍息。县署久毁，官僦民舍。请于上台，得重建衙。严江水决，海塘田禾尽淹。公相度堵筑，开通三江闸，淤沙乃步。祷故建闸者明太守汤公之祠，并为文以祭之。三日，淤沙忽松解，略加疏浚，水退田出，得补蒔，有秋。庚午，任衢之西安县，治理一如宰山阴时。邑民纳粮给柜收，名曰活串。公谓：“数难核实，弊且百出。”爰仿江苏例，釐造三联印串，一存署，一给完户执凭，一付粮柜销比。自是吏不侵欺，民歌乐利，至今便之。又闻民间粟米有官沽、民沽名目，官沽价特短，牙侩复于外用外加贴差钱，民困其累。公立召各米行谕禁，令一其价，通详立石，民感【咸】赖之。课士有方，辑有《鹿鸣书院课艺》，衢人称为创事。尤留意于民生疾苦，如栖流所、养济院之属，悉为筹款兴修。其无负职守，类若此。癸酉，解任归，卜居吴县木渎镇。遇邑中善事，无不解囊为倡。戊寅，晋豫灾，领册广劝解赈。严冬，常散米票、制棉衣裤以给里中穷饿。尝称：“士大夫无分出处，能以一善及人，亦于所学不负，其立身有本末，而笃于内行，心存利济，不徒为乡闾矜式。”卒年六十七。子二：晋昭、临吉。

唐子珊

唐寿萼，字子珊，家莺湖。少孤而贫，曾习贾，心弗善也，遂弃去。从叶溉翁游，刻意苦吟，几如闭户入瓮。由是，境益

困。嗣挟医术，所至有文酒之乐。顾所与交，率多沈冥之士，无能为办草堂赏，故名虽起而贫犹昔，一假诗以发之。其为诗，造意必深，炼句必隽，缠绵凄恻，令人不堪卒读。虽其性所近，亦境遇使然也。著有《皀翁亭诗集》。

赵咒生

赵莲，字咒生，震泽人。自幼性敏，读书过目成诵。初学制举业，好骋才气，不肯俯就绳墨，屡蹶于试。嗣亲歿家落，与诗人叶改吟、周柳初饮酒倡和无虚日。意气之豪，有不顾俗子侧目者。里中人咸讶其狂，而君弗计也。工骈体文，兼善汉隶篆刻，学日益进，而秀敏之资益充。以学问少年，意气消磨殆尽，而君之纵酒益甚，遂得瘖疾¹以歿，年四十三。著有《咒筭庵剩稿》。

盛敬之

元 盛舆，字敬之，吴江人。初为震泽镇教谕，升锦州学正。中原兵起，参谋浙省军政，擢崇德州判官。公尝受《易》于郡人龚子敬，好古博识。医卜、地理之书，靡不通究。所著有《韵书群玉》《滴露斋稿》。

倪元镇

元 倪瓚，字元镇，无锡人。善书画，性萧疏，超然物外。尝寓同里镇及华严寺，筑笠泽斋，居于吴江九里村，士大夫争延致之。洪武初，以事牵连，乘舟匿长桥芦苇中，捕者闻其异香，遂获之。七年，始还乡，人称云林先生。

1 瘖同“暗”。瘖疾，由于生理缺陷或疾病而不能说话的病症。

吴廷用

明 吴璋，字廷用，吴江人。幼孤，为锻工。永乐二十一年，诏选天下节妇给役内廷，母陆在籍中。宣德元年，淮王之国饶州，陆偕行¹。公弃家寻母者二十年，屡启王请见，不允。书十四上，王怜而许之，命入宫见母。母方病革，公刲股作糜以进，病稍间。王闻，愈怜之，召赐金帛，遣其母出。至逆旅，三日遽卒。乃匍匐归，葬先人墓。士大夫美之曰全孝翁。卒年八十一。后子贵，赠太仆寺卿。葬邑之梅里村，祠在弦歌巷。

史明古

明 史鉴，字明古，吴江人。博学洽闻，工诗古文词。状貌奇伟，髯须奋，与人辨【辩】说，不避尊贵。居穆溪之西，治家严，动遵古礼。尤长于吏治，巡抚王恕延见，与论政务，虚心咨访，未尝以部民遇之。弘治中卒，年六十三。所著有《西村集》《西村杂言》《小雅堂日钞》《礼疑》《礼纂》。

吴禹畴

吴洪，字禹畴，璋子。成化十一年进士，授南京刑部主事，洊擢至广东按察使，有惠政。召迁工部侍郎。刘瑾用事，诬刘大夏以罪，欲杀之。公与屠应俊力辩，得解。旋拜刑部尚书。时邓宁河家兄弟争产，依瑾为援。公执法不阿，瑾遂勒令致仕。卒年七十八，赠太子少保，赐祭葬如例。墓在梅里。

赵半江

赵宽，字栗夫。少聪慧，有声场屋。成化十七年会试，主

¹ 《嘉靖吴江县志》云：“宣德元年，亲王出封广东，徙封饶州，陆皆从行。璋弃家奔走二藩，屡启求见母，辄不允。”

试吴宽得卷，大惊异，置第一。授刑部主事，历官郎中。出为浙江提学副使，品鉴精敏，凡七年，士风为之一变。迁广东按察使。卒年四十九，葬吴山灵石峰。公为人平易闲雅，人乐与交。文丰瞻葩藻，诗亦俊雅。有《半江集》。祠在震泽县治前。

叶廷缙

叶绅，字廷缙，汾湖人。性质雅，人称长者。成化二十三年进士，授户科给事中。弘治七年，奉使闽浙，值吴中大水，公上言当疏通水利，请于廷，报可，得浚吴江长桥、吴淞江、白茆江、斜堰、七浦诸处，水大泄，民甚利之。十年疏陈八事，内劾太监李广大罪八，乞置之法，以为后戒。明年十月，广自杀。未几，迁尚宝少卿。卒于官。

盛斯徵

盛应期，字斯徵，居华严寺前。弘治六年进士，授工部主事，历云南副使。所至有声。寻擢四川巡抚，未几，以两广总督升右都御史，总理河道。以谤夺官，久之，更赦复职，致仕，卒年六十二。

周行之

周用，字行之。弘治十五年进士，授行人。正德初，迁南京兵科给事中，谏上迎佛乌斯藏¹。历河南右布政使，代监司鞠南阳滞狱，囹圄为空。累升南京刑部尚书，时九庙灾，坐自劾免。御史交荐，起为工部尚书，督河政，改督漕运。寻入为

1 明代称西藏为“乌斯藏”。乌斯藏在云南西徼外，去云南丽江府千余里，四川马湖府千五百余里，陕西西宁卫五千余里。其地多僧，无城郭。群居大土台上，不食肉娶妻，无刑罚，亦无兵革，鲜疾病。佛书甚多，《楞伽经》至万卷。其土台外，僧有食肉娶妻者。

左都御史，迁吏部尚书，以劳勩得疾，卒年七十二。赠太子太保，谥恭肃，赐葬祭。公端亮负节，推重当世。工书画，喜《周易》，著《读易日记》、诗文集十六卷。墓在十八都，祠在北塘巷骆驼桥北。

徐孝女

徐孝女，震泽五都儒林村徐友梅广文名曰淦孙女，午甫上舍名尔琳女。幼娴诗礼，纯孝性成。母得心疾，侍奉汤药，辄废寝食。迨母病卒，女年仅十五，哀痛恐伤父心，恒泪承于睫，不敢泣下。甫经两月，父病又危笃，医生束手，女忧惶无措，百计多穷，遂刲臂肉和粥煎羹以冀疗疾，而疾竟不起。女哀毁号泣，痛不欲生，因念两妹一弟孤露堪伤，为此含忍哀痛，不敢轻死。然终悲郁莫解，竟成瘵疾。越两载，卒于光绪戊寅冬十月。

徐少岩

徐宝治，字调元，号少岩，震泽县人，世居黎里镇。公幼而颖异，倜傥不群，有知识。时每夜即有髻龄女，若来相黜，公亦不之惧，人固未尝知也。嗣后，凡居处于内，旅宿于外，无不相偕如伉俪。自公登道光甲辰科贤书，赴礼部试，女仍与俱。场前一夕，公告女曰：“明日入闱，勿相扰。”女曰：“请从此逝，后会有期，君善为之。”于是绝迹。迨榜发中式，以主事选授浙江金华府，颇有政声。六年，俸满，援例引见，返于沪，游勾栏间，遇一妓曰爱林者，相见如故，各证前因，历历不爽。询悉女生之日，即礼闱前别之夕也。遂携归任所，而公旋亦罢卒，爱林犹时为人言之。

樊祥伯

樊生保，号祥伯，吴江人。中式同治甲子副贡。为人公正，乡里称之。时粤匪陷县城，同里镇办理团练，公亦与焉。一日，诇获奸民十余人，讯无实供，群疑莫决，询公，公曰：“此等游匪，杀之可也。”遂皆骈戮于市，不料中有一人，的系难民，因死非命。及公病临歿，自言：“我官阶本至侍郎，因屈杀一难民，将登鬼箠，虽邑之乡贤先灵及祖先，均为求免，不允。”言讫而终。一言之下，杀人自杀，可不惧哉！可不慎哉！

陈海霞

陈海霞，吴江人。历司桂林抚署刑名。在梁茝林中丞幕中，云有浙中皇甫某，乾隆某科进士，为某邑宰，罢归，来主吾邑笠泽书院，授从有方，吾邑人士亦亲爱之，而暮年殊困顿，有一子已登贤书而暴卒，惟老夫妇寄居吴江，亦相继而歿。尝语人曰：“吾因一事错误，致受恶报。此生无望，虽悔曷返？言之可为戒也。吾宰某邑时，门生某有才无行，中乡榜，后嫌聘妻贫，诬以有外遇。此女患痴病，乃指为孕，控于吾乞断离，吾信之，拘女讯于公庭，不容置辩。女性烈，袖出刀，自剖其腹，急救不及，遂死。上闻，某抵罪，吾亦失官。无何，吾子白昼睹女来，卒死。今吾夫妇老而无依，行见为他乡馁鬼，报亦酷矣。”

赵平章

又云：同里某氏适邑中赵某，其夫私一仆妇，有孕。氏已有子，知其故，乃匿仆妇于内，诈为己孕，俟其产，留抚之，人鲜知者。后仆妇所生子名平章，中某科举人，选嘉定教谕，氏得封如例，而已生子则夭亡矣。向使不留仆妇子，宗祧不遂斩

乎？天之所以报不妒者如此。

陈养波

陈养波，吴江人。幕游本省府州县，聘书争延，必择官之清正者，否则却而不就。凡三十余年，囊无余贲，悉以调亲朋之贫乏及葬亲、毕姻等事，寿逾花甲而终。当在幕时，遇案有牵累者，概予摘释，曰：“少提一人，可免其人失业破财。且有被诬者，亦免致屈陷。狱可清而讼可简。”其嗣子枫江，亦游幕宁扬苏松诸郡，治狱巨细不忽。遇重讞，则一夕数起，虽疾病不即安，曰：“世称刑名家害人而自害，信有之。然其学不能废也。余无他，惟慎中求速，速中求慎而已。”在吴县时，有为贼诬，株连对簿。先生察其冤，乞勿问，其人德之，馈白金五百，三反，正色拒之。生六子：长宗元，道光辛卯举人，癸巳进士，官吏部主事。先生恭膺封典，年逾五旬卒。嗣宗元授江西吉安府，于乙卯年城陷，不屈死寇难。奏奉荫恤。五子宗恕，咸丰辛亥举人。余皆诸生，兼习幕业，有父风。

李思曾

李三省，字思曾，郟阳人。万历九年以贡为吴江主簿。邑频年苦潦，三省乘小艇循行阡陌间，便宜修救，未尝受民一鲠一菜也。置一竹兜，出入舁之。衬章革带，常质于钱家。尚书严清称之曰：“居官如李丞，天下岂复有墨吏哉！”升昆山县丞，卒于官。昆民思其德，祔祀柳塘祠。

干文传

干文传，字寿道，平江人。元仁宗诏举进士，文传首登延祐二年乙科，授同知昌国州事。累迁长洲、乌程两尹，升婺源知州，又知吴江州。长于治剧，所至俱有善政。长洲、吴江为

文传乡邑，文传徙榻公署，未尝辄出，而亲旧莫敢通私谒。故其治行为诸州县最，论者谓其有古循吏之风。至正三年，召赴阙，预修《宋史》。书成，进一官，擢集贤待制。无何，以嘉议大夫、礼部尚书致仕，卒年七十八。

按：《元史》本传，文传为平江人。而元总管高德基《平江纪事》云：“干文传，昆山人。”

槃庵禅师

槃庵禅师，湖广嘉鱼人。明天启乙丑进士，知吴江县。晋吏垣。崇祯壬癸间，建言谪戍赐环，不复出山。沧桑后，剃染为僧。康熙乙卯，驻锡江城，距作令已五十年。邑人沈高陵先生赠以诗云：“空门阅尽几沧桑，独对寒云卧竹床。百炼身存心铁石，万言书在字风霜。前朝文献征遗老，一代天龙护法王。士女争来瞻瑞相，拈花还是旧河阳。”

徐双桥

徐双桥先生，名淳，字葆初。世居吴江，其先世以贵雄乡里，又以能诗、善鉴古名。先生承父祖业，奋然思有以自见。好读书，涉历史传，于前代成败得失，讲论悉中肯綮。事二亲，先意承志，无少违拂。侍疾居忧，皆如礼。两庶母少年守志，先生敬事弗衰。族姻故旧，任恤弗吝。尝雪中过胥江，有覆舟者，冒险往拯之，解衣衣溺者。其勇于为善如此。中岁勤于课子，非名师益友，戒勿往还。最后赋《悼亡》，终身不娶，亦不置妾。工于诗，四方名流游松陵者，造庐过访、诗酒之会，无虚日。如钱塘袁简斋、嘉定王西泚亟称之。所著有《金陵游草》一卷、《古今体诗》一卷、《杂著》二卷、《家传》一卷。其子乔林，为邑之名诸生，以廪贡试用儒学训导，亦以诗名。著有《望云楼诗集》。

吴少谷

吴士坚，字中确，号少谷，居震泽县之平望镇。乾隆己亥举人，授江阴县训导，课士朏息，拔茅搴藻，与砭愚订顽相辅而行。南巡时，恭办召试大典，恪恭将事，并呈《迎銮项册》。乙巳夏，久不雨，河涸苗槁，藩悉檄委勘灾，减从缩食，不劳供帐，循行阡陌，分别轻重，民心帖服。报七分灾，县令欲裁减，力争之，卒如所勘，报详核奏。旋奉给赈，檄委发银，按户面给，不假胥役。有贫生途次求补给者五六人，先生勗以士贵有恒心，仍周恤之。越日，遂无至者。有役夫宿庙，猥褻于神，怒，仆地气绝。先生肃拜请命，祷毕而役苏，人咸谓正直感应。当路因欲保举以知县用，先生以患病力辞。嘉庆甲子，吴江等处以水潦，劝捐平糶，尽力周济，以裨桑梓。乙丑，予告终养，去任。绅耆、士民送至苏、常交界，固辞乃止。先生家居课孙，怡情诗酒，日手一编以自娱。所著有《骥沙存稿》一卷，《汉书蠹说》一卷，《笺注秋笈集》¹《列史蒙拾》《塔影轩笔谈》《课余随笔》四卷，《四书分部字考》四卷，《四书总字分类韵编》四卷，《诗文四六》若干卷，卒年七十七。

吴诗庭

吴鸣销，字韵伯，号诗庭，少谷子。幼颖悟，年十五，补邑庠生。父司训江阴，摒挡家事，与徐孝廉绍基、王太守苏、王明府骥，樽酒论文，互相切磋。五应省试不第，遂辍业。孝于亲，友于弟，笃于友朋，慈于子侄，里中称之。甲子夏，吴江大水，承父命而劝平糶，与同事协力捐输，三月而米价平。丁卯，里中社庙灾，先生偕诸绅士劝输，三年而告成。他如除道成梁、

1 《道光平望志》作“《秋笈集笺注》”。

掩骼埋胔之类，行之不倦。其勇于为善如此。尝留心邑中掌故，著有《平望志》八卷，所采录文献，足备郡县志张本，卒年六十。

潘稼堂

潘耒，字稼堂，家烂溪，明参政志伊曾孙。由布衣应康熙十八年鸿博，官检讨。公颖慧，从徐俟斋及顾亭林学，学既大成，工为文章，而于史事为尤长。其与修《明史》也，谓“搜罗博而考证当精，职任分而义例当一，秉笔直而持论当平，岁月宽而卷帙当简”，陈泽州相国是其言。笃于师谊，俟斋歿，周恤其孤孙，使之得所刻布亭林《日知录》及诗文集，犹以未及刻《肇域志》为憾，卒年六十三。所著有《类音》八卷、《遂初堂诗文集》四十卷。

陆元珍

孝子陆士铤，字元珍，震泽县人。事父大经、母邓氏，先意承旨。父夏夜读书，为毒蛇所啮，立昏眩，求医不得，且殆，先生即自为吮毒。父恐毒及先生，坚拒。先生掩帐托为邻之能医者，渐吮渐平。父梦白衣女子谓曰：“急以雄黄治足口，尔父子可无恙。”醒即如法疗之，果皆痊。先生有二伯，家贫，因父笃于友爱，每竭力以周恤之。母先歿，先生营葬，遇雪，恐蹉跎不可，涕泣祷天，果止，得安然下窆，躬亲负土。庐墓三年，不饮酒、茹荤，复积馆谷，置祭田五亩，为永远蒸尝计。苦志读书，不与人争竞。足不入公门，钱粮急完办。尝语人曰：“草野之人，非此不见忠君。”有蠹役飞裁银两，先生父欲鸣官。先生规知役贫，有老母，曰：“送官必收禁，伊母谁养？”遂典债代赔，嘱后勿犯。父亦为之首肯。先生妻王氏，以针黹佐书幌，见先生孝事双亲，亦晨夕不懈，得翁姑欢心。时姑患

症痢，先生亦患病，氏方妊孕临月，侍奉汤药无倦色。每祷天，愿以身代，姑旋愈，而腹成疝痞，苦痛难忍。先生偕氏轮以手运，氏鬻簪典筐，措办参朮以补之。又儿乳以乳其姑，姑痞以消。里族咸称有古唐氏风。翁性嗜鲟鱼，而江邑罕有。先生馆于苏，得购以供，而不能常继。氏与航船作为主顾，或给银钱、布匹寄买，时人号为孝妇船。先生夫妇孝行著于乡里，适邻有薛姓者，以妇言致骨肉有隙，未几，其子顿悟曰：“我愚不知孝，今见陆家夫妇孝顺如此，殊愧！”遂改过。氏劝其妇，谕以大义，时为调恤，妇亦感悟，勿复逆。其翁姑喜甚，向先生夫妇泣谢曰：“吾有逆妇，赖公而顺。吾欲诛子，赖公而生。”击颡而去。有童谣：“西邻孝，东邻不敢哮”，盖指此也。先生歿，族党私谥曰孝怡。同邑徐虹亭、潘稼堂、邓协中诸前辈，为之传记，曰吮毒，曰乳姑，曰格邻。其子过名，县学生，牖陈事，呈请旌表。乾隆十八年，奉旨给银，建坊旌表，入祠崇祀。当事名公巨卿、文人学士，阐扬潜德，题匾、诗歌、传记哀集成帙，名曰《陆门双孝录》。

袁朴村

诗人袁景辂，字质中，朴村其号也。居吴江县之同里。幼警敏，通四声，即能成韵语。年十二三，经史娴熟，为制举文，才法并到。暇即披览《纲目》，有所见，辄咏成篇。尝从其师蔡寅斗至京师，群为招致。诗人畏酬应，未一岁归。弱冠补震泽县诸生，再试于乡不利，循例贡入成均。生平师事皆巨儒硕学，诗之源流则禀承于沈归愚。先生益肆力于诗，尝与王北溪、顾蔚云东岩、陈竹轩芝房、蒋梧巢、沈朴堂逸溪、赵药亭、沈芥舟诸名流结竹溪诗社，时人比之西园玉山云。又念乡先辈多诗人而不尽传于世，乃搜访百年来诗家遗稿，论次编纂，成《国朝松陵诗征》二十卷。阅四年，甫卒业，作自序、凡例，

越宿而病，旋卒。所著有《小桐庐诗草》十卷，诗皆根极乎真性情，而风格神韵与唐大家辄吻合。归愚先生订而序之，与所辑《诗征》，均于歿后板行。吾邑故多诗人，前如朱愚庵、计改亭、顾雪滩樵水、吴汉槎、叶己畦，后如潘稼堂、徐虹亭、吴柳塘、张损持、周汉荀、吴恒斋、叶横山、张石里、陈玉文、陈狷亭、李玉洲、顾帆川，皆《诗征》中之极盛者。其余作者，指不胜屈，如先生诗卷，真可梯接名贤矣。

沈君服

孝介沈先生，名自然，字君服，县学生。有至性，孤峭绝俗。家贫，虽蔬食不给。闭门讽咏不辍，与潘木公、史弱翁、徐介白、俞无殊齐名，号松陵五才子。于人少所许可，独山阴祁公彪倾心于公，相与商榷。居母丧，以哀毁疾卒，友人私谥曰孝介先生。时崇祯之季，公年三十八耳。有《来思》《闲情》二集。愚庵、己畦、归愚诸先生亟称之，谓“近体诗方驾义山，五言神似玉台体者”，皆定评也。

沈恒斋

沈恒斋，名自南，字留侯，君服弟。性恬静，不慕荣利。弱冠举于乡，知县叶翼云以“真孝廉”目之。顺治乙未成进士，授山东蓬莱知县，清介自矢，一以恩抚民。所著有《艺林汇考》一百七十一卷，钱牧斋称：“先生博通今古，其书为经籍之禁御、文章之圃田。”《历代纪事考异》《乐府笺题》等。诗有《恒斋稿》及《集陶》，长洲陈格以为“多朗秀而浑成，五言古体亦得陶公神韵”。

沈君山

沈君山，名自东，自号恬静公子。为人孝弟醇谨，好读儒

家书，赋诗著文，有《小斋杂制》十余种，惟《七晋赋》《丹宸箴》《撰美篇》刊行于世。小时坐书塾，闻一客诗称木为卉，一客非之曰：“卉者，草也。”先生徐起曰：“《诗》曰‘山有嘉卉，侯栗侯梅’，然则《诗》亦非耶？”客惊服其敏，每为人言之。

沈高陵

沈高陵，名永令，字闻人，南康子。以手有枝指，自号一指。登顺治戊子浙江副榜，覃恩入监，廷试中式第十名，授陕西韩城知县，汤文正公称为有长者风。诗文、词曲、书画皆有名，而画蒲萄、松鼠尤工。著有《深柳堂集》。

沈四明

沈柳庵，名永智，字四明。县学生，以诗名。尝作艳词数首，以轻脱见疑于人。及访族兄保昌署，有美婢入房挑之，公坚卧不应，人始服其操。著有《柳庵稿》一卷。

沈默斋

沈默斋，名世楙，字旃美。少孤力学，甲申后绝意进取，与顾雪滩、周樵坡赋诗饮酒为事。奉母至孝，过五十，犹承欢如孺子。卒之日，友人私谥曰贞孝先生。著有《听斫斋集》。

沈培福

沈元景，名培福。七岁能为文，弱冠师事戴褐夫。褐夫贵，招之入都，未几，褐夫见法，无以殓。元景与其所亲，醵金棺敛而归，葬之。后侍母疾，剜股肉和药以进。尝辑《先代诗文稿》若干卷，将编次总集，以客游未果，卒于蜀。诗有《东溪稿》。

张雪窗

张雪窗，名世炜，字焕文，世居吴江唐湖。年十五时，冲口咏雪，得“肥添瘦鹭飞远下，淡点寒梅白共香”之句，宿老极惊异之。隐居不仕，诗酒卒岁。家酷贫，三十习岐黄家言，精于脉理，不较钱文，远近争延之。著有《杜注》《历朝诗选》¹《唐人真赏集辑注》《读素问钞》《雪窗文钞》等书刊行世。诗有《秀野山房集》。

王云舫

王云舫，名恩溥，字佑良。世居震泽之儒林里。少力学，童试屡困，援例入国学，非其志也。工诗，又善于古。承先志，搜集见山楼藏书、金石、碑志、字画、图籍之属，凡若干种。性孤峭自持，不慕荣利。喜读《南华经》，时或从田夫野老课晴问雨于阡陌间，朋好相语，不及当世事。有不合，辄望望然去。虽士大夫，不顾也。诗有《种蕉庵稿》，同邑董竹甫、张开甫两先生订而序之。又幼时头即有肉角起，因自号曰赘瘤生。

朱游初

朱天麟，字游初。先世居吴江，为农家。天麟好读，无力从师。十岁，从父子静之黎里，道士陆华阳者，故昆山人，欲留之读书，父不可，携归。越二日，天麟潜附鬻薪舟往，家人促之，不肯归。华阳亦劝学甚力，延名师教之。八年而学成，因华阳婿于昆山沈氏，冒其姓曰沈天英，奉其父并挈从弟天凤、天虬，占籍昆山。天麟由诸生中万历戊午乡试，崇祯元年

1 《道光平望志》作“《杜诗正义》《历朝诗约选》《松陵诗约》《唐人真赏集辑注》《读素问钞》《秀野山房初、二集》”。

成进士，始复本姓，改名天麟。南都破，挈家航海至闽。既卒，粤西永明赠少保建极殿大学士，谥文靖，事详《明史》。子宿垣，字日生，初授大理寺评事，迁御史，先卒；斗垣，字月生，授行人，抗节死，赠兵科给事中。天凤，字来丹，子翼垣，字元生。天凤领闽省乡荐，官仪曹，寻入粤，卒于江州。翼垣即卜地以葬。服阕，以明经考授詹事府录事。至壬寅四月，奉天麟柩归葬。天麟妻沈，以翼垣贫乏，析遗产相劳，力辞不受，就幕自给。卒于鸠兹。

李彦平

宋 李衡，字彦平，江都人。高祖昭素，仕至侍御史。衡幼善博诵，为文操笔立就。登进士第，授吴江簿。有部使者怙势作威，侵刻下民。衡不忍以敲扑迎合，投效于府，拂衣而归。后知溧阳县，盗猾起旁境，而溧阳靖晏自如。帅汪澈、转运使韩元吉等，列上治状，诏进一秩。寻召入，为监察御史，历司封郎中、枢密院检详，出知温、婺、台三州，惟婺尝莅其治，加直秘阁而衡引年乞身，恳恳不休。上累却其奏，除秘阁修撰致仕。上思其朴忠，旋召落致仕，除侍御史，以老固辞，不获。差同知贡举，会外戚张说以节度使掌兵柄，衡力疏其事，章五上，请老愈力。上知不可夺，仍以秘撰致仕，定居昆山，结茆别墅，聚书万卷，号曰乐庵。卒年七十九。

顾徐氏

烈妇徐氏，昆山人，适郡庠生吴江顾洗，从夫馆于陈家湾。闻妇女为兵所污，厉色曰：“曷不速死？我若遇兵，必不辱！”乙酉九月，兵来，洗逃匿，氏投水死，年二十五。

卜孟硕

卜舜年，字孟硕，吴江盛泽人。少孤，有异质。喜词赋、书画。年十八，受知于秀水知县颜颂章，读书东塔寺。华亭陈继儒见而异之，引为弟子，授以河洛、讖纬、干支、营阵之学，尝周其贫。孟硕性好客，座恒满。既不得意，更为奇服动众，题其门曰“乡人皆恶，国士无双”，惟与同里庄汝培端甫结契，时相和酬。闻吴门张怀仙善音，能感恻人，遂从学吴歙，尽得其妙。有时骋伎登坛，珠玉一转，四座掩泣。好狎游平康¹，又多与娈童²处。一日，大悔，立功案自考已，更学长生飞举之术。喜视鬼，每于阴云晦月之夕，独至荒冢中露宿，冀得一遇，终以瘵死，年三十四。临歿之岁，人有乞其书画者，卷后但题曰“泥无身”。顺治间，越中召仙者，时降乩赋诗亦称“泥无身”，盖已仙去矣。所著有《绿晓斋集》，其友潘一桂梓之以行。

朱白民

朱鹭，字白民，初名家栋，吴江县学生。少有俊才而忠孝性成，每谈革除事辄流涕。万历中，议修正史，先生著论以为革除四年之事，孙蒙祖号死乱，生年失，莫大于此，宜断以史臣之权，为建文帝立本纪，复其年，随录其当时行事，以成一代之典。乃仿《纲目》，作建文书法，僭版行于世。厥后，建言者以先生意上请，诏可其议。家贫，授经以养父母，恒置百钱于床头给用，名买笑钱。父母卒，乃谢青衿，芒鞋竹杖，独游名山。所至以画竹自给，不妄受人一钱。家居时，一富家翁

1 平康，即平康里，唐长安街坊名，后亦为妓院的代称。

2 娈童，供成人猥亵的美少年，是主人性侵犯的对象。也作男妓解。

重其画，具舟延之。既至而鄙其人，即坚辞去，亦不留一画。其舟子贫且老，怜之，赠以画竹一卷，嘱之如东坡与贾耘老故事。富家翁闻之，以数金购得之，其矜贵如此。尝游华岳，登天井，黄绦道服，长髯等身，见者疑以为仙。初好元学，解《道德》《参同》之旨。晚而归禅，号西空老人，结茅华山寺左莲华峰下，绳床石灶，供具淡泊。其画最善竹，篆书亦超诣。年八十余而终。先生与王在公、赵宦光齐名，时称吴下三高士。文文肃公震孟志其墓。又著《颂天庐笔》行世。

沈范氏

烈妇范氏，吴江之耕读村人，文正公之苗裔也。嫁同里沈三阳。三阳贫而知书，顺治初，嘉兴某弁招三阳至其幕，三阳为人放诞不羁，弁疑三阳与其妾有私，诱三阳醉而杀之，乃沉之于河，而以失足溺水告。未久，事露，妇痛其夫死非命，乃大恸曰：“杀我之夫，勿与共天日矣！”当是时，妇年未三十，舅姑俱物故，孑然一身，无子女，大书“为夫报仇”四字于衣背而诉之嘉兴府县，府县以弁故，且利其贿，不为理。时御史秦公世桢按江南，有廉察声。妇奔控之，秦公移文提弁，赴讯得实，论死系狱。妇与弁讦讼三年，家故贫，惟精于缝纫，凡道途口食之费，皆出十指上，竟以忍饥致疾而死。死之日，弁闻之，方酌酒自庆。明日，部檄下，弁斩矣。

张建瓴

张士标，字建瓴。少孤，喜读书，能诵“四子书”、《毛诗》、《周易》、《左》、《国》、《史》、《汉》、唐宋八家之文三百余篇外，及《通鉴》等书，家落而废读，习细微贸易事，以佐不逮。而督课侄世炜有方，年二十五，赘于盛墩袁氏。袁业贾而无子，债负甚多，从而贾于江淮之间，竭力奔驰，历数年，每代为偿

债。未几，袁翁客死。建瓴迎柩归葬，而资本先为其侄所耗，家四壁矣。后六年，亦客死淮安。建瓴志气豪迈，与人交，肝胆相照。性不容人过，而以诚待之。家故贫，而轻财仗义，好为人代理不平事，有古侠士风。年仅四十卒。子二：世辉、世焯。

张祖槐

张国宁，字祖槐，瑞庵之长子。承世业习医，寒折胶，暑铄金，志不少懈，尽通《灵》《素》诸家之说。弱冠而业成，治病辄奇中，名遂大振。治病必先贫者，尝曰：“富厚之家，惜身重命，而病止一身。贫家一人病，则一家惶惶不能存活，不惟一身病，且一家病矣！何可缓也。”凡乡党有疾者，必戴星诊视而后远出，及愈，不责报。以故术大行于江浙，往来皆缙绅，然固未尝择贫富也。日诵孙真人“胆大心小，智圆行方”之语，奉为典型。故审症极详，用药必当。遇疑难之症，日夕傍徨，形诸梦寐。于他医告技穷者，每获效如神助。前明崇祯十三年，岁大侵，饥民道殍相望。时邑侯叶敬甫劝募，设糜饲之者累月，复捐钱二百余千，日给里中之贫者，有簿籍可验也。里人某多子而贫，佃祖槐田数亩，租不及半，或劝收其田而易佃之，曰：“彼子幼而食指繁，使租税必清，一家岂能尽饱？且无子之家，有求之而不得者矣，我何惜数亩田，忍使其父子离散耶？”父有金贷诸渔户，贫不能偿，因焚其券。司李倪公伯屏建吾郡郭外五龙桥，募各邑殷户捐助，首捐数金。胜墩向有三国时盛司马祠，里人谋重建，独祖槐捐助为多。其事亲以孝，御下以宽，待亲戚以厚。平昔舟舆之暇，每手一编。竟以劳瘁卒，年四十九。

朱长明

僧海溯，号敏流，姓朱氏，初名灿，字长明，本儒家子。其

父羲甫，隐居教授，自盐官迁吾邑之黄溪，故为吴江人焉。溯少敏悟，能读书通史，为文奇峻，不合当世，屡试不售。家贫落魄，及母死妇亡，继遭回禄，遂披薙为僧，盖其遗迹云。初，溯狂放负气，与二三少年徒步仗剑，欲以策干史阁部。将渡江，闻扬州破而返。故语及鼎革时事，辄歔歔泣下。尝与同邑戴笠、陈殿升，会稽刘肇兹相往来，既为僧，结茅唐湖滨，地仅半亩，栽四时花不绝，日夕吟哦其间。为诗刻意钟谭。性好洁，焚香煮茗，日手一编。遇文士，必留谈。忌寝食不当意者，却之不顾也。晚年禅学精进，参天谷和尚，得契而归，归而冒疾卒。

程穆甫

程邦愚，字穆甫，吴江人。生有异质，读书如宿习，构艺有成诵在胸，借书于手之乐。工诗善书。年十六，随外大父王翠庭入都，见许于阮元。弱冠时，才名已照耀日下。旋阮公视学浙中，招往幕中，皆知名士。唱和甚夥，著有《定香亭笔谈》。中式嘉庆辛酉举人，壬戌进士，入词林，充实录馆纂修官，献《万寿赋》册，极蒙睿庙褒赏，命刻入《文颖续编》，时以为荣。壬午，补江西道监察御史，历充乡会试同考监试官，建言委署州县之例，得旨准行。癸未冬，五城米贵，奸商滋弊。奏请申明例禁，民困以苏。甲申，补授京畿道，事繁刑重，具折条奏，其略曰：狱讼为民命所关，往往胥吏把持，奸蠹簸弄，经年累月，身家俱破。迨呼吁无门，不得已而京控。欲清其源，务在各省详慎推鞠云云。得旨通飭中外。其他如请拨奉天米石及浚治太湖泄水要道诸折，凡所陈奏，悉关吏治民生之大，皆蒙俞允，赏赉有加。乙酉，补户科给事中，擢鸿胪寺少卿，患病假归，主讲上海敬业书院。性澹泊，在京邸曾以“清虚静泰”自颜所居。生平不妄交游，孝于亲，慈于众，友于兄弟。尤喜施济，以故囊橐屡空。卒年六十有二。著有《迟云吟馆诗》

数卷、《试帖诗》数卷、《奏稿》一卷。兄际韶，嘉庆戊辰进士，官至兰州府同知。子庆华、庆善。

杨列欧

杨复吉，字列欧，吾邑人。生有异禀，三岁，日课百余字。读书过目成诵，远近有神童之目。九岁，通经书大旨，习时文。陆朗夫中丞掌教笠泽书院，获课卷，亟赏之，谓：“他日必以文名天下”，目为奇才。试辄前列。工诗、古文词。十七岁，与曾叔祖蕢园讨论，著有《北片剩语》及《明史乐府》五十章。弱冠，泛览子史，著有《伍员论》等篇。光禄王西庄极赏之。己丑，补震泽县学生，约同志为文会，课必压卷。中式庚寅恩科举人，壬辰捷南宫，以知县铨选，时年未及壮，即好楼居，拥书万卷，手不停披。沿流讨源，寸心千古。尤熟于国朝人古文、说部，寓目殆遍。乙未，王光禄来主笠泽讲席，引为弟子，商榷古今，搜讨秘籍，相得益彰，有“独角麟，一时罕见其匹”之誉。壬寅，奉铨部截取¹，以锐意著书，淡于仕进，即引疾不谒选。时大江南北贤士大夫咸器重之，必过访以资考证，乐与订金石交。丙辰，力辞孝廉方正之举，虽同谱之名公巨卿，先后持节吴中，自诗文外，绝不干以私，因咸敬礼有加焉。笃志好学，至老不倦。生平孝友耿介，根于天性。诱掖后进，无倦容。得其学而获售，踵相接。与人交，和蔼诚笃，不立厓岸。居恒淡泊自安，谓：“日对古人，此中自有真乐；常咏吕仲，实句不敢妄为。些子事，只因曾读数行书；于斯语，盖躬行而实践之。”人咸服其学行有足继古人云。诗以玉溪为宗，又嗜元遗山。古文渊懿醇茂，得力欧、曾；骈体裔皇典丽，嗣响有唐。

1 在清制，凡举人考中后经三科，由本省督抚给咨赴吏部候选，称截取。又以食俸年限及科分、名次为资格之官员，由吏部核定其截止日期而选用，亦称截取。

于嘉庆庚辰卒，年七十四。著有《诗集》十二卷、《诗余》四卷、《文集》十卷、《梦阑琐笔续笔》共廿四卷、《史余备考》一卷，时文已刻稿六十首，未刻稿百首。纂辑则有《辽史拾遗补》五卷，《元文选》三十卷，《昭代丛书新编》《续编》《广编》《埤编》《别编》共二百五十卷，《虞初余志》廿四卷、又《补》八卷，《国朝七家乐府》三帙、《艺苑碎珠》二帙、《天崇文阐》四帙、《律赋丽则》二帙，《元稗类钞》《燕窝谱》不成帙。子一：两盈。

陶锡蕃

陶谿，字锡蕃，吴江人。先世以忠厚称。锡蕃幼有至性，事亲以孝。为人慷慨乐善。癸未秋，邑中大水，田禾尽淹，出廩粟以施济，全活甚众。大吏嘉之，为请于朝，得邀议叙。后逢岁歉，无不乐输。有司给匾旌奖。他若矜恤邻里，称贷姻党，始终无少懈，人咸感之。以母苦节，丧未毕，先为请旌，建坊于墓侧，尽孝思也。晚年别筑书室于旧居西偏，颜曰璧庐，取习勤之意，故自号曰补勤。居家谨饬，处事以敬。为人谋忠，故踵门请问者无虚日。卒年五十有五。子二：心源、承湛。

金云栽

金芝原，字云栽，文简公士松子。世居吴江。生而岐嶷，初作文，即有丹凤和鸣之目。早岁通经史诸子百家，随宦入都，辄邀名公奖赏。故弱冠时，才华已藻耀日下矣。中式乾隆己亥恩科举人，充景山官学教习，入直薇垣，从事票签，撰文详妥得体，旋充内阁侍读、文渊阁检阅。遇部中例案，无不辨析疑似，稟请平章更正。辑有《丝纶备式》，为后进津筏，诸相国依如左右手。公余仍读书勿懈，屡蹶春闱，而处之淡如也。己未，奉讳里居，哀敬尽礼。丧葬毕，仍补中书，旋以内阁侍读

诰敕房提调归，与二三知己吟咏卒岁，创建文简公专祠，并以应得封典，推恩戚族，又以季弟嗣叔后，其孝友之忱类如此。居官以勤，能补拙俭，以养廉二语为圭臬。自奉菲薄，酬酢则丰，御下以宽，治家则肃。舍旁植梅百余本，绘图征诗，其寄托之高有如此者。书法从钟王入赵。性嗜金石碑碣之学，名人书画，真贋立辨。藏皮甚夥，人比之云林清闷。甲戌，吴中亢旱，米珠薪桂。捐赀平糶，全活不少。九月，以疾卒，年六十四。著有《颐性斋诗文集》若干卷。子六：长宗培，一品荫生，官至湖北荆宜施道；宗均、宗尧、宗墉、宗埈、绳祖。

费策云

费振勋，字策云，登乾隆戊子举人，乙未进士，授内阁中书，历户部主事，累迁郎中，擢山东道监察御史，论州县考课法，又极言吏胥奸状。曹司掌案，皆邀俞允，所言悉中利弊，有古直臣之风。督学广西，增减生员额数，创建考舍，造就人才，所取咸成名士。迁吏科给事中，秩满，当得监司，力辞不就，遂告归。掌教正谊书院，立条约，选课艺，理本程、朱，文师韩、欧，面命耳提，娓娓不倦。江浙之士，沐其陶成者，指不胜屈。性坦【坦】白，治家以俭，待人以忠，同僚皆推为长者。乐善好施，养孤恤贫，友于昆弟，笃于故旧，宗族乡党咸赖焉。年七十九，崇祀乡贤。子兰墀。

费秀生

费兰墀，字秀生，振勋子。登嘉庆庚申举人，壬戌进士，选庶吉士。乙丑馆元，授编修。性恬退，父告归，即请终养。主讲虞山书院，所造皆知名士。居家服膺“为善最乐”之训，创设善局，专办掩埋。道光三年大水，棺多淹没，乃募资捞起，运送苏郡安葬，几及万具。贫民逃荒遗弃子女者，乃立收婴局，

转送苏郡抚婴局收养，给票为据。江震素无乡赈之举，首倡倍捐，令贫民计口给钱，自向富户支取。发赈之余，又查得老病残废千余口，聚于崇吴、永福两寺，按口给米，又给棉衣。生平勤学好问，至老不倦。善诗、古文词，年五十七。著有《蓬庵文钞》。

费伯瀛

费元镛，字伯瀛，兰墀子。以嘉庆癸酉副榜登道光元年恩榜，就挑列二等，得皖之休宁学司训，课士有方。徽郡为先儒故里，俗尚勤俭廉节。莅任后，访得贞孝节烈六千余人，自六朝迄昭代，详请旌表如例。劝置义仓，筹办军需。秩满，例得进一阶，力辞不就。旋以知县事升用，未及部覆而卒。性坦适，忠厚诚笃，济困扶危如不及。癸未，江震大水，漂没棺柩，随父捞获一万有奇。一日遇狂风雨，舟几倾，得免，人谓感神佑焉。甲申，又募资千余金，往鸠江赎还已买妇女三十余口，人罕知其事者。以善恐人知，故托舅氏姓也。好论因果，日诵《感应篇》《阴骘文》《金刚经》各一卷，手书集各善书及梵字文曰《宝善大全》，辑有《醒世晨钟》。年五十八，崇祀新安名宦。子延洪、导源、延庆、延良、延鳌。延庆，同治甲子举人；延鳌，乙丑进士，授职编修前，任河南学政。

陆朗甫

吴江陆朗夫中丞燿外任时，母已年高，上谕知之。初选大理府，为改登州，升西宁道，复为调运河。及为方伯，母夫人以痰疾，颠狂益甚，必中丞侍侧，少息叫号。乃上疏陈情，即蒙温纶垂允。纯皇帝之推恩锡类，体恤臣工，史书未之有也。令甲文武官员，凡亲年七十，虽有次丁，许陈情终养，自乾隆朝从湖南巡抚陆燿之请始也。

计甫草东、顾茂伦有孝、潘稼堂耒、吴汉槎兆騫，皆吴江人，皆以诗笔雄视当世，皆落拓无所遇，其郡人翁小海返慕典型，因画像以示乡里。元和顾涧菴学博有《松陵四君画像记》。

徐虹亭

吴江徐虹亭、秀水朱竹垞二人，少负才名，定交辇下，同被征，同入史馆，相宅同居。虹亭就征之日，为友绘《枫江渔父图》，竹垞题诗，有“惊起沙鸥莫相笑，黑头未称作渔翁”之句。又填《摸渔子》词，前调云：“怕白水捞虾，红栏斗鸭，与尔便无分。”后调云：“料八测塘边，三高祠里，让我醉眠稳。”既而竹垞滴官，虹亭亦言归所居。虽壤画江浙，然百里邮签，朝发夕至。一舸往还，互商旧业。白头二老，隐系东南文献之传，后生望见者，咸以神仙目之。徐、朱本姻戚，虹亭七十时，竹垞往祝，因命工为《二老垂纶图》。余最爱王阮亭大司寇一绝云：“十载吴江狎钓丝，笔床茶具似天随。朝来宣赐蓬池上，却忆鲈乡亭畔时。”

陆朗甫

陆朗夫中丞抚楚时，会总督阅兵抵长沙，直入巡抚厅中，见公午食皆菽乳菜蔬，讶之，答以天久不雨，斋必变食，故如此。总督瞿然詈其奴曰：“此来传舍，酒肉如山，何不以祈雨告耶？”返行辕，丰腆悉撤。时总督为满洲特升额公，人谓特公善改过，而益叹公之清德之感人也。

姚吴氏

吴氏女，为吴江集贤里人。年十八，字同里前姚里桂生。生病，羸术者云：“当婚而愈。”女乃请于父而往就婚，生不能起拜，女独谒舅姑，侍汤药二十许日，生遂逝。舅姑欲夺其节，

妇欲闭户自经，乃听之。生之仲弟生子甫晬¹，妇即乞以为嗣。未几，子死。仲复举子，妇又嗣之，则又死。妇泣曰：“天乎！终不使我有后于桂氏耶？”遂悒郁成疾，而舅姑与仲妇复重苦之，竟以疾卒。太仓陆桴亭先生道威为之作《贞妇叹》，见集中。

赵山子

赵运，字山子，明瓯宁令庚子。顺治八年举人，善文，工诗。初在慎交社，与同邑吴兆騫、计东并为昆山徐乾学所推重。既而与顾有孝钞选诗文，名播海内。屡上公车不第，就选江阴教谕，卒。所著有《雅言堂诗》《客燕草》。

计甫草

计东，字甫草，号改亭，家盛溪。幼奇慧，即能诗歌，辄惊其长老。操笔千言立就。读书讲学，风趣异人。尝著《筹南五论》上阁部史可法，可法奇之。顺治十四年，举于乡。三试春官，旋以辛丑诖误，折挫坎壈。公意气溢如，有祢衡之风。尝客邕中，访谢茂秦葬处，为封土三尺余，立碣表志。至顺德，忽忆归震川尝佐此郡，有《厅记》二首，求其遗迹，不可得。西向再拜，流涕被面。游中州，拜卢柟墓。过梁国，慨然吊古，为之流泪。游泰山，至日观峰，见丰碑屹立，大书“人子不登高、不临深”，即杖策而下。还吴，见黄孝子向坚，自称弟子。轶事尚多，此特其最著者。其失路之怨、幽愤之思，时不可掩，竟以是卒，年五十二。有《改亭集》。

1 晬，古代称婴儿满一百天或一周岁。

吴汉槎

吴兆骞，字汉槎。少有隼才，童子时作《胆赋》累千余言，见者惊异。入慎交社，名闻远近。为人简傲，不拘细行。顺治十四年，举于乡。科场事发，遣戍宁古塔。塞外二十余年，日与羁臣逐客饮酒赋诗，气壮而才丽，诸大帅皆敬惧之。康熙癸亥，献所作《长白山赋》，圣祖览而称善。友人大学士徐元文捐金赎之¹，得释归。逾年，卒。所著有《秋笈集》。墓在尧峰山薛家湾。

徐电发

徐钜，字电发，号虹亭，家城西，有松风书屋。年十三，吟诗有惊人句，兼通古文。及制举业，声誉日起。尝两至京师，公卿皆折节与交。康熙十七年，会开博学鸿词科，大司农梁清标荐之，召试授翰林院检讨，纂修《明史》。后值翰林外转，与朝贵忤，黜归。公好远游，历浙闽、江右、两粤、中州，所至留题，人珍传焉。上南巡，赐御书，诏复原官，卒不赴。筑丰草亭于园中，与远近耆宿日事觞咏，悠然忘老。公少时所刻《菊庄诗》，朝鲜贡使仇元吉以饼金购去。著有《词苑丛谈》《本事诗》《南州草堂集》等书。

陆朗甫

陆燿，字青来，号朗夫，家芦墟。人少立志，以古人自期。举乾隆十七年乡试，旋中癸巳明通榜，授内阁中书，累迁至湖南巡抚，以劳瘁卒于官。公律身严正，自奉俭约，门无私谒，馈送屏除。初至长沙，夜梦赋诗云：“能开衡岳千重云，但饮

1 《乾隆苏州府志》作“友人大学士宋德宜捐金赎之”。

湘江一杯水。”至今士民诵之。其学有体有用，自经术以及星纬、輿图、名物、象数，靡不探索。著有《切问斋集》《朗夫诗编》等书。

王元芝

王锡瑞，字元芝，号应庐。其先由山左迁吴江。成童即以读书砥行，与诸弟相勸。年二十三，补诸生。嘉庆庚申、辛酉，公及弟锡泰先后举于乡，时以为荣。公益自敛，六蹶公车，归里授徒，从游者日众。论文咸有本末，不事雕绘，务求先儒理法，故得其指授成名者数十人。居恒服御俭约，一茧袍十年不更。手植花木，静验其敷荣。尝指示门弟子曰：“凡物必先养其本根，而后枝叶茂。”因颜其居曰滋树斋，闭户著述其中。然以析居去亲舍略远，时往省视。虽癸未大水，路断人行，日必再至。旋居父忧，哀毁异常，丧葬尽礼。及病将卒，遗命以未受朝秩，用儒服殓。性雅好吟咏，于苏诗用力特深。积功三十余年，成自注读本若干卷，藏于家。

蔡卫川

蔡淇，字卫川，号竺溪。其先由浙湖迁居吴江之黎里。世有潜德未耀，至公始以科名显。公性慧好学，少从名师游，以郡试第一补县学生，中式嘉庆庚午举人，两上公车不售。途中车覆伤唇，创甚，得异人授以敷药而愈。遂以亲老，绝意进取，循倒纳贖，加太常博士衔归，为莱服承欢计。旋居父丧，尽礼尽哀。事母尽孝，与兄联宅，庭户交通，便母往来。两宅间竞相迎养，时进旨甘，人争羨之，比之晋时陆氏机、云之住东头、西头云。道光癸未夏，吴中大水，公体母意，捐贖财数百缗以襄赈务，大吏嘉其善，为请于朝，得纪录一次。其他调恤贫病，称贷姻娅，始终不稍懈。甲午，以疾卒。公雅度春容，遇人无

主角。通籍后，时与同年李子仙、毛春门诸先辈排日为文字欢，间事吟咏。著有《挹青楼》《媚学斋》《七逸居》诸诗稿藏于家。以上两则见《俞少甫先生稿》。

方 言¹

方言土语，不但有远近之别，且有今昔之殊，此理殊不可解。相传河南地居九州之中，其音较正。吴越两境，大不相同。前贤有《吴谚集》《越言释》之刻，读之可以概见。

今以吾邑江、震两县论之，其方言语音，有足述者。凡字之属在九永者，或开口呼，从二十一个韵，如“大”音如“惰”之类。

又有呼字母之切者，如圆为突栾之类。然恒谈亦颇有所本，而不关臆造者，如电谓之霍闪，见顾云诗中。蟪蛄谓之蜚，见《田家杂占》。纳舟者谓之浜，集嬉游谓之孛相，见黄山谷《与范长老》²称：“韩十逐日上学，且护其薄相耳！”擘橙橘曰扒，见《广雅》。隐迹曰畔，见陈诗谣。田畔曰田头，见《后汉书》。不正曰差路，见唐诗。小名冠以阿，见《晋书》及《三国志》。太甚为忒煞，见《朱子答敬夫书》。指目曰个般，曰这个，类省作个，见《朱子语类》。应词曰嘎，见《庞居士集》。事烦无条理曰磊崢，见赵宦光《长笺》。石声曰蹠蹠，见《通志》。浣衣曰汰，见《说文》。滴水曰滹，见《广韵》。浮水曰余【余】，见《桂海虞衡志》。乳曰乃，见《真语类录》。问语曰那，见《世说》。不曰弗，不慧曰呆，见《唐韵》。粗蠢曰笨，见《宋书·王徽传》。指人曰伊，见《诗经》。称我曰依，见《湘山野录》。

1 此条原在“陆朗甫”条目后，“姚吴氏”条之前。

2 黄山谷，即黄庭坚（1045—1105），字鲁直，号山谷道人，晚号涪翁，洪州分宁（今江西修水县）人。北宋知名诗人，乃江西诗派祖师。书法亦能树格，为宋四家之一。

满足曰彀，弓满也，见《论语》。以肩举曰捷，出《史记》。种苗曰蒔，热酒曰汤，见《韵书》。以磋腌物曰盐，出《礼记·内则》，去声。两手取物曰掇，见《易经》。盖物曰礮，亦曰匭，见《汉书》。十五日曰月半，见《礼记》。饭粒曰米糝，见《庄子》。整理曰修妮，见《唐书》。众多曰多许，见《隋书》。热不透曰温噉，见《楚词》。物相类曰一样，见《汉书》。畏惧曰寒毛卓卓竖，见《晋书·夏统传》。人死曰过世，见《晋书·秦符登传》。

又有异古异他方而义稍通者。看曰望，藏曰圪，取深穴意。忍曰熬，取煎迫意。置物曰安，平稳意。指物曰那，犹言那个。儿戏曰蛮皮，顽声之转，鄙俗之意。相谑曰吵，取调笑意。又曰楼，曰取笑。门之关曰闩。睡曰困，取偃伏意。睡声曰昏涂，天明曰天亮，能干事曰在行，亦曰在道。骗人曰串局，受骗曰上党。帮话曰插嘴，亦曰搭嘴。可怪事曰诧异事，可喜曰利市。物完全曰囫囵。晦气曰不色骰，亦曰倒运。得利曰赚钱。聚小成大曰趸当。些微曰粒屑。安身处曰窠坐。此处曰该边，彼处曰个边。日曰日头，月曰月亮。男人揖曰唱喏。首饰曰头面，家伙曰家生。数钱五文曰一花，取五瓣意。不清楚曰腻夹夹。天微明曰黑朧朧，消人夸张曰摆架子。

又有异他方而义难通者。执物曰当，按物曰揞，掷物曰豁。稠密曰猛，妄语曰造，痴曰铎，怒曰动气。货之低曰邱，亦曰邹。刚才曰姜才，纠缠曰累堆，不洁曰喇塔，有能曰本事，事难曰尴尬，阻事曰打破。

句多事揞格喇若名不正者。呼曾孙为玄孙，呼父为阿伯，呼神道为佛、为菩萨，呼医生为郎中。

有讳言而变其名者。讳散，呼伞曰竖笠。讳极，呼屐曰木套。讳死，呼洗曰净。讳滞，呼箸曰筷。

有借喻者。帮闲曰篾片。伺隙加害曰踏沉船，武断曰横撑船。插入事中曰夹篙撑。附和曰一窝蜂。无用曰水统蟹。

醮钱共饮曰扛柜。许物不偿曰拔短梯。轻易举事曰掬木梢。外貌好曰金漆马桶。无知曰黑漆皮灯笼。

有音异他方而非古者。税为世人、为迎賒、为沙蛇、为茶伤、为丧二、为膩忘、为忙孝、为好让、为酿觉、为阁热、为业物、为末铁犁、为铁搭枇杷、为弼杷症、为愕吹、为痴。

又有音异而字亦讹者，围为圩，都为保，鄙为畲，愈为越，太为忒。

此外尚有音不同而义无可考者，则鬼如举，归如居，跪如巨，亏如驱，椅或读为于据切。小儿毁齿之毁，读为许声。皆以相近而致误者也。

其余字音为合郡之所从同者，姑不备录。

垂虹识小录卷四

张渊甫

吾邑张渊甫先生，名履，为句容教谕。士习素称窳惰¹，先生至，严设月课，为定法程，诸生有不赴，面加训督，无敢视为具文者。暇至街巷，辄令门斗²携短铁链从其后，见有妇詈姑、子忤父、幼逆长者，即以链系之，必伤其自悔乃已。由是，邑中之不率教者，咸惧为先生知。每祠宇间赛神演剧，或涉淫褻之戏，立拘班首，桁³杨警众。先生之言曰：“朝廷设立是官，本以正饬风化，文章其末耳！”始而邑宰绅士惮其严正，皆侧目，而闾里小民咸啧啧颂先生之德不衰。后邑宰以折粮增价几激民变，赖先生一言而定。于是，上游咸器重之。夫教谕在今日特闲曹末秩，无足重轻者耳，而先生独为上官钦企、下民仰望如此，岂非在自为之哉！是真能于卑官冷署自行其志者矣。

1 窳惰，yǔ duò，亦作“窳惰”，懈怠懒惰。

2 徐珂《清稗类钞·胥役·门斗》：“旧称为学官供役者曰门斗，盖学中本为生员设廩膳，称门斗者，当是以司阁兼司仓，故合门子、斗子之名而称之耳。”

3 桁，háng，古代用于加在囚犯颈部的一种木刑具。

杨硕甫

杨硕甫，名艺，吴江平望人。少时遇松仙，授以道法。松仙者，相传为明豫章宗室成道者也。硕甫遂能前知，言皆奇中。瞿公稼轩深器之。乙酉，偕往广西巡抚任，多所赞画。庚寅冬，王师下桂林，瞿公不屈被难，硕甫哭于定南王孔有德军前，请敛其尸，凡四日夜，欲继以死，始得请，并敛同殉难诸公。一时义声动三军。瞿公孤孙为军中劫去，勒其财物。硕甫时医术游于孔王及巡抚王一品之间，力争脱之，终护其丧归葬虞山。隐居三十余年，卒葬雪湖之滨，人称雪湖先生。平望范湘舫用源，旧藏陆清献公手书《贻杨高士诗序》，既许以争曜日月，而又惜其遇异人而未遇濂洛之儒。顾南雅通政驳之，谓“孟子恶杨，为其无君也；恶墨，为其无父也。假令其道无害于事君、事父，虽与圣人异趋，圣人犹无恶焉”等语，字数较多，因撮其序跋中大略记之，留备文献之征，并待有识者论定焉。

瞿忠宣公之得敛也，由于杨高士之哭请，非特《高士传》中言之。即瞿文昌一作昌文《粤行纪事》亦惟曰：“收尸敛葬者，杨君硕甫一人。”其复【后】李定国亦曰：“祖父死节，赖义友杨艺槁葬。”又瞿公子元锡撰《始安事略》亦言：“杨艺请于有德敛公”，又称“艺为礼部主事，盖忠宣当日曾荐于永明王，授此职”。可补前传所未及，而野史乃有僧性因上书定南王请敛瞿、张二公事，传其书稿。且言杨君初请不获命，及性因书入，定南乃许之。杨君因得经纪敛事，似其事皆出于性因一纸之力。初为疑信参半，既见王应奎《柳南续笔》，知性因即金堡，在永明王，遇事敢言，气陵朝上，后被劾廷杖，遣戍清浪，遂出家为僧于茅坪庵。因亦上书定南王请此事，遣侍者诣王府，将投书，遇艺，知已得请，遂不果上。后性因以其书遗瞿

氏子孙，瞿氏梓行而不及艺，故两粤吴楚之间，但知敛瞿、张二公者为堡一书之力，而艺竟泯矣。又按，兵部尚书总督学士张公传略有云：“二公既尽节，僧性因上书有德，未报。而吴江义士杨艺踊哭收其尸，具衣冠并殓葬于北门之园。”拾二公囚中与性因倡和诗，授瞿公孙昌文，还属性因序而跋之，曰《浩气吟》。”且钱山人所撰传内言：瞿公子元锡，以其女配硕甫之子一宁，合而观之，始知性因《偏行堂集》中果有此事，特未上之定南。野史不察而误传之耳！

顾仲容

明末范石甫孝廉《朋旧尺牋》十册。考《苏州府志》，石甫名公柱，长洲人，为文正公裔孙。崇祯壬午举人，所交皆名流硕德，后多成大节者。石甫于诸公尺牋后各缀数语，余择其有涉遗闻轶事、可备文献之征者，摘录于此。尺牋文繁，不暇写出也。松陵顾仲容与予同隶长庠，午未连掇，任奉化令，聘吾友皇子汝升往，归而述其实心爱民，方切喜慰。未几，变作矣。又未几，传闻遇变而歿。近知仲容于唐藩建立时，得君甚专，升广东御史，挈家而往，未尝歿也。但未知唐藩避位后，仲容存歿若何耳！按：顾仲容名俊，亦作之俊，于国朝顺治二年，大兵下杭州。闰六月，宁波钱肃乐起兵守御，之俊应之。明年六月，鲁王航海入闽，之俊从亡，晋官御史，以刚直著。后入粤，从永明王，死于肇庆。见吴愚甫《复社姓氏传略》所引《先辈小传》《钱肃乐集》《同里先哲记》。

吴汉槎

吾邑吴汉槎先生，意气兀傲，凌厉无匹。尝与朋辈同出县东门，忽顾汪钝翁述袁淑语曰：“江东无我，卿当独秀。”傍人为之侧目。此所谓名士习气也。其子振臣，撰《宁古塔纪略》

一卷，志其父出塞入塞颠末，亦及其地之山川、城郭、物产、土风。书中称其父顺治丁酉秋获隼，变起萧墙，横被诬陷，以戊戌八月赴戍宁古塔。其母葛，日夕悲哭曰：“妇当与夫同患难，奈何不去省视？”其祖燕勒公哀而壮之，为料理行计。庚子冬，自吴江起行，辛丑二月五日到戍所。振臣以康熙三年甲辰十月生于宁古塔，至辛酉十八岁，乃随父归，葛已抱孙入关矣。至赐环之事，振臣言：“同社诸公如宋右之相国、徐健庵司寇、立斋相国、顾梁汾舍人、成容若侍卫，固不忘故旧，而其中足趼舌敝以成兹举者，则大冯三兄之力居多。”又言：“洎乎《长白山赋》入，天心嗟叹，温诏下颁。”卷首张尚瑗序，亦言：“汉槎《秋笈集》，昆山司寇公为刊行。更以所著《长白山赋》进呈御览，并辇下诸故人、大僚醴资代赎，遂得以辛酉入塞归。甫四原钞四下一字漫灭，不知是年是月。疾卒。”旧传汉槎归后即没，或云在京，或云在途溺水，其说不一。若《纪略》只云：“文人薄命，溘焉捐馆”，未著何年何地，而张《序》则已明言归后疾卒。又杨大瓢《书中记》：“汉槎还，病且死，犹思食宁古塔所居篱下蘑菇”，则非在途溺死可信。惟冯大三兄振臣但言“壬子拔贡，在京考选教习”，迄未详其里籍名字也。余前检得其《西曹杂诗自序》有曰：“望慈帷于天际，白发双悲。忆少妇于楼头，红颜独倚。”可为呜咽！

吴仲廉

《苏学景贤录》载：吴简，字仲廉，吾邑吴江县之姚墩人。元时乡试不第。有吏役之版筑，简儒衣儒冠操作，人笑之。简曰：“吾儒者，岂释是服耶？”寻应荐授郡学训导，迁绍兴路学录，以老自逸。明洪武初，征诣曹试，以富民论。简所奏，愿疏渠通溉灌，课粟多者第赏劝之。授昆山主簿，寻疾罢。所著有《诗义》《论语提要》《史学提纲》及《守约集》，凡数种，年

八十三卒。

某节妇

吴江某村有酒佣妇，事姑甚孝，结褵甫一载，夫往芦墟酒肆。庚申秋，粤匪至芦墟，与一戚同被掠，其夫以不从见杀，戚乘间逃归，具以事告其家。妇闻之，痛不欲生，血泪俱尽。姑转慰劝曰：“汝夫虽死，尚有薄田数亩，足以自守，不夺汝志也。”妇佯诺，自是绝粒不食，数日喉尽肿，竟以饿死，时年仅十八。殓之日，吊者数百人，无不叹异。惜传者逸其姓氏云。

沈 韶

明吴江沈韶，年弱冠，美姿容，尝和萨天锡韵，题《吴中》二首，为时辈所称。洪武初，避征辟，泛舟游襄、汉，次九江，登琵琶亭。月下仿佛闻歌声，有司马青衫之感。明日，复往，徙倚亭中，有丽人冉冉而来，呼韶同茵而坐曰：“妾伪汉陈主婕妤陈婉娥也，年二十而死，殁于亭侧。”命侍儿钿蝉设酒肴，歌《念奴娇》二阙曰：“昨夕郎所闻也！”口占一律，赠韶曰：“凤舰龙舟事已空，银屏金屋梦魂中。黄芦晚日空残垒，碧草寒烟销故宫。隧道鱼灯油欲烬，妆台鸾镜匣长封。凭君莫话兴亡事，泪湿胭脂损旧容。”韶答诗云：“结绮凌春万户空，几番挥泪夕阳中。唐环不见新留袜，汉燕犹余旧守宫。别苑秋深黄叶坠，寝园春尽碧苔封。自惭不是牛僧孺，也向云阶拜玉容。”韶与留连半载，谈元末群雄兴废及伪汉宫中事，历历可记。临别，以金条脱为赠。同游梁生作《琵琶佳遇歌》。

周季侯

周侍御，名宗建，号季侯，吾邑吴江人。明天启时，三疏发逆，不为群凶所容，逮狱。时备极惨毒而毙，讣音尚未至家

也，有舟子于清江浦接一秀才来雇舟，许偿一金，问姓氏暨所从来，答云：“我周季侯也，自京师出。”因问吴中诸大臣逮京状，秀才颦蹙曰：“俱死甚惨！”更问魏监，秀才曰：“伊恶贯满盈，不久被显戮矣！”至吴江，秀才曰：“尔即相随往我家取金。”舟子如言，至一大家门，秀才先入，待久不出，舟子频声促之，一管家出，问何因来此，舟子俱言故。管家曰：“此吾主人名字，渠前被逮至京，今存亡未卜，安有附舟之事？”正喧嚷间，夫人急出问故。管家将舟子语备述，夫人曰：“良然。昨夜半梦侍御来家，自称逮京后备极苦刑以死，上帝鉴其忠直，俾为神苏州。今自清江浦附舟归，许以舟资一金，明晨来取，当与之，不可令我食言。”夫人言未终，号泣不胜，举家闻之，皆哭。舟子亦哭，与舟资，固不受。夫人曰：“侍御生而特介，汝不受值，是令其死后有诺责也。”舟子始肯受，谢曰：“不惟侍御精忠贯日，夫人亦且大义凛然，一门正气乃尔！”因再三叹息而去。又季侯令仁和，究心民隐，县有神君之称。尝出行，忽怪风起，吹所张盖，卷落纱帽翅。回县，执盖人请罪曰：“小人因张清风，遂至冒触，甘受罪。”季侯思之，久曰：“我不尔责，令捕差二人各予二金，往拘张清风，限三日解案。”差莫解所从，届限无获。两人商曰：“捕风捉影，世无此理。然明府德信素著，今再不能拘，何以复？”其一人曰：“且沽酒宽怀，更作计耳！”乃登楼共饮，闻席中有谈某笃疾垂危，一人曰：“若请张青蜂去，必有生理。”二差因细问张青蜂状，潜往其家，值张他出，因拘其妻至县。季侯一见，正色讯曰：“汝夫平日作甚欺心事？”妇曰：“渠本非吾夫，吾夫因病，请渠调治。渠见妾姿容，怀不良意，潜投毒药，致夫身死。寻复谋娶妾身，妾初堕计不知，一日渠酒后自吐真情，尔时妾欲免死，私念伸冤无人，故隐忍偷生至此。今遇天台，夫冤可伸。但渠今往某处，若待其归，闻风必逃，须就某处拘之。”季侯如言，

命前差往拘，未几，果来。一讯即服，遂抵死。时一县咸称快焉。

某主簿

明三吴大旱，吴江令赵梦麟命主簿入乡勘荒，至村落，投宿车溪寺中。寺久名饶裕，因主之。僧中一少年，号傅衣者，见门役而悦，诱与为欢，约以丙夜。门役憎其空手来，故给曰：“吾榻设在房之南牖，汝漏下见就可也。”不知此役已先说簿：“后窗虽邃而湿，吾当移彼。公老人，可卧南牖以纳凉。”簿喜从之。比夜饮，潦倒就枕。更深后，傅衣者洪醉¹入室，迫床抚尻，乘锐深捣。簿秦人，老岁荐也。梦中受创，疾呼。此僧狂走去，诸阁黎²皆惊起。簿大怒，谓：“何物铁锥划吾肠？”絜群髻，将诉之令公毁寺治罪。髻震惧，乞哀，尽出所蓄，不满数则以粟足之。簿满载归县，赵令已先知情状，迎笑曰：“三长官暮年能以后庭博多金，可贺也！”簿不禁羞愧，叩首而已。吴江人因作对曰：“老主簿巧献屯田，荒岁供粮加倍入；痴和尚误钻库穴，祖传衣钵尽情抛。”盖以屯为臀，以库为裤也。

俞羨长

松陵俞安期，字羨长，农家子也。幼时父令送秧，踏死一蛙，告其父曰：“我不拔秧矣！”父诘其故，答曰：“顷踏死一蛙，挺身如人，因想人死犹蛙耳！欲求一出类之人，惟有读书做官，死后不至如蛙之湮没无闻也。”父异其言而无力延师，遂游于村塾，听其句读。一日，忽动游学之思，纵步而至太仓

1 洪醉，大醉。

2 阁黎，亦作阿阁梨。梵语的译音，意译为轨范师，可矫正弟子的行为，为其轨则模范，是高僧的敬称。

州，入一高门。闾人问之，云：“欲借书读。”闾人以其村童，拒之。适主人送客出，询知其故，遂留而俾师教之，乃王凤洲也。后学日进，携至都中。一日，虞人获鹿，诸大老竞咏之。凤洲诗先成，结句苦不佳，改削再四，终不恰意。羨长曰：“余有二语，似可用。”凤洲未之许，诸老使吟之。羨长曰：“虽无头角异，不与犬羊同。”众共称赏。

郑 媪

《夷坚志》载：淳熙元年，吴江长桥侧居民郑媪，年八十余，独处茅檐之下，日丐于市，人颇怜之，敝衣粝食之外，蓄其剩余，藏于瓶，欲以画观音像。夏四月，邻火延烧，所积一空。明日，泣理故处，于烬中得瓶，略无损缺，而钱自镕成宝像，高一尺许，冠衣璎珞、杨枝净瓶皆具，工制巧妙，塑匠惊叹以为莫能。及巨室王氏取去，营室严奉，留媪事香火，寿过百岁。绍熙中，媪犹存。

周秀卿

明正德乙亥，吴江知县周秀卿伟，耽嗜烧酒，终日昏睡，行事颠罔可笑，人目为周烧酒。逾年病卒，其父移柩至葑门，设奠焚纸钱，灰飞着棺。棺中火，遂大发，亟救，乃息。而其尸已烬，盖凡酒皆火，而烧酒之害尤烈，酒毒郁蒸于棺中，偶得火气，内外即应发也。

朱长孺

松陵朱长孺鹤龄有《猫说》，借贪猫以喻墨吏，亦有激之言说曰：“余家多鼠患，藏书多被啮蚀。邻家有猫，乞得之，形魁然大，爪牙甚钜，始至，群鼠屏息穴中。私喜，鼠患自此弭矣！迨月余，患复作，终夜咋啞有声。余怪而伺之，则猫与鼠

甚比同寝处，若倡和然。诃¹其故，猫性贪，嗜鲍鱼腥。中厨所庖，见必窃食。鼠觉其然，凡猫之所嗜，鼠必预储以遗之。猫啖而德之，遂一任所为。鼠始以形之大也而畏猫，既以所嗜尝猫，终则狎猫、豢猫，利有猫之出而为患也益无忌。余乃叹曰：“甚哉贪之毒也！使猫无所窃，鼠其敢尝之耶？猫既先鼠为窃，其能禁鼠之群窃耶？畜猫本以捕鼠，而今反以导鼠，且昵之为一，是鼠魁也，曷若去鼠魁而群鼠之患犹或少弭耶！”乃命童子锁其项、繫其足，数而扑之，沈之于交衢之溷。

史仲彬

明建文帝首至吴江史仲彬家，题诗清远轩，云：“玉蟾飞入水晶宫，万顷琉璃破晓风。诗就云归不知处，断山零落有无中。”“画鹢高飞江水涨，老渔倦唱夕阳斜。秋来客子兴归思，船到吴江即是家。”又三至吴江，有《满江红》词云：“三过吴江，又添得、一亭清绝。刚占断、水光多处，巧依林樾。漠漠云烟春昼雨，寥寥天地秋宵月。更冰壶玉鉴。暑宜风，寒宜雪。臞庵石，山依缺。垂虹左，波涛截。正三高堂畔，旧规今别何。但渔翁垂钓好，漫将柳子新吟揭。信登临，佳兴属彭宣，能挥发。”又题仲彬别室《水月观赋》，诗曰：“细雨披杨起绿烟，水波如织影迷帘。午钟何处偏来耳，不似西宫奏管弦。”

叶陶氏

《近峰闻略》：嘉靖壬午，吴江举人叶伯惇妻陶氏贤淑，有乳媪欲盗其金，暮置毒茗中，将饮之，适叶醉归，索茗甚急，进饮之，暴死。媪给其父曰：“无疾，脱阳耳！”父丑其淫，竟殓之。后年余，纠一婢，俟陶寝熟，以布带绞杀之，则又给其父

1 诃，音 xiòng，侦察，探听。

曰：“堕私胎，惧露，故自尽。”父益不欲彰，亦就殓。时有小婢，观其状甚悉。逾时，媪殴其婢。具以白父，系置于法。

朱长孺

朱处士鹤龄，字长孺，吴江人，明诸生。甲申后，绝意进取，肆力于古，尤专经学。以朱子掎击小序太过，乃集诸家说疏通序义，为《毛诗通义》，与陈启源之《稽古编》互相订正。以蔡氏说《书》未精，撰《尚书埤传》。以胡氏传《春秋》多偏见凿说，乃合唐宋以来诸儒之解，撰《春秋集》。又以杜氏注《左氏传》未尽合，俗儒又以林注乱之，撰《读左日钞》。所著诗文曰《愚庵集》。昆山顾亭林《尚书埤传》诗有云：“白首穷六经，梦寐亲皋伊。百家纷论说，爬罗殆无遗。论及禹贡篇，九州若列眉。上愁法令烦，下慨清风衰。君今未大耋，正可持纲维。”盖为亭林之所倾倒者。《松陵文献》称其遗落世事，晨夕一编。行不知路，坐不知寒暑。人多嗤之曰愚，因以愚庵自号。专精若此，宜其直造古人欤！

朱不远

朱处士明德，字不远，隐居烂溪之滨，治经义有声。生平外和内介，不为矫激之行。晚年学道，有得于性命宗旨，至老不衰。有《纪略》一书，记明末国事甚悉，署名《勾吴外史》，遗诗见《松陵集》中。鼎革后，《广宋遗民录》以见志，顾亭林为之序，略云：朱君与仆同郡人，相去百余里而未尝一面。今朱君年六十二，仆又过之五龄，一在寒江荒草之滨，一在绝塞重关之外，皆患乎无朋。君采辑旧闻，得程克勤所为《宋遗民录》而广之至四百余人，以书来问序于余，此殆所谓“一方不得其人而求之数千里外”者也。

潘力田

潘节士怪章，字力田，吴江人，日讲起居注、翰林检讨次耕耒之兄。与同邑吴赤溟炎草创《明史》，以实录为纲领，若志乘、文集、墓铭、家传，凡有关史事者，一切钞撮荟萃，以类相从，考核精详，为《国史考异》一书，钱牧斋极为称许。又著《松陵文献》。后与吴赤溟同死庄廷铤书案之难，顾亭林为书二子之事¹，略云：“吴江有吴炎、潘怪章，皆高才生。国变后，年皆二十以上，并弃诸生，以诗文自豪。既而曰：‘此不足传也，当成一代史书，以继迁、固之后。’予在淮上，潘子刻《国史考异》三卷示予，予服其精审。及予之昌平、山西，犹一再寄书来。会湖州庄氏难作，庄名廷铤，尝得故阁辅朱国桢遗稿，编为《明书》，凡百余帙，颇有忌讳，而列吴、潘二子于参阅姓名中。寻为人首于朝，所杀七十余人，而吴、潘二子与其难。当鞫讯时，或有改词以求脱者。吴子独慷慨大骂，官不能堪，至拳踢仆地。潘子以有母故，不骂亦不辩。其平居孝友，以古人自处。则两人同也。”

朱节妇

朱节妇邱氏，吴江儒家女，增广生朱路妻也。婚时年十九，其夫锐意攻苦，氏亲操井臼，篝灯佐读，无倦容。夫在馆遘疾，亟迎归，谨侍汤药，累月衣不解带。夫歿，号恸绝粒，将以死殉。舅姑语以“抚遗孤、奉二老，与死孰重？”乃勉进水浆，时结褵仅三载矣。舅姑既高年风矬，又丧子伤悼，赖氏供旨甘，竭力奉养，忘衰耄焉。其子绪，始周辛勤抚育，得早游庠序有声。又为子婚娶，择吉壤以葬其夫，皆鬻簪珥、事纺织，自为

1 所述事情经过与本书卷七略同，可以参照。

经理。岁时祭享丰洁，恒哀泣如初诀时，闻者惨切。凡苦节三十三年而终。迨雍正间，恩诏屡下，事闻，得督抚学政合词请旌。制下，报可，采行实载《一统志》，建坊祠祀，悉如例。戴雪村赞曰：“余读苏州郡乘，节孝妇独吴江为多。盖邑水乡，无溪山花柳笙歌游冶之场，俗尚俭嗇，薄朱粉，寡滋味，尤勤织布，虽富贵家庭，列纺车机杼以为常。敬姜¹曰：‘民劳则思，思则善心生’，岂不然哉！抑自雍正元年以来，屡诏褒举，节孝行义，政治澄清，民间一善无匿者。呜呼盛矣！往时官司黷货，胥吏因缘为奸，必富家大族节行始上闻，盖旌者节必不苦，而节愈苦愈湮没弗传，礼乐百年后兴，盖明人伦、励风化若斯之难也。若朱节妇，尤卓然矜式哉！”

徐烈女²

徐烈女，吴江盛泽镇卖缁人女也。幼字同里仲某，仲少孤，依外舅居，既而患痼疾归，久而弗瘳，仲乃告其季父，俾告其外舅，请更字女。女自其婿之归也，即茹素不御膏沐。及是，遽自经，救之苏，呜咽告父曰：“即不欲见死者，愿长侍耶，以终几年。然亦不忍以衣食累耶。”父乃为置织纆之具于楼，楼之上，终日机声轧然。父嗜酒，夜贩缁归，女为治酒馔，俟父寢，然后敢寢。有小妹，教之女红。妹既嫁，遂独处。有说之归空门者，弗应。后婿疾日殆，其季父来，又告曰：“若女诚贤，然所以守死不变，徒以婿存耳！今必不生矣，吾将为若女择所归。”父以语女，女默然，仍夜治具如故。更阑，登楼自经于

1 即“敬姜犹绩”之典故，意思是富贵而不忘根本、不求安逸。语出《国语·鲁语下》。春秋时文伯歌已为鲁相，其母敬姜犹纺绩不辍，歌问之，敬姜曰：“今我，寡也，尔又在下位，朝夕处事，犹恐忘先人之业，况有怠惰，其何以避辟！”

2 原稿在此条之后的人物传，不再将人物姓名另列作目名。

机侧，救之，气已绝。婿之季父驰至，见尸而叹曰：“吾为女计，怜汝耳！不虞汝遂至此，汝今真仲氏鬼矣！”女忽张目，一视而瞑，年二十七。其婿亦即死。康熙七年事，见《印雪轩随笔》。

明 赵廊，字伯式，邑庠生。倜傥有节概，不畏强御。有表戚侏犯私盐，令欲置之法。廊力保之，得末减¹。祖宽，故居售他姓，其门首会元坊改为进士坊，白于熊令开元，复其旧。崇祯甲申，遇兵，不屈而死。子湜，字子正，有父风。见《意中山房集》，下同。

明 庞鸿模，字范中。天资近道，又善涵养。有兄二，事之和敬交致，因颜其室曰“翁和”。析产后，兄鸿标欲以己产让鸿模，力辞。未几，鸿标病革，出一契，谓弟曰：“当受无嫌矣！”鸿模即投契于火，以绝兄念。鸿标卒，鸿模家益窘，就馆于严舍。会侄某与贵戚讼，力为解劝，并涕泣而道以骨肉不可戕之至情，事得弥缝。晚年，养益深。婿顾时行尝语人曰：“吾为婿二十年，未尝见吾舅有怒容妄行。”皆实录也。鸿标，字圣衡，乌程邑庠生。有经济才，读书常忘寝食，年甫三十，赍志以卒。

明 顾祖燕，字公诒，郡庠生。为人浑厚谦恭，安贫守道，乡党共敬之。

明 马而锡，字晋公，秀水邑庠生。家素丰，以讼倾尽。倾之之仇，不宿怨，庆吊如故。性和柔谨²，无嗔恚。人无贤愚贵贱，尽善视之。善训人子弟，延者踵相接。父修龄，字载德，性慷慨好施，尝建大木桥于市之阔港。后值兵至，奔窜得全者无算。

国朝 龚兆辰，字民瞻。笃行好学，兼善咏诗。艰于一衿，

1 末减，谓从轻论罪或减刑。

2 柔谨，温和恭谨。

老于寒窗。尝不自满，假取著述，就正后生。与章学易交最莫逆，凡往来寻访采择，必二人与俱，时称两达云。歿年八十有奇。

朱仁熙，字万元，自号云鹤散人，县学生。家贫，性耿介，终身不入豪富门。与里中马胎良称莫逆交，由两人性情笔墨同以萧散胜也。著有《西堂草》。见《诗征》袁景辂撰传。

陈大烈，字扬之，铨曾孙。自少工韵语，弱冠后，以疾弃举子业。当严寒，雪飞入破窗中，几案皆白，僵立耸肩索佳句。夜分不就寝，从父竹溪谓曰：“儿欲呕出心肝耶？”卒以苦吟夭歿，年未及长吉，伤哉！著有《深竹轩诗集》。见《诗征》陈毓升撰传。

王彦，字圣哲，浙庠生禹陈长子。禹陈始居梅里，继迁同里恩汾桥，家本贍，以力学不事生产，晚至贫困。以研田治生，刻苦三十年，家遂饶裕。性友恭，有弟仍居梅里，往来无间。子衡中，能承亲志。邑庠生德辉，其孙也。

朱虎林，字越山，邑诸生。父克后，太学生。勇于为善，言无欺妄，多刻格言以劝世。虎林性温厚，事亲孝。自幼读书，尝依母纺绩。母歿，尝废寝食。祖子新，年高，虎林佐父欢侍左右，不忍去。父歿，哀毁骨立。中岁业岐黄，视疾不计酬否，一以利济为心。三十余年，囊无余货。晚寓黎川，喜与文人讲求诗书，深谈易理。乾隆丁酉，荐而不售。丙辰卒，年五十九。子仁熙、义熙，皆好学，有文名。以上二则见《意中山房集》。

吕本南，茂才。家有其先世文穆公墨迹行书八字，云：“飞翠鸣玉，出入禁门”，又有小字两行，漫漶不可辨。卷中有道光十年裔孙晋昭跋云：“崇祯甲戌，五世伯祖非庵公讳一经，督学中州。五世祖声王公随至洛阳，有某氏手卷，题首八字系文穆公书，遂以金易之，珍藏于家。”云云。又王右军《平安帖》墨迹，其文曰：“得足下书，深有感切，遂冀平安不暂面，王羲之顿首。”墨色暗淡，纸质亦多损坏，有“内府宝玩印”，

又有张九龄、欧阳修名印。余两印不甚可辨，其前有明敕云：“顷四明进王羲之《平安帖》，笔墨飞动，古劲圆朗，真迹无疑。敕卿等重加审定，装璜成卷，诸跋不必删去可也。宣德四年夏六月，武英殿敕。”其后有魏徵、贺知章、薛绍彭、东坡居士、苏轼、黄庭坚、放翁陆游、赵孟頫各跋。班惟志¹七言绝句一首，又有米芾、顾瑛、许衢、张羽、李和、吴宽、朱泽民、高启诸人名印。见俞荫甫《春在堂随笔》。

朱陞宣，字德升。少颖悟，读书数行下。性至孝，父复中翁出，必随侍。为文辄惊其长老，名籍甚。独与周忠介公订总角交。万历四十年壬子，举于乡。淡于仕进，笃志养亲。家故贫，而性极耿介。于当道绝无干谒，尝言：“士大夫当以不贪为宝，能安贫则能不贪。若鲜衣美食、崇楼邃宇、妾童艳姬，皆所以养其贪心，而为败德堕名之具。”故其自奉甚俭，奉亲则又志物兼备，世咸目为真孝廉云。母氏李，先弃养，哀毁骨立，以父在，恒破涕为欢。旋居父丧，不入内，不饮酒、食肉，一如丧母时。竟以毁疾卒，年五十有六，私谥孝介先生。崇祯七年，诏赠翰林院待诏，同邑叶古为树人²为之传。

顾祖奎，字元度。美丰姿，家世清华，能折节读书，为诸生，有声庠序。天启元年，举于乡。崇祯十年，选丹阳教谕。甫莅任，作《五伦箴》以训士。越三年，升福建连城县知县，以端士习为首务，民风为之丕变。其他省繇赋以宽民力，劝农桑以厚民生，严保甲以防民奸，备积贮以恤民灾，黄公道周尝作序以颂之。又明年，迁户部员外郎，时度支告匱，公独调剂得宜。出知广西南宁府，积案为之一空。平反数大狱，全活无算。时贼势益张，公闻三月十九日之变，知事不可为，北向

1 班惟志，元著名诗人、书法家，约1330年前后在世。字彦功（一作彦恭），号恕斋，大梁（今河南开封）人。

2 叶古为树人，本书本卷有传，见后。

顿首谢君恩，又北向拜谢父母恩，遂出走隆安之姚村，祝发为僧。著有《乡约讲说传》。见《春晖堂文集》。

沈汉甫茂才金渠，震泽籍。好学能文，屡试不遇。抑塞无聊之思，悉于诗寓之。有《春风庐诗集》。

吴柳塘茂才祖修，震泽人。淡于声利，一志丹铅。诗主清新，如《芜湖绝句》云：“关吏狰狞去复还，客囊颠倒在江船。书签莫怪无人检，文字何曾值一钱。”《法雨泉》云：“山颠高下势潏洄，时为琮琤听一回。世上浊波流不尽，此泉莫放出山来。”皆有为而作者。吴有仆杨清能诗，题琉璃河关帝庙，有“铁枪不为朱温死，此地如何庙寿亭”句，命意亦新。见《冷庐杂识》。

宋瑞亭大令锡祺，山东人。由教职保升县令。道光癸未宰震泽时，适水灾，劝捐办赈，挑浚河工，实心抚字，莫不爱戴。既而因事被劾，去任之日，有《留别士民诗》四律，一时赋诗赠行者百余人，最爱吴芝堂茂才句云：“临歧争把须眉认，似此清官再有无。”可想见官清似水矣。又张月庭方外句云：“方外未能工赋别，敬供禄位祝长生”，语亦有致。

叶古为树人，吴江布衣。性耿介，不随流俗。顺治二年闰六月廿五日，大兵驻吴江县同里镇，出巡。以抗薙发令，与诸生马桂徵、文学范邦宿同受戮，年四十八。殉难时，有《绝命词》云：“难忘结习强吟呻，一首诗成了此身。浩荡游魂天外去，不教碧血化青燐。”可谓从容就义矣。士林私谥毅烈。其六世孙尧莫，刊其《春晖堂集》，并绘遗像，乞唐陶山方伯作诗征题。其族人调生为赋一律云：“故国降幡出，残黎脱帻收。头颅拼一掷，毛发共千秋。大节吾宗仰，遗文后裔搜。布衣能抗志，簪冕笑名流。”

张基，吴江人，中嘉靖庚子应天乡试，例得坊金百，一日散宗党略尽。当会试，有显者欲为地，坚谢弗应。是年拟魁选，

竟落次举。值父南安守觐卒，痛弗躬殓，即以事父者事大母。再举，诣善相人，谓：“骨法当上第，而色如有沮者，何也？”行一舍，念“得毋以大母故乎？”遽返棹，大母果终其手，痛父遗言：“病作，妇视病，并瘁死。”乃叹曰：“母亦老矣！谁与朝夕定省？”步武不离，滫瀡非亲调不以进。先是，究心为已之学，与江右罗文恭公洪先往复数四。至是，得专心研之。习静坐者十三年，内外事悉委季子。尚友，绝欲，茹素。冬不炉，夏不扇，寝不胁席也。尤能为德于乡，岁大侵，赈米数百斛，属军兴族皆役，不忍独以例免，为请代于官，毁家纾之。自是，产若削矣。预刻亡日，至时跌坐而逝，几上存书数行，皆身后养母事，时年五十有九。学者私谥为靖孝先生。所著有《孝经附注》《读书疑》《独鉴广颐》数十卷，史官文震孟摭遗事，刻《吴中名贤小纪》，而京兆焦竑采入理学名臣中。见张世伟《自广斋集》。

明 烈妇陈姓，嫁张，贫居乡中，早寡。伯谲¹嫁之乡猾徐姓，为囊橐²主谋，当欲决死，扶持入船，不得逾。一夕，宛转就其父，乃克鸣于官。官章令人细人言，且不忍其奋詈³，置狱。出狱，走松江，控之按台。路刎，死公庭，松缙绅士子翕然。褒死剧生，檄诛无算。按台摭实，闻之朝，镌令级⁴罚去。本邑缙绅沈少参倡义归其丧，与原夫合葬支劬。章令吴江，初政颇亦矫矫，后果暴终胥关舟中。沈参知归之冥殪云。见同上。

沈清凤，字献廷，号梧村，吴江人。幼学能文，工诗善画。少有至性，隐居教授。尝受知于莫宝斋⁵文宗，一时名流为之

1 谲，欺诈，玩弄手段。

2 囊橐，犹勾结。

3 詈，恶骂。

4 镌级，降低官阶，降职。

5 莫宝斋，名晋，仁和人，乾隆乙卯探花，数任江苏学政。

倾倒。伯桐庄称其“清真雅正，不愧作家”。著有《梧村诗文集》，未刊。其删定稿，余曾于玉峰市上得之。

金仁，字得尊，号藹堂。少颖异，读书目百行下。潜心经史，不事华饰。中年，贫病交攻，学益粹。作《励志诗》以见品，一门群从，教以孝弟敦睦，一言一行，时时警策。有志于圣贤之学，慕邵康节、陈白沙之为人。惜客死岭南，年四十四。著有《味真山房诗文集》五卷、《粤游随笔》一卷。兄锐，亦工诗，有《其恕斋诗草》十八卷。

金文城宗元，号问梅。好读书，家藏富万卷。束发时，即抱向平五岳之志，只以闲居奉母，不敢远游，往往翻阅志乘，披检图籍。于古今名胜之迹，一一纪之以诗。仿李白“梦游天姥吟”之意，著有《梦游草》十五卷。子黄钟，工书好吟咏，尝辑里中耆旧事，各成一诗，曰《桑梓吟》，诗笔清矫绝俗，见赏于仁和汤点山先生。著有《听雨芭蕉馆诗》三卷。

吴江吴松岩先生，宰广东澄迈县事时，得两仆，以白龙子、乌龙子为名，盖其母感于龙所生也。体如常人，不食烟火，日捕水族生啖之。性善泅，命以书寄，远行水中，虽数千里必达。后以老病死。

吴树琳汉廷，号柳塘。为人寡言笑，淡嗜好，不求闻达。年六十有四，未娶，殆古之独行者欤？工诗词，以课徒终。

陈赫家心，号二赤。幼工制义，顾心独好诗，以居乡少见闻，出游云间，相羊¹三泖九峰之际，过钓台，访松石，渡大江，吊六朝，识江山之娟秀与夫雄且壮焉。北游京师，归而息影于射襄城畔。于是，畅所欲言，以写其性情。尝自编四十岁后诗六卷曰《小琼海诗集》。

俞岳，字子骏，号少甫，震泽诸生。工为文，一以震川为

1 相羊，亦作“相徉”，犹言徘徊、盘桓。

宗。尝校《太仆集》，筑室贮之，颜曰“归庐”，以志向往。而尤长于画，师事昆山王孝廉学浩，尽得其传而变化之。中年，游京师，名日噪，绝不与时贵通。慕顾通政莼之为，人，执贽门下，甚器之。所交如朱水部楹、戴学士醇及同邑张广文履辈，皆以诗古文词称于时，互相切劘，诣大进。既报罢，入赀就校官，以文字见赏于林文忠公。咸丰初，屡摄丹阳、太仓校官。癸丑，王匪犯太仓，预作《绝命词》。城破，拟投泮水殉。后贼退，得不死。晚年避地沪上，卖画自给。旋卒于嘉定学任，年七十四。著有《笠东草堂诗文集》若干卷。弟岱、孙焕章刊其遗稿行世。

郑璜，字元吉，号瘦山。好读书，补郡诸生，两中副车。嘉庆庚午，举于乡，累试春官不第。家亦中落，客严河帅幕府，主云龙书院，教以孝弟，务为敦本之学。亲丧，号恸殆不胜。家毁于火，穷且老，复不得志于校官。仍跌宕自喜，益好为诗，兼攻经学。著有《春秋地理今释》二十卷、《三国志辨讹》、《海红华馆文钞》。

徐堂，号澹人。性至孝，少失母，与父居，遇之严，小不如旨，杖击，走避不敢出一语。潜心宋儒之学，以汉氏为宗。闭门考索，尝以《毛诗》列注疏齐鲁韩之不显于世也，荟萃古人之说于右，而自系其说于左，久之成《三家诗述》十六卷。于《易》则衍郑氏《爻辰图说》¹而敷畅其意。于《书》有《书古训》若干卷。余事作诗，亦探源《骚》《选》，泛滥韩杜，一吐其胸中之奇。惜中年摧折，无有表显之者。

缪烈妇邱氏，吴江同里镇人。父为匠冶铜，父歿，依母居，年十九嫁缪文郁。缪故贫，为磨豆家佣，积赀娶妇。娶三十九日，文郁死，道光二十四年春仲也。先是，里中迎神赛夜会，

1 东汉郑玄以《周易》卦爻配十二辰的学说。

诸少年傅粉墨，衣妇人衣作妖冶状，参错其间。强文郁为妇人装，妇耻之，不欲观。归而妇消责之，且使之辞，戒毋出。越宿，文郁竟以病死。妇殓夫已，招母与居，诡令母市楮外出，缢夫之灵座以殉。金黄钟为闻于有司，得旌如例。

倪小香茂才廷烺，工书，为邑宰孙枝秀重交甚契。倪有婢，与木工某私。一夕被繫，疑为盗，驱毙之。闻于官，竟坐擅杀罪，倪配维扬，卖字为生。当讯狱时，倪望高坐堂皇者则青面狰狞，殊非孙也，岂前生冤对【怱】，乃为报复耶？

震邑横扇东三里库港陈姓子，业渔于沧洲荡，一日于荡中芦墩畔获一古剑，芒寒射逼，不敢卒视。悬诸壁时，闻声若蛇鸣者。陈旋病，筮之，知剑为祟，仍投原处，乃愈。好事者入水求之，卒不可得。同治辛未年事也。

吾家呆山太史之三省堂后，有楼久废，未倾。光绪乙未岁，春雪特甚，积深数寸，人见楼巅履迹，印雪成行。此楼凌空兀峙，四无依傍，非人力能升，异之。旋于三月间，室中忽烟，迷不辨门径。迹之，由地隙中出，时许而熄，后无他异。

己亥二月，地生黑米，由常郡而至吴中，各乡均生于草丛瓦阜间。其形如黍，色黑而坚，任煮不熟，至夏始息。

吾邑之城垣，于光绪辛丑六月二日坍塌数处，历年未久，修而复圯。是何故欤？

王观潮，字子愉，号湘筠，府学生。家同里镇。耽吟咏，与汤礼祥游，诗益进。性极纯谨。著有《潇湘吟馆诗稿》。吴江仲子湘，选其诗入《留爪集》。

沈烺，字树棠，号琛厓，国学生，候选州吏目。母吴，以节著，事载府志。烺事母孝，多艺，能书画，无不工。尤善医。日与其配叶琼华倡和，著有《停云楼诗》。年四十三卒。子曰寿、曰富。

程烈女，字沈秉渊，将婚，秉渊卒，女闻讣，颜色自若，夜

伴睡，伺人定，自经死。两家父母以木主成礼，遂合葬。道光乙酉六月三日事也。年十八。

沈曰富，字沃之，道光己亥举人烜子。性孝友，又嗜交游，工诗古文辞，钻研实学，能自得师。著有《诗文内外集》《读诗笔记》《读三礼笔记》《夏峰学录》《夏峰门人录》《杨园渊源录》《当湖弟子传》。

陈泰来，字仲亨，号切庵¹，震泽县学生。性嗜饮，忤俗，人目为狂。工诗，见称侪辈。著有《寿松堂诗稿》十四卷，存江山刘履芬泖生处，王礼为作《寄诗图题词》满幅，卷失于庚申兵燹。认【切】庵歿后无嗣，同邑仲子湘为刊一卷，又《寿松堂诗话》四卷行世。

陈懋，字四桥，吴江诸生。耽吟咏，学诗于周味闲、金二雅两先生之门，志和音雅，不为矜奇炫异之语。陶冶性灵，别裁风雅，浸浸乎三唐诸贤。著有《遂高堂诗集》。

汤钟，字纲庭，国学生。少习举子业，尤长诗古，负隽才，有声庠序，数奇不遇，专攻诗学，自颜其卷曰《记存草》，王致皞序而梓行。

张栋，字鸿勋，居震泽之平望镇。博学，工诗文，善山水，专用枯毫焦墨，不喜设色，格气苍老，法董香光而古健有余。乾隆十六年，应两浙雅中丞聘纂《南巡盛典》，历游南北，浪迹江湖者三十余年。著有《看云楼集》。子纫菑，亦善画。《墨林今话》。

吴博屋，字补斋，吴江人。寄居吴郡，善写真，旁及花鸟，苍劲有法度，尤善草虫、鲛鱼，生动有致，为艺林独绝。室程小白，为同郡程征白处士女，亦善六法。见《画林新咏》。

1 《同治苏州府志》云：“陈泰来，字切庵，春生弟子，以诗有闻于时。”本传后文据改。

赵丕省，字周藩，号西林，瑶舟子。工画，所写人物、花卉俱有法，山水仿董、赵两家，冲澹秀润，时共推之。年四十余卒。弟丕承，挹峰子。工书，学赵松雪。晚乃出入香光、梅壑间。尤善墨梅，冷隽入骨。诗喜为短句，韵淡而蓄，亦类其为人。年六十五无疾卒。见同上。

钟圻，字敬和，号午峰，与西林同里，同习绘事。初法北苑，继参华亭、娄水，所诣益精。为人贞亮率直，不要世誉。惟沈酣笔墨，所居一楼，坐拥卷轴。虽严寒，炙砚挥不稍倦。年七十四卒，里党称其有隐君子风云。见同上。

袁棠，字湘湄，与同邑郭频伽、朱铁门游，结竹溪诗社。词章之余，兼好六法，在耕烟、墨井间。行楷书出入唐宋诸家。嘉庆丙辰，应举孝廉方正。晚岁家落，为两江总制铁梅庵记室。著有《秋水池塘诗集》《洮琼馆词》行世。子玉，工填词，善写生，傅色艳逸。同上。

陆俊，字漪竹，震泽之平望镇人。初从张栋学画，久辄厌弃。年四十余，忽得颠疾，自署白鹤山道人。深通医理，治垂毙之症，有活者。病中喜作字画及诗文，不假思索，援笔立就。其山水大率似思翁而加脱略，颇得天趣。书法亦然。尝论画云：“读书不多则用墨不腴，临池不多则用笔不辣。画虽小道，北苑大痴之法俱在；欲参三昧，须于古书古帖间求之。”刻有古文若干卷，曰《骈拇剩墨》。同上。

吴山秀，字人虬，震泽岁贡生。善山水，亦长写生。与吴兴沈芥舟善，兼好吟咏。生平诗稿甚富，身后散佚，画亦罕传。同上。

徐达源，字无际，吴江黎里人。博雅工诗文，所交皆海内名士。尝一至都中，其配吴珊珊夫人驰书促归，遂不复出，以著述自娱。性好文翰，骚人词客往来于楔湖弗绝，典衣沽酒，谈诗论画无倦容。善墨梅，简老疏古，得杨无咎法。间作山水，

小幅脱略畦径。刻有《紫藤花馆藏帖》。子晋镛，号双螺。工诗古文。女玖，字丸如，工楷书，亦善画梅，适同里汝氏。同上。

庄曰璜，字渭川，号礞溪。工山水，萧疏淡远，师法倪黄。间作兰竹，亦清绝。兼以医济人，至无暇日。画以是益少而愈自矜惜已。子镐，字乐平，习花鸟。

殷立杏，号鹤溪，盛泽镇人。写山水，师耕烟。后乃放笔，兼法华亭、娄水，名噪里中，求者未易得也。同上。

迳朗，字汜川，莘塔镇人。性豪爽，有干济才。诗古文词，必自出机杼。亦工骈体。中乾隆己酉顺天举人，任凤阳训导。初在京师，以工笔山水名于公卿间。归里后，则写意花卉居多。年六十七卒。著有《郢巫集》《淮上纪闻》《粤游笔谈》《绘事琐言》《绘事雕虫》等书。子鹤寿，道光丙戌进士。尤深经学，亦能画。继室沈氏，字芝卿，细竹学管仲姬¹，有林下风致。同上。

李敬思，字纫斋，吴江人，寄籍顺天，由内廷馆供事²任新会牛肚司³，以画名于粤。画巨石最佳，竹次之，花木又次之。罢官后，侨寓吴阊以终。同上。

翁广平，号海琛，邑之平望人。嗜古好奇，志行高洁，食贫著书。纂《日本国志》三十余卷，一名《吾妻镜》，奇作也。尤工诗古文词，分隶宗汉碑，山水师北苑、巨然，俱为文名

1 管仲姬，即管道升（1262—1319），字仲姬，一字瑶姬，浙江德清茅山（今干山镇茅山村）人，祖籍江苏青浦（今属上海）人，元代著名书画家赵孟頫之妻。工词章翰墨，善画竹石梅兰，笔调清超，有运笔成风之誉。

2 清代京吏在衙门内各房科管理事务的，都称供事。《清会典·吏部·验封清吏司》：“凡京吏之别三：一曰供事，二曰儒士，三曰经承。”注：“宗人府、内阁、上谕馆、文渊阁、翰林院、詹事府、中书科、内廷三馆及修书各馆，各衙门则例馆，皆曰供事。”

3 牛肚司，牛肚湾巡检司的简称，潭江流经新会段有很多江湾，此巡检司乃明清时期设立在今司前段江边。

所掩。道光辛巳，应举孝廉方正。晚年，不苟为人作尺素断纨¹，自遣幽寂而已，以是知者甚少。子雒，号小海，画有凤慧，遂臻绝品。跋语、小诗亦异庸手。著有《论画绝句》数十首。同上。

蒯嘉珍，字铁厓，邑之黎里人。曾官广西州牧，有《铜鼓斋诗集》。年未四十，即解组归。晚岁落拓不羁，画笔愈形奇特。配钱与龄，字九英，秀水文端公孙女。得南楼老人传授画法，故铁厓闺中倡随之暇，以绘事相娱乐。九英写生尤清逸，绝去闺阁纤媚柔弱之态。从兄箴石侍郎，亦亟称之。尺幅寸缣，得者珍为瑰宝焉。夫人诗不多作。同上。

计牲，甫草先生之族裔，居盛泽。世席华胄父，嘉禾诸生，曾与世父瑛重刻《改亭诗文集》。至牲，家中落，薄宦皖江，尝摄宿州州判。晚年归里。为人冲和谦约，书宗二王，山水师元人。牲故毗陵钱文敏公姨甥，渊源盖有自也。同上。

计瑛，字文珍，乾隆庚辰副贡，官滨州州判。工花卉，简古如徐青藤²。同上。

王致纲，号倚帆，邑诸生，丹阳司训元勋长子。性聪颖，善属文，旁通诸艺。山水疏秀，宗子久法。水墨、蔬果学白阳山人，亦具雅韵。兼工飞白。

王之孚，字诚庵，国子生。为人蔼然温雅，好交游，性阔达。少尝攻举业，后弃去，托兴于艺事，兼工山水、花卉。下笔秀逸，气韵天成。配吴氏倚云，名核桃，故名家女，能诗，伉俪甚笃，所至以卷册自随，人皆目为仙偶。年二十七卒。倚云以悒郁成疾，越三年亦歿。研农梓其夫妇遗诗曰《金海楼合

1 尺素，书写用的一尺长左右的白色生绢，借指小的画幅、短的书信。现在指信件。纨，细绢。

2 徐青藤，即徐渭（1521—1593），是明代嘉靖、万历年间的大画家，有许多名号，其中以“青藤道人”最著名，故有此称。

稿》。同上。弟棠，号台叔，嗜学敦行，喜登陟，尤妙水墨写生。所为诗清丽幽渺。著有《蕉雪庵稿》。室赵氏，名征兰，静笄女，性耽翰墨。

王锡璐，字墨痴，震泽人。幼入塾，即好写生。游庠后，历试不得意，遂弃去。专心于画，兼习篆刻。为人闲静寡言，不与世接。家极贫，人有以润笔乞画者，笑弗纳。故其迹世不概见，间有流传，颇古拙，得白阳山人遗意。同上。

程东一，字桐生，平望人。工古隶，善铁笔，尤长于画。山水、花卉、人物靡不能，别出町畦，高自标许，时多称之。同时有凌基山水，传鹤癯道人法。家贫，性冷【冷】僻，肆力于六法，水墨超妙，有非道人可及者。又有黄若思，嗜画山水，亦出鹤癯之门，颇苍老，俱与东一同里。同上。

陈武，字良周，号烟农外史，混迹青衣中。酷好画，凡见古今名人妙迹，无不临仿。尤善山水，见赏于钱杜。益用力于皴染，秀淡闲静，超然尘表。邑之缙绅咸推重之，如珍宝焉。同上。

杨秉桂，字辛甫，盛泽人。家临西荡，烟水浩渺，颜其斗室曰红梨庵，盖自水以北不三里有红梨渡，因以名也。性旷淡，不趋荣利。四十后即绝意科名，日惟友朋翰墨是乐。所为诗词，皆瓣香南宗，画兰不名一家，瘦肥浓淡，自成馨逸。同上。

周璋，字莪删，与秉桂同里。性孤冷，慎结纳。家贫，以卖画益之。中岁，妻子皆卒，益困苦。浪游吴越间，后依人作西陲之行，橐笔万里，越十二年归。初以士女称于时，后写花卉，尤长于梅，得诗人清致。著有《西来吟》一卷。

沈伟济，字亦吾。生有至性。其父秋槎，邑诸生，能诗，好艺菊，有柴桑隐君子风。患沉疴，伟济刲左股和药进，得稍瘳。旋复病卒，伟济哀慕不已，手自绘《怀菊图》，遍征题咏。尤工山水，临池亦具古法。诗不多，作辄有秀句。中岁眚其目，

由用力之过。可谓笃于此矣！弟保滋，有同癖，偶作疏柯竹石，渴笔苍秀，得其家狮峰老人意。同上。

于世隆，字蕉林，居震泽之因渎村。工山水花鸟。父问轩，曾任南昌通判，故多书画，世隆日临仿，艺遂精。又尝摹历朝彝器篆帖二十卷，尤具古致。年二十六，援例授府参军，将入都就铨，遽卒。同上。

钱志伟，字峻修，家吴江之珠溪。性沉敏，凡医卜、音律、书数、篆刻之学，靡不深造而窥其奥。尤精绘事，人物、花卉粗细皆工，尤精山水，出入石田、石谷之间，苍秀有法。所著《无隐处题画诗》，皆高逸可传。同时有张大林、张钤、徐緘人、张寅谷，皆盛泽人，并善写生。同上。

张钧，号季韶。工人物、士女，动合有法。花卉宗南田，后摹松壶、玉壶两家，馥馥乎称入室焉。诗亦幽隽。

王锡祚，字静之。工写花木、蔬果，颇饶闲趣。孤介为怀，雅不欲以画著，而人无不推而重之。

郭骥，字友三。家贫，工山水，入能品。随意点笔，天真朴野如其人。尝客他乡，所至咸款洽。子岱，能写人物。侄桐，号琴材，为频伽嗣子。挈游四方，从松壶、玉壶、小迂画人物、花卉，而山水尤守文、沈矩矱。性沉静，终日默坐无一言，客死袁浦¹，传作绝少。

王之佐，号硕农，震泽梅堰人。道光辛巳，举孝廉方正制科。博雅好客，工吟咏，著有《青来草堂稿》。画兰，其寄兴也。癸未水灾，脱粟振济，不避艰险，多所全活。为刊《绘水集》纪其事。

张澹，号春水，居吴江盛泽。幼孤力学，志行肫笃²。尝手

1 袁浦镇位于杭州市区西南面，地处“三江两湖”交汇处，东邻萧山，南邻富阳。

2 肫笃，诚恳笃厚。

葬先世八棺。亲死，庐墓。工诗善画，中年丧妻，遂橐笔游四方，一时才俊皆与订交。后入汤都督貽汾幕，诗画益进。著有《风雨茅堂诗文稿续》。配陆氏蕙，号璞卿，明慧，亦能诗画，颇得倡随之乐。有“文章知己”“患难夫妻”两小印。

宋銓，字韵山，震泽人。天资灵敏，书学欧、褚，诗词清隽，有南宋人风格。点笔设色，妙有生趣。

沈焯，号竹宾，盛泽人。初工写照，画花卉，兼善山水，天分甚高，走币请乞者无虚日。同时有王礼，字秋言，善花卉、翎毛，设色得北宋人法。避兵申江，画为苹花社中首推，名遂大噪。奚方二壶后独树一帜，字学山谷，诗喜东坡，题语逸趣横生。

垂虹识小录卷五

黄增禄，字谷卿，道光癸卯举人。工山水，出笔幽秀，书法瓠香馆蝇头小楷，舒卷自如，尤不易得。同时有陈泉，字麋叔，善画人物、山水、花卉，名重一时。官曹县县丞。兄曼史，亦工山水。

刘德六，号子和，娟洁自好，画花卉、翎毛、草虫、果品，并臻其胜。庭有梨花一树，即颜其斋曰红梨花馆，明窗净几，笔砚精良，对花写照，即物取形，各具生趣，以是名噪一时。同里陈月圃庚，亦善人物、士女。

释达曾，号竺峰，南浔东藏寺僧。志量阔达，才识过人。凡重任巨举，当之无倦色。震邑有崇福永乐寺，在麻溪滨，久废。达曾募费重建，务极宏丽。又扩东藏旧刹，遂成名蓝。平生淡泊自持，能鼓琴，喜吟咏。画梅亦疏峭历落¹，得法外意。著有《香影庵诗稿》。弟子证亭，亦震泽人，幼习楷法，兼画山水，俱有秀挺之致。诗亦清超拔俗。体素弱，清削见骨，而负气兀傲，于缙流鲜当意。独喜亲才艺之士，见赏于武进汤都督，名播遐迩。过者咸欲乞其片墨，且订尘外交焉。

羽士谢晋，号云屏，震泽梅堰人。住持吴江栖真道院。善

1 历落，疏落参差貌。

画人物、花鸟。旋复寄兴山水，不轻握管。性恬淡，喜艺兰。诗人皆愿与游，年七十三卒。法嗣孙张临，得传画理，兼从邑人陈亦园习医，尽通其术。亦园故工诗，临相习既久，吐语亦复不凡。所居曰冰壶精舍。著有《冰壶吟草》两卷。

徐灵胎先生，颖悟绝人，游庠后，厌薄时艺。岁试，题诗卷后：“徐郎不是池中物，肯共凡鳞逐队游”，因是见黜，以布衣终其身。于学无所不通，名重一时。好作道情，一切诗文皆以是代之，自谓：“构此颇不易，必情境音词处处动人，方有道气。”著有《洄溪道情》行世。尤精医学，著作极富。两召入京师，年已七十九岁矣。命其子曦，载棺柩¹以从，至都三日而卒。临歿时，授一方与其子，制为宝元带，束于腰，即房中秘方，而戒子孙弗复作医。今其家尤以此自食云。其释“分尺为寸，分寸为尺”，云：“关上分去一寸，则余者为尺；关下分去一尺，则余者为寸。”诠释明晰，可谓要言不烦。

平望莺脰湖，通巨区，波涛汹涌，一望无际。北为溪口，南为野猫口。每遇严冬，北风大作，尤多骇浪，舟子相戒，无敢冒风行者。村人沈姓，筑蟹舍其间，一日风狂，远望一舟，势将覆，借邻舟往救，不允，乃至己村，刺船以往，则已覆矣。沈入水援之，出数人，皆得活。检行李，少一小箱，沈复入水取之，邀入己舍，置酒相庆。舟固巨商，挟赀以归者，以遭厄无失，取四十金为沈寿。沈不受，收四金市肉食，与邻人共饮之。明日，送商归，终不望报。沈之风有足多者。

郭频伽先生麟，饮于友人处，有某太史在座，少年甲第，未免意气陵人。先生语气之间多所狎侮，太史不堪其谑，作而言曰：“频伽先生有何开罪，却句句奚落下官？”先生曰：“公读书中秘，言当雅驯，奈何以稗史之谈挂诸齿？”太史曰：

1 棺柩，亦称“棺部”，古时棺中垫尸体的长方木板。

“《晋书·百官志》：朝士七品以下不得称臣，但称下官。《南北史》亦然。某承乏翰林，官止七品，称下官，礼也。先生独未之前闻乎？”频伽惭不能答。按，下官二字，不始于晋，已先见于《汉书》曰：“下官不职。”

金二雅先生学诗有《兰亭禊饮图》手卷，中有刘石庵相公、王梦楼太守题咏，馀亦不乏名作。前年某骨董持以相视，余以番钱三十元得之，珍如拱璧。乡先辈之流风余韵，不致散佚他方矣。按，国朝书家，刘相公专讲魄力，王太守全取丰神，时有浓墨宰相、淡墨探花之目。

梅堰显忠寺贝叶山房盆柏，大合抱，高广五六丈，枝干夭矫。盆藏根内，仅露北面尺许。相传宋元祐中，僧智仁于归云楼前植柏石盆，越二十余年，风雷夜作，树骤长，根辄出盆外。国朝康熙时，雪川大令陈棻读书寺中，作诗咏之。乃县志失载柏之颠末，诗亦不入《雪川集》中。客有言寺系宋王钦若宅。钦若信形家言，得龙穴，此其首也，遂家焉。后恐人讦告，舍为寺。则地气之灵，一发于盆柏，宜哉！或曰王文正祠，殆非也。见《小琼海诗集》。

鸚鵡报德¹

吴江梅堰镇有殷姓者，贾人子也。畜一鸚鵡，五六年矣，爱如子。咸丰十年四月，粤寇突至，殷举家奔窜，半途忽忆鸚鵡，复还至家中，谓鸟曰：“寇至矣，不能终畜汝，汝速去，勿罹此祸！”遂纵之去。而寇至，几不免。后岁余，殷徙居莺湖之计家港，一日，鸟忽至，飞鸣于室，若有所言。殷不悟，饲之，不食。笼之，不宿。至夜不去，啁啾如故。俄闻炮声，始悟贼将至，鸟速之去也。即挟眷属狂奔，而贼已四面合围，不得脱。

1 原稿在此条开始又出现列目情况。

天迟明，潜出，欲越墙北走，而伏寇群起遮拦。忽有一鸟，翱翔其间，贼注目视之，鸚鵡也。口衔白布一幅，咸共骇异，疑为神，逡巡久之，而殷氏之众已从桥上去，贼亦不追。殷至光绪中尚在。

尼 案

吴江黎里镇多尼庵，登徒子游其中，犹青楼也。有农家妇，与青莲庵尼相识，艳其所为，常寄宿其中，尼即诱与恶少淫。其夫屡以舟来迎归，尼厌之，与妇谋杀其夫。妇始允，继而悔焉。一日薄暮，夫又以舟来，尼与所私者诡言欲至某处，使其夫载以往，招妇偕焉。行数里，天晚，旷野无人，尼与所私者用力推其夫于河，妇骇甚，欲援以手，禁勿许。妇大号，尼曰：“为人闻知，尔当膺极刑。我则无恐，王法不杀僧尼。”妇信之，忍哭，仍从尼归。居数日，其夫弟来探其兄。尼与妇均言未尝来此，其夫弟遍访，无知者。会岁暮，妇归，私祭其夫，且祝曰：“死而有知，勿我怨！”为夫弟窥见，排闥入，穷究其故。妇坚不承，乃执妇并尼，控诸官。官严鞫之，始吐实，而苦不得其尸。时光绪三年正月十七日也。天忽大雷雨，尸浮起，距其死已五十余日，而面如生。尼所私者久亡去，官命役捕之不获，役祷于尸，夜梦死者谓役曰：“其人在江宁水西门外某姓饭店。”如其言，果得之，皆论如律。

董梦兰

董兆熊，字敦临，号梦兰，故王姓，父赘于董，因承其氏。家同里镇，善诗。性慷慨，值里党急难，屡倾所蓄，家以是贫。尤爱钞书，斜行密字，每日可得数万言。最工骈体，然自言得意者不过数篇。里豪有遗重赀，丐墓上文，拒不纳。诗以朴实为主，著有《南宋文录》百卷、《明遗民录》二十卷、《樊榭诗

注》二卷、《味无味斋诗文集》，以咸丰元年诏举孝廉方正。歿后，屢示灵异，相传为神。妻郑氏，后九十余日自经以殉。

顾瞻麓

顾甦，字瞻麓，吴江人。后移家魏塘。生平以诗为性命，物故既久，无能举其名者。五律一体，当其至处，几入四灵之室。间有存者，为郭祥伯钞入《碎金集》中。又有徐芝春者，亦以诗名，居近里巷而人不知之，可一慨也。

徐楠，字整斋，号邦良。性质朴，入塾即刻厉。父怀芸，怜其羸弱，谓读书不可躁进，期于明理而已，因不甚督责。然先生心实好之，肆力于诗古文词，寒暑咿唔不辍，晓则先宿鸟而起焉。登乾隆庚午贤书，两上春官，被放，遂不复偕计吏车¹，心力亦稍瘁，年三十七卒。著有《扣舷集》，乌程钮汝骥序以行世。子兆奎，亦工诗，有《晴轩诗钞》附梓。

午梦堂集

《午梦堂六种》，吴江前辈叶仲韶工部绍袁所刻之书也。壬午春，其裔孙莲菀表叔出示藏本，其《午梦堂遗集》则曰鹂吹，沈宜修宛君著；《芳雪轩遗集》则曰愁言，叶纨纨昭齐著；《疏香阁遗集》则曰返生香，叶小鸾琼章，一字瑶期著；《伊人思》，沈宛君辑；《窃闻》《续窃闻》，天寥道人叶绍袁撰；《鸳鸯梦》，叶小纨蕙绸撰。宛君，为天寥先生之配；昭齐、琼章，乃其女；而蕙绸则昭齐之妹、琼章之姊也。擅秀一家，含悲千载，试问碧翁斯何意欤？按：《午梦堂集》尚有《彤匿续些》一卷、《秦斋怨》一卷、《百旻》一卷，连前共九种，后入《灵护集》

1 计吏车，计吏所乘的车。古代州郡掌簿籍并负责上计的官员称计吏，亦作考成的官员。

为十种。然博雅好古之人甚少，板多残缺，香销粉褪久矣，惜哉！

冯希珍，名岳一，字玉蹊，吾邑汲溪人。与平望吴采杉最相得，皆有豪致。诗好作鬼语，早卒。

费元衡

吴夜钟《寒塘诗话》载：吾族思任公元衡，初为莘县令，继改莱阳令，每问于父老，知民间疾苦。又延诸生之贤才者，于衙斋讲道论文，俾知际圣朝为文人，必期不负，而后可以无愧耳！邑中潜德，务表彰之。先达著述，则补其残缺，揭行于世。其乐扬人善，即其勤于政事之见端矣。其子又谦，已登壬子贤书。其食报正未有艾也。

平波台

《百城烟水》云：平波台在莺脰湖中，明天启四年，道人周妙圆筑。有顾氏香久诗云：“盈盈湖上柳花飞，绕岸莺声送落晖。望去平波台不远，羨他幽鸟一双归。”按，湖离吴江城四十五里平望镇南，旧以湖似莺脰，故名。

圣寿寺钟记

钱霭《吴江县志续编》载有《圣寿寺铜钟记》，不知何人所作，驾名于苕中沈度汪先生涵，其略云：圣寿寺之名于吴江也，肇自宋天圣二年，而铜钟之悬于圣寿也，则自元至大元年始。又云：终元之朝，迄于明之中叶，寺之僧世守之。朝扣暮击，莫之变改。嘉靖三十二年，倭夷寇东南，江浙为甚，居民惶骇。本县知县杨君芷使人移钟，悬之城东门楼，恐倭至，则撞之以集士卒，而铜钟遂属之东门。一百五十余年，习为故常。历紫柏、允持诸师，未有能考其旧而复之者。今年春，县

之人士请子彬大师主持圣寿寺方丈。先是，康熙之四十二年，正殿隳于火，其旁舍日益圯坏，而所主持者皆庸僧，不克振。记之言如此。愚考《吴江县志》，寺建于吴赤乌中，诸家志书皆然。不宜竟从宋始。且既云“历紫柏、允持诸师，未能考其旧而复之”，是谓诸高僧皆不能归此钟于寺，何又云“主寺者皆庸僧，不克振”乎？殿为江邑最高大者，辛巳之隳，《记》云“四十二年”，传误也。势难复建。至旁舍圯坏年久，必然而修者不少，安得一概抹之。且从辛巳以后，主寺者如青回、古眉、圣宣辈，皆不愧为高僧。子彬所远不及，诎可略不一考，而妄云庸僧也。但就归钟论之，何可使以能归为贤，而未能者为不肖乎？况《记》中明云“会东门之城楼毁，铜钟坠，议者”云云，然则城楼未毁之时，安能无端而议此钟之宜归也。子彬亦适逢其时，耸动村市之翁媪，遂能归钟立碑，乃作《记》者，绝不一思，但学时文中尊题之法，徒逞夸词，何其鄙倍¹欤！更可异者，《钱志》竟不辨而收此文，殆不知其伪为也。然其志寺观，则又明云“圣寿禅寺，吴赤乌中，康僧会尊者开山”云云，则何以览此记而不知其截去厥初也。钟为管军总管张问达所铸，并造钟楼一所，作《记》者当云：有此巨钟，必造楼，则声始远。今钟归而楼之毁已久，当更造乃可耳！彼《记》中有是乎？其粗疏又不仅此也，识者当自知之。说见《寒塘诗话》。

沈陆氏

烈妇陆氏，吴江县学生沈友铿妇也。父泰，号朴斋，母吴氏，年逾三十始生烈妇，钟爱甚。烈妇字友铿，未及笄而孤。其母欲得友铿为婿，友铿以冢子²不可，遂娶以归，然烈妇依

1 鄙倍，浅陋背理。

2 冢子，即嫡长子。冢，大。《左传·闵公二年》：“大子奉冢祀、社稷之粢盛，以朝夕视君膳者也，故曰冢子。”

其母之日为多。友铨授徒于外，归亦时从妇居。光绪十年冬十二月，友铨以瘵发卧病妇家，烈妇虔侍汤药，日视其夫之悴愉为忧喜，而背地辄饮泣。逾月，友铨病笃，烈妇回皇惨恻，潜提其一子一女而哭，复向其姑若母而哭，姑若母谕止之，毋使病者闻也，则举子女属曰：“以此相累，儿不忍见夫之瞑，更痛其欲瞑不瞑之惨苦也。急迫不知所为，计惟从之，斯已耳！”姑若母大惊，察之，已先时仰药矣。俄而毒遽发，与友铨同时死，年三十一，时十一年春正月二十有六日。翌日，以二尸归殡于沈，礼也。先是，俛堂之夕，烈妇尸大动，举室骇曰：“新尸狞厉矣！”则皆走。既而以为苏，趋询者环集，烈妇侧身瞠目，叠呼其母。母至而声气复绝，然后知烈妇之死，其心终以母故不即死，而以夫故不得不即死也。呜呼！烈妇由此不死矣！论曰：友铨世居大胜村，道光癸巳之冬，村有某妇饿死不失节。沈氏曰富为作《大胜村妇传》，迄今已五十三年而又得烈妇，其事不同，要亦同其为难者，岂川泽奇伟之气钟于女子，钟之尤勤耶？不然，何若是之后先辉映也。

王顾氏

烈妇顾氏，吴江县附贡生王祖德之室也。父友于，居同里镇。妇未字时，事亲以孝闻。光绪五年十月于归祖德时，年十八。祖德游庠后，橐笔赴台湾，从舅氏习申韩家言，治狱仁恕，名噪公卿间，当道争罗致之。妇以侍奉翁姑，往而复还。祖德幕馆台北府，当军务倥偬，摒挡衰助，心力交瘁，致感瘴气。迨戎事底定，于十一年秋假归省亲，而妇先于十年十二月举一子开甲，心甚慰焉。冬初，就台湾道陈展堂聘，仍挈妇同往以侍疾。至则舅氏甫捐馆，祖德经归其丧，哀痛逾恒，致触旧恙，于十一月十七日卒于道署幕所。仓卒间，亲友鲜有在台者，妇勉节哀思，偕其弟顾永树暨仆从辈营治棺殓如礼，盖棺日痛不

欲生，只以夫棹未归、孤儿罔托，不遽死。十二年二月初七日，扶夫棹、携孤儿乘轮船旋里。二十三日，抵家入门，时泣于夫灵，谒拜舅姑，手孤儿开甲以相托付。泣谓夫弟祖福曰：“汝兄惟汝一弟，汝能善事父母，严教孤侄，汝兄虽死犹生。”家人群来劝诫，妇容色如常，惟出洋百元，呈交于翁曰：“此夫之馆谷余也。”又促雇乳姬哺儿甚急。二十五日，雇完乳姬矣，遂于是日未刻乘间饮洋药以殉，距祖德之死九十八日。徐察药所自来，乃航海至沪时托言肝胃气发，遣舟人购之市，密藏枕箱中。及是，用以毕命。可知其殉夫之志早决于夫亡之日矣。自来妇之殉夫，往往激于一时之愤。若妇之扶柩、携孤，险渡重洋，抵家两日，始以身殉。其历时既久长，其矢志弥坚确，其设计愈周密，其就义甚从容，实非寻常节烈可比。里人闻之，莫不敬悼，观者塞门户，而烈妇面如生云。近日，江震绅士具呈中丞，乞为奏请旌奖，以彰奇节而维风化，当可仰荷恩纶也。

费孝女

孝烈费女，吴江庞氏子，未婚室也。父恂卿，母金氏，歿于同治四年。是时，女生甫四十五日，赖祖母王氏抚养。稍长，知礼义，克孝顺。父与继母，仅此一女，咸爱怜之。性敏慧，精女红，字庞氏子元垚。因失怙恃，依岳家诵读焉。祖母老且病，每疾作，则侍奉不离。壬午夏，病甚，女忧形于色，至废寝食。十二月初七日，祖母病革，家人环泣，而女哀尤甚。易箴后，乘众仓皇，潜仰药以殉，恐死不速，复摘二金珥吞之。父母觉而夺之不及，谓父母曰：“大人善自保养，冀得一弟以重宗祧，毋以女为念。女虽生何益？誓将代父从大母于地下。”灌以汤药，忍不肯咽。未几，神色惨变，竟于戌刻死矣，时年一十有八。见钱塘周模表序略。

第四桥

王西庄《蛾术编》云：朱竹垞好用第四桥，必有所据。但遍考地志，吴江县无此桥名。范成大《吴郡志·土物门》：“松江水，在张又新水品第六，世传第四桥下水是，今名甘泉桥。”按其文义，似当在八测，此村在今县城南十里。徐崧《百城烟水》及王阮亭《精华录》皆作八册，询之土人，亦不知有此桥也。予家人《生日诗》：“比肩先拜初三月，携手闲寻第四桥。”予主震泽书院讲席十五年，家人或从，故云。青崖连先生按徐师曾《吴江县志》云：“甘泉在石塘第四桥下，去县治南五里。唐陆羽《茶经》品为第四，桥因得名。”宋张达明诗云：“桥下四檐水，人间六品泉。松陵无鲁望，山茗为谁煎。”以张又新品甘泉为第六，故也。元倪瓚诗云：“松陵第四桥前水，风急犹须贮一瓢。”《热火烹茶歌》：“白纈怒涛翻，雪¹少停桡。”观此，知元时其地半为太湖，今则尽成膏壤矣。王逢亦有诗。先生既在吴江十五年，竟未一见县志耶？八斥去县城二十四里，而云十里。误。

徐梅村

光绪十五年四月初一日，夜将半，盛泽镇后街徐氏火，焚死三人。吴江徐儒选殉其母，越日检视，肢毁肉脱，衣衾棺殓，畚夫失声。于时喧传，遐迩悼痛。会吊，莫不歔歔感叹，异口一词曰：“孝哉孝哉！”镇人施绍书，与儒选族叔徐树桂为戚属，询悉颠末，亦曰：“孝哉孝哉！守乎经矣，合乎义矣，无可如何而出此矣，不纪则泯焉沕焉，后无征焉矣！请于有司，例当得旌，亦同里闹者之责也，乌可以不纪？”按：儒选姓徐氏，

1 此处疑脱一字。

字梅村，世为镇人，居后街垂二百余年，业缙，家中落，其屋厅事四皆有楼，分四之三赁他姓，前楼奉母自居之。妻先没，无子嗣，留妻母依养焉。性静默，对人竟日，或不交一语。行事介然，嗜酒，未尝纵。家既贫，为人经纪缙事，恒不家食。然朝出则暮必归，主人数数下榻留，执不可。虽不明言其所以然，其心盖为母故也。母年七十二，病软脚，不下楼者一稔矣。是夜火猝发灶突间，烟迷漫，焰腾上爆，楼木裂。儒选惊起，奔抱母，负而走，力不胜，蹣，再负，再蹣，终不胜。母曰：“我死于此矣，汝速去。”妻母年亦老，在侧，连促之曰：“婿速去，同死无益！”儒选犹应曰：“我母在此，母不去，我亦不去。”妻母闻其言决，火势且燃及衣，遂下，而梯已灼断。儒选终侍母焚死。妻母既语人如此，又言：“至楼下时，闻楼上有急足声。”后众检殓残骸，儒选死所，离母仅咫尺。更见母身多覆一红毡，未尽烬，悬拟其意，盖欲包母缢下而未及也。同死者为儒选兄女，年十五岁，父母早亡，钟爱于祖母，寐而惊醒，三起三仆，匍匐祖母前，亦焚死。呜呼惨哉！子殉其母，十五龄弱女子殉其祖母，亦可谓孝行萃于一门矣！夫孝者，人伦之重事也，非一殉之遂足为孝也。吾哀儒选之求生其母，穷生之术，乃出于殉之为孝也。听其妻母所述死状，与儒选应答数语，固已临难坚定大节不夺，无异乎力竭捐躯者也。母子尸骸相去咫尺，红毡包裹，余烬宛然，不啻彰儒选之孝，而特暴此区区以明其心迹也。谓为孝子，复奚疑哉！吾独怪我镇频岁多火患，火辄伤人，近三四年焚死者十余人，灾耶？命耶？人事之不修耶？推求其故，而不得所以拯救之方与挽回之道，庸詎知十余人后又有如徐孝子儒选者出乎其间耶？孝，美德也；焚死，惨事也。遭惨事，著美德，孰若无此惨事而美德自在？古有抱棺而返风者矣，有号哭而灭火者矣，火无情物也，何为乎？鉴古若彼，观今若此，得无气化之不纯，主宰勿谄欤？抑或偏

驳乖戾，杂然上升，遂致冥漠隔阂欤？果若是，则孝子乃适丁其厄者哉！完火备，精水器，急图之末务也。力反浇漓，敦崇醇朴，缓图之本务也。然非一人一家之事，而在千人万人之心也。吾默参于天人消息之机，而一若重有忧于衷者。若夫表微阐幽，宣道湮郁，亦一端也。爰书以待录。见《申报》。

周云帆，字虚舟。家世寒微，自奋力学，下笔绵绵千言，屡试不遇。所作诗文，懒不收拾，歿后无一存者。同时有沈钦道，字桐庄，诗才奔放，积卷甚富，后不知所归。两人均以诸生终。

吾邑城隍庙有园，名共怡。乾隆间，宛平龙铎雨樵明府作令时所筑，园可大十余亩，池台花木略具，叠石为山，仿佛郡中狮子林，有银杏一株，大数抱，数百年物也。落成日，邑中诸诗人咸咏诗，刊石陷壁间。兵燹后，园圯未修，惜哉！

沈兼，字兼人，震泽人。刚烈好义，身長八尺，须髯奋张，与同邑王寅旭、潘稼堂为中表兄弟。寅旭有女，字锡蕙，其母吴嘱兼人择婿，遂以庄氏子名济者配焉。济年十岁，补弟子员。未几，庄氏史祸作，同姓列名者俱论死。子男十五以下者，遣戍沈阳。时济十二岁，亦在遣中。兼人值父病，无所为计。俟父丧服阕，即走告吴母曰：“我当至戍所！”吴乃尽鬻钗环，资其行。遂挈稼堂同行，盖稼堂兄子亦坐是狱同戍者。至燕山北，稼堂身肿肤裂，两足流血不能支，遂返。兼人北行，出金买一少年为仆，同抵戍所，隐以金赠狱官，结为深交。周旋既久，具以情告，乞出济于狱，许之。因申文长官言：“济病重，宜置别所。”数日，兼人令仆与庄济易衣，而沉仆于水，挈济遁。不敢从故道归，乃循海北行，历苗獠而至红毛国。居岁余，得中国洋船归家。往返九年，自家抵戍所历数千里，自戍所历海滨诸国几三万里，其渡海自红毛归，又数万里。既归家，即送庄济至王氏成婚，更号退庵，绘《抱瓮灌园图》以寓意。是时，

稼堂亦以鸿博科翰林落职归，访之，为谈夙昔出关事，相对痛哭。见兼人须发尽赤，盖至獠土时染之避患云。

潘雪巢鹤，又字玉堂，住平望东乙圩。雍正年间诸生，晚年作答梦中人语云：“什么仇，什么冤，火性热，水性寒，各人生性莫相嫌；什么恩，什么爱，一作狼，一作狈，彼此相逢假欢会；什么男，什么女，一朝肉脱毫无异；什么尔，什么我，千年骨化同成土！”了悟至此，绝胜世之参禅者哑棒瞎偈多矣。《虎下长语》。

徐白，字介白，本嘉兴人，徙吴江。性狷介，不苟取予。以诸生久次当贡，遭乱弃去。隐灵岩之上沙，有园数亩，无子女，不蓄僮仆，手一镰，种蔬艺果，拮据自给。暇则作画吟诗，有晚唐风致，无尘俗韵。不出山者三十余年矣。《松陵文献续纂》。

程烈女，吴江盛泽镇人，许同里沈氏子。嫁有日矣，沈以羸疾卒，女闻讣，言色如常，若不甚戚者。夜即自经死，年甫十八，道光五年六月初三日事也。于是，两家父母以木主行幽婚礼，谋合葬焉。见金锐《其恕斋诗集》。

姚烈女，吴江大义村人。父赉扬。女少孤，母许同邑徐元宗幼子。婚有日矣，元宗子病卒，女闻讣，一恸几绝，醒谓其母曰：“儿愿归徐！”母未决，宗党金曰不可。母旋吊于徐，女乃剪发与母曰：“儿既不往，请以此殉。”母诺之。将行，又谓母曰：“须键户以绝里党之问讯者。”母亦诺之，键户去，女自缢死。母归，见之，即告于徐。徐迎女柩合厝焉。道光己丑十一月十五日事也，女年二十三。同上。

王载扬¹

丙辰征士王藻，字载扬，吴江人。贩米为业，偶题《桃源

1 原稿此条列目。

图》云：“相看何物同尘世，只有秦时月共天。”以此受知于沈翰翁先生，四处揄扬，遂弃业读书。吴大宗伯荆山荐举鸿词科，廷试报罢。往来扬州，与诗人结社吟咏。貌琐瘦，急遽小声音，好畜宋板书、青田石印章。有友借观，误堕地碎，载扬垂泣三日。其风趣如此。读《吴梅村集》云：“百首淋漓长庆体，一生惭愧义熙民。”《翦梅》云：“大抵端相求入画，最难割爱似删诗。”见《随园诗话》。

郭频伽，名麀，吴江才人。少有神童之目，一眉白如雪，屡试不售。橐笔江湖，诗名噪一时。所著《灵芬馆集》，气骨清隽，洗净俗尘。尝以《水村图》索人题咏，同县女士汪玉轸题之云：“深闺未识诗人宅，昨夜分明梦水村。却与图中浑不似，万梅花拥一紫门。”频伽乃倩奚铁生补为《万梅花拥一柴门图》以代前轴，亦可谓风流好事矣。《郎潜二笔》。

车马曰赙，货财曰贖，衣衾曰襚，贝玉曰含，玩好曰赠。知生者赙贖，知死者赠襚，所以助生送死者也。松陵之俗，凡于丧家亲厚，用麻布或用绵布七八尺许，同冥楮致敬，名曰上襄。倘亦助之为义乎？但取必于小殓后、大殓前数刻内，争先亲送，孝子答拜受之。此真慎终之时也，哀痛荒迷，检点附身之具正亟，何暇为主宾慰谢之礼乎？上襄止吴江有之，似乎可裁【载】。如其从俗，弗责孝子答拜可也。

顾公陈黄门侍郎，以御水为功，载在祀典。如江邑侯张使君，皆祀附城村祠。康熙四年七月十五日，新添敕封永利侯名，为松陵土地。考汉初始置松陵镇，历代以来，或割为县，或升为州。入明，改州为县，非复松陵之旧矣。独垂虹桥西偏有太湖庙，建自宋祥符中。绍兴十五年，赐额永利侯。所称永利侯，得无由是耶？然志书云：庙祀太湖之神，俗传神为郁使君者，谬。今乃附会郁使君，肖像供庙中。河夫辈但取祭坛，日征逐哄闹，不必其事之核与祀之正也。一笑。

吴江张濮泉，名德纯，明老儒生也。质朴安雅，有古人风。工画猫，一猫受一钱，画《百猫图》，穷尽变态，可得十金，藉以供饗飧。年八旬而卒。

五福以寿为先，寿亦福也，然享其全者实难。我邑庞斗华秉道，名门世德，儿孙霏成进士，生于明嘉靖壬戌年，九十七考终，庶几五福全备者。以上四条见陆文衡《菴庵随笔》。

王锡阐，字寅旭，号晓庵，又号余不，一号天同一生，吴江人。学究天人，以濂洛关闽为己任。尤精历象，与人书，俱用古文奇字，人多不识，亦不欲人识也。遇天色晴霁，辄登屋卧鸱吻间，仰观星象，竟夕不寐。隐居笠泽，有自著《天同一生传》。崇祯甲申之变，欲死者再，父母强持之，乃止。遂闭户不出，穷约终身。兼通中西之学，自立心法，用以测日月食，不爽杪忽。其学与宣城梅征君文鼎并称精确。《御制考成》所采梅氏，以上下左右算交食方向法，实本于王氏。然梅氏之学盛行，而王氏不显，盖寅旭无子，传其业者无人，又其遗书皆写本，得之甚难，故知之者少。论者谓“梅氏博而大，王氏精而核，各不相掩也”。其所著《晓庵新法》六卷，已采入《四库全书》。尚有《历算》《历策》《大统西历启蒙》《日月左右旋问答》等书十余种¹，俱能究术数之微奥、补西人所不逮，惜不行于世耳。尝赋《绝粮诗》云：“尽道寒灰不更然，闭关岂复望人怜。平时空慕荣公乐，此后方知漂母贤。何必残形仍苟活，但伤绝学已无传。存亡不用占天意，矢志安贫久更坚。”

沈彤，字冠云，号果堂，吴江人。以廪生荐举鸿博，后以

1 《同治苏州府志》著录王锡阐著作有：《字母原始》《大统西历启蒙》五卷、《推步交朔》一卷、《测日小记》《三辰晷志》《圜解》二卷、《日月左右旋问答》《南北两极图浑天歌》《筹算》一卷、《五星行度解》一卷、《丁未历稿》《晓庵新法》六卷、《历说》五篇、《汉书日食辨》《续唐诗本纪》四卷、《职方表》四卷、《读史贯索》十六卷、《浩然堂集》《困亨斋集》二卷。

修《一统志》《三礼》书成，授九品官，不就，以诸生终。少游何侍读义门之门，中年善方阁学望溪及李侍郎穆堂，亦为之折席定交。潜心经学，长于古文。著有《周官禄田考》《群经小疏》《果堂杂著》《气穴考略》《内经本论》《果堂集》诸种。卒后，门人私谥文孝先生。

邱端，吴江人。少孤，与母徙居东山之俞坞。家贫，力佣以给。尝买鲜鱼奉母，妻匿其半，将以饲子。端获之，问有余，妻曰：“亡矣！”端泣且怒曰：“妇死可续，母一而已，何逆妇不以我心为心耶？”欲出之。妻感其言，后亦以孝闻。母既歿，因母性畏雷，每雷电必匍匐墓侧，曰：“儿在此！”人比之王哀云。见《具区志》。

周溥，字德周，震泽县儒林村人。父宸锡，明末诸生。鼎革后，弃去。溥奉父命，亦不敢就试。一生授经于东山，遂长寓焉。为人言规行矩，著有诗二卷。见《太湖备考》。

吴江县有皂隶石鲁瞻者，居心甚善，无事时辄取所用竹板，磨之极细。或浸之粪缸中，使竹性尽化，能使受打者不痛不伤。有私托其用重板者，石呜咽不能声，曰：“吾不忍为此也！”如是者五十年，至今尚在，年九十五矣。四代同堂，儿孙绕膝。陈海霞为余述之。见《池上草堂笔记》。

吴江金文简公士松，少寒苦，随其封翁外出读书。翁尝馆同邑某氏一年，至除夕始放学。主人讶其迟，翁曰：“明年正月下旬为子聘妇，恐稽时日，故于今岁预补其不足耳！”又曰：“寒士举事不易，纳币贖实无所出，欲预支明年两月束脩，可乎？”主人如言付之。届期，备礼迎宾。冰人赵某，旧交也，饮酒欢甚，贖币至女家。女徐姓，号素封，见赵，色变，愤然曰：“几为君误。今而知金氏赤贫，吾女奈何适窳人乎？”赵谓：“君业已许之，岂能食言？”徐坚不允，词气俱厉。赵无奈何，还白翁。时宾朋满座，见事中变，咸默然。翁惭甚，谓：

“赵君作蹇修¹而事至此，奈貽笑何？”赵俯思久之，乃曰：“我与君旧交，家有息女²，年与郎君若，即以缔姻何如？”翁喜诺，立浼³座客执柯⁴，以币纳赵，应期成礼焉。后文简官至大司马，赵封一品夫人，而徐女不知何往矣。见同上。

沈琛厓烜，家舜湖。能诗好古，所居停云楼，藏弄名迹甚夥。其配叶夫人秋霞，名璩华，小鸾六世侄孙女也。亦工诗，有《小疏香阁稿》。

庞鹤霄兆缙，村居教授，名不出里巷。吟诗一卷，吹气如兰，全不类村夫子口吻。其表妹王素芬梦兰，亦能诗，时有唱和之作。

张鲈江孝廉士元，工古文，以震川为宗法，纾余恬淡，豁然自拔于流俗。今之为古文者，未能或之先也。家在严墓，隐居教授，罕与世接。著有《嘉树山房集》，诗亦不落近时风格。

许宗蔚，一字叔豹，字质生。沈静寡酬对，与世落莫，而潜心问学。与郑瘦山、袁仲容交好，互相砥砺。有《听江馆》《童初仙馆》二稿。乃以客游死舟中，其稿散佚。瘦山搜得三四册，传于世。

徐兰浦上舍曾泰，酷嗜吟咏。家号素封，因而中落。尝有句云“尖风吹落碧桃花”，正不减“枫落吴江冷”之句，其工一在“冷”字，一在“尖”字，只此七字，足与古人并传。殆诗人少达而多穷欤！

迨征君云龙，号耕石。少负时名，倜傥任气。历游黔滇，为诗有奇气。乾隆改元，以荐应鸿词科，报罢。更益自放，使

1 蹇修，媒人。

2 息女，亲生女儿。

3 浼，请托、央求。

4 执柯，也作伐柯，旧指给人介绍婚姻。语出《诗经·邶风·伐柯》：“伐柯如何？匪斧不克。娶妻如何？匪媒不得。”后称为人作媒为执柯，称媒人为执柯人。

酒漫骂，陵折侪偶，竟以此齟齬于时，以副贡生终。归家筑室，种树著书自娱。所居曰池上草堂，藏书甚夥，今散佚殆尽。

沈刚中需尊，自号北溪居士。野逸古雅，有隐者风。喜论说古今，自少即专意为诗。家多藏书秘册，北溪皆博习强记。间为散文，亦有法。其先人水村先生，何义门高足也。家素豪于财，好客喜事，遂至中落。至北溪益贫，恒典及琴书。中岁好游，其游迹多见于诗。有刻木以求者，今皆不可见。

徐江菴涛，少时颇事放荡，中更折节读书，沈思恳苦，不轻下一字。同人宴集，分韵拈题，江菴或通夕不成一章，拥褐深坐，兀若木鸡。及成，出示诸友，莫不俯首折服。尝论诗之为道，一纵一横，在唐则青莲为横，工部为纵；昌黎为横，东野为纵。后如永叔、眉山、放翁，横之类也；圣俞、山谷、无已诸人，纵之类也。横则天才放逸，学力宏博，不须深造，高步一代；纵则万力千气，十变五化，钩深致远，洗髓伐毛。用功深者，其收名也远。素抱羸疾，年未四十卒，稿亦散佚。

震泽倪太史师孟，幼颖悟，七岁时与蔡某同塾，蔡亦聪俊，举《四书注》“倪，小儿也”以戏之，倪应声曰：“蔡，大龟也。”客有于席间，令作蚕豆破题者，倪即云：“豆以蚕名，可食而不可衣也！”

震泽张杞山布衣尊，质朴无他嗜好，惟喜为诗。著有《吟雪轩诗稿》，如《闰重九日同人游荻塘》云：“登临休怅是他乡，秋老林皋野菊黄。今日招邀须尽兴，百年几度两重阳。”《山塘杂咏》云：“白苎清歌夙擅场，至今水调听吴娘。潇潇暮雨红桥外，不是离人也断肠。”雅有石湖风味。

明永乐间¹，选天下嫠妇无子而守节者，或有子而幼且窘者，有司籍送内廷，教宫女刺绣、缝纫，及有藩王之国，分隶随

1 此条在卷八重出，词语略异，内容基本一致。

以教王宫女。其所处曰养瞻所。吾邑吴家妇陆氏与焉，有子遗家。至宣德间，陆从某王封广东，又转从封江西。子已长，往来二藩间，屡请求见母，辄不允。迨正统丁卯，复恳启于王，王怜而许之。陆已病笃，不能言。子刲股与食，陆苏。王闻，益悯，召见，赐金帛劳遣之。至旅而卒，归槨先墓。人为作《吴孝子传》。子名璋，生子洪，由进士历任南京刑部尚书。

吴山，洪子。为礼书时，丹徒靳文僖¹卒，继夫人年未三十，比老，有司以其孙为严氏客，为之奏请旌典。事下礼部，山曰：“妇人节旌，制也。第令甲所载诸旌典，原为匹夫匹妇发潜德幽光。若士大夫家，何人不当为节义孝顺者？文僖公身为鼎臣²，夫人已生受殊封，奈何与匹夫匹妇争宠灵乎？”执寝之。大学士徐阶亦以为言，山正色曰：“相公亦虑阁老夫人再醮耶？”阶语塞。时分宜之子阴执朝权，尚书唯唯听命，第不敢犯山。有求嘱者，姑应之曰：“俟他日父老自言之！”

1 靳贵，字充遂，自幼聪明好学，读书不用双亲操心，十七岁于乡试中得第一名（解元），次年于礼部考试又得进士，在翰林院职司编修，掌理国史，官至宰相。政绩甚得朝廷与百姓的推崇，人人皆称贤相。死后追封“文僖公”。

2 鼎臣，重臣、大臣。

垂虹识小录卷六

陶振，洪武末举明经。天才超逸，诗词豪俊，有名于时。官教谕。著有《钓鳌集》《紫金山赋》，今不传，止遗《汾湖赋》。

徐有贞父，本芦墟人，以医行侨居郡中。有贞遂赘于郡，为长洲诸生，登进士。立朝事迹，详《天顺名臣录》。

袁黄，字了凡，祖籍吴江芦墟人。后由嘉善迁汾湖，复迁赵田。万历丙戌登进士。学究羲文，理参孔孟，图书精蕴，讖纬奇秘，靡不穷原物始，各臻至境。洵一代之宗工，百家之汇海也。子俨，字若思。天启乙丑进士。身长丰伟，不事边幅，与人无贵贱，皆和颜色以接。读书数行俱下，过目不忘。凡诗赋、古文，握笔数千言立就。高谈雄辩，闳博罕敌。令高要期年，清风映拂，沁入阨滯。卒时，巷哭。盖棺日，即祠名宦，亦从来所未有也。崇祯十五年，父子同日入吴江乡贤祠，一时羨盛事焉。

洪定远，名祖烈，芦墟人。居贫，攻苦，佣于人。有善相者云：“当以武起，家必致贵。”于是弃笔砚，习司马兵法。中万历丙辰武进士，即将兵征剿闽粤海寇。洪以气节自厉，瑯焰为稍止，功亦卒不录。为南京龙江水兵营游击时，大司马李公邦华以国士待之。雅歌投壶，有古名将风。旋与奸相马士英

不合，罢职归里，行李萧然。乙酉六月，遂入闽。丙戌九月，福州陷，死之。

李枝芳，芦墟布衣也。松江之役，从戴之俊为部领。丁亥四月，吴胜兆谋泄受祸，之俊阖家死之。枝芳亦被执，辞色不挠，意气激烈，杀之于市。

沈令言，字十林。少习举子业，不售，辄弃去。以豪侠自雄，体伟善谈。万历癸卯，挟策入燕，精太素脉，名重都下。与江夏郭文毅公善。时郭官少宗伯，为争楚藩四辅，四明郗焉。会妖书事起，四明欲以中文毅，念大臣未可轻动，知沈与文毅往来甚密，遂令缇骑逮沈下狱，深文罗织，云：“但言妖书出郭侍郎手，则汝事毕矣！”令言备诸惨毒，终不发一声。以故，郭无恙而沈亦减死，安置塞上为民。已四明罢相，人皆重郭而怜沈也。因放之归，归来筑室滋黄圩以终。以上六则见《湖隐外史》。

王朝臣，字熊翁，元泰定甲子进士，官太子司经。少从金吉父游，天文、地理、阴阳、历算诸书，悉得其指授。工诗词，以清真隽雅为主。吴江州判官张显祖咨以太湖水利，无不切中事宜。邑建垂虹桥，聘董其事，捐铁掬一百九十六条，以襄厥工。登第后，益究心经世之学。居官正色立朝，丞相脱脱器之。著有《或默轩诗文集》。以下见《盛湖诗萃》。

王贵，字玉川，朝臣曾孙。天顺癸未，由人才荐举通经，官左春坊司谏。性端直凝重，不为权贵所右，九载不迁。归田后，益肆力濂洛关闽之学。为诗文多涉世教，尝谓人曰：“鸚鵡以舌受羈，木铎以口自毁。口舌之为祸不一。”或问佛家生死轮回，公曰：“祖宗即是前身，子孙即是后世。”又尝谓：“因果报应，不自二氏始。《易·坤卦·文言》《书·禹谟》《汤诰》《伊

训》诸篇，及《左传》周内史叔兴父、鲁闵子马¹，皆历历言之，导水以归壑，未有不趋。移火以就薪，未有不爇。自取之也。”家居淡泊寡营，惟以读书孝友勉其二子。著有《玉川书塾问答》二十卷行世。

王锡命，字天宇，号文泉，明嘉靖壬戌进士。历官江西右参议，有《葆光阁集》。以母病告归，绝意禄仕，惟与二三老友倡酬而已。

卜梦熊，字仲登，号景川，万历癸酉武举。工诗善画，兴至，写幽岩瀑布，画理入妙。有执贖来者，虽王侯，千金必峻拒。尝谓舜年曰：“山水灵物，丹青贱役，不解画俗卖画俗，吾游戏自娱而已。”

王顺阳²，字敬怀，号恭斋，贵曾孙，国学生。性慷慨任事。万历庚申，岁饥，邑宰派令平糶，公以东南一隅自任，使诸圩自举公正数人，给以信筹，十户一保，十保一总，每总各具一册，两月蒞事，人咸称诵。邑宰晏清上其事，部议优叙，授七品冠带。生平耽于诗，著有《潇洒独吟编》，文震孟为之序而行之。

明 曾烜，字日章，以字行，吴江人。受《春秋》于鲁渊。洪武间，以岁贡授黄陂县知县，考最，升翰林侍读，同修《永乐大典》。再使交趾，卒于富良江。见《列朝诗集小传》。

邹奕，字弘道，吴江人。秀目美髯，貌若玉雪。议论英发，文词高古。至正中，登进士，调饶州录事。洪武初，任御史，出知赣州府。坐事谪甘肃二十余年。永乐初，以蹇义荐召还。有《吴樵稿》。同上。

崔澂，字渊甫，吴江人。厌弃举业，好古工诗，年二十九

1 《左传·僖公十六年》载周内史叔兴言：“吉凶由人。”《左传·襄公二十三年》载鲁闵子马言：“祸福无门，唯人所召。”

2 卷二作“王顺扬”，以姓名一字之差重出，传文略同。

而卒。有《传响集》十二卷。同上。

姜元，字元仲，吴江人。少博学嗜酒，不就博士弟子试。与邢丽文游，慕好之，居于湖濱，足未尝轻诣人。或使其子弟学焉，亦时谢遣之。朝起，视盎中粟稍可炊，即闭户吟诵。岁中所过相善者，率不出百里。晚年善黄鲁曾、徐纘，鲁曾盖师事徐、姜也。徐诗尚华美，姜务雅淡，极意陶炼，每成一诗，辄复捐去，著思再三，芒藻几尽，不为时流所知。或讽其少贬，执道愈坚。以知希为得，盖亦诗家之逸民也。鲁曾之子德水，撰《国华集》，载元诗五篇，元之名得附以传。同上。

金允治，字际升，县诸生，居邑之江泽村。尝讼其叔冤，为怨家所陷，系狱三年，手不释卷。潘兵部有功救之，得免，携入都。崇祯三年，冒锦衣卫籍，得中顺天试。词藻斐然，论旨称赏，名动京师。后官晋江知县。

徐时亨，字龙池，民望五世孙。官江西大庾县丞，大吏称其能，继署县事。清廉勤慎，多惠政，民咸诵之。将推升，而时亨见时事日非，遂以老病告归。崇祯十二年卒，年七十六。

徐国贤，字岳生，正裔孙，县学生。性刚直，扶弱挫强，不惮权势。与董宗伯为总角交，所藏墨迹尤多。鼎革后，隐居以终。

徐上麟，字长康，正裔孙，县学生。顺治二年，明兵部主事吴易起兵时，江泽盗魁潘况依附剽掠，大为民害。上麟直诣吴营陈盗状，吴立斩况以徇，乡里以安。康熙二十年，举乡饮宾，寿登大耋。其孝友睦恤，详冯勛所撰传。子钐，府庠例贡生，孝于亲。吴江漕运收兑属民间，里长苦之。钐偕陶天民、沈作霖上书巡抚，请归诸官，一邑食其利也。

沈金声，字于野，龙泾村人。幼负文名，康熙庚子岁贡生，选授潜山县训导，严立课程，以别优劣，勸以敦品励学。逾年，以病告归。

许寅，字翼皇，世居江泽村。笃伦纪，尚正直。雍正三年，考授州同，旋蒙同邑李重华荐，举孝廉方正。以丁父忧不果。子天祚，县学生。著有《江泽小识》¹。

张孝起，字将之，吴江人。崇禎十三年特赐进士，任廉州府推官。城陷被执，永历元年始得出狱，从幸梧州，迁兵科给事兼掌吏科。四年，会十三营自楚战败，入行在，跋扈不法。孝起疏劾其罪，直声大振。有郟国公高必正者，闯贼李自成之妻弟也，骄蹇尤甚。孝起责以大义，卒慑服焉。五年，从幸南宁。孝起出为雷、琼、高、廉四府巡抚，未至，四府已陷。乃入廉州山中，依靖氛将军邓耀于龙门岛。后依漳平伯周金汤，金汤败走，孝起仓卒被执，不食七日死之。见《粤觚》。

戴笠，原名鼎立，字则之，号耘野，吴江人。国变后，隐居，不入城市。弃诸生，欲自况于河，不获，则遁入缙流，不愿则返。息敝庐，奋笔以志己之所志。于是，为《则堂纪事》三十余卷，志痛忠义节烈耆旧也。为《寇事编年》十八卷，志痛国也。为《永陵传信录》《圣安书法》《文思纪略》《鲁春秋》《行在阳秋》²若干卷，志痛国亡之始终也。藉笔耕以佐饘粥，有余则以急人之急。炊烟时绝，昕宵编摩，以此自终。己酉春，吴梅村招之至娄东，宿于野寺，知陆桴亭先生名，属友人持刺致之，下拜称弟子。行谊具详郡邑镇各志。其宅址在同里镇南，曰朱家浜。子姓无考。宅后即其墓，前为元镇庵，旁舍为位以祀之。参《杏庐文钞》。

1 《光绪周庄镇志》云：“许寅，字翼皇，号西畴，世居江泽村。笃伦纪，尚正直。雍正三年，考授州同。吴江徐邑尊永祐为赠铨曹高选额以旌之。早岁受业于潘太史耒，与同邑李重华、郡城裴桐交。当诏举孝廉方正时，适重华自主试四川归，覆命日即疏荐寅，旋以寅丁父忧而罢。子天祚，字景运，江庠生，尝与徐敦仁辑村中故实，成《江泽小识》一书，每胜迹各题以诗。”

2 《道光苏州府志》另有《殉国汇编》《骨香集》《耆旧集》《发潜录》，而无《则堂纪事》。

王家彦，字仲美，号绳河。万历甲辰进士，授韶州推官。韶俗骄悍不知礼，至则教民孝悌。有讼者，剖决不移时。署府篆，值岁稔，散俸设糜食之。曲江多旷土，民困输赋，为白监司，蠲除之。丁内艰后，补庐州推官。兴除大事，皆一时硕画。台司报可，乃著为令。奏最，将入都巡按，委查扬州盐课。大贾因缘为奸，赂以万金，不纳。奸吏乃纵官舫于大江中，几覆，得疾卒。

仲嘉，字孟嘉，万历己未进士，官兵部职方司主事。

计名，字青麟，县学生，为东父。品高学粹，治经义有声。一时游其门者，多所造就。吴汉槎少时，简傲不拘礼法，见其所作，瞻赋嗟赏之曰：“此子异日必有盛名，而终不免于祸！”后果为科场事被遣，人以为知言。

张世芳，字父初，县学生。见世途险阻，无意进取。尝以盛湖水势下流，散而不聚，因集里人于白洋湖东度地，捐金共建文星阁三层，颜曰文起，识者比之文笔峰，而斯土亦赖以镇奠焉。诗气韵高秀，超然尘埃之表。子天章。

沈承休，字白起，县学生。博学好古，诗文书画皆出人意。鼎革后，不事进取，隐居乐道，诗酒自娱。著有《眺楼新咏》。

徐寅，字羲宾，幼失恃，事父以孝闻。奉后母益谨，昆季间友爱笃至。不求仕进，留心经术，议论具有卓识。

皇甫钦，字尧臣，县学生。好诗工书，人争购之。著有《罗浮存稿》。

朱逢源，字贯槎，号苻村，县学生。好风雅，富收藏。康熙己酉，圣祖南巡，回銮于八坼舟次，恭献诗赋，面试蒙奖“诗好”，命赴江宁与召试，钦取第七名。有《恭纪诗赋献册》。

周景岷¹，字鲁祈，灿孙，康熙丁丑进士。

1 《乾隆吴江县志》从山，作“岷”，《康熙吴江县志续编》作“呢”。

王奂，字维章，号可庵。博学能文。康熙己未，荐举博学鸿儒。性喜吟咏，调雅词清，一时无右。著有《倚树堂诗集》《可庵诗钞》。

张天章，字汉为，号在斋，县学生。学行纯粹，笃于孝友。顺治己酉，松江兵至，民多遇害。在斋侍父疾，兵欲刃其父，委身翼庇，被数创，流血不释。兵悯其孝，舍之。晚年潜心内典，寿八十余。

徐溶，字筠窗，号白洋山人。工山水，笔墨苍秀沈著，小幅及浅绛尤妙，萧疏闲冷，直逼元人。其断句亦秀韵。子椿，能承家学，年八十余。

张天麟，字东侯，号笏山，县学生。天才英异，读书等身。工行草书，有声于时。尤饶干略，有义行。康熙庚戌，岁饥，捐米三百余石，民赖以活。马抚军旌其门曰“烝黎饱德”。生平杂著有《笏山斋诗钞》。

周元熙，字缉堂，号抱静。性至孝，事母能先意承志，周恤亲族，不待请。人有急难，力为排解，无德色。著有《抱静遗稿》。

沈元鉴，字韬庵，国学生。赋性颖敏，闭户读书，工书法。壮年游幕四方，行滕¹所至，公卿倒屣争迎，名益重。好韵语，著有《锄经堂诗稿》。

陈位坤，字惕公，号宁斋，王谟子，国学生。由一统志馆议叙官宁州通判。工书善诗，居官廉谨，慈惠研鞫，必得其实。宁地多桑而无业蚕者，每岁刈为薪。宁斋从家乡觅蚕种，并绘治蚕器具，令民制造，亲授其法。由是，比户业蚕，而民被其利，感德载道，并塑像称为蚕神。即以去官日为蚕神诞辰，立庙署傍崇祀之。

1 行滕，绑腿布，喻远行。

仲步墀，字集川，号莼溪，周霏子，县学生。中乾隆庚辰顺天副榜，屡不得志于南闱，专力于经术，崇尚朴学。邑令唐陶山聘修县志，未成。著有《水利考》。

王燕，字翼之，号乙巢，县学生。天资颖敏，勤学好古。生平穿经史，著有《学庸讲义》三卷。汇辑历代名媛之工诗书画者，类分三编。屡战棘闱不得志，遂放于酒，以著述为事。善诗古文，著有《宝文阁诗文集》。子致聪，县学生，工书法。

张兆鹏，字凌苍，号云九，天章曾孙，国学生。天性慈祥，克绳孝友。弱冠，购地葬父母。兄辈惑于地师言，因泣祷于神：“设有不吉，愿独受，无与诸兄。”遂获葬焉。诗亦抒写性灵。

程瑶，字朝璋，号玉舟，乾隆乙酉举人。生平谦谨和介，不屑随俗。乡举后，不刊送闱。艺人问之，曰：“俗习为此，所以博馈遗也。我方举孝廉，便可不廉耶？”晚年授徒以老，诗亦典雅。著有《玉舟诗稿》。

沈大本，字启文，号礼堂，震泽增生。具夙慧，读书过目不忘。九岁作《石猴赋》，多惊人句。为人笃于孝行，重然诺。生平诗为余事，以经学为务。所著有《礼堂诗钞》《仪礼详义》《中庸口义》《读书吃说》《杂录》及古文若干卷¹。子岫，县诸生。英才绩学，游幕浙省，坦直不为利动。著有《左塾吟草》。

王惇，号岫轩，举人，和行弟。平生无书不览，阅后至老不忘。著有《史汉人名异同录》。

姚梓生，号春崖，震泽诸生。刻有《松陵倡和集》。同时有朱尔澄，号春池；倪天钧，号琴溪；叶兆泰，号晚香，皆有诗名，入集中。

谢宗素，字贞谷，号履庄。少颖敏，年十九为甘旨计，弃

1 《同治苏州府志》著录“沈大本《周易述义》《礼记订讹》《中庸口义》《服制考异》《读经日钞》《读书吃说》《城南夜话》《艺苑时贤小志》《礼堂诗钞》八卷”。

书读律，历游公卿间。晚岁归里，杜门却扫。道光癸巳，邑大水，田尽淹，得以全灾实报，民困获苏。宗素陈言大吏之力居多。著有《却扫庵诗稿》。

金兰源，字绍盘，号谢堂，吴江诸生。入赘为官，历滇粤，所至有政声。官云南澄江府知府，归，优游林下十余年，著有诗二卷。

姚瀛，字文澜，号槎客，国学生。工吟咏，精鉴赏。著有《香祖居诗稿》。

黄有熊，字朗浦，号小轩，吴江诸生。子如斋，举孝廉。孙鑿，入学时，有熊偕之重游泮宫。

王锡泰，字汇亨，号秋水。嘉庆辛酉拔贡，庚申举于乡。官国子监助教，任满后，京察一等，放陕西宁夏分府，适居忧，不复出。培育子弟，人文蔚起。兼工书法，求辄应之。

黄灿，字汉章，号星槎。工诗画，兼善汉隶。尝幕游浙东，有《东甌诗草》。弟焜，震泽诸生。工诗及书，早卒。子以正，号小槎。博学好古，工诗善隶。有《吟红馆诗稿》。

杨观吉，字蓉锦，号古山，国子生。颖敏绝伦，于学无所不通，屡蹶于试。专习诗古文词，好与前辈博雅者游。天文、地輿、河洛、星命、卜筮、医药之术，悉究其要。于书法功尤深。晚年又以医名于时。性简傲，卒年七十。著有《鸿雪堂诗存》。

沈才清，字甄陶，号秋伊，吴江诸生。好山水，曾度梅岭，揽百粤之胜。晚岁寄迹莺湖、虎阜间。著有《古柏轩诗稿》。

沈宝树，字稼维，号爱漪。嘉庆戊午举人，年八十余，童颜不衰。同时有孙懋勋，号花山，亦年逾八秩，精神矍铄。尝游粤东归，颜其室曰“且停桡”。工书，善拳勇，豪于饮。醉后归，吟咏自乐。所著有《天籁集》。兼善医。

周星彩，字景如，号白庵，吴江恩贡生。人品如浑金璞玉，

工功令¹文，老成望重。及门甚众，而仅以明经终。年将八十，荐举孝廉方正，论者翕然。诗工长律，可至百十韵不懈。曾刻时文《启秀集》，学者争为圭臬。

沈宝禾，字子实，号辛畬，吴江恩贡生。实学真品，当世所钦。府《石志》²曾聘修焉。然功名屡蹶，仅以明经终。所著有《毛诗多识录》六卷、《古史世系谱》一卷，《春秋左氏》分编、合编各一卷，《春秋大事摘要》二卷、《姓氏韵编》四卷、《听蛙溪舍诗钞》十卷，《赋稿》《杂著》各一卷，《南史杂咏》《范石湖杂兴诗笺》《鼓吹词》各一卷，《家谱述》八卷，未刊。弟毓知，岁贡生，馆都中潘相国家，亦困于科名。

沈清衢，字云逵，号廉斋，吴江诸生。道光辛巳举人。生平谨厚，不苟言笑。官无为州，训导学宫。旁多隙地，令民人植桑饲蚕，多得利益。升扬州府教授，未赴任。咸丰庚申，在籍殉难，赐恤。子继椿，官浙江县丞；希植，世袭云骑尉；恩繁，丙子进士。

王与沂，字英初，号赋梅，震泽廩贡生。少志科名，曾游都下，旋设讲席于家，时以立身致命训其子弟，从游日众，多所造就。道光丙午，创建文星阁于梓潼观东偏，阁北筑室三楹为文会。咸丰庚申寇警，命家属出避。城破，贼至其家，生骂不绝口，殉难，赐恤。弟与汶，沈静寡营，诗写性真。旌表“悌弟”。

赵瑶林，号子霞。早岁工诗，抱异才，性不羁。游皖不得志，旋至闽为幕僚。有《吟花馆剩稿》。子京，官闽华封县县丞，殉难赐恤；次子宝申，官浙之玉环厅同知。孙锦忠，邑诸生，官四川；铭忠，光绪乙酉拔贡。

1 功令，旧时指法律、命令。

2 指石韞玉等纂《道光苏州府志》。

杨澥，号琢堂，又号聳石。少工篆刻，至晚年不用墨篆，直以刀写之，曲折如意。每作印章，奏刀坚劲，得金丁之法。精鉴碑版，多为题跋。字古茂，有金石气。作诗得奇趣。子庆麟。另见。弟炳春，号漱云，生平笃友谊，为故人海盐张姓葬其两世，人称美之。道光己亥举人，官浙江泰顺鄞县，摘发如神。庚申，君方理省中粮马，城破，殉难，赐恤。有《扶雅堂诗集》。

费仑，号二峰，震泽籍，府学岁贡生。有文誉。居至山堂，督课后辈綦严，课余辄以诗酒自娱。著有《小壶天诗稿》。子凤锵，号歧生；凤标，号梧生，县诸生。孙源长，号式卿，入泮后即卒；廷鹭，号雄卿，精易理。

费芝沅，字瑞庭，号楚江，震泽诸生。性慷慨，遇事敢为。有文名，屡蹶秋闱，未展其志。

黄楚湘，字子全，号晓槎，震诸生。少游袁江，遍览江山之胜，归与六舟僧结金石缘，绘图征题。晚益肆力于诗，著有《稻香草堂诗钞》《言志集》，乡党增辑旌表孝子。子尔常，号品五，震诸生。侄尔寿、尔康，皆能诗，有集。

吴元相，字子孝，号达庵，吴江诸生。居同里，家贫力学，熟于掌故，诗古文词并有宗法。诗亦雅近渔洋，连不得志于有司。晚年屏俗杜门，著有《松麈闲谈》三十二卷¹，《吴氏统谱》《愧匏轩随札》《玉香阁诗文稿》《松陵琐缀》八卷，《说鬼董狐》六卷，《雨窗述问》一卷，《夷事略》一卷，《黄叶村人自述》一卷中，《续聊斋志异》十卷。孙鸿珍，县诸生，光绪乙酉，赴白门秋试，卒。

倪廷琅，字小香，吴江诸生。工诗，善书法，著有《浣绿草堂诗钞》。年六十外，而神明不少衰，有如韵岩者。韵岩，徐

1 《同治苏州府志》作“三十卷”。

姓，名筠，同邑人，酷嗜吟咏，淡泊自甘。年六十而有少容，著有《芋香山房诗钞》。见《三布衣集》。

陆清桂，字馨德，号春园。居城中下塘，少孤家落，生平廉洁自持，课蒙外惟事吟咏。同时有程春江，居相近，亦工诗，皆矜矜自守高洁者也。

张宗翰，号晓江，震诸生。喜吟诗，至晚年兵燹后，多愁苦之音。《哭殉难》诸作，阐扬忠烈，可作诗史。有《匏弃山人诗草》。

费馨莲，号莲舫，乙丑进士卿庭孙，震诸生。少游幕，晚家居，性淡泊，善弈。

沈曰彬，号逸楼，震诸生。为人谨厚好饮，工书法，雅近欧褚，从游者皆卓然成家。徐鹏，号冲斋，精篆刻，工画兰竹。皆名噪一时。

吴治谟，号花南，震诸生，居梅里村。风骨清超，尝游皖浙。归，与同人联诗酒，欢喜画墨松，劲节贞操，不啻自写性真。咸丰庚申，贼破江震，犯梅里，长媳夏氏赴水死，幼子才杰护父抗贼死。治谟怒目骂贼，被伤晕绝，徐苏，强行依祖茔。贼又至，骂益厉，受数刃殉难。赐恤。

叶振声，号子音，道光庚子举人，儒素家风，处之自安。好藏书，丹黄校补，精核可喜。平生孝友真挚。

盛坤吉，号简堂，震泽恩贡生。幼有异禀，笃于孝行。同治十年旌表孝子。子钟歧，光绪己卯举人。

金清桂，号粟香，国子生。工画梅，尝云：“作墨画须隔宿磨待用。”著有《画梅说》《粤游记》。子宝森，县诸生，工篆隶。

徐堂，字仲升，号淡人，吴江诸生。精究经学，于《易》有《衍郑氏爻辰图说》，于书有《古书训》若干卷，于诗有《三家诗述》十六卷。诗虽余事，然语多性灵，笔极矫健。有《五凤楼诗钞》。兄基，号醉仙，亦工诗。

任廷旻，号雄卿，吴江同里人，道光癸卯举人。拣选知县。性豪爽，有干济才。少时得母教，工诗古文。咸丰庚申，粤寇至，有“生为大清人，死为大清鬼”语，骂贼而刃伤喉，血涌，赴屋后河死。同时殉难者有：顾榆，号星桥，甲辰举人，以知县分发皖省。贼至，不屈死。陆宝麟，号含斋，震诸生。文词清丽，性沉静，寡交游，终日与群编相对，环堵萧然，亦殉庚申之难。均旌恤如例。

王汝佐，号诘墅，道光丁酉举人。秉质颖异，食贫力学。游皖省，览既广，学益进。著有《卷菴吟草》。子树业，廪生；树藩，乙亥举人；树丰，诸生。

殷汝述，号补庭，府庠生。丰裁高峻，不苟言笑。工举业文，兼耽吟咏。著有《制锦草》。弟汝烈，字霞士，亦工诗，同卒于难。

赵云衢，号龙门，震诸生。幼时至邑庙，见神起立，遂终身不入。性雅洁，工书，宗倪高士。间墨画小品，亦古秀。喜藏诗画、书册，行篋恒满。晚馆黎里，值中秋，有乞书“琉璃世界灯”额，甫书就，即中风不起。著有《五石十水吟草》。

金沛霖，号朴盒，府庠生兰原子。工隶篆，尝临《古味花印谱》，有《芎芸馆诗集》。弟作霖，号雨人，咸丰庚申，殉节于浙省盐经厅任，与妾杨氏同殉，旌恤。子其相，号笑酣，震诸生。有隽才，诗其家学，官浙江安吉归安知县。械，县诸生，工吟咏，有《近蓬莱仙馆吟稿》；枚，号吉臣，官浙江乐清县县丞，亦能诗，卒于官。

费希濂，字质初，号少云。少失怙，长而好学能文，工书善诗，官浙盐尹。后得军功，擢仙居县知县，寻代理府篆。会蒋方伯益澧进剿，省垣委办军务，兼摄富阳县篆，积劳疾，卒于军。辑有《仙居县志》《平寇略》。

费干宸，号硕甫，震诸生。功深举业。侄福畴，号子选，

江诸生，年二十六，幕游皖省。咸丰三年，贼渡巢湖北犯，福畴遇之，不屈，身被七枪，死而复苏。旋委办军务，因积劳，金疮迸裂死。赐恤如例。

沈菑生，字洵芳，号子湘，震诸生。性伉直，品端方。庚申辛酉间，流离颠沛，未尝取非分财。工诗古文词，以笔耕为业，好奖掖后进，试辄高等，文誉日噪。年七十，从游者尚众。著有《劫余草》。子鸿文、鸿钧，县诸生。

黄思睿，号哲甫，震泽南厓人。客授他方，诗甚工丽，长于近体，有《修月山房存稿》。

费震壬，号桂卿，馨莲侄。能诗，老境坎坷，客死武林。

倪宝键，字玉门，号又香，廷烺子。吴江贡生。夙负才望，诗画雅洁，兼工倚声。时际兵戎，多感慨之作。著有《三十树梅花老屋诗稿》。

费寿康，号廉卿，仑从侄。弃举业，作幕宾。一时士大夫争结纳焉。晚岁家居，工画山水，笔墨精良。诗亦清雅脱俗。兄寿曾，号麋生，工隶楷。

王树年，字百之，号羨门，震诸生。秉性诚恳，勤学好古，敦气谊。庚申殉难，赐恤。弟树人，号更梅，县诸生。耽诗酒，著有《松陵人物汇编》。

钱麟，号忆莲，震诸生。少失怙恃，事继母以孝闻。用不给，质衣以济，不使继母知，恐廛忧虑也。庚申寇至，以身殉之。

沈文杓，字政衡，号梦斗，震诸生。少孤，事母、兄以孝、友称。弱冠即有文誉，喜吟诗、作画、度曲，并肆力于古文词。著有《紫桐花馆诗钞》。

余高熿，本高姓，号蔚人，震泽籍府廩生。资质英敏，文尤精锐无敌。弱冠，中咸丰壬子举人，一试礼闱后，闻江左兵尘载道，只身旋里，谓：“天下事不可为矣！恨不能为终军请

纓、允文克敌耳！”喜围棋，谈文论古之余，日以此自遣。年二十二卒。有《南旋草》一卷。

韩霖，号傅雨，吴江籍。家贫而好施。祖本徽籍，号惕斋，工画山水，老年喜拾字纸，常携布袋至街巷，见墙上贴纸飘落，即铲去收归焚化。傅雨中咸丰己未补科举人，闾中见其祖衣冠挈字袋。至庚申城陷时，在田邑尊署襄办团练事务，不知贼已至，方出署战，却之。次日，贼来益众，胁降被执，不屈死，赐恤如例。

费华宝，号绶笙，馨莲子，吴江诸生。善围棋，工吟咏。遭粤寇后，尝游浙东、皖北，得诗甚富。

钱锡庚，号觉莲¹，震诸生。为人兀傲不群，有干才。文宗三方稿。同治庚午举人，光绪丙子进士，官工部主事，不就职。归，执文坛牛耳。遇事敢为，不避嫌怨。庚申之难，感愤时事，冀获死，而会天幸得脱。乱后，凡地方善后事宜，独伸己见，刚果不挠，人咸钦之。

吴恢杰，号莲衣，治谟子，震泽廩贡生。疏爽不群，性友爱。庚申，至湖城佐军务时被围，冒险出，赴海上乞援。贼平，尝至塞外张勤果公营，奔走数万里，得保二千石。时兄仁杰，官京师，信札往来，不绝于道。归后，病咯血卒。

费鸿勋，号呦笙，震诸生。性落拓不羁，家不给，以馆谷济之。父元标，号暹溪，县诸生，工制举文。

周之桢，字祝年，号竹岩，县诸生。工画兰，喜吟诗，客授于外，得友朋唱和之乐。性温厚，好收藏书画、碑版。晚以子祖薰卒，尽弃之。尝修葺其先忠毅公祠，举凡敦睦，身先倡之。著有《垂虹诗剩》八卷。祖薰，号兰伯。性静默，有干才。游幕皖省，归守砚田，遇宗族亲朋事，力任不辞。诗本家学，秀

1 《同治苏州府志》作“梦莲”。

雅中有至性语。有《摘萍闲唱诗稿》。

周祖白，名宝彝，震诸生，居谢溪。颖敏过人，始讲求星学，夜每登屋瞭观，不惮霜露。未几得疾，弃而习山水，深造高逸，极似沈、王。诗古文词靡不精，而岁终坎坷，怡然自若。尝谓：“余画不悦时眼，数百年后当有知而珍重者。”有《祖白遗编》二卷。

李治运，号漪亭，重华子。雍正庚戌进士，官浙江按察使，政绩卓然。尤慎刑律，凡故乡戚友投者，无不量材为之地。旋请终养归，与朋旧诗酒往还。工写兰，诗承家学，有《贞一斋集》。

周志任，字莘傅，号梅梁，寄客廷谔子，县诸生。为人沈静寡言笑，择交游，重然诺。诗有摩诘致，著有《梅梁寄客草》。

沈宗湘，字六如，号莼村。乾隆丙辰进士，官江西新淦县知县三载。其收漕严禁胥吏染指，亏费数千金，至鬻家产以偿。旋以议刑名忤上，告病归。主笠泽书院山长，讲学论文，娓娓不倦。暇与诸耆宿结岁寒诗会。著有《越游草》一卷。

吴登俊，字聚升，号半峰。情致简淡，沈酣书史。家落食贫，客游海内。历淮抵赣，度梅岭而南，凡山川、风土、古迹、名胜，兴酣落笔，每即所见闻，托诸翰墨以娱客况¹，或见诸诗画，初不求其工也。著有《闽粤闲吟》。

周汝雨，字纯夫，号六浮。举孝廉方正，曾梦前生为六浮山羽士，自号六浮散人。有文名，工于诗，盖本其父龙藻训也。中年，幕游关中，历览塞上、中州形胜，诗益奇拔。著有《六浮吟稿》四卷。

徐履端，字端操，号楷亭，震泽诸生。古心厚貌，以德胜，

1 客况，客居的境况。

不以才胜。精于理学、制举艺，从游者辄飞鸣去。诗非所长，然其人不可泯也。

沈斯盛，字西京，号江干，县学生。少有文名，抑于有司。沈酣韵学，一时名士咸集江干草堂，结吟社，为邑盛事。著有《柳塘后处士诗》。

杨淮，字禹远，号蘋园。无他好分心，终日苦吟。家日落，贫无立锥地，炊火不举，儿女啼号，吟自若，不顾也。人既无知者，亦不屑示人，以此谤毁不及，自以为克全其天。晚居婿家以卒，年已八旬余矣。有《尺五楼诗钞》。

朱钟秀，字鸿声，岁贡生。工诗文，豪于饮，谈谐倾座，和藹知人。有事与谋，热肠不辞劳瘁，人咸重之。嗣游桂林、武昌归，以诗酒自娱，年逾八十而终。所著诗文皆手录成册，冲夷淡远，适意而止。有《雪圃吟草》。

黄汝德，字心一，号直斋，乾隆辛酉选拔甲子举人，历官山东、浙江知县。天赋轶才，为人磊落。重气谊，喜吟咏。有《归读斋诗稿》。

赵含章，字夏九，县学生。工制举文，喜作韵语。有《敝麓偶存稿》。

赵楠，字端木，号石厓。于书无所不读，先中乾隆己酉副车¹，馆淮南，后游京师，所交尽知名士。工诗、古文。壬申，举京兆，抑于礼闱，官丹徒儒学，不数月卒。著有《〈易经〉〈诗经〉注存》《淮南程氏》《春秋列国考》《宝斋堂吟草》。

吴锦驰，字凌槎，号螭村，吴江诸生。清才邃学，工制举文，尤长于诗、古。晚年游幕楚浙，不得志归，而迁居殷家荡。贫病以终。著有《松江渔父诗草》《南枝集》《杏圃丛书》。

陈庭学，字景鱼，号莼溪，世居邑之方尖。乾隆初，随父

1 副车，清代称乡试的副榜贡生。

入都，遂籍宛平。乙酉，以选拔举京兆试，丙戌成进士，由部郎出知潞安，历官至汉兴道。以事被议，谪戍伊犁凡十四年，始得赐归。著有《塞垣吟草》及《东归途咏》五卷。

费玉坡，字覲贤，号蓝庄，吴江诸生。父振烈，为文坛名宿。玉坡承家学，精于文，以病弃学，幕游中州、江右，所历山川、人物，一一托之于画。虽不以画名，而画实为文掩者。

薛梦柳，字方韩，号西园，居城南茭堤，有池塘林木之胜。试童子场二十年，始为县学生。好读书，终身为蒙师，鲜知之者。诗亦清丽芊绵，时涉哀怨。歿后，其子不能继业，稿遂散佚。

周京，字邑丰，号寄林，居邑之郭南。纸窗竹几，闭户摊书。喜临池，作晋、唐书，兼写芝兰，而尤肆力于诗。喜结纳，好古之士如陈四桥懋等，诗酒往还无虚日。气盛心虚，座客常满。以不善治生产，家益落，寄食村舍而卒。著有《五芝堂诗草》。懋著有《遂高堂诗集》十卷。

顾日新，字剑峰，吴江同里镇人。幼孤，随其母适长洲袁氏，冒姓补弟子员，占长洲籍，推归原县，居城中。才气过人，晓晓¹自雄。晚年病甚，侘傺²以歿。著有《寸心楼诗集》三十七卷。

费秀元，字玉成，候补都司，邑之计巷村人。迁居周庄。性任侠，好结纳，每为人排难解纷。咸丰丙辰，水乡多盗，郡守平翰檄令督捕巡缉。盗魁沙哥不获系狱，徐有壬知其才可用，出诸狱而檄募枪船助守各门，徙郡绅韩崇朝夕督巡。至庚申四月十三日，粤贼陷苏城，急与崇夺门出，归而益募枪船，为保卫乡里计，兼图恢复，自行团练，妥为约束。时金泽、盛

1 晓晓，争辩声。

2 侘傺，chà chì，失意而神情恍惚的样子。

泽、北库各有集募枪船者，间相寻仇，得秀元一言，则立释，人咸重之。已而薛中丞煥、吴方伯煦先后，檄令侦探贼情，整备船勇，堵御葑娄门援贼。于是，诸镇之募枪船者皆用命。同治元年春，疾卒。人以其有保卫乡里功，咸惋惜之。

柳以蕃，字价人，号子屏，晚号韬庐。幼承家学，资性颖异，以附贡生试北闱，闱中友某病，以蕃调护之，几不克试。罢归，遭粤寇乱，所居分湖大港，避难来者皆一时魁杰，相与跌宕诗酒间。旋宅父母忧丁，家中落，营葬。先世遗产，让仲季两弟，授室入郡邑庠，以次归其妹。客授，以资之连，不得志于有司，慨然曰：“学岂为干禄计耶？虽得之，如亲不逮养何？”于是，绝意仕进，力攻古文，宗桐城姚氏鼐，诗追苏、黄，乡先生若陈寿熊、沈曰富，同时若吴望云、费延釐辈，咸心折之。年四十，发秃露巖。仲卒，郁伤得疾，畏风蛰居且十年，以笔札自遣。兼通轩岐术，主讲切问书院，称得士最。睦姻任恤，无弗笃摯。坎坷终身，且无子，年五十八卒。著有《食古斋诗文录》，凌泗为之梓行。

凌淦，号砺生，世居吴江莘塔镇。伟干炯眸，豪气逼人。咸丰己未，与从兄濬中恩科同榜举人，考取觉罗教习，援例候选郎中，应礼部试，屡不得志。旋丁母忧，里居，与熊其英、李龄寿分辑《国朝松陵文录》二十四卷。承当道命修县志，又与熊、李分纂成《吴江续志》十六卷，采乡先生迕鹤寿、陈寿熊遗著上学院长沙王侍郎先谦。由是，迕氏之《齐诗翼氏学》、陈氏之《读易汉学私记》，并刊入《续皇清经解》。于世无所藉，一意举乡里善事，乐奖才技，能平不平事。人有告乏、干请，必诺存恤。袁孝廉清贺遗妾若子，沈兵曹元溥死，托孤幼女二，皆为抚养，女择配，孤殇立嗣。子死，又立嗣孙陈麟，成县学生，皆其力。好蓄典籍，购毁淫书。家故饶，坐是窘乏，然不以此自挫。光绪三年，中州大饥，与同郡谢家福令主募赈

已，与青浦熊其英入汴协振，力疾救修武、策济源，恤林县雹、武原蝗。五义口告决，淦主以工代振募，运材抢堵，堤以固。事竣南归，筑退修书舍，嘯歌其中。卖药海上，踵求户满。乙未，倭事起，已而就抚。著《狂言》三册，署曰《东海季连》。由是纵酒，且饮且呕血，遂卒，年六十三。同上。

费金绶，字若卿，吴江南町村人。父秀元，以捕盗团练功积赍都司，咸丰庚申，以团勇保卫乡间。及卒，金绶统其众，时年十八，精强威重，通晓兵机，为诸名将器重。同治二年，伯相李公以金绶部隶淮扬，后改为抚标水师新后营，所向克敌。随大军攻葑娄门外各贼垒，贼势穷蹙，遂复苏州。又随程公进兵，克八斥、平望，以所部收黎里，歼贼于唐家路，随收王江泾。三年春，为程公前锋，攻克嘉兴，移驻夹浦，分巡堵剿，肃清事平。李公累奏保以蓝翎千总至副将赏换花翎，补常州右营守备，迁左营。光绪九年，法越事起，拟随吴公大澂至朝鲜。未几，以弟金组驻军镇海，击沉夷船，应提督欧阳公召，亟往助防，获胜。事上，记名简放总兵，署象山协副将，补授平阳协副将，兼统瑞平练军。二十年，浙西盐泉为患，调署嘉兴协，兼统嘉郡各营带缉捕巡盐水师，添造枪划船游徼，遂得擒斩泉酋王康南、孔光明等。二十一年冬，以事力疾，至申浦，舟覆，援回即卒，年五十三。事闻，赐恤如例。

沈中坚，字致五，号颀生，吴江雪巷村人，懋德孙。生有至性，小试不利，弃举业，游于艺。诗境激昂，书法颜、褚。通音律，习骑射、搏击，一以绳武为心。踵刻《学》《庸》《论语》善本及名医、劝善等书，亦近百种。尝割田五顷贍族，广置医药局，修邑庙及杭之岳鄂王祠墓、句曲之茅君殿。患平望杨家荡风波之险，筑湖堤三十余丈以避之。悯沿塘行旅之艰，创凉亭，自无锡至嘉兴四十余所以憩之。居乡排解纷难，力劝人善，然善不自居。光绪四年，燕、豫、晋皆告饥，吴中义赈迭兴。

多赴豫，鬻田三十顷，挟贖往天津，剖金振晋，自任安平县冬振，山谷编户，风雪中躬历靡懈，遍恤之，罄其贖。大吏以事上，得旨以郎中候选加三品衔，给予“乐善好施”字样。逾年返。自是，一舸书画，挈妻子往来吴越间，游名山，访畸士。好搜罗名家手迹。会家人不戒于火，第宅、亭台、典册、碑版之属，悉烬焉。居恒力自撙节，裘敝不更，制食恒蔬二十三年，卒年五十有五。同上。

沈懋德，字翠岭，世居雪巷村。国学生，候选布政司经历。家有田万余亩，而取租平，为远近最。每岁四月，耕懋德田者，计亩贷米三斗，至秋收还之，不权子母。其子孙行之以为常，租入必镛数仓，虽高值不售，曰：“无蓄，脱歉岁，何以平粟？”又建庆善堂，施棺掩骼，独力举之。好藏书籍，尤多刊刻遗书，如杨氏复吉、张氏潮所辑《昭代丛书》，迮氏鹤寿所校王氏鸣盛《蛾术编》，吴氏翌凤《国朝文征》，朱氏珩《古文汇钞》。卒年七十有三。

陈世杰，邑之吴家埭人。幼入村塾读书，即略解《孝经》事亲之道。父晋惠，早卒。奉母任氏以孝闻。母有疾，侍汤药惟谨。母尝病剧¹，气绝，世杰大声哀号，母恍惚若有惊之觉者，遂得无恙。人以为诚心所感。越三年，母歿。遇忌日，祭奠必敬，有余慕也。性又友爱，兄世英有残疾，为之成婚，终身誓不分爨。道光二十四年卒，年七十四，至今乡党犹称之。

1 “母尝病剧”之后原稿阙，今据《周庄镇志》补。

垂虹识小录卷七

十八保

吴江在吴越王时筑南北二城，以守长桥之口，其时一望汪洋故耳。南城自头天门至二天门，北城自小东门、大东门，城外及城内傅家桥、斜桥、小仓桥为界，所谓十八保也。均为落地。

鲈乡亭

鲈乡亭因陈尧佐“秋风斜日鲈鱼乡”之句而作，邑志可考。其址在江月桥北堍偏东，兵燹后，吴大司成仁杰移建在西门外梓潼观东偏，墙嵌联额。

书院场

北门城外柳胥圩俗有称为书院场者，实为察院场也。前代为巡按行辕，有四石柱尚存，上有联字可考。

龙 穴

龙穴有四：察院址一；北柳胥大港桥张仙庙址二；小武当庙门前双井，闻时出鲤鱼，今井已塞，为三；又其一在九龙桥

下，时人鲜有知者。

文星阁

梓潼观东南文星阁，道光丙午岁，王瘦梅明经创建。阁旁有土墩，立石镌张处士墓。或云即石里太史，或云太史之从兄贞毅先生葬处也。堪輿家云：是阁关系邑中科第。光绪十年，吴大司成重修，旁建鲈乡亭。震署东南文星阁，每修亦利科名。

岫山楼

城北大悲禅院西偏，本有挹秀阁，奉文昌神。俞少甫学博于道光三十年增筑楼三楹，以望尧峰、楞伽诸山，如在襟袖间。左邑尊辉春书额曰岫山楼，座联集谢句云“窗中列远岫，天际识归舟”。北更拓地建姜白石先生祠，祠中石刻象王秋言礼摹宋良玉本，并镌先生过垂虹作，及嘉禾沈匏庐观察涛《石湖仙词》一阙。祠外有廊，廊有栏，题曰倚红，为邑人士觴咏之地。王秋言曾绘《笠东鸿迹图》，图中八人，邑尊姚抱勤铤、司铎赵季梅彦修、少尉王冶亭钩、明经徐江帆琛、征君王砚农之佐、孝廉杨漱云炳春¹、上舍徐娱庭锡祺及俞少甫学博岳，沈曰富作记，北平王长熙书，镌石嵌诸壁。劫后石毁，余家尚存一原刻初拓者。

1 《黎里续志》云：“杨炳春，原名庚，字子慎，号漱芸，江城人，吴江县学生。尝授徒蔡氏德星堂，后又赁居里中有年。炳春性刚直，遇事敢言，无所顾忌。偶忤震泽某令，令衔之，诬以他事，不得白。遂以妻子托其戚，只身走京师，以笔耕糊口。与黄制军宗汉、徐中丞宗干、何太史绍基为莫逆交，诗酒倡酬无虚日。道光十七年，以大兴籍中顺天副榜。十九年举人，官浙江泰顺知县。禁绝瓶葬，创立育婴堂，陋俗以革。其余捐修文庙，整顿书院义学，建桥梁，修道路，善政不可枚举。咸丰十年，粤逆窜杭州时，炳春卸署鄞县事在省，骂贼死之。事闻，恤赠云骑尉世职，敕建专祠。炳春博学能文，工诗善书，勇于任事，尤笃于友谊。故人海盐张茂才开福家两世丧不能举，出赀葬之。著有《扶雅堂诗集》十四卷、《泰顺从政录》一卷。光绪元年，泰顺民公请于朝，入祀名宦祠。”

松 厅

城隍庙西我族三省堂后有镌“蟠松”二大字石，相传宋蔡襄书，为周安期故物，宅亦为周氏旧居。详震邑《沈志》。当时有古松在第二进，即称为松厅也。今石尚存无恙。

园林杂记

松风书屋，徐虹亭太史宅，在西门内下塘，后为蒋氏居。白皮松一株，徐氏旧灵胎先生即生其地。相传诞时见有老僧入门，以为转胎，故称灵胎。

流觞小榭

与松风书屋邻近，凿池叠石，筑亭于南。翁覃溪学士、王梦楼太守为碑记，为金二雅先生学诗故居，即余所藏之《修禊图卷》。咸丰初，黄小谷增美得是园，与其室赵纨秋夫人吟诗洒翰，蒔红梅数十本，因艳【颜】其亭曰艳雪。今江邑积谷仓即其居。

一 枝 园

在北门外歌兴圩，俗称百间楼，有丰草亭，为朱竹垞太史书额，擅林泉之胜，为徐氏故居。旧有高州府通判马志墓在其中。兵燹后，园成瓦砾【砾】，墓仍无恙。

翠 娱 堂

在盛家厍沈宅。

望 湖 楼

在西濠徐氏，今无存。

芳草园

在新桥河王氏宅，宅本前朝驸马府，有春夏秋冬四园，此乃春园也。在乡镇而言，如同里任氏之园林，黎里周氏之五亩园，平望凌氏之采柏园，同里郑氏之西柳园，吉水港丁氏之知止园，雪巷沈氏之江曲书庄，各称于时。

桥

碓坊桥一名对芳，在北门外。咸丰元年，邓子鲁募捐重建，本石柱方桥三拱，改作大方一拱，柱联云：“十里烟波通蠡市，三秋风月饱鲈乡”，为诗人周卓岩名之楨者作。与同里镇金寿人作永济桥柱联云：“永济太平南北路，落成嘉庆廿三年”，同为钝根人所不能道。我邑甘泉桥名第四桥，有泷泉在焉。非由城来数值第四，以陆羽《茶经》品其泉为第四，因名。

城内河道

城内前河自西门至县治，长一百四十八丈有奇，阔二丈三尺。县治至东门八十七丈有奇，阔二丈二尺。见沈礼堂先生《松陵旧闻》。兵燹后，砖石堆积，长则犹是，而阔则非矣。光绪十五年，吴望云大司成募资开下塘城河，自北门至西门，均挖深五尺。

浚长桥

同治十年，上官督浚吾邑长桥水港，在水王庙西北隅，有砖砌成四方，径各二丈，高亦如之，甚坚固，不敢破入。有人挖其砖作砚，锋棱刺手，未见莹润。砖长方式，或云是古圻。外面俱削方木桩，上与砖齐。至水王庙桥拱，尚有此桩。似后有桥，先有桩，不知历几千年也。桩木甚香，有某锯一二寸藏

之，可制鼻烟壶。

仙迹

宗真观后改崇真。杨真人有仙术，所传奇异事不一。观前有河，即今尚书巷前河。时有红色虾，当时真人食虾，弃壳于水，须芒栩栩而去，红色未变，至今尚有见之。与西河半焦鱼、断尾螺同为颠仙遗迹。又仙里桥，相传宋陈昉升仙处，西南岸有洞，或云通西洞庭，昉即由此仙去。现有横石于洞上，镌正书“古仙人洞”四字。

寺钟

城中北寺有钟，鸣时声闻四远，俗称铜钟。帖塔、纸圣、石观音、钟，与塔均在北寺仓桥东堍，一椽屋，奉元天上帝，即纸圣也。石观音有庵，在西门外。四古，今惟观音在焉。钟为发逆制炮，莫能碎。有人指钟曰：“以土实之。”工如其法，应手而碎。其人忽不见。

同里古迹

吴江县之同里镇，唐初名铜里，宋讹为同。四面皆水，南叶泽，北九里，西庞山，东同里，四湖环绕，有如洲屿。

苏州水利同知署

向在同里，雍正八年设，十三年移驻洞庭东山，今其宅久为民居，而人尚呼为同知衙门。又红塔，其初一佛幢耳，后始架屋一椽覆之，至今犹存，人称为红塔埭。向有紫藤极盛，现绝无矣。

梳栳桥

本疏柳桥，为沈万三婿陆仲和宅中胜境，明初为蓝党株连籍没，今废为民田。

团圆山

相传为元宁昌言墓，春日游人不绝。乾隆九年，草根忽生细子如珠，遍地皆是。今犹间有之。

社 仓

在来龙桥，即富观桥南小石桥，今名旱桥。明宣德中，巡抚周忱建。正统中，移并总收仓，因废。至今人犹呼为仓场街。

罗星洲

在同里湖中，仿西湖湖心亭制，领诸水下流，系合镇文运。明嘉靖间，里人筑基建关圣祠，自此文风丕振，科第不绝。

东溪桥

向近同里湖滨，风涛作时，颇艰行旅。里人顾昶捐貲移建于内，改为东新，今仍名东溪，知者鲜矣。

仁济道院

俗称南观，明天顺间，道士倪守真增建元穹阁后仙去。

逼 试

粤贼猖狂时，开考试士，以天父天兄命题，取者为博士、约士。伪官钟石泉之英，本吴江诸生，为我邑监军，甚作威福，尝逼试文士。有同里王诸生某，被贼役二人突入户，令赴城。

时方夜深，从被窝中跃出，即褪其下衣，人笑之。某云：“尔等奚笑为？吾正以显清白之体耳！贼目虽非曹操，秀才可作祢衡。”卒免污。士林义之。又某士，被携至嘉兴，贼目于酒后出一对云：“蓄发留须，重见汉唐面目”，士应声曰：“杀人放火，依然盗贼心肠。”愤激而言，甚为痛快。当时，有十天十地绝对，切中时事，为世传诵。云：“说什么天主教，枉称天父天兄，灭天理，绝天伦，好一个青天白日，闹得天昏，那时看，天讨天诛，天终有眼；这几班地方官，尽是地豪地棍，当地蛇，坐地虎，尽许多福地名山，竟成地狱，到处收，地丁地税，地也无皮。”

粮蛮子

海运行而粮艘停止，水手往往恃强滋事。震邑尊沈花淑则柯，即集为乡勇。于是，益肆行无忌，以盘诘为名，竟至有白昼劫掠，得钱放重利债。赌博负者借其钱，或无偿，房屋、妻子均为所据，因而殒命不少。咸丰五年，薛太守煥率兵勇剿除，人心一快。郡城粤人亦由是除。近今之枭匪光蛋如出一辙，安得起薛太守于九原而除之哉！

折漕

道光十八年水荒，江缓征二分，震二分五厘，米价每石二千二三百文，而勒折大户每石六千一百文，小户更不至【上】此。以后，折数渐加。乡农一石八千四百文，加耗几至十千文。咸丰九年，震邑乡民以白旗为号，运米来城，输纳舟皆阻塞，人心惶惶，遂有白旗帮之变。

青草滩主人

唐开元中，进士屈突辞建昌宰，隐居于震泽之穆和溪，即

黄家溪，自称青草滩主人。李白赠之诗曰：“陶令八十日，长歌归去来。故人建昌宰，借问几时回。枫落吴江雪，纷纷入酒杯。山翁今已醉，舞袖为君开。”见《太白集》中，邑志未载。

复社

明崇祯庚午，楚中熊鱼山开元自崇明令调吴江，最尚文章声气。时吴江诸生孙淳孟朴、吕云孚石香、吴翻扶九、沈应瑞圣符、吴允夏去盈辈附之，号召同人，创为复社。孟朴渡淮泗、历齐鲁以达于京师，贤士大夫必审择而定衿契，然后进之于社。盖先后大会者三，复社之名动朝野，孟朴劳居多，然而敛怨深矣。

陆叟

明李日华《紫桃轩又缀》云：“元末，吴有陆叟，富甲江左。沈万三出其门，为运筹典计。一日，叟叹曰：‘老矣！横积必酿祸。’悉推以与万三，卜筑陈湖之上，为黄冠以老。”按：此言沈万三致富之由，与他书异。果尔，则陆叟真豪杰之士矣！

随春

国朝徐钜《词苑丛谈》云：“叶天廖云：‘侍女随春，年十三四，即有玉质琼章，极喜之，为赋《浣溪纱》词。’注云：‘随春，一名红于，小鸾歿后，归庞氏，别字元元。’”按：叶小鸾事，至今艳称之。其婢随春，当为拈出。

同里

宋周密《癸辛杂识》云：“近岁平江虎丘有虎十余据之，同里叶氏墓舍在焉。其一大享堂，虎专为食息之地。”按，国朝杨复吉著《梦兰随笔》云：“我邑富士镇，至成弘间，以其名贾

禍，离合其文，改为同里。”及观周公谨所记，已有同里之名，则宋元间已然矣！非明代始改也。用特辨正，以告故乡父老。

才思敏捷

黎里蔡岭香孝廉傅梅，道光丁酉拔贡，中式庚子顺天举人。中年溺水死，友人撰联挽之，得句“厄并子安，落霞警句高千古”，苦无偶语。时徐双螺先生晋镛在座，沈思未久，即应声曰：“狂追太白，捉月仙踪渺十洲”，群相叹服。前辈之才思灵敏如此。又芦墟镇有卖瓜者，忘其姓字，每值暑月，肩挑叫卖。至一家门首，其主人曰：“西瓜不要。”卖瓜者即随吟曰：“缘何不要买西瓜？要买西瓜也不差。解得渴来消得暑，客来不用去煎茶。”时郭频伽先生方以诗鸣，故下至厮卒、伧父，亦解韵语。句虽欠工，然韵人韵事，亦可与诗丐、卖柴叟并传矣。

垂虹钓雪

邑东门外有垂虹亭，以桥得名。桥为宋庆历八年，县尉王庭坚建。米芾诗有云：“垂虹秋色满江南。”绍兴间，金人犯境，有议焚桥者，郡守洪遵持不可，而县父老聚哭圯下，得不果焚。桥之北旧有鲈乡亭，与垂虹相望。陈文惠《留题松陵诗》有“秋风斜日鲈鱼乡”之句。屯田郎林肇为吴江日，作亭江上，因以鲈乡名之。后易名三高，更为塑像。臞庵王文孺献其地雪滩，因迁之。《姑苏志》：“宋王份居，环江湖以入圃，柳塘花屿¹，中有钓雪滩。”

1 《康熙吴江县志》云：“臞巷，在东门外学宫西，宋大冶令王份归老处也。圉江湖以入圃，柳塘花屿，景物秀野，名闻四方。圃中有与闲堂、平远堂、种德堂、山堂、烟雨观、横秋阁、清风台、郁峨城、钓雪滩、琉璃沼、臞翁涧、竹厅、龟巢、云关、缣林、枫林等处，而浮天阁、聚远楼为最胜。”

分 湖

汾湖在吴江县，东北属于吴，南属于越，中分为二，故名分湖。湖底有蚌径，皆蚌房积成，直接湖南，亘十里许，阔可四五尺。晴日射之，光皎然，浮于水面，如大秦国以水晶为屋柱，此是水晶堤也。又有五彩锦被，不知何代物，凄风瑟雨之日，浮漾水上，若远若近，渔舟往往见之。或云是蜃气之属。见《湖隐外史》。

湖 异

汾湖中有金缆一，村农载米渡湖，若有萦绕楫间者，视之，得缆，则紫金色也。其人停桡撷之，迨如千寻不止。遂弃米于水以容此缆，缆犹未罄，舟重且几沉矣。其人大惧，仍掇置之水，铿然有声。遗金一钩，揆其铢两，适与所弃之米值正相符。又有巨蚌如二三大艇，夜必光灿沙沚间。初疑月色，无月亦然。忽一日，大风雨，有龙下，取蚌，蚌不胜龙，龙夺珠去，蚌死，壳浮水上，乃见其大云。事在明万历初年也。同上。

陆天随，湖人也。《甫里先生传》注云：“甫里，松江村墟名。”按，唐陆广微《吴地记》：“松江一名松陵，又名笠泽”，则古之松江，正今吴江也。又安知今之汾湖，不即为昔之甫里哉！今其子孙散在湖以南，世系历有可证。同上。

顾 墟

陈黄门侍郎顾野王宅，在吴江三里桥，今名顾墟。先是，公居吴，适吴淞江潮骤涨，数十民岌岌矣。公一喝而水退，土人德之，称为喝潮王，立庙而祀。

殊胜寺

平望镇殊胜寺，明嘉靖初，殿壁最高处忽有诗一绝云：“我自蓬莱跨鹤来，山僧不遇意徘徊。时人莫问菩提寺，三十余年化作灰。”下书回道人题，字画奇险。寺僧怪之。及三十三年甲寅，寇至，寺焚，独壁上诗字迹如新。

三高祠

吴江旧有三高祠，在垂虹桥南，祀越上将军范蠡、晋大司马东曹掾张翰、唐赠右补阙陆龟蒙，明载祀典。或弹蠡云：匿怨友其人，丘明所耻¹。非其鬼而祭，圣经是诛。蠡，越则谋臣，吴为敌国。鄙君为乌喙²，目已曰鸱夷，变姓名为陶朱，逐刀于都市，乃假扁舟五湖之名，居笠泽三高之首，况当此无边胜地之上，岂应著不共戴天之仇，其视菰菜莼鲈、敝屣名爵、笔床茶灶、短棹江湖者，岂容与之并驾临风、联镳钓雪耶？“可笑吴痴忘越憾，却夸范蠡作三高”，刘清轩之见讥固深。“千年家国无穷恨，只合江边祀子胥”，黄东浦之赐诮尤酷。按：子胥固忠矣，然前既楚臣，何得鞭平王之尸？况业已破国复仇，却乃如此之甚，将何解于楚乎。所合褫其位、沉其躯，别议高尚充其祀，庶千载之流风益懍，三江之夜月增明，盖深非之。近读僧善住《三高祠范蠡诗》云：“越国谋臣吴国仇，如何庙食此江头。扁舟载得蛾眉去，却作三江汗漫游。”其见亦同。元毗陵谢应芳《上书饶介之》，亦欲黜范蠡而以泰伯为主，配以仲雍、季札，

1 语出自《论语》：“巧言令色，足恭，左丘明耻之，丘亦耻之。匿怨而友其人，左丘明耻之，丘亦耻之。”对孔子而言，把对一个人的怨恨隐藏起来，而在表面上做朋友，是一种令人不齿、不屑的行为。

2 乌喙，典故名，语出《吴越春秋·勾践伐吴外传》：“夫越王为人长颈乌喙、鹰视狼步，可以共患难而不可共处乐。”形容人之嘴尖。

张陆二公列之从祀，其论甚善。让国之贤，高节清风，万世瞻仰，且吴产也。会世变，惜不果行。前明及国朝陶子昌振、张雪窗世炜两先生，曾著论辨之。

华严塔

吴江塔欹侧已久，康熙癸未，奉县令出示，募人修整。久之，无人应募。忽于夏间有人投词云能正塔，令奇而面询之，问：“用工费若干？”答云：“所费不多，止用壮夫一百二十人，棺板一百二十块，各带畚锄，豫备大土箕若干。至期，众工酒肉食之须饱。”令以其言太易，忽忽数日后，定期六月十八日黄昏起工。至期，大风雨，役众工搜去塔脚一处泥土，各以板从低处敲起，而以土基塞之。其人于四周遍视众工，但闻风涛声。如是者一昼夜，至暮，风雨亦息，人视塔，已正矣。至光绪辛丑五月二十八日夜，狂风大作，塔顶忽摧。中有巨木，周可四五尺，长数丈，亦拔而出之，堕于河。后为寺僧曳入庙中，而屋倒墙倾，不知凡几。

平波台

《百城烟水》云：平波台在莺脰湖中，离吴江城四十五里平望镇南，以湖似莺脰，故名。明天启四年，道人周妙圆筑，有顾氏香久诗云：“盈盈湖上柳花飞，绕岸莺声送落晖。望去平波台不远，羡他幽鸟一双归。”

八 测

宋陆《入蜀记》云：六月八日过平望，遇大雨暴风，舟中尽湿。少顷霁，止宿八测，闻行舟有覆溺者。小舟扣舷卖鱼颇贱，蚊如蜂蛰，可畏。按：平望八测，为江浙往来之要道，然今皆误作八尺，不知本为八测也。

桃 墩

桃墩旧有宋大臣吴充墓。充之后贫，不自存，鬻其墓之地于里人顾姓者，顾使平其封，发石椁，充赭袍碧带，伟焉如生，见风忽化。两夫人朱氏、戴氏，金钗及缠臂之属，光焰犹新。其墓志则贾平章笔也。按：贾与吴不同时，盖吴之后人乞贾为铭耳。桃墩亦吴江地，去吴兴之南浔可四五里许。

震泽古柏

笠泽三贤祠前古柏，鳞枝黛肤，千年物也。前人历有题咏。明崇祯甲申，渐就枯萎，今止存根株而已。先是祠后竹圃中忽于地出一花，如木芍药，并无枝叶。里人施姓者见之，以为下必有异。持锄坎之，尽花之茎，则有细丝缘络土中。丝断，锄止，亦无所见。又阅月，复生一花，施坎之如前，其丝蜿蜒丈余，得物圆大如土茯苓，碎之，中脱而出，则宛然一鹿也，头足尾皆具。于是，好事者争穴土而入，见柏根回环无端，大可二十围，中径之木色光润而清芬，触手皆有细丝，分悬其间。迹丝求取，若茯苓者盈畚累榻，或为人形，或禽兽形，土人以鬻于苏州，多得善值。是岁，有客从吴兴来，道遇寄舟者，古服形疲¹，问其姓，曰姓柏。问其家若何，曰：“曩颇饶，今衰矣。”问所往，曰：“将之杭，今已晚，欲宿震泽之普济寺。”舟至寺前，趋而入，顾榜人曰：“少待即归汝值。”久之不出，遍索寺内，无若人。从古柏下瓦砾间拾碎银少许，则所偿寄舟之值也。俗传此柏能为神，达观禅师其化身。观此，信有之乎²？

1 《道光震泽镇志》作“服制朴古而形神憔悴”。

2 《道光震泽镇志》有云：“抑柏既能神，而何以槁死？岂神以树为形，其萎也，亦如仙家之遗蜕而去邪？”

桃源洞

宋侍郎杨绍云去官归里，于震泽镇之中筑桃源洞，去西三里许，地名马浦。明万历时，诸生钱士果，字净六，又号泊庵，自鳧湖徙居，高隐焉。有桃园十二亩，诸种俱备。中坎小池，外环幽竹。春时，花光灿照两岸，日与诸名人觞咏其间，风流胜地，足继宋贤。今则宅废园空，子孙殆尽，无有过而问者。其曾侄孙似岩、茂才汝砺¹，述向时所刻《桃花园诗》甚富，惜板已失，而余于友人处犹得见有抄存者。

棺 怪

震泽王蟾生，梦薇先生之父也。道光庚子岁，读书东安村之八蜡庙。庙有楼，王君与诸友日则读于其下，夜则寝于其上。一日，友皆外出，王独留。忽狂风起，窗户皆鸣，卷帙飞舞。突见一老叟兀立案前，年可六十许，黄面白须，目开合不止，两手作攫抓形。惊问不答。徐退至东壁，如嵌入者。王大呼，老僧闻而至，则全身已隐，仅见须眉口鼻于壁也，惧而出。薄暮，友毕集，复偕入视，则无有矣。夜，仍宿于楼。夜半，闻扣窗声。窥之，则有长人立于庭中，而首出楼外。诸友中有吴有霞者，素有胆，潜立窗侧，挟利匕首伺之。俄其人探手入，急以匕首刺之，中其腕，大叫而遁，匕首随腕俱去，俄闻锵然堕

1 《嘉庆黎里志》云：“汝砺，字启商，南安知府讷子。以岁贡选授孝感县教谕，升四川庆符知县。县在山僻，称难治。砺恩威并用，民大悦服。检校逋税，廉得侵渔者，处以法。邑每遭苗害，砺设方略，督士卒为声援，寇不敢犯。六载秩满，拟上考，以年老告归，卜地建家祠，岁时致祭。性宽和，虽遭横逆，不与较。为文以意胜，耻事钩棘。诗萧散有致，著有《西归集》。兄舟，字济商，与砺并著才名。弘治丁巳，以岁贡选授孝感县县丞，迁广东布政司都事，转湖广都司断事，升云南赵州知州，历任皆有声。性豪爽，多畜声伎，喜宾客，当时士夫每艳称之。”

地。明晨得之于殿庭之西隅，血凝如膏，腥秽难近。人咸迹之，至庙后，有败棺，盖有渍血。僧以此棺为怪，议焚之。王君止之，后亦无他。

怪物

平望镇之西，有地名韭溪，里人潘氏之墓在焉。某年夏，忽于赤日中霹雳一声，白云四起，空中有一物堕其墓上，长四五尺，牛首鬣身，有鳞角而无尾，足皆五爪，后足若痿痹不能起者。行过之处，翁仲俱仆，大木尽拔。村人大骇，奔告于潘。次日，潘至，是物已力倦卧草中，蝇蚁集身，腥不可迹。间或昂首一嘘气，触之者无不立倒。潘知其异，禁人勿犯。无何，雷雨交作，物奋身一跃，腾空而去，天半犹垂首俯视，久之，始杳，竟不知其何物也。

布袋和尚

布袋和尚者，不知何许人。嘉庆中，至吴江县城卖卜，居城东关帝庙，口操楚音，年可七十余，项下悬一黄布袋，每日所用之具，咸取之无缺，不稍释，因以名之。谈休咎辄中，日游村市拾字纸，以斤为度，如是者三十余年。人有伺其熟睡而探其袋者，止得龟壳一，长寸余。于是，皆疑为仙。一日，和尚圆寂，失其袋，大索不得。正共惊异，而西郭外之人群至，咸曰：“和尚成神矣！”盖其地有土地庙，是夕，父老皆梦土地来别曰：“吾去矣，明日有悬布袋于项者，是代吾者也。”及旦至庙中，则见神项下悬一黄布袋，詫曰：“此布袋和尚之物，何为在此？”入城而和尚果死，故知其为真成神也。众即葬之土地庙后。今不知神项犹悬布袋否？

潘吴逸事

康熙癸卯二月，湖州庄史事发，吾邑吴愧庵名炎、潘力田名怪章，同被株连，逮系武林军营，互相唱和。是岁五月，吴与潘俱磔于杭之弼教坊，同死者二百余人。先一日，吴语其弟曰：“我辈必罹极刑，血肉狼籍，岂能辨识，汝但视两股上各有一火字者，即我尸也。”闻者无不流涕。潘之著述甚富，悉于被逮时遗亡。间有留之故人家者，因其罹法甚酷，辄废匿之。如《杜诗博议》一书，引据考证，纠讹辟舛，可谓少陵功臣。朱长孺《笺注》多所采取，竟讳而不著其姓氏矣。

秋灯会

元夕张灯，各处皆然。而我邑独盛于中秋，且作龙舰数十，俱笼灯为鳞甲，蜿蜒垂虹、钓雪间，波光月色，上下辉映。香舆夹路，画舫盈湖。箫歌管弦之声，达曙不辍。读顾英白先生伟《江城秋灯篇》，婉丽悲宕，不禁有今昔盛衰之感焉。现在各乡镇间亦有行之者，而江城则萧条寂寞，不复睹曩时景象矣。伟，吴江之同里人，笃志好学。所辑有《唐诗汇选》《古文粹选》，惜其后嗣不振，而卷帙浩繁，无有能行之者。

顾亭林先生《书吴潘二子事》略云：吴江有吴炎、潘怪章，皆高才生。国变后，年皆二十以上，并弃诸生，以诗文自豪。既而曰：“此不足传也，当成一代史书，以继迁、固之后。”于是与吴同草创，以实录为纲领，凡志乘、文集、墓铭、家传，有关史事者，以类相从，稽其异同，核其虚实，为《国史考异》。余在淮上，潘子刻寄三卷示余，余服其精审。及余之昌平、山西，犹一再寄书来。会湖州庄氏难作，庄名廷铨，尝得故阁辅朱国桢遗稿，编辑为《明书》，凡百余帙，颇有忌讳语，本前人诋斥之词，未经删削者，而列吴、潘于参阅姓名中。寻为人首于朝，

凡列名于书者十八人，皆论死。所杀七十余人，而吴、潘二子与其难。

徐虹亭

检讨钜与潘次耕同举康熙己未鸿博，年未七十，乞归不出。工词，所刻《菊庄乐府》名动海外。著有《南州草堂集》三十卷。诗格在唐中晚间，余尤爱其《十八滩绝句》云：“万壑千峰送客舟，槎桠怪石水交流。岭猿莫更啼深树，只听滩声已白头。”

吴汉槎

兆骞以科场事谪戍宁古塔。按，方坦庵《绝域纪略》：宁古塔无疆界、无城郭，八月雪，春多风，夏多雹。病无医，无陶器、无盐。或云其地即金之天会府，信人迹罕至之区。汉槎科场之谪，即此。其被罪之由，久而未得其首尾。顷阅《石鼓斋杂录》载：顺治丁酉科，尤侗、汤传楹不第，乃为《钧天乐传奇》，隐姓名曰沈白、杨云，三鼎甲曰贾斯文、魏无忌、程不识，并主考何某，描樨尽相。科臣阴应节据以纠参殿廷复试。不完卷者钁铛下狱，汉槎本奇士，战慄不能握管，审无情弊，减死，谪戍，事出无辜。后捐金赎还。

明万历四十八年令吾邑者为瑯子曹钦程，时米谷踊贵，官榷之说起。邑中受派官榷者无不破家丧生，村号墟哭。钦程乃始扬扬得意，其恶亘千古如此。瑯败，司寇议大辟焉。邑绅叶绍袁窜名册首，周阁学道登知之，亟语钦程曰：“其先虽宦，清德在人。人皆知其贫士，又负文章名，奈何与贾人子、素封乡豪同操此役，固必不可。”钦程不得已，议遂寝。见叶绍袁《自撰年谱》。

崇祯五年夏月，大旱，分湖水为之涸。湖底累累耸矗，俱太湖石，故药栏苔砌间物。湖浒居民云：“闻之故老，百年以

前，某家园亭在此。”疑即是也。水波渐没，不知迈几日月矣。同上。

吴江城中，有居民沈，以卖糕为业，不知名，人皆呼为沈卖糕云。崇祯丙寅，年二十余也，闻郡中为周吏部蓼洲系缙骑事，心窃慕之。会同邑周侍御来玉亦被逮北上，奋身请从入都。逆珰焰方燎天，来玉公子至，不敢窥春明一步，而来玉既诏狱，家人辈惟有鼠窜匿耳。奔走服劳及买棹视殓，皆沈为之。时人共加礼貌，称为义士。于是，即名沈义，相与荐于苏松备兵冯公元颺。冯大嗟赏，擢为牙门旗尉。冯督津门巨镇，义奔随之。敌来，稍有功，授参游等衔。同上。

顺治三年，吴江邑舍，乙酉已咸阳一炬。邑令李承尹潜据周麟伯家中，顷念翁先生麟伯父名道登，尚书、东阁大学士。空中击承尹，自楼坠下，几死，以泄愤。元欲留正典刑，快心西市，故未死也。见《甲行日注》。

城中沈氏，巨室也。新婚，顾其妇自持一衾服晒花间，遂为祟凭，发狂披发。觅一巫驱，巫为妇所逐，几死。又一道士以符水遣，亦逐如前。适吴安镇至，妇初亦大诟厉。吴以石灰画地，妇即能出，词气稍懦。安镇云：“擒之！”妇即自反接，跪地。安镇问：“是何鬼？”曰：“园中司花之神，姓王名盖，五圣部下也。今已知愆，求容放归耳！”安镇叱之去，妇即醒。同上。

分湖有渔人，网起多活海舌，声嘈嘈然，当是随潮汐由黄浦泖涨入耳。舌作蜚，字讹。见《江赋注》：“即水母目虾也。”同上。

吴安镇，亦名高谈，当冥役。据云，年来狂魔骚乱，矢及神霄殿外，天兵神将相角，互有胜负。鬼部亦起勤王，鏖战四五载，杀伤各亿万计。今魔势稍衰，天威已振，然屯营聚垒未降者，尚多也。鬼兵死亡者，其魂随风飘荡，依托草木，化为

蠓螻、虫豸之类。吴则冥魔下一将领，一月往受役四五日云。丙戌正月十六日第三阵大风，是其队伍卒所推车也。此战有功，故冥授安镇云。冥国居大罗山，在海中，此去十二万里。山亦广数千里，鬼一日食米三粒，从征与五粒，其本管主帅名许全也。言甚诞可笑，东坡云：“姑妄听之。”同上。

平望里有杨硕甫者，家酷贫，馆于金，未一月，寡姨病死，无子，杨丐主人贷四金买棺，主不可，杨怒，拂衣去。正惘惘间，忽道傍遇一叟，野服古貌，谓之曰：“二十五里一株松，烂却芒鞋此是踪。”言毕竟去，杨颇怪之，姑如言往，果见乔松下盘石上有烂芒鞋，发视，得四金焉。即取以殓，然杨竟失馆。访前叟于山深林密处，不数日，果遇，语曰：“吾姓松名年。”遂挈之行，师事松。乙酉丙戌间，忽语杨曰：“吾将往粤西。”时临桂伯瞿公抚粤，靖江王作难，囚临桂伯于舟中，欲饿死之。杨每日午于艚板下出香饭半瓯食之，不饥。凡三十五日，靖江败，乃得解。邑人讯其貌于杨，肖像祀之，称曰松祖。见《烂柯集》。

晋 张翰，字季鹰，世居吴江县二十九都之二鬲港。父俨，仕吴至大鸿胪。翰纵放不拘，时人号为江东步兵。齐王冏辟为大司马东曹掾。冏时执权，翰因秋风起，忆莼鲈，自洛归来，营别业于枫里桥，朝暮往还，觞咏靡间。宅东带水，因称为莼鲈港。今两村张姓仍聚族而居。性至孝。遭母忧，哀毁过礼。年二十七卒，墓在南役字圩。墓傍有敬信庵，即其祠宇。今庵中木主犹在。嘉庆间，曾有墓碑出土，载“有田若干亩”。农人以侵占墓田，惧，将碑沈于河。后震泽王之佐募人出碑于水，则碑面篙眼如蜂窝，而字迹亦漫漶，不复可辨。同治九年，知吴江县事黎庶昌重修立石。一作在横山东五里，非。

叶仲韶先生

国初时，避居光福山。所著《甲行日记》有一条云：“丙戌六月十七日壬辰，山中遥传日生凶问¹，初未敢心信。理云：理者，凌姓小史，见《日记》。‘营中人言确矣！’夏至日，曾为揲著²，遇大壮之夬，六五：丧羊于易。今未月也，易则其名，异哉！”《日记》之眉有无名氏按语云：“吴日生名，《明史》作‘易’，而他书或有作‘易’者，今先生以‘丧羊于易’作证，则作‘易’无疑。先生与日生同邑、同时，有书札往还，必无传讹。且易、易二字分别甚微，传钞翻刻易于淆混，今有确证，自应据此以定作‘易’之误。”见《鸥波渔话》。

明 沈同和，字志学，万历丙辰倩同邑赵鸣扬代笔，得中会元。赵中第六，为言者所劾，逮问褫革。有“丙辰会录，断么绝六”之谣。后遇赦归，营别业于邑之张家浜，与浔阳湾陶唐谏善，往来相隔一溪，故有“昨夜灯前曾有约，今朝移艇渡溪来”之句。妓穆素徽者，四方名士争欲得之。同和匿之张家浜，有不欢于同和者，制为《西楼记传奇》，即吴门袁箏庵也。所称池三公子，即指同和也。沈亦作《望湖楼传奇》报之。西楼遗址，嘉庆初尚存，素徽即葬于此。

咸丰丁巳，上海城内豆腐店水沟中血涌如泉，旋有小禁子之变。吴江村镇亦有坠血之异，大抵皆不祥之兆也。丙辰夏，地生五色毛。

善湾村唐氏有旧宅，闭不居。乾隆甲戌，忽闻室中有声。窥之，有巾服者，有倩妆者。启户视之，无有也。闻其言，不

1 凶问，死讯、噩耗。

2 揲著，亦称“揲著草”，数著草。古代问卜的一种方式，用手抽点著草茎的数目，以决定吉凶祸福。

解，惟一妾能辨之，曰：“我实狐也，暂托奴于此室¹，不敢相扰，幸勿惊疑。”唐氏故多藏书，时相告假²，毕则送还无误。久之，告以有事他出³，厮役预戒飭矣。然渐为患⁴，或攫小儿物⁵，或揭字画悬檐间，或掷污秽以恐人⁶。唐憾焉，归而斥言之⁷。未几告曰：“奴子作狡狴⁸，今已杀之。”视其庭，血满盎，且曰：“前我所以出者，奉城隍神檄办人口册，今事毕，我从此生【去】⁹矣。”后遂寂然。明年，大饥继以大疫，人多死。所谓人口册者，或指此也。

我吴自汤文正公毁除上方山五通神像，淫祀遂绝。近二三十年间，此风复炽。乡里奸巫往往托为妖言以惑众，有庄家圩神者，在三白荡滨之庄家圩村，濒水立庙，奉像其中。神不知为谁何，而远近争传其异。谓夜尝有火光入庙，为庙祝不敢寝其中，寝则比寤而身已在庙外，临卧水滨，一转侧将溺矣。因是求嗣、求利、求医药者，且有士人而求科名者，香火牲帛之盛，无日无之。得一效则酬神之家，或迎神以归，侈陈鼓乐、酒食，而祀之终日乃毕，以为敬。初仅一神，不足以给众人之迎，遂增塑其像。故迄今仿佛者，有六七神焉，而庙中犹时有无神之日。庙祝皆村中人轮流为之，为其获利厚也。此淫祀之继五通而滋萌者。道光辛巳六七月间，江浙大疫，初起足麻，屈不能伸，名为脚麻痧，又名吊脚痧。患此者，或吐或泻，骤

-
- 1 《周庄镇志》作“暂寄孥于此室”。
 - 2 《周庄镇志》作“时告言乞假”。
 - 3 《周庄镇志》作“告以有事当出门”。
 - 4 《周庄镇志》作“然自后渐为患”。
 - 5 《周庄镇志》作“或压小儿物”。
 - 6 《周庄镇志》作“甚或抛掷瓦砾污秽以恐人”。
 - 7 《周庄镇志》作“及共归也，斥言之”。
 - 8 音快，奸猾、狡猾。
 - 9 据《周庄镇志》改。

如霍乱，甚至顷刻殒命。死者日数人。光绪壬寅，自春徂夏，亦如之。米价骤贵，每石制钱六千五六百文。当道奏留漕米十五万石，发县减价平糶。以上见《贞丰里【拟】乘》。

吴江震泽人之著述及编纂古今书籍为余家所藏者，宋沈义甫《乐府指迷》一卷，周宗建《道德经解》二卷、《奏稿》四卷，陈启源《毛诗稽古编》三十卷，朱长孺鹤龄《笺注李义山诗》三卷、《补注》一卷，徐师曾《礼记集注》三十卷，沈岱《吴江水利考》五卷，潘耒《类音》八卷、《遂初堂集》（二）二十卷、《别集》四卷，钮琇《临野堂集》十五卷、《尺牍》四卷，王锡阐《诗文集》五卷，潘耒《松陵献集》十五卷，徐钊《本事诗》十二卷，沈彤《沈氏诗录》十二卷，董兆熊《味无味斋集》十卷，金学诗《播琴堂诗文集》十八卷，王元文《北溪诗文集》二十二卷，沈璟《云巢诗稿》十卷，凌淦《松陵文录》二十四卷，沈彤《震泽县志》二【三十八卷】，徐大椿《医书八种》，袁景辂《国朝松陵诗征》二十卷，殷增《松陵诗征前编》十二卷，陆日爱《松陵诗征续编》十四卷，俞岳《笠东草堂诗文集》四卷，赵兰佩《江震人物续志》十卷，王鲲《松陵见闻录》十卷、《盛湖诗萃》十二卷、《吴江县续志》四十卷，柳树芳《汾湖小识》六卷，董兆熊《南宋文录录¹》二十四卷，顾有孝《明文英华》十卷，潘耒《唐诗选平评》²八卷，张履《积石诗文稿》二十二卷，张世炜《秀野山房集》三卷，张士元《嘉树山房集》二十二卷，沈曰富《文集》六卷、《当湖弟子传》三卷，杨炳春《扶雅堂诗》十卷，秦源《韭溪诗存》二卷，迮鹤寿《江震潜德编》四卷，徐达源《黎里志》十六卷，陆文衡《菴庵随笔》六卷，袁景辂《小桐庐诗草》十卷，张方湛、王逸虬、郁

1 疑衍一“录”字。

2 据《同治苏州府志》著录，《唐诗选平》乃叶弘勋著作。

文《稽古日钞》八卷，周之桢《同里志》二十四卷，邱孙锦《有余地遗诗》六卷，蔡丙圻《黎里续志》十六卷，杨复吉《昭代丛书》，迮鹤寿《校注蛾术篇》，庄元埴《励学室诗存》一卷，庄庆椿《冬荣室诗词》二卷，周元圭《吟秋馆诗草》一卷，王廷鼎《紫薇花馆文稿》二卷、《诗稿》二卷、《词稿》一卷、《杂纂》一卷，徐筠《芋香山房诗钞》一卷，陈希恕《传略》《治疾记》一卷，宋锡祺《舆诵编》一卷，凌泗《苏灾录》一卷，王之佐《绘水集》三卷，周之桢《垂虹诗剩稿》八卷、《哭子诗》一卷，范其骏《帐墨居诗钞》一卷，陈来泰《寿松堂诗话》四卷，郭麐《樗园消夏录》三卷、《爨余丛话》六卷，陆士铤《旌孝录》一卷，殷增《孤鸿编》四卷，黄汝德《归读斋诗稿》一卷，徐淳《望云楼诗钞》一卷，徐夔《凌秀轩诗钞》三卷，朱逢泰《画石轩诗集》四卷，任本泉《漆园诗稿》三卷，沈金渠《春风庐诗集》二卷，金奉尧《萝月榭诗草》四卷，周孝学《勉庐诗钞》四卷，金恭《玉尺楼》四卷，徐作梅《劲香窝诗钞》四卷，王之孚夫妇《金海楼合稿》一卷，吴丽珍《写韵楼遗草》一卷，王淑《竹韵楼诗钞》三卷，梅芬《绿筠轩诗草》一卷。以上刻本。

朱春生《抄查慎行诗钞》二卷，陈来泰《寿松堂诗稿》四卷，陈毓升《诗钞》四卷，顾虬《秋梦斋诗稿》一卷，郭麐《集外诗》一卷，陈沂震《征尘集》二卷，吴雷发《寒塘诗录》二卷，袁鸿《瑶华仙馆诗稿》一卷，程庆禄《大吉祥吟馆稿》一卷，许蔚宗《听江馆诗草》一卷，屠拱垣《诗稿》，徐氏《晚圃诗》一卷，黄河清《铁吟草》一卷，许珠《女史诗草》，徐继穉《璇玑分锦图》一卷，俞岳《集外诗》一卷，陈氏《江汉游草》，无名氏《芜城寓草》《燕齐游草》各一卷，陈沂配《息存遗稿》一卷，陈士载《梅轩诗草》一卷，陈毓良《桃源草》一卷，陈梦鼎《簏中拾存》一卷，陈明德《蛩吟集》一卷，陈黄钟《梅花诗》一卷，程庆禄《默庵居草》一卷，陈揆《诗钞》一卷，钱汝

砺《桃花园集》五卷，钱云《盛湖诗乘》一卷，徐淳《金陵杂咏》一卷，潘鹤《雪巢诗稿》一卷，金俊秋《渔吟草》四卷，黄思睿《修月山房草》一卷，杨淮《尺五楼诗词录存》四卷，王恩溥《种蕉庵诗钞》一卷，吴坚《痴卧楼初稿》一卷，周篆《草亭诗集》二卷，周砚商《诗集》一卷，费仑《课余草》一卷，费华宝《诗稿》，费吟芝《诗草》一卷，朱震《抄谷音》二卷，费士玘《四书音证》二卷，无名氏《壶隐余课》一卷，沈澍《浣桐汇稿》二卷。以上抄本。

任兆麟《有竹居集》十卷，郭凤山《砚书诗》四卷，陈赫《小琼海诗》六卷，邱冈《德芬堂诗钞》六卷，吴祖修《柳塘诗集》六卷，周嘉福《重次千字文》一卷。以上残缺本。

李祖惠《西征赋》，叶燮《江南星野辨》《吴江县志》，徐钊《词话》，张尚瑗《石里杂志》，吴雷发《香天谈藪》，沈曰霖《粤西琐记》，杨淮《古艳乐府》，陆燿《烟谱》，叶燮《己畦琐语》《原诗》，沈彤《释骨》，吴振臣《宁古塔纪略》，钮琇《竹连珠杂言》，张方湛《忠文靖节编》，潘眉《孟子游历考》，史册《隆平纪事》，王梁《读画录》，陆燿《甘薯录》，朱鹤龄《愚庵杂著》，李重华《贞一斋诗说》，潘眉《三国志考证》，沈元钦《秋灯录》，迮朗《画船录》，杨复吉《梦阑琐笔》，王曾翼《回疆杂咏》，沈曰霖《晋人麈》，金学诗《牧猪闲话》，叶琼章《艳体联珠》，顾有孝《友约》，钮琇《广东月令》。以上《昭代》、《檀几丛书》本。

沈彤《周官禄田考》三卷、《尚书小疏》一卷、《仪礼小疏》八卷、《春秋左传小疏》一卷、《果堂集》一卷，陈寿熊《读易汉学私记》。以上《经解》本。

钮琇《觚剩》。《说铃》本。

徐筠《芋香山房诗钞》，翁广平《平望志》十八卷，黄兆怪《平望续志》十二卷，叶绍袁《湖隐外史》抄本，龚升《上枝楼

诗钞》，陈锐《随笔》，周元瑛《昆冈诗钞》，梅观潮《雪香吟》，徐作梅《仙游潭分韵诗》，柳以蕃《食古斋诗文录》，邱孙梧《易安斋诗集》六卷，周龙藻《恒斋诗集》十六卷，钱大培《餐胜斋诗稿》四卷，陈懋《遂高堂诗集》十卷，顾我锜《浣松轩集》六卷，朱春生《铁箫庵诗文集》六卷附袁宸《独笑轩文稿》一卷，金士松《乔羽书巢诗内集》六卷、《外集》四卷，任兆麟《吴中女士诗词钞》十卷，周灿《西巡政略》，郑璜《海红花馆文钞》四卷，费二峰《课余草》二册，殷寿彭《春雨楼诗文集》两本。

垂虹识小录卷八

光绪三十三年四月，苏抚陈筱石、中丞夔龙具奏，略称：据绅朱以增等呈称，一品封典、前选云南昭通府通判、震泽县附贡生沈毓桂，现年一百岁，该员植品纯粹，潜研实学，光绪五年与美国儒士林乐知在上海创建中西大书院，前后掌教十有八年。复与诸西儒共译《英国志》《中西关系略论》《格致探原》及天文、化学、算数、医理诸书三十余种。又创设《万国公报》，译登中外政事、学校商务诸大端，五十年不求闻达，历次捐款助赈，奖叙同知衔，递加知府衔、三品封典。光绪三十年，以年近百龄，经同乡官呈请升抚端方具奏，奉旨“著赏给二品封典，准其旌表”在案。现在时逾三载，年满百龄，精神强固，励学不衰，呈请代奏，恳恩赏给崇阶，以励耆学等情前来，合无仰恳天恩，俯准加恩，奖宿学，除咨礼部查照外，理合会同两江总督臣端方，恭折具陈。奉朱批：“沈毓桂著赏二品衔，准其旌表。钦此。”

吴江城南五十里曰黎里镇，南界浙，西北接运河。咸丰初年，乡佃抗租，土棍聚赌，皆经镇绅禀飭，练勇平定之。庚申四月，粤匪南犯，举人萧晋荣、蔡尧栋，典簿徐泰吉等倡义立团局练勇外，添募民壮，树栅筑土城。时文报不通，江令田人熙来黎，云苏城已陷。据吴令沈伟田受伤出苏城，而面述于田君者。

二十四日，吴城县城陷，震泽同陷。次日，扑平望镇，地接浙江也，总兵江长贵不战，遁。二十六日，破嘉兴府城，沿塘烽火相望。黎在平东十四里，即堵截水旱各口。五月初旬，贼由大和港、杨家荡迭次来犯，勇目经双桂、吴兆年放炮拒之，斩多贼，内有黄巾贼目，并获船械等件。十一日，有人自称张燕山，从盛泽持贼榜到黎招降，有“及早归降，不杀人”语，盖盛泽早已降矣。黎绅裂其榜，喝斩之。时兵不满千，户不满万，乃增置火器，按户出丁，分段扼守，众志成城。有扶春由乡来黎，以为可恃者矣。十五日，土匪陆某率枪船犯黎乡上丝等圩，遣经双桂、张永林分路往剿，擒二艇，斩三盗。二十二日，湖绅赵景贤命钮广文承怡至黎，约攻平望，知己拔双林、南浔各贼垒。二十四日，赵师次平望，由野猫口、北关口夹攻。黎勇五百，渡雪湖，驻兴隆桥为犄角。平贼筑濠以守，力攻未克。二十六日，赵轰以大炮，三发皆中，贼营阵乱，黎勇助攻之，贼死甚多，余贼遁。即救出难民百余人，留养于玛瑙庵。赵绅拟进恢嘉郡，与张玉良南北夹击，不料湖郡警逼，赵绅暂回，派刘仁福守平望。六月初四日，仁福闻警，退驻三里桥。黎绅往□其回平，不允，未刻扬帆去。仁福后在湖城通贼，事泄，被诛。初六日，贼犯金家潭，勇目陈德胜败之。次日，犯东杨、西杨各村，焚掠甚惨。经双桂、汝后桐击退之，多斩获。酉刻，下丝圩缚奸细至局，讯之，云常州人，被掳者贼遣其送书吴江，中途逸出，书中有“曾某到湖州，明日来东，平望兵单，乞速援”语。黎绅皆信之，而不虞其诡计也。初八日五鼓，贼由陆路佯攻西营土城，被勇黄普贵等击败。黎明，贼攻南栅，亦败之。少顷，贼兵水陆大至，炮声不绝。团长管三信、周二毛、经双桂、陈万祥皆战死。人心渐涣，当事仗剑督饬，然势难禁矣。贼乘胜绕阵后急攻，团勇大溃退，屯袁家桥，接战久，徐泰吉死之。此役也，坚守五旬，死难者四百余人，被掠者三百余人，房屋被焚者四千余

间。自宋时黎遭金寇焚掠，至是已七百余年，繁富安居，猝逢大劫，惨哉！

同治时江震阵亡各员名略

外委 江兴发 芦墟亡。

守备 刘士珂 湖南人。 外委 周长荣 张万顺 皆吴江亡。

都司 王新华 江西人，同里亡。

外委 刘生寿 湖南人。 朱启发 皖人，皆夹浦亡。

以上各员二年春夏亡。

外委 罗华有 伍其彬 龙有才 李得胜 四员 湖南人。

把总 徐明才 金玉田 以上吴江亡。

外委 胡友立 胡明山 马开先 皆湖南人，叶泽湖亡。

把总 涂长庆 皖人。 秦芳林 湖南人。 林得胜 刘富

春 刘得才

外委 马万盛 刘宝善 李春瑞 陈玉林 李承熙

守备 孟得元 谢正元 王德昭 张万青 攻黎里、平望亡。

以上各员均同治二年秋冬亡。

冯经，字授之，籍震泽，居黎里。戊午，北闱举副榜第一，就职直州判。粤贼犯苏，里绅纠资招勇以守御，生年最少，豪爽激昂，兵勇咸服其指挥。四五月间，屡却贼，斩馘数十人。六月八日，平望贼党大至，团勇战溃，生被掠行里许，出贼不意，投水死。弟潍，同殉。

蒯善培，字艮斋，吴江监生，以婿张曜贵，封赠朝议大夫。庚申，贼犯黎里，年六十三矣，与弟淦斗贼，贼众，不能支，皆被害。淦字荔生，入江邑庠，工古隶。

徐士涛，字默庵，居盛泽，甚孝母，葛氏守节，受旌。贼警，奉母避北新圩。庚申六月，贼至，母卧病，贼将掖之出，搜其

床席，孝子奋力拥护，断手指者三。贼去，母病重死，心痛母，每号泣，伤口迸裂，血涔涔下，未久卒。子树勋，端品学，壬子举人。越年余，积哀病歿。

叶渭，从九职督办团丁，迭获奸细，斩之。贼攻吴江北门外三里桥，乃亲领练丁抵拒，贼稍却。明日，贼麇至，被执不屈，拥至塘路，见害。

陈寿熊，字子松，郡庠生，居黎里镇。通诸经，尤深于易，谓虞翻变成既济之说，为得易奥旨。著《周易集义》诸种，未成编而死于难。前游娄邑姚椿门，与沈曰富、陈克家友善。古文简严，有《静远堂诗文集》。又搜辑松陵人诗加评引，曰《诗征续编》。庚申，镇破遇贼，以身蔽母，腰腹被数创，仆地，徐苏，门人莘塔凌泗昇至家。两月，创渐合。嗣莘亦被扰，始归。有以款贼说进者，怒骂之，创裂血淋而病作。闻贼渠将设黎伪馆，则大恸，作书与亲故诀，绝粒五日卒。生平善诱掖后进，造就经学，撰《读易汉学私记》，又《冬官补亡说》。死年四十九，事闻，得恤。长媳、次女，贼至时赴水死。

沈春镛，字翰香，震庠生。年七十，闻苏城陷，团勇丁率子侄等守查家桥要地，先后击贼，斩获甚众。四月二十五日，贼猝至，生奋斗，中枪死。子壬林、侄之瑜，各蔽以身，枕籍死。生等既殉难，族弟承庚、仙庚继领团，御守尤严，累战，辄杀贼。七月十二日，贼大股来攻，二人均殉。江震一门死忠者，水华港沈氏为最烈。以上《昭忠录》。

徐泰吉，号茹香，郡庠生，以筹饷得国子监典籍衔。早失怙，抚诸弟成立。母病，割股作糜进，遂愈。居恒尚气节。庚申四月，贼南窜，生与蔡、萧、冯诸绅举办黎里义团，屡抗贼，多斩获。六月八日，贼队水陆分途进，乃督战袁家桥，歿于阵，年三十八。赐恤建祠。

陆炳堃，字藹春，博学能文，屡困童试。旋纳粟入监。贼

攻黎里，势迫，劝母出避，不允，偕弟正钧、桂林同侍母不离。贼至，挟刃出战，正钧奋夺贼刀杀贼，桂林以酒瓮击贼，炳堃助之，毙多贼，三人并阵亡。贼恨之，纵火焚其屋。正钧、桂林均八品衔，同受恤。以上吴江、黎里两志。

夏宝全，字惺元，戊子顺天举人，由吴江籍迁太仓，官国子监学正。有勇力，励志耐劳苦。咸丰癸丑，青浦土匪周立春党犯太仓，君与州绅办团击贼，城无恐。事平，大吏上其功请奖，君独固辞不受。庚申夏，太仓陷，避地至蓬阁镇，又徙横泾，与同志议复州城，不果。辛酉，庞大臣檄委团练于太昭，遂密团数百人以候机会。壬戌，官军复嘉定，贼西走，君邀击之于半泾杨家浜，屡告捷。及太仓绅民乞师讨贼，知府李庆琛、都司姜德统兵接应，屯六渡桥，檄君守界牌桥，将分道攻城。贼猝扑李姜营，溃，乃率勇奋击，斩黄衣贼目，夺其马，贼引退。会嘉定宣家桥、戩浜各团告警，君驰救之，设伏长桥左右以败贼，贼死枕籍。贼又掠宣家桥，乃回军掩击，战良久，嘉定民团亦溃，君手刃二贼，猝中数枪，堕水死。义勇从死者五十余人，年五十四。继妻余氏及幼女同殉。事闻，得恤，赠助教。按：夏君在娄东，羁旅书生耳，无谋事当死之责。乃始则立功辞奖，继则报国丧身，伉俪忠烈。于松陵义绅中，宜推首席矣！

仲孙懋，字兰舫，住盛泽镇近乡，慷慨自励。同知孙樊，胞弟也。孙樊官临海时，得民心，募其乡人为台勇，随剿上海有功。公以从九随兄营效力，及兄歿，公代领之。恩威并济，积功保县丞，奉提督邓绍良调援宁国，又调驻黄池。乙卯，克芜湖、石埭等处，力保建平，升知县。又随提督秦如虎往来徽宁间，攻复东坝。丙辰冬，克复宁国府，由知府擢道员。时贼扰湾沚、黄池，绍良阵亡，郑魁士军溃，公驻宁国，保江浙藩篱，厥功甚著。己未年，复湾沚、黄池，授宁绍台道。庚申春，调守省垣，与贼战，炮伤头眼，城破，裹伤巷战，遂殉难。死事

与前卷略异，并存之。公少孤，事母孝。与兄友爱无间言，时其母妻在家，夜闻鬼啸于房，似惨死者，疑信参半。越日，凶音至矣。公无子，以兄子元熙兼祧，旋卒。以堂侄虎腾嗣袭世职，身后萧条。有功无禄，可谓二难也已。

周宪曾，字荫芝，诞生时芝产于庭，故以为号。曾祖元理，官工部尚书，勋代载国史。父光纬，割田千亩立义庄以贍族。庚子捷，由户曹出为广平府同知。癸丑，发贼北扰，奉札防邢台之临洛关，警逼，有劝其入城暂避，坚不可。往见督部胜保言事，公之同年也，乃督部已退，公遂驰回。八月下旬，贼大至，关陷被戕。妻崩、妾郭皆自经。君有遗书若干首，其友陈昌镛搜罗辑之。

陈宗元，字柳坪。胸襟坦白，和而不流。癸巳进士，授吏曹，补员外郎。咸丰癸丑，由京察放江西吉安知府。公竭心力，抚循疮痍。乙卯冬，粤贼石达开率众犯吉安，其地邻南楚，当贼冲。前年属邑多被蹂躏，会臬司周玉衡领兵来援。冬至日，公集寅僚¹行朝贺礼。忽报贼来，城中仅千人，贼称五六万。公语僚佐曰：“事急矣，非战，无以为守。”乘夜风雨，出击贼，毁营数座，歼贼千人。一日，获谍，发其函，有“某日从东门进，官兵从西门出，两面勿施枪炮”语。公焚之，斩其人。既而曰：“悔不就其计用之。”有顷，又擒贼，索复书。公屏左右与约，纵之逸。至期，贼薄东门，乃令施空枪，毋伤贼。贼见计行，蚁附登城。忽城上矢石雨下，毙贼数千人，贼恨甚。久之，粮尽，杀犬为食。先后十八次遣使至省求援，绘援兵绕道地图，而援兵不到。越时，贼轰地雷，裂城数丈，遂陷。公守东门，周臬司守西门，贼自西城入，臬司死之。公与长子世济战贼同死，年五十一。族父钰、妻兄周以衡均殉难，丙辰正月

1 寅僚，同僚。

二十五日也。计守六十五日而城陷，贼割公父子首悬诸东门。逾日，吉民陷贼者敛钱赂贼目，得其首，合诸体槁葬城中，赠道衔。殷兆镛奏请赐谥武烈。世济奉父命，挈老母、弟妹出城，后仍乞求缙入，伴父同亡，义不忘本，天经地义，贤乔梓并垂不朽矣。

江震殉难义民 各处乡民殉难，而非因御贼者，一概不登。

秦兰墀子福田。 陈秀发 沈炳忠 张凤梧以上皆韭溪人。

监生朱如柏珠【朱】旺浜人。 监生徐璆六里庠人。

黄兴顺 汝佑坤 陈国佐 翁梅 鲍士杰 张漳

庠生朱春贵 庠生秦廷宝 庠生赵鲁沂 庠生周师韩 庠生倪金城

庠生李清淦 庠生王观澜 庠生沈文烈 庠生王复亨 庠生赵镜清 庠生李元烺

孝子戚崧 孝子沈益之 孝子陈绍文 孝子钮益甫

张坤泰 吴秋江 尤集芳 秦慕椿

流寓周霨杭人 陆子选秀水庠生。 王庆嵩嘉善附贡。 吴嘉鹏歙人，子士爵。

以上各则，见《苏浙表忠录》。

吴江八都人姚襄期、姚四夏，为张考夫先生高弟，见《陆清献公日记》卷九。

陆稼书先生尝过吴淞江，因论东南水势。盖从苏州至嘉兴，自北而南者，官塘也。太湖在官塘之西，吴淞江在官塘之东，诸湖或在吴淞江之北，如尹山湖是也；或在吴淞江之南，如庞山湖是也，皆在官塘之东。吴江县乃吴淞江之首，又古之水势，自吴淞而东，直抵于海。自吴淞壅塞，水不能即东，乃折而南为淀山湖，又南而为泖，又南而东为黄浦，又东而北始达于海，则其势迂曲，故常壅而为患。同上。

吴宗汉

吴亦溟先生叔振兰，字九畹，诸生。乙酉，南都陷，与兄振远、宗潜、宗泌，约束丁壮保乡里。鲁藩遥授振远为监军金事，而振兰与宗泌为御史。丙戌春，大兵围其家，振兰先期避僧舍得免，更名宗汉，字广平，终身不薙发。无子，以兄之子燮为后，私谥贞孝先生。所著有《南村集》。《顾亭林年谱》注。

徐孝祥，吴江人。隐居好学。后园见树根一坎塌陷，谛视之，下有石瓮，启之，皆白金也，乃亟掩之，一毫勿取，人无知者几二十年。值弘治壬戌，岁大歉，民不聊生，孝祥曰：“是物当出世耶？”乃启其穴，物皆如故。日取数锭，收糶以散贫人，所全活者不可胜计，物尽乃已。女将适人，惟荆布遣之，而于藏中之物锱铢无犯。《春气录》。

王文恪公整修《苏州志》，众欲请杨君谦，文恪以君谦谣啄¹，不欲与同局。《姑苏志》成，文恪遣使送之，君谦方栉沐，不暇抽看，但顾签票，云：“不通不通！”使者还述其语，文恪以为狂，愠甚。一日，晤杨，问前语，君谦曰：“然。今府志修于本朝，当以苏州名志。姑苏，吴王台名也，以此名志，可乎？”文恪始大服杨之精识。《臣鉴录》。

明永乐间，选天下无子而守节之嫠妇，有司籍送内庭，教宫女刺绣、缝纫，及有藩王之国，分隶随行，以教王宫女。其所处曰养赡所，初独以无子者，其后有子而幼且窘者亦遣行。有吴江吴家妇陆氏与焉，有子遗家。至宣德间，陆从某王封广东，又转从封江西。子已长，往来二藩间，屡请求见母，辄不允。迨正统丁卯，复恳启于王，王怜而许之。陆已病笃，不能言，子刲股与食，陆苏。王闻，益悯，召见，赐金帛劳遣之。至

1 谣啄，犹谣言。

旅而卒，归槨先墓。人为作《吴孝子传》。子名璋，生子洪，由进士历任南京刑部尚书。野记。

徐元英，字华国，吴江人也。少贫，与二弟仲季分田，仲曰季田腴，必易之，相争不决。华国谓仲曰：“我田亦腴，可畀汝，毋与季易。”于是，兄弟以和。有富家欲以女妻之，华国曰：“非吾姻也。”及吴氏庚帖至，不发缄照，于日中识其姓，曰：“此吾妻矣！”遂娶之。生三子：长卯，次崧，次艮。华国曰：“吾惟一子尔！”卯、艮果殇，惟崧成立。人怪而问之曰：“君预知妻姓吴氏，惟有一子，何也？”华国曰：“吾昔梦神人，使吏与我一谍，有文曰‘室吴氏，年终四十三，子两耳，佳。两耳一人，天定之已。’及病革，家人请祷，不许曰：‘命乃在天，何以祷为？’遂卒，年四十三。唐甄《圃亭集》。

费大受，字任宇，世居吴江西操里。父九湖，母陈氏。甲申乙酉间，盗寇蜂起，盗入人家，辄执其主，加楚毒焉，以求贖。或缚去施酷刑，要重赂乃免。贼至西操，大受扶其父母以避，而父老惫，为贼所得。大受匿其母，而奋身诣贼曰：“此吾父也，老不任事，请释之，而以我代。”贼不听，劫其父，求藏金。父无以应，将兵之。大受以身蔽父，贼怒，将刃大受。大受延颈受刃，贼胁之数四，终不舍父。贼亦感动曰：“真孝子也，难得难得！”并其父免之。后十余年，邑令霍勋以绰楔¹旌其门，将白之上官，闻于朝，大受坚让，乃已。潘耒《遂初堂集》。

雪滩头陀者，东吴文学顾有孝茂伦也。生而长身玉立，秀出人表。自少游于陈大樽先生之门，为诸生，有声。申酉之交，焚弃儒衣冠，与山陬海澨之客相往还，然意气甚豪，携蒲博

1 绰楔，亦作“绰削”或“绰屑”，古时树于正门两旁，用以表彰孝义的木柱。

簏¹，穷日夜不休。用是，业益困，而茂伦顾夷然不屑也。尝窃慨于唐人之诗选者承讹踵谬，千百年来未能洗剔，为之扬摧论次，择其真赏者，命之曰《唐诗英华》。摭摭新、旧《唐书》以及纪事、艺文志，人自为传，胪而陈之。虞山宗伯称其“不立阡陌，不树篱棘，分曹迭奏，焕然复见唐人面目”。书成，凡扶余日出之国，无不争购。于是，茂伦诗名及于海外。然其自为诗，每矜慎，不苟作，遇有分题击钵者，恒终日不成一字。而间出片语，必隼永倾其座，人人以是益推服之。至其订证经史，左图右史，丹黄错互，必穷究根柢，不泛泛为渔猎故事。名益大起，四方之士有过松陵，必停橈问茂伦起居。而茂伦家故贫，或不能治鲑菜，必具脱粟与之对饭，客每欣然一饱而去。间有留者，尝至下榻经旬，虽瓮无宿春，而欢笑晏如。有穷孟尝之目。其邮筒往返，投赠之作，悉登梨枣，如所谓《骊珠》《岁邮》诸集，往往不甚持择，世或以是诋议²茂伦，而要非茂伦志之所在也。晚而须鬢苍然，长眉皓齿，幅巾布袍，俨如图画。经生执业者日益进，抉摘字句、搜讨典故之余，必为之返话前辈风流逸事，令人听之娓娓忘倦。先自号雪滩钓叟。雪滩，故在垂虹亭畔，为少伯浮家、天随泛宅³之乡，海内同人赋《雪滩钓叟歌》以赠者，有数十百首。其临歿也，梦陈大樽先生招之语，颇近怪，不足传。自为遗令，属门生勿拟私谥，亲友勿作祭文，并令诸子以头陀殓。因更号雪滩头陀。徐轨《南州草堂集》。

沈烈女，吴江望族沈秀才之女也。秀才名枢，家居傍城

1 擲蒲，古代一种游戏，像后代掷色子或飞行棋。古代博戏中用于掷采的投子最初是用柁木制成，故称柁蒲或擲蒲。博簏亦作“博塞”，古代一种赌博性游戏，亦称“格五”。

2 诋议，亦作“訾议”，非议。议论、指责人的缺点。

3 少伯，范蠡字；天随，即陆龟蒙。泛宅、浮家，谓以船为家。

墙下，登城望之，其家之户牖、井灶、屏帷、衣桁之属，无不悉见。女以故深自闭匿，而邻园邹氏子窃闻其美也，茜裤炫服，日登城以窥之，久不得见。一日，会女病，推帘欲吐，遂得一窥。适覩秀才他往，竟逾垣潜入卧所。夜将二鼓矣，见女从灯下刺绣纹，向前抱之，遽扑火。女惊呼捉贼，恐力不拒，即取架上剪刀自刎其喉。婢仆来，争持杖击贼，贼就擒，举火视之，则固邻园子，平时茜裤炫服于城上往来者也。绳拉之。无何，闻户内仆地声，急往视女，见水喉已断，涌血如泉，争救女，而邹氏子脱矣。女竟死。死时，雷电水雹，里人惊异，鸣于官。越五日，丞往验，色如生。洗视颈颌间，剪刀痕凡八。邹氏子倚其家赀，不少惮，仍茜裤炫服，扬言于众曰：“是向与我有私。所以死者，羞婢仆耳！”挥其金，属吏张挺遍赂，几脱于罪。挺归廨，啖粥，忽顾见女形而惊，亟语家人，即挟箸含粥而死。事闻，县始再谳，论如律。女生于顺治庚寅年，死节于康熙丙午年也。董以宁《正谊堂集》。

钱继升，昌其名也，居吴江之保障里。崇祯八年，以选贡授郡通判，不就归。是时天下多盗，而含山盗最剧，恶继升家饶于财，一日有二人踵门云：“奉主命贷银数千两，必得以返。”询之，乃含山所遣也。继升劳以酒食，为好言慰之曰：“银不能卒办，幸缓数月，当赍至山中。”其人约期而去。继升念曰：“盗不可藉之银，且豺狼无厌时，不如以家之所有，募士守御，庶几全吾乡里。”因具状请于官，得便宜从事。乃立格募兵。岁方饥，闻者先后至。家有大木仆地，继升言于众曰：“能举此木者留。”未几，有崇明武学生黄扶摇等四人至，皆黄姓，号四黄。遂命训练曹伍，里人吴彦康等亦别集壮丁自卫，皆听继升指麾。含山盗恶继升负约，率其党至，钲鼓喧阗，若甚可畏者。里中武士皆持兵、彀弓指之，盗惶骇，诡云：“吾曹欲往木渎取粮，不过假道贵邑，何纷纷为？”继升使谓之曰：“尔既

无意侵掠，何不藏尔兵器？”盗不得已，举兵器敛之。继升纵兵奋击，盗歼焉。久之，盗有沈判者，乘大舟，拥黄盖，驻野宏荡，声言欲为含山报仇。继升兵少，力不敌。时职方主事吴公易，以两都失守，倡义起兵，有众数千人。因抵职方，借其兵。职方初难之，卒与舟师二百，而黄扶摇等率之以归。继升侦察船设炮，患之，遣人伪为乞人，至其船乞食，潜以盐卤滴炮中。及判发炮，皆不起。继升用炮坏其船，遂获判。先是，扶摇献计谓，盗来必乘舟，舟必蔽以苇席，若用棉附箬而灼膏射之，则糜烂矣。从之，于是盗船尽焚，烟焰四起。李膏药者，判党之勇者也，继升与搏战，几殆。有许某者，斩膏药，悬其头于溪桥。继升乃徐讯所获之盗，杀其素为盗者，赦其胁从者。顷之，盗复夜入里中不遂，自是不复至。闽藩闻继升名，使以礼聘，谢不往。而吴职方败走，大军购之甚急，迹及继升。继升与吴彦康皆被逮，继升有辞得免，彦康亦免。继升与弟威皆能文，威中顺治丁酉乡试，以同榜有事，谪宁古塔。继升亦牵连，至京师病卒。张士元《嘉树山房集》。

沈祖惠，字岷望，号虹舟，乌程之马要人。父在莪，赘吴江平望李氏。祖惠生而母卒，育于外家。王父母仍为外氏赘婿，外氏无嗣，因冒李姓。乾隆壬申，领解第一。其秋会试第二，改复沈姓，除江西高安县知县。年三十四，游陕甘学政幕中，始锐意词章，为《西征赋》，两年乃成。既脱稿，并自注，合一万五千六百四十许字，赅洽宏深，上掩潘岳。交河王侍郎兰生曰：“千余年巨制也！”其诗亦各体稳称，五律尤高浑峭拔，逼真唐音。年四十一而倦游，以帖括授徒乡里，潜心理学，厌薄词章。先时稿本，弃之敝篋。与并世名流，绝不通问。登第后，为《四书讲义》，自负理学正宗，不为时论所重。以故，祖惠毕生无词章名，亦无理学家名。及卒，其高弟子王元文搜辑遗诗，获《三秦游草》四卷、《洞庭游草》一卷、《拾存草》二卷、《经

进草》一卷，谋付梓不果。余获之，合编为《虹舟集》。严可均《铁桥漫稿》。

汪孝子良绪，字纘武，吴江人。世居城中。其父邦楨，以好博破家。母张氏，直谏忤意，为所逐。孝子日夜号泣，求返其母。父怒，并逐之。于是，奉母至平望之战河，依其妻父王某以居，久之，父窘困，不能自存，亦来依其子。初，汪氏本素封，张亦饶裕，母虽被逐，尚携其奩中物，值数百金。孝子为置田四十亩，以供养膳。至是，父又尽斥去其田，乃贫无立锥，惟赖孝子馆谷以养。然孝子奉事惟谨，即与他人言，未尝一语以父为非也。暑月多蚊，为父置帐，辄去之以偿博。孝子撤己之帐以与父，父又去之。孝子无如之何，则亦裸卧蚊蛇，斑遍其体，妻欲为之假帐度夏，孝子蹙然曰：“吾父无帐，吾其忍安寝乎？”其母抑郁多病，孝子亲侍汤药，不稍离。母歿之岁，适馆他所。闻，亟归，而河水不通，徒步数十里，值津渡，履冰而过，见者皆股栗，盖急于视母疾，不自知蹈险也。居母丧，哭泣无常，朝夕寝地，不脱经带。寐必觉，觉必呼母不止，邻人闻者，皆为流涕。如是久之，遂以毁致病，未及终丧而歿。歿后，人视其枕，则以麻布包土块。年二十有八，无子，一女尚幼。孝子能为诗及古文，有遗稿若干首。顾汝敬《研渔庄集》。

四腮鲈，乃三秋所产，巨口细鳞，是其的证。俗以虾虎当之，误矣。虾虎，吴江等处亦有，且巨口而鳞不细，非霜严不上，何云秋风起而思乎？乾隆时，洙泾有鲈鱼腊，其制佳，其味隽，今无矣。古所云松江，乃吴淞江也。长桥，乃垂虹桥也。今吴江县。

吴汉槎兆騫《秋笈集》三卷，每半页十一行，行二十字。卷一赋八首，卷二诗一百二十首，卷三诗一百十五首。前有汉槎弟兆宜《小引》言：“健庵先生身既托于重霄，情弥深于旧雨。读定远玉关之作，侧望沾襟；接都尉塞外之诗，悲凉陨涕。

乃谋劄劄，以寿枣梨。”《四库提要》别集类存目《秋笈集》八卷，前四卷为徐乾学所刊，后四卷题《西曹杂诗》。据兆宜《小引》，乃汉槎自定其集，寄健庵者与？

张尚瑗《宁古塔纪略序》：合汉槎子名振臣，《提要》误为“振”字，单名且讹“振”为“振”。按，杨雄《甘泉赋》：“列宿乃施于上荣，日月才经于栲振。”韦昭曰：“荣，屋翼。”服虔曰：“振，屋招。”振臣，字南荣，取义于此。司马相如《上林赋》：“偃佺之伦，暴于南荣。”

吾邑前明有史仲彬者，相传为官于朝，曾从建文帝出亡，著有《致身录》一书，历叙出亡之事，并从亡诸臣究竟安据。夫明之不幸有靖难也，当以成祖入城，建文阁宫与后俱焚为正。乃疑其事，而为出亡。又新其说，而为来归。且诸书所载，地异事异，又姓名诗句各异。《致身录》之膺，遂踵于此。考吴文定公《匏庵集》有仲彬墓表，生平有梗概，寿终有年月，与是录所载从亡绝不相涉，则诬案定矣。夫其身诬，而所传之人与书亦诬矣。故虞山氏有十无之辨。潘稼堂宗其说以攻史氏，史氏后人遂成仇隙。后史氏请于当道，以仲彬入乡贤祠，徐检讨钜与焉。稼堂复作书与徐辩论。先是，稼堂兄力田曰：“此系前朝之事，当存而不论。”此语最善。

宋建炎时，有自称中兴野人，和东坡《念奴娇》词，题吴江长桥者。高宗巡师江表，过而睹之，诏物色其人，则不复见矣。案《烬余录》云：“吴云公雅善诗词，居苏城之临顿里，著有《香天雪海集》，传诵一时。靖康国难后，披发佯狂，更号中兴野人，厌弃城市，时往来于吴江李山民家。李即忠愍公讳若水之侄，避寇来吴，就馆吴江，与云公为僚婿，且同为岁寒社诗友也。山民尝题《洞仙歌》于吴江桥亭，不系姓名。龙蛇飞动，若真不烟火食者。时皆误传为洞宾所书。词见《五石脂》。

吴汉槎天才横逸，与同邑顾茂伦、计改亭、潘稼堂并称四才子，以科场事于顺治庚戌遣戍宁古塔，驱车北上时，尝托名金陵女子王倩娘，题诗驿壁，自寓哀怨云：“忆昔雕窗锁玉人，盘龙明镜画眉新。如今流落关山道，红粉空娇塞上春。”“毡帐沉沉夜气寒，满庭霜月浸阑干。明朝又向渔阳去，白草黄沙马上看。”情词凄断，两河三辅间，和者甚众。按：汉槎少年时尝作绝句二十首，亦托名女子，夜题于虎丘寺壁，其顽艳尤绝。词旨与上二绝如出一时，论者谓已兆投荒之祸云。

明晚结社之风甚盛，吾邑有惊隐诗社出，四方高蹈能文之士，一时云集。如顾、归、潘、吴、顾、戴、王、钱等，均以故国遗民，绝意进取，遁迹林泉，优游文酒。社集在唐湖北渚古风庄，颇有烟水竹木之胜，不啻避秦之桃花源也。其后庄史事发，社遂辍。

吴江刘秀才某，授徒于元和县蒋家。清明时，假归扫墓，事毕，将复进馆，谓妻曰：“予来日往某处访友，然后下船到闾门，汝须早起作炊。”妇如言，鸡鸣起身料理。刘乡居，其屋背山面河，妇浙米于河，撷蔬于圃，事事齐备。天已明，而夫不起，入室催促，频呼不应。揭帐视之，见其夫横卧床上，颈上无头，又无血迹。大骇，呼邻里来看，群疑妇有奸，杀夫。鸣之官，官至检验，命暂收殓，拘妇拷讯，卒无实情，置妇狱中，累月不解决。后邻人上山采樵，见废冢中有棺暴露，棺木固完，而棺盖微启，疑为人窃发，呼众启视，见尸面色如生，白毛遍体，两手抱一人头，审视，识为刘秀才，乃诉官。验尸官命取首，首为尸手紧捧，数人之力挽不能开，官命斧斫僵尸之臂，鲜血淋漓，而刘某之头反无血矣。盖尽为僵尸所吸也。官命焚其尸，出妇狱中，案乃结。见《续新齐谐》。

沈叶氏，邑诸生星金女，适同邑沈蕙庭。氏母晚岁目盲，依女居。沈有族子某，素无赖。一日，伺蕙庭出，某操刀入室，

欲戕人以快心。家人皆避匿，氏念瞽母不及避，启门则某突入，连斫氏十数刀，晕绝复苏。邻救医痊，氏谓：“初被刃，尚知痛，后不复觉。”人以为孝感所致。其面上刀痕，至老犹存。年逾七十，夫妇齐眉。

陈易斋，邑之黎里人。始厚于货，其兄颇浪费，人有以早析箸劝者，辄不应曰：“贫富，命也。岂可以钱财伤手足情哉！”妻刘氏或偶言及伯，公正色曰：“妇人不得问我骨肉！”刘亦能体公意，无愠色。或有为刘虑者，刘曰：“苟至饥寒，亦我命。”后公侨居江城，以名廩生拥皋皮¹，负笈者常盈户，终身温饱。沈相国文定公经筵，其外孙也。

费玉坡，邑诸生，善山水；弟眉坡，善书，皆习名家言。历佐剧县，晚岁家居，设米肆于门首，常属其伙曰：“零余者，切勿苛，生财不在此。小民升合所需，米色必佳。”故贫户争集焉。米豆得时进，足岁获盈余。其长厚如此。

仲孙樊，邑之盛泽人。事母至孝，家贫力学，以馆谷养母，每日必躬亲为母洗净桶。尝馆池亭叶氏，一日，凭北牖读文扬声，学生顾视先生，赤蛇绕体，哄堂叫诧，盖得意出神也。道光庚子，与同邑叶子音振声、洪受甫文益以第三、第六、第七各魁其房。仲旋捷礼闱，以知县仕浙。

柳峙安，邑之北垞人。以贩运起家，有田数千亩，开典与酱园。子四人，两补诸生。长子桂轩，同治间曾秉铎嘉定。峙安治家精核，店内外常餐止荤素各一，然与负贩者不论价、不过秤，其俭而不刻如此。道光二十九年，大水，民饥，家储米三千石，市价涌贵，每升五六十文，乃开门零粟，止收三十六文一升。门设一水缸，不论升斗，必浸水以付，恐人转以图利也。庚午，其孙昌霖举江南乡试。又莘塔凌成天者，以贩棉为

1 皋皮，虎皮。古人坐虎皮讲学。后因以指讲席。

业，积费开油坊，旋成巨富。道光己酉，大水，出家米以贬价济之，邻近各圩人赖以不饥。咸丰间，以军需劝捐，捐银至万两，例得一钦赐举人，当道欲为之请，其子弟皆不愿，曰：“功名敢幸邀乎？”戊午，江南借浙闱乡试，同堂三人，两登贤书，可谓积厚者流自光，有志者事竟成焉。若富而能仁如柳与凌两翁，可以风矣。

金文简公士松，少时有赵翁作伐，聘周姓女。文定¹之前日，周母闻金家业道士，中悔，至日闭门却拒，不得已，赵以己女与焉。未几，公入词林，周女所适，仅足温饱，赵翁女封一品夫人，可见功名、婚姻皆有莫之致而致者矣，营求规避，何为哉？

吾乡昔有仙源道院，陈公之故居也。院去仙里桥不数武，桥有仙人洞，相传陈公得道后入此洞去，不知所往。陈公名昉，少为县吏，日食鱼二尾。同署某戏窃其一，悬之梁。公归而诘其婢，怒挞之几死。继见腐鱼自梁间坠，慨然曰：“一家之枉尚不能辨，况一县乎？我生平过失多矣！”遂谢绝人事，修真仙去。国初，有人持葫芦于桥东酒肆，沽酒独酌，遗其葫芦。家渐富饶，易名为张仙源。人疑饮者即陈公也。院今无存。

吾邑向有武安桥，在西门外关帝庙左侧。明嘉靖间，倭人入寇，命通判公防湖。至庙，卜以杯，玠兆曰吉，全胜而归。自是，屡昭显应，香火日百数。民以隔越洲中，艰于迂道，特设野航渡人。邑侯杞县陈公，广其宫垣，复募民建斯桥，咸称便利。清康熙四年重修，道光二十七年，邑侯湘乡左公正复捐费募修，桥庙毁于咸丰十年粤匪兵燹，现存一片荒郊而已。

任德成象元，吴江人。笃于儒行，奉朱子白鹿洞规，因集明以前先正格言，与洞规相发明者为一书，曰《洞规大义》。

1 文定，古代指订婚。

居乡勤施济，置义仓，创社塾。岁饥，煮粥食饿者，乡人德之。一夕，步于庭，有偷儿方逾垣下，见象元，惊欲窜走。徐语之曰：“子无恐，得无患馁乎？”手量米一斛给之曰：“此危道也，勿更为。”其人叩头负米去，乃遍告其党，相戒勿窃。任氏其言，颇闻于人。雍正初，诏举贤良方正，鄂文端公为布政使，欲荐之，固辞乃已。尝浚万顷江，达之太湖，里中无水患。有司以闻，赐八品服。学行如君，东京之彦与南宋之儒，与今日吴中之士习，安得若君辈三五人，不言躬仙而示之标准欤？

徐虹亭太史有《菊庄词》，为吴孝廉汉槎在宁古塔寄至朝鲜，有东国会宁都护府记官仇元吉题词云：“中朝寄得《菊庄词》，读罢烟霞照海湄。北宋风流何处是，一声铁笛起相思。”益都冯相国有“记载三长矜虎观，风流一调动鸡林”之句，皆一时实录也。

吴日生，名易。为人秀雅，寡言笑，无名士习。登崇祯丙子科贤书，癸未成进士。弘光当璧为兵曹，喜谈兵，走马驰梁，为恢复事。继而大兵南下，江南覆没，日生父母妻子皆死乱，而乃跳身湖海，结义勇，出入波涛为巨敌，隐然抵东南半壁。一日，走嘉禾，饮一巨绅家，为所给，付大兵执。时贝勒征杭，解至军前，欲官之，不屈，遂赴法死。

吕石香，名云孚，娄东籍。少攻经史，搜奇选僻，不肯为时俗文。张公天如甚器之，荐于楚中鱼山熊公。时熊为吴江令，遂入试，得为吴江庠生。性绝孤介，鲜与人交，人益严惮。居无何，大兵屠娄东，石香被执，死之，年三十五。一子，亦旋卒。石香家素封，藏书亦夥。歿后二年，家业散，藏书尽耗杨、陆手，即石香之妇翁与妾父也。

《明史》之狱，发难于吴之庸，后攀染无数，凡藏书与著书，一体同罪，严旨逮捕。吴江有两生，一为潘怪章，一为吴炎，平日闭门读书，亦私著《明史》一部，虞山钱宗伯以书三

航供其纂辑，书成，未及梓，庄允成以其同心也，列之参校。后按籍擒捕，两县令一司理登门亲缉，一则方巾大袖以迎，一则儒巾褙衫以迎，词气慷慨，凡子女妻妾，一一呼出，尽以付之。县令司理谓：“君家少子姑藏匿，何必为破卵？”两生曰：“吾一门已登鬼箠，岂望覆巢完卵耶？”悉就械，而挺身至杭就讯。既见两部官，痛詈不屈，夹二棍，骂益甚。两部官蹴其齿尽落，旋罹于法。时康熙二年五月二十六日也。

以上三则见娄东沙溪无名氏《研堂见闻杂记》。

松陵费氏著述存目

善庆 谨录

族谱稿二卷 叙文一首 凡例十八条	予济公
至山堂稿 射法一卷 阵法一卷	梅原公
桂森斋杂录 咏古诗一卷	儒珍公
劝刻族谱启 时文稿一卷	羽吉公
洁斋杂著四卷 课余吟二卷	洁斋公
半园诗稿二卷 诗余一卷 为学日记三卷	洁斋公
制义存稿一卷 聊莘水利说一卷	洁斋公
公移条示八卷	洁斋公
笔记一卷 时文稿	心原公
古今词选	成九公
曲谱一卷	仲山公
诗文杂稿	以增公
广锦字笺	育焉公
大字结构一卷	乐根公
香谷诗稿	在中公
峻于制艺	峻于公
九华诗钞 映月楼诗钞	显谟公

春秋左传列国地名考二十四卷	朵山公
稽古编八十卷 经说八十卷	朵山公
国朝经义考六卷 句吴俚语考二卷	朵山公
吴江城隍庙志一卷	朵山公
诗文全集 分韵子史辑要	朵山公
远就阁制艺 帝王表见记	朵山公
周易汉学通义 四书音证	朵山公
许氏说文重文补录 音韵表	朵山公
家塾迹言 遂初轩吟稿	在轩公
周礼郑注疏证	仲礼公
读论过庭记 采兰斋诗稿	仲礼公
课余草一卷 小壶天诗稿	二峰公
断肠词	顾氏含春
宫幕同舟录四卷	友棠公
胎产心法达生合编三卷	友棠公
痧证全书三卷	友棠公

费氏节孝_{贞烈附}

周氏，荀龙公配，夫卒于乾隆三十一年，遗孤元荣十三岁，周氏年四十二，抚孤成立，守节三十五年卒，光绪十九年题旌。

谭氏，显堂公配，夫卒于嘉庆十九年，无子，谭氏年三十四，立侄山寿为子，守节四十五年卒，光绪十九年题旌。

邓氏，兆琳公继配，夫卒于道光十三年，邓氏年三十一，守节三十五年卒，光绪十九年题旌。

曹氏，凤偕公配，夫卒于道光二十年，无子，曹氏年二十五，立侄良杰为子，守节二十一年卒，光绪十九年题旌。

蒋氏，秀升公继配，夫卒于光绪十七年十二月二十日，蒋

氏于次日仰药殉，光绪十九年题旌。

王氏，叔鉴公聘室，夫卒于光绪二十七年十一月，王氏闻而守贞，逾年而卒，迎柩合葬于震邑裳字圩考墓之穆位。

费桂生少尹枕经楼诗古文集序 殷寿彭

余弱冠，识费君桂生、颂斋昆季于鹿城旅邸，时两君名籍甚，试岁科及经解，辄冠其侪。后十余年，余与颂斋同举于乡，同入京师。颂斋联捷成进士，出宰山右。余胥疏江湖，奔走衣食。闻颂斋循声翕然，上游方荐卓异而遽歿。迨余今年再至都，则桂生以明经教习八旗。余甚惜颂斋之未竟其用，而又幸桂生之久别相见也。暇辄遇桂生寓庐，因得读所著《枕经楼诗古文集》若干卷。桂生幼承尊甫在轩丈家学，与颂斋啾唔一室，足不出里闾¹。天性友爱，在轩丈以经学为吴中名宿，两昆季侍膝下喃喃然，虽夜分犹讲解不辍也。迨尊甫仕黔中，两昆季名益成、年益强，乃始出游，求天下奇闻壮观，以发泄胸中蕴蓄。桂生尝南至浙，北至燕，目览所及，一一形之于诗。今集中纪游诗是也。其诗不冒袭盛唐，不皮傅残宋，大抵皆道性情，而出以自然者。桂生家故贫，然性闲静，不慕荣利。颂斋既歿，桂生自伤其境遇之穷，尝谓余曰：“士生一世，但当守先人敝庐，种竹栽花，座客常满，斯是乐也。至功名宠荣，殆有命也，毋相强也。”余谓：“桂生方将出宰百里²，举任兴城，绾铜符³，拜腴壤，领第一清班⁴，助登三醇化，岂仅以手椎子为活计者？白傅风流，苍生霖雨，君诗固自

1 闾，yù，门槛。

2 百里，谓距离甚远。古时诸侯封地范围，后亦指一县所辖之地，因以为县的代称，借指县令。

3 铜符，即铜虎符，唐人避唐高祖之祖李虎讳，改“虎”为“兽”。指郡县长官或相应的官职。

4 清班，清贵的官班，多指文学侍从一类臣子。

信之矣！况桂生应京兆试，文甚高，服其侪辈。异日杏苑飞龙，蓬池斫鲙，凤举鸿翻，青云无难自致耳，何为局促若辕下驹耶？”桂生曰：“善知我者非子莫若，序我集者亦非子莫属矣！”遂濡笔谨志之。

江震科第贡举考

乾隆元年丙辰恩科乡试即以乙卯科案作科举：

中式 顾礼让 吴至慎 陆鸿言 钱之青 赵宗堡 沈景熹 周日藻顺天。 吴鸿振吴江人，桐乡。

副榜 张宗洙吴江人，浙榜。

孝廉方正 周汝雨纯夫。

出贡 潘其炳 吴台征

丙辰会试：

中式 沈宗湘新淦县令。 叶宏遇泗水县令。 沈廷光 吴讷

丁巳恩科会试：

中式 俞武琛 沈裕云崇宁县令。 沈惊远

戊午乡试：

中式 倪廷元 沈椿龄 周元理吴江人，浙榜。 孙金铎吴江人，乌程籍。

倪承茂承桂弟，吴县籍。 沈怀祖

出贡 潘学博 王恒岁府。

己未：

出贡 钱国宝江。

拔贡 黄汝德江。

辛酉乡试：

中式 倪廷铄府。 孙莘衡吴江人，浙榜。 吴岩吴江人，浙榜。

副 凌均吴江人，浙榜。

壬戌：

出贡 沈永江。

甲子：

出贡 张儒燮江岁。 叶兆封

恩 张昇东皋，浙岁。

甲子科乡试：

中式 顾我钧 庞曾瑞 王大魁 黄汝德

乙丑科会试：

中式 周日藻

丁卯科乡试：

中式 潘廷仪 张峰之

出贡 钱柏森府。 钱桂森江。 张富仪府。

戊辰：

出贡 金起人震。 王士府。 叶兆封江，由湖州府学出贡，推归苏州府学。

庚午科：

中式 沈墀 徐楠府。 钱汝楠顺天榜。 吴大勋顺天榜。 董翼吴江人，浙榜。 郑念荣吴江人，福建榜。

恩 庞焉震。

副 周旦江，一作潘谔。

岁 吴濂震。

辛未恩科乡试：

中式 沈泰来 曹森 管嵩淳安县令。 赵楠 陆张耀吴江人，顺天。 李祖惠吴江人，浙榜，解元。

副榜 沈穆 钱大培吴江人，顺天浙监。

出贡 丁守信府岁，是科北副贡。 钱大培震岁。 沈穆震岁，改名兆熙，壬申副贡。

壬申恩科会试：

中式 李祖惠二名。

拔贡 潘焯江。 王曾翼府。

癸酉科乡试：

中式 王曾翼 于煌吴江人，浙榜。 周诰副。

副 施天柱

出贡 陆文起府岁。 张兆洙江恩。 朱志楫江岁。 倪学涵震恩。 陈宗渊震岁。

丙子科乡试：

中式 司马梦祥 王堡 吴芝光顺天。 徐作梅顺天。 金士松顺天。 吴钟桥顺天。

出贡 陆近思江。 金书升震。 秦彬府岁江。

丁丑科会试：

中式 吴岩欽点主事。

出贡 何锦江府岁。

丁丑科：

出贡 陆近思江岁。 金书升震岁。

己卯科乡试：

中式 费宏勋 郑邦柱吴江人，浙榜。 蔡鹏副，改名双桂，通州教谕。

出贡 沈槎府岁。

庚辰科会试：

中式 王曾翼 金士松任终吏部尚书，谥文简。

庚辰恩科乡试：

中式 陈师集 李赵龙 庞冕

副 程炜震泽人，上江籍。 仲步墀顺天。 计滨江，顺天。 倪士奇顺天，震。 程炜安徽籍，震泽副。

辛巳科：

出贡 朱廷相府震岁。

壬午科乡试：

中式 沈翰 金学诗顺天。 倪万澹顺天。 曹吴霞副府震。

出贡 史积厚江岁。 程学洙江恩。 潘永安震岁。 吴山秀震恩。

诰封 王廷敬曾翼父。

癸未科会试：

中式 沈翰

甲申科：

拔贡 庞端明江。 金德辉震。 唐大成江府。 宋贵江，桐乡籍。 陈庭学江，宛平籍。

乙酉科乡试：

中式 沈乐 程瑶 张球 丁云锦江，顺天。 陈庭学顺天。

副倪若震震。 沈大中震。

出贡 顾参江。 庄宗鋈震。 朱昇府。

拔贡 金德辉震。 唐大成府江。 宋贵江，桐乡籍。 庞端明江。 陈庭学江，宛平籍。

丙戌科会试：

中式 陈庭学 按：己丑科会试中式。 丁云锦江。

戊子科乡试：

中式 费振勋

副 陈阶琪己丑出贡。 沈吐玉江。 费伟烈震。

己丑科会试：

中式 丁云锦

庚寅恩科乡试：

中式 杨复吉

副周士松 全士淳

辛卯科乡试

中式 王元照 金德辉顺天。

壬辰科会试：

中式 杨复吉

癸巳：

出贡 钱心灿府江。 王元文江恩。 张锡桓江岁。 倪之禄震恩。 程云万震岁。 叶焕震府岁。

甲午科乡试：

中式 吴舒帷震。 王锬府江。 赵振业震。 陈兆騅江。 谭书吴江人，本姓倪，广东榜。

乙未科会试：

中式 费振勋 王元照

丁酉：

拔贡 徐赋震。 周王图江岁，仁和籍。

丁酉科乡试：

中式 陆泰增江二名。 唐诗震。 叶逢金北榜。 殷立梧 周瑜副。 陈钜北副，吴江人，天津籍。

己亥恩科乡试：

中式 吴士坚震。 金芝原监。 徐晋亨北榜。 周兆基湖北榜，推归本邑。

出贡 朱钟秀震府岁。

戊戌科会试：

中式 吴舒帷钦点翰林。 王锬

出贡 沈培敦江岁。 费盛烈震岁。

庚子科乡试：

中式 许金阶 陆探副。 周瑑北副，再中。 王祖武北副府。 周镐浙副。

辛丑：

出贡 陈毓咸江恩。 张宗泽震恩。

癸卯科乡试：

中式 盛朝栋震。 陈毓咸江。 沈德霖震。 王祖武江，顺天。 倪树枚震副。

甲辰科会试：

中式 周兆基

甲辰：

出贡 王承恺府岁。 袁益之江岁。 陈光培震岁。

丙午科乡试：

中式 仲锦奎江。 严鸣皋吴江人，本姓张，浙榜。

乙巳：

出贡 顾汝敬江恩。 赵基江岁。 费辰龙震恩，即士璜。 徐汝宁震岁。

戊申恩科乡试：

中式 张士元震。 陈预吴江人，宛平籍。

丁未科会试：

中式 王祖武 沈清瑞

戊申：

拔贡 倪定安震。 仲振豫府江。

己酉科会试：

中式 叶逢金七十六名。

己酉科乡试：

中式 沈宗德江。 朱兰森震。 顾我乐江。 沈钦临江。 迓朗顺天。 沈志钦吴江人，北榜。

出贡 庄鼎府震岁。

庚戌科会试：

中式 陈预欽点翰林。

出贡 叶振德江恩。 陈兆牧江岁。 徐翰震恩。 陈光烈震岁。

壬子科乡试：

中式 陈兆登江监。 丁纶 殷立柏监，吴江人，浙籍。 陈云顺天。 沈灏副。

癸丑科会试：

中式 陈云吴江人，欽点榜眼，宛平籍。

出贡 沈芸震岁。 金镇岳震。

甲寅恩科乡试：

中式 周鹤立江。 徐熙吉震。

岁贡 陈宗燮府江。 袁兰江。

乙卯科乡试：

中式 顾青藜江。 徐垣震。 王和行江。 黄土灿震。

出贡 袁兰江。 陈宗燮府。

嘉庆丙辰科会试：

中式 陈毓咸一百廿六名。

诏举孝廉方正 袁棠

戊午科乡试：

中式 王麇孙江。 徐岫吴江人，浙榜。

出贡 宋景和江恩。 钱埰江岁。 周丰玉震恩。 费士玠震岁。

己未：

欽取宗人府教习 周鹤立

恩贡 叶莹江。 范徽枢震。

辛酉：

拔贡 萧伟江。 王锡泰府震。

优贡 吴庆元震。

庚申恩科乡试：

中式 陈兆彪江，十五名。 王锡泰震，四十二名。 周模江，六十一名。 吴鸣镛江，二百十三名。 沈璟江，七十一名。 费士玠南元，顺天二名。 费卿庭震，卅九名。 费兰墀顺天，八十七名。 周材吴江人，浙榜。八十三名。

辛酉会试：

中式 沈钦临中书。

辛酉科乡试：

中式 程邦宪江监。 丁绶江府。 王锡瑞震。

壬戌科会试：

中式 程邦宪钦点翰林。 费兰墀钦点翰林。

出贡 周孝均江岁。 费怀新震岁。

甲子科乡试：

中式 程际韶江，官卷¹。 王宇荣府。

钦赐举人 顾汝敬江恩贡，八十岁。 王朝栋副榜，七十岁。

乙丑科会试：

中式 费卿庭钦点翰林。

出贡 钱奎焕江。 马若霭震。 庞泰初府。

丁卯科乡试：

中式 钱溶江。

副 郑鑽钦赐举人。 张芹震增生，八十一岁。 周兰兆基侄，亦江夏籍，吴江人，是科中式后改归原籍。

戊辰科会试：

中式 程际韶知县。

1 清代科举制度，凡高级官员子弟参加乡试，皆另编字号，另入考试，以人数多寡，各分定额取中。因其试卷均编为“官”字号，故名官卷。

大挑¹ 陈兆騄 丁纶 黄士灿 王麀孙俱二等。徐长宁原名岫，浙二等。湖北江夏县，推归吴江县。周兆基工部左侍郎，甘肃静宁州，推归吴江县。慕整² 丙辰进士，兵部职方司员外郎。戊辰恩科乡试：

中式 叶鑽六名，江。周省焘十三名，震。沈宝树五十一名，震。吴音八十八名，震。周诵芬顺天。

钦赐举人 吴作舟震附生，八十岁。

钦赐己巳会试：

中式 张芹检讨。

出贡 陈阶琛江恩。邱璋江岁。姚敬清震恩。吴勋震岁。

庚午科乡试：

中式 赵亨衢江。郑鑽府。蔡淇震。

副 叶鏞江。

出贡 王麟勋府江岁。

钦赐举人 周孝均江岁贡，年七十二。

辛未科会试：

钦赐国子监学正 周孝均

癸酉：

拔贡 赵云球震，朝考一等小京官³用。

1 清乾隆以后定制，三科以上会试不中的举人，挑取其中一等的以知县用，二等的以教职用。六年举行一次，意在使举人出身的有较宽的出路，名为大挑。挑选的标准多重形貌，相传有“同田贯日气甲由申”八字诀，合于前四字形貌者为合格。例如长方面型为“同”，方面型为“田”，身体长大为“贯”，身体匀称为“日”。

2 《苏州长元吴三邑科第谱》载：“慕整，循陔，甘肃静宁州籍。戊申，北，吴。户部员外郎，肇罗道。”《民国吴县志》载：“慕整，德仪，甘肃静宁州籍，顺天中式，见进士。前志作是年预行己酉正科，误。”

3 小京官，宋代称低级的中央职官。清代，满人自从六品至从九品；蒙古人自从六品至八品；汉军自正六品至从七品；汉人自正六品至未入流的某些中央职官皆称“小京官”。

癸酉科乡试：

中式 程庆麟江监官卷。 陈兴嘉震。 吴枚浙榜。

副 费元镕江。 王友浩江。

丙子科乡试：

中式 张生洲府。

出贡 王纲江岁。 叶泰亨震岁。

戊寅恩科乡试：

中式 沈福清顺天。

己卯会试：

中式 沈福清钦点主事¹。

乡试中式副 陈大治

出贡 黄元吉震岁。 袁鹏程江岁。

道光辛巳恩科乡试：

中式 张海珊解元，震。 费元镕官卷，江。 沈清衢江。 王锡晋一作邕，府震。 周知府震。 周士钰府。 黄增川江。 蒯成照榜姓陈，顺天。 蒯芬顺天。

孝廉方正 翁广平江附。 王之佐震附。 周桂震副，桐乡籍。

壬午科乡试：

中式 沈超然二十五名，江。 姚凤赓四十名，震。 连鹤寿四十五名，江。

出贡 倪廷望江恩。 周星彩江岁。 秦清锡震恩。 王锡纶震岁。 陈兴荣府恩。 王祖康府岁。

乙酉科乡试：

中式 沈焕十一名，江。 潘纬十三名，江。

钦赐 张汝琪副震，年八十二。

1 主事，明清时为各部司员的低级官吏。一般由没有考中庶吉士的进士充任，也可以由皇帝赏赐。

拔贡 吴荣震。

出贡 王昌毅江恩。 吴鸣锵江岁。 黄文燮震恩。 王锡蕃震岁。

丙戌科会试：

中式 迕鹤寿 沈超然

大挑 钱庆辰原名溶，二等。

戊子科乡试：

中式 夏宝全监北榜。

优贡 殷寿彭 杨金生震府岁。

出贡 杨金生府。 费一桂府。

辛卯恩科乡试：

中式 陈宗元 董荣椿晴霞，浙榜。

出贡 沈宝和江恩。 庞禹门江岁。 徐庆荣震恩。 邱孙锦震岁。 沈宝荣府岁。 黄文鲁府岁。

壬辰科乡试：

中式 张景星三名，震。 费公彦六名，震。 殷寿彭江。 周均元震。

癸巳科会试：

中式 费公彦知县。 陈宗元主事。

甲午科乡试：

中式 陆镛震。

出贡 金寿祺府岁。

乙未科恩闱乡试：

中式 仲孙机 殷兆镛

出贡 沈毓和江。 徐锡琛

丁酉科乡试：

中式 沈槩森六名，江。 王汝佐震。 沈宝桐江。 杨炳春初名庚，顺天副。

拔贡 蔡傅梅震增。

出贡 杨炳桂改秉桂，府。

己亥恩科乡试：

中式 沈曰富七名，江。 吴炳林 殷寿臻江。 杨炳春顺天。

出贡 顾复升江恩。 叶尧冀江岁。

庚子会试：

中式 恩闈 殷兆镛翰林。 殷寿彭传胪，翰林。

庚子科乡试：

中式 仲孙樊三名，江。 洪文益六名，江。 叶振声七名，江。 蔡傅梅震，顺天。 周宪曾仁和籍，顺天。 周士炳莲史，浙榜。 周士炳铁霞，浙榜。

出贡 范清芬震岁。 秦穀丰震恩。 王芝孙府岁。

癸卯科乡试：

中式 任廷暘五十一名，府江。 黄增祿四十九名，府震。 沈镐五十八，震。 沈桂芬六十五名，江，顺天。 袁嵩龄松巢，浙榜。 周士燮克庵，浙榜。

甲辰科乡试：

中式 周元圭江。 徐宝治震。 沈光鉴震。 金宝忠府。 周星垣顺天。 陈景辂顺天。 杨庆麟顺天。 顾榆顺天。 蒯贺荪顺天。

出贡 刘浚源江。 徐曰淦震。

甲辰科会试：

中式 殷寿臻翰林。

乙巳科会试：

中式 仲孙樊一作甲辰科知县。 周士炳

丁未科会试：

中式 沈桂芬翰林。 沈镐主事。

出贡 孙楷江恩。 赵鲁沂江岁。 陈兴庆震恩。 徐丙华震岁。

己酉科乡试：

中式 程庆桢震。 吕鸿宾江。 周礼菽香，浙榜。

拔贡 赵荣光震。

庚戌科会试：

中式 杨庆麟翰林。 徐宝治主事。 袁嵩龄

出贡 袁廷璋江恩。 王宝书江岁。

咸丰辛亥科乡试：

中式 汝春嘉江，亚元¹。 张乃淳府。 陈宗恕江。 任廷昶震。 陈铠顺天。 沈元溥顺天。

制科² 孝廉方正 董兆熊

出贡 费仑府岁。 盛坤吉震恩。

壬子科乡试：

中式 蔡尧栋十二名，府。 徐树勋江。 余高煌府。

出贡 蔡召棠震岁。 周宝琪江。

乙卯科乡试：

中式 萧晋荣八名，顺天，本省停科。

出贡 张其泰江。 夏墉府。 沈玉森震。 王希曾震。

戊午科乡试：

中式 冯经顺天副榜一名。

出贡 丁保怡江恩。 王琇江岁。 赵云衢震恩。 秦廷玉震岁。

己未补行乙卯科借浙闱乡试：

中式 韩霖十九名。 王希鏊三十九名。 赵汝钰六十一名。

1 亚元，谓名列第二。明清时报子对乡试第一名解元以下举人的恭维称呼。

2 制科，旧时指科举出身的人。

李葆恩一百廿七名。 凌浚一百十名。 凌淦一百十三名。

袁清贺一百卅一名。 费延鳌一百七十七名。 张仲友副。

辛酉科乡试：

中式 黄兆怪顺天。 王景贤顺天。

拔贡 费延庆江。

同治壬戌恩科乡试：

中式 陈振瀛吴江人，宛平籍，北榜。

癸亥科会试：

中式 陈振瀛翰林。 王景贤主事。

甲子补行戊午科本省乡试：

中式 蔡鲁琛十三。 庄人宝 凌惟寅 陆莹监。 吴廷桂 王偕达 叶嘉树

钱家骏 张育源副。 樊生保副。 沈文炘北。 吴仁杰北。 费延庆北。 沈文沅北副。 吴楨千臣，吴县，副。 周善咸仲阮，浙榜。

乙丑科会试：

中式 吴仁杰翰林。 费延鳌翰林。

丁卯补行辛酉科乡试：

中式 张育源 钱宝德 黄宝棠 张文浚 陈麟 张绍箕 叶锦组 刘春藻副。 柳兆薰副。 吴鸣銮武。 张王熙欣木，浙。 王徐庠小希，浙。 王景曾梦仙，浙。

出贡 周宝琨岁。

戊辰科会试：

中式 张文浚主事。

出贡 陆巨鸿震恩。 凌泗江。

庚午科并补壬戌乡试：

中式 钱锡庚震。 沈恩荣江。 柳昌霖监江。 朱元善府。 黄灿府。

辛未出贡 王增沐震恩。 张特桂震岁。 吴复亨震岁。

癸酉科乡试：

中式 徐日华府。 凌泗副。 陈昌燧副。 殷源江，顺天。 庞庆麟震，北榜。 王藻墀浙。 徐泽之佰铭，浙。 王壬泽江，拔贡。 王树萱震，拔贡。

出贡 周清彦震恩。 徐宝澍震岁。 范其骏震恩。 沈观宾震岁。

甲戌科会试：

中式 殷源翰林。 庞庆麟主事。

光绪乙亥恩科乡试：

中式 黄元芝震。 周龄府。 王树藩震。 顾友焘江。 徐世勋震。 范家骥顺天。 周善承子宣，浙。 施则敬子英，浙。

出贡 柳大奎江恩。 沈宝纲江岁。 郁庆云江恩。 柳应墀江岁。 吴鹏年江恩。

丙子科会试：

中式 沈恩荣江，主事。 钱锡庚震，主事。

丙子科乡试：

中式 钱焕八名，江。 陈熊十三名，震。 张鸣驹江。 王文毓江。 洪乃琳副。 钮家焕觐唐，浙。 周文炳春庭，浙。

丁丑科会试：

中式 周龄翰林。

出贡 凌其楨府江。 任鳌瓚江。 王朝泰江。 叶锦棻江。

己卯科乡试：

中式 汝惟寅十三名，震。 盛钟岐震。 洪乃琳江。 范宗麟江。

出贡 陈大受震。 于丙来震。 李我泉江，钦赐举人。 沈文焘绶生。 殷柏龄柯亭，庚辰出贡。 施绍书江。 徐兆熊江。 王树人震。

壬午科乡试：

中式 沈宗汾震。 沈宗荣江。 杨学沂吴江人，吴县籍。
夏勋臣江，副元。

出贡 孙云锦府岁。 叶兆荣江岁。

乙酉科乡试：

中式 曹缙明震。 徐聿修震。 钱钟祿江副。

拔贡 徐观萃江。 赵铭忠震。 杨敦颐府震。

出贡 谢咸庆震恩。 谢宝恕震岁。 叶昌第府江。 张深
仁江恩。

丙戌科会试：

中式 王文毓江。 凌赓颺陞卿，浙。

戊子科乡试：

中式 刘长灏二名，江，大挑二等。

正贡 沈增祥江岁。 沈观澜震恩。

己丑科恩闹：

中式 陆廷楨监江。 张嘉桐江，大挑二等。 汝梦庚
震。 王希梅震副。

正贡 龚树经震岁。 沈文华震岁。

辛卯科乡试：

中式 吴燕绍震。 庞元启震。 翁绶祺江。

正贡 朱凤苞 钱谦吉

壬辰科会试：

中式 陆廷楨知县。

癸巳恩科乡试：

中式 曹吴钰震。

甲午恩科会试：

中式 吴燕绍内阁中书。

丁酉科乡试：

中式 金曾烜五十四名。

拔贡 金祖泽江。 黄元吉震。

优贡 张慰祖朝考二等。

出贡 王运昌江。 张藜照江。 王家桂 钱萃吉 张世

荣

壬寅补行庚子辛丑恩正并科乡试改八股试帖为经义策论自是科始：

中式

钱崇威震廩一百零七名。 徐世泽江，一百四十名。 黄元

吉震拔一百五十八名。 范祖培府增二百六十七名。

癸卯科乡试：

中式 周积厚博山，浙榜。 庞文俊震，北榜。

甲辰科会试：

中式 钱崇威七名，翰林。

丙午优贡 庞国钧

正贡 蒯保衡

宣统元年己酉科：

拔贡 王国华江。 沈毓清江。 王赓颺震。 汤之铭震。

出贡 沈恩培江。 张人俊

正贡 王庆仕 王钟澍 陈庆林 顾乃德 金树芳

松陵费氏诗集卷一

善庆 谨录

翼民公诗

公名时美，字翊明，王政子。性敏好学，才大精算。每遇钱谷，一握了然。邑宰熊公开元、叶公翼云皆倚重之。尤敦孝行，好义急公，为合邑倡。故当道巨公，屡给奖匾，亲族咸赖之。中岁奉佛，至老益虔。刊经布施，自奉甚俭。寿至八旬，视听不衰，犹及见孙登甲第焉。纂有《历朝金刚经持验纪》一卷，并《劝诵金刚经述意》一篇。见《家谱》。

七十自述

忆昔童稚时，早岁离师塾。严命理赋役，业薄苦迫促。一身任艰难，独费多劳碌。嗣后即析居，数楹分庐屋。中年痛丧父，吁天罪莫赎。昆弟共五人，同气天伦笃。分产遵母命，授田供饘粥。十亩半荒区，未补输官粟。经营殫心力，风餐兼露宿。上苍悯劳瘁，稍得遂所欲。远感祖考恩，流泽衍川渎。孝弟仁之本，积书子孙读。裕后赖累德，为善天降福。守拙自无竞，君子戒慎独。岂料鼎革时，忽罹祸患速。貽累固有由，身家几倾覆。痛母又见背，血泪洒林木。所居苦湫隘，罄囊置荒陆。勉力建厅楼，聊以安杼柚。两遭绿林惨，移家邻更卜。择

地葬亲柩，林莽屡匍匐。虽有诸昆季，负土甘独筑。二儿俱成立，田庐均分属。孝友我所重，兄弟惟雍睦。向平累已毕，可离世网束。愚钝还守雌，善恶有报复。我年已七旬，尘劳苦驰逐。终为后人计，念我徒鹿鹿。独立创家基，守成尔亦足。戒尔莫争竞，譬我无所畜。若能遵我训，知足自不辱。昔日张公艺，行谊敦风俗。高义动至尊，明诏天赐禄。惟愿子孙贤，持躬如执玉。书此为家箴，永以训嗣续。

伟文公诗

公名元熙，字翼王，嘉楨子。例监生。

送吴同升钱晋裴入都四首之一

此别应难嘱早归，扶摇万里仁高飞。临行一语堪持赠，莫遣缁尘涴素衣。

岳钟公诗

公名岳，字岳钟，号髯翁，允仕子。例监生。又入浙江平湖县学武生。性至孝，尝啗臂肉和药以愈母病。善画，工诗，同邑李重华、何堂、沈彤、沈芳辈亟称之。

《题溪山风雨图》，吴中盛念庵茂晔画品，在包山磬室之亚，其雨景一幅，烟峦云物，颇有生气。独其位置失宜，尚未尽溪山之趣。爰稍变其林壑，作此漫成小句一绝，聊用遣情，非敢希风于辋川之二绝也。雍正乙巳初冬听鸟评花兴未阑，奔雷掣电绕峰峦。此中自有升腾物，莫作寻常风雨看。

儒珍公诗

公名士璟，一字儒正，允份子。公安贫好学，以著述为事。

学有经济，好义急公。雍正甲辰九月，始分吴江县为震泽县，督抚奉文营造县治，阅六岁，不果。公为请于当道，董建于济农仓基，始终其事。著有《桂森斋杂录》，分类标题，中多确论。所载轶事，足资考证。又有《攸好古斋诗》一卷，沈归愚作序。无子，其书散佚，为女夫任纯仁所编。是非褒贬，不肯苟同而得其正，即此可觐其学殖矣。

燕燕于飞

患难久相依，归与燕独飞。终温今古诵，不念故君非。

马嵬驿

鼙鼓声同羯鼓催，邮亭无复绣成堆。渔阳探骑红尘起，犹认炎方进荔来。

鱼 罾

鱼水相忘逐浪回，谁知世网不轻开。香钩才幸惊扬去，又见纷纷入得来。

题陆孝怡同妻王氏夫妇双孝录

宣公旧裔胄，分派在莼乡。世德当湖远，流风笠泽长。胶庠冠孝行，壶内播名芳。定省方交励，尝羹更共将。承欢依膝下，触螫起萧墙。吮毒痍旋愈，殉亲体不伤。感天免灭性，化逆又熏良。不率已烝义，冥顽亦洗肠。风声腾两邑，纪传光吴疆。绅士连翩举，嗣英特发皇。王章耀柱石，宠命勒崇坊。忠裔产纯孝，延陵正颀颀。

课衍儿二首

忆我髫髻时，坟籍颇记强。诂屈经句授，背诵声琅琅。自许读三遍，但逊目十行。稍长顾不能，及兹转颓唐。旧记十无五，朝诵夕则忘。亦复竭其力，昔一今十偿。人生非金石，生

质那保常。耳目日庞杂，精力即倦荒。俗累与年益，并作聪明戕。所以古之人，重咨老大伤。胜我汝勿喜，不及更自量。

洒扫与应对，愚智始幼仪。如何狷薄习，日盛里中儿。尔汝其父执，安问兄肩随。雉卢聚群戏，客至公然居。习惯见勿怪，长者莫之訾。膏肓望却走，神针竟何施。读书理气质，矢慕忌污卑。画虎且有戒，小恶尚勿为。惜令圭璧资，都与砒砒夷。渐染近朱墨，吾以戒吾儿。先识小学义，然后事书诗。

洁斋公诗

公名元衡，字思任，允侃子。康熙五十二年癸巳举于乡，好读儒先书，受业张清恪公之门，所得成帙，张公点定而序之。后试宰山东莘县，莘漕故多弊政，公为革除之。兼摄冠县及聊城市事，既而调繁莱阳，适患水，公为开引河数道，赈【赈】灾恤民，核有隐粮田亩，损置普济堂以贍之。为政有干略，多此类。遭亲丧，给假归葬治所，士民来会送者至百人。乾隆初，以病乞休，卒于家。著有《洁斋杂著》四卷、《课余吟》二卷、《半园诗稿》二卷、《诗余》一卷、《为学日记》三卷、《制义存稿》百余篇、《聊莘水利详说》一卷、《谏语公移示稿条陈》八卷，选有《周礼节注》《左国史汉八家文》《时艺正宗》《大家名家》三集。

哭张清恪公师三首

理学薪传赖有真，千秋遗绪一番新。狂澜力挽皆宗海，化雨无私并与春。一息尚存犹励志，百年未老定容身。谁知岁际龙蛇会，掩泪郊原已获麟。

尧舜君民素所期，升沉荣辱岂关思。频因直道逢时诟，自有忠诚结主知。四国黍苗资牧伯，两朝楨干重英耆。忽闻骑尾归天上，丹诏哀思赤子悲。

坐风立雪几经年，一旦山颓梁木颠。华晷未能亲执烛，战兢无复听临渊。生刍一束怀徐稚，筑室三年愧鲁贤。他日淇源操桧楫，一杯清酒滴重泉。

留别莱阳士民二首

吴咏扁舟兴已豪，小臣辞禄敢云高。不才非为明时弃，多病应将世网逃。头上初安新箬笠，床前犹有旧毡袍。既耕复读余生业，击壤讴歌答有陶。

倦鸟思林怅已迟，幸随北雁往南移。不从勾漏求丹药，且向商山斫紫芝。雨后麦田欣尽绿，风中弦管正相吹。归与遥望无他愿，振古丰年只在兹。

题陆孝怡同妻王氏夫妇双孝录孝怡名士铨，字元珍，震泽县学诸生。

公纪遗芳久莫攀，先生纯德绝人寰。蘋蘩兼获闺中佐，簪组宁移衣上斑。天锡神方教续命，人钦至性可砭顽。翳余里闰还相望，伫看褒纶指日颁。

可斋公诗

公名鸿，字羽吉，允伦嗣子。苏州府学附生，曾辑《族谱》未成，有《劝刻族谱启》一篇，已录于《族谱》卷首。

渡江

如练晴波漾客舟，金焦两点峙中流。江山颜色青如许，不使英雄叹白头。

虚谷公诗

公名谦宜，字又谦，元衡子。雍正壬子举人，善书。

题陆士铨双孝录

夙仰遗徽托比邻，德门双孝古无伦。升堂拜乳崔家妇，侍

疾稽顙庾子真。循陔有诗君不忝，陟岵无望我悲辛。余丁母艰，故云。摘词漫作高山跂，会有辘轩达紫宸。

静斋公诗

公名兆蟾，字峻干，廷珍子。吴江县廩贡生，湖北武昌府经历。著有《制义》一卷。

中秋抵任公安感旧

几年宦绩类征鸿，制锦南平绣未工。虎渡地名。曾闻多异政，民安古驿名。犹喜见淳风。晴江舫棹云初净，萧署鸣琴月正中。回首郢都烟景旧，秋光渺渺愜幽衷。

九月崇阳署中

天城环城四面皆山，旧名天城。如画望中幽，昼静帘开翠影稠。却笑参军风落帽，漫同彭泽菊浮瓯。临池洗墨清香远，拔茗栽桑惠化流。最喜下车逢岁稔，千村熟稻为农酬。

再任通城即事

峨峨塔影上城隈，独坐篮舆晚霁开。嵩水斜阳人候渡，银峰山名点黛我重来。代庖宁奏三年绩，展牍犹惭百里才。一自台湾还鄂渚，仍从此地浣尘埃。

孙如公诗

公名曾谋，字孙如，谦宜子。才富家贫，不治生产，远游作客，族人相与矜之。

远馆山东有感家事偶咏二首

忽见飞鸿至，翻惊落雁秋。楚天何不吊，吴地漫生愁。棣萼非连理，螟蛉莫效尤。回思当日事，添我子孙忧。兰孙并桂子，臭味却相当。托迹空山下，移栽绝壁旁。西风常飒飒，秋

雨更茫茫。寄语寻芳客，无令三径荒。

西屏公诗

公名成烈，字显谟，号西屏，书芬子。例监生。夙抱奇才，晚益清厉。所作诗篇甚多，有《九华诗钞》《映月楼诗钞》《闲吟摘句》，俱已散佚。仅有存者，姑录如左：

金阊纪游

阖闾城畔泊兰桡，放眼风光客思饶。春水帆樯湖抱郡，夕阳烟树寺当桥。千秋霸业青山在，一梦豪华夜雨消。只有伍胥祠庙古，鹧鸪声里忆吹箫。

赵北口

挟剑辞村店，驱车古战场。风烟辽守戍，沙碛宋封疆。断岸垂杨碧，空亭落照黄。兴亡游水逝，雁外碧天长。

椿树庵小饮

螺旋入幽阒，小饮傍经台。鹤唳调清磬，花飞落酒杯。孤云石窦出，闲溜曲池开。对此不能去，东皋月色催。

送人南旋

万户炊烟起驿楼，送君千里转林丘。青山红树江南暮，白草黄沙塞北秋。匹马关城归路稳，寒衣刀尺异乡愁。他时独对苏台月，可忆飘蓬客尚留。

渔阳客舍

朝辞桑干河，暮宿平沙店。严风野萧条，徒步倚长剑。入门咸裂肤，惊沙犹满面。暗室灯无光，流尘集如霰。只将浊酒倾，讵以腥膻荐。驰逐信何为，逝将适芳甸。明发驾骊驹，宛转星河晏。长揖阎公宾，托身愧浮贱。

涿鹿馆斋

蓟门三载独淹留，萧寺钟残起百忧。故国青山谁对酒，异乡明月独登楼。长天雁外苍茫路，落叶风前暗淡秋。一片冰心何处寄，断肠无梦到林丘。

客夜偶成

流落真无计，相看又岁除。五年仍故我，九折只残书。寒重青灯小，更深客梦纾。双亲头渐白，愁绝是门闾。

七夕三河丁明府邀同人灵山寺宴集

峭壁当三面，凌虚接斗牛。风光敞孤阁，天宇近高秋。疏树凉蝉咽，芳花石磴幽。传杯¹欢会足，不使忆针楼。

怀袁高士

雪夜曾排闷，挑灯话世情。如君真洒落，愧我尚狂佯。才岂文章著，交能肝胆倾。风尘知识少，此亦见平生。

题卧虎图

谁把山君写屈蟠，一般寥落卧林峦。分明意气终腾上，莫作寻常牛马看。

春日津门郊外

畿南大郡首称雄，瀛海风光入望中。潮汐三津汇日下，鱼盐万户近淮东。远帆徐赴浮云没，归雁低飞暮雨空。又值清明好时节，绿杨旖旎小桃红。

客中生朝诸同人宴集东海斋中诗以志谢

十年京洛误芳时，枵触悬弧一系思。戊子当年惭独小，甲辰今日笑成雌。云天意气销人海，风雪轮蹄验鬓丝。多感诸

1 传杯，指酒宴中互相斟酒。同“传杯弄盏”。

君斗酒劳，高歌击筑复何辞。

赵北燕南又五年，侧身天地拥寒毡。故人半奏凌云赋，贱子仍歌招隐篇。昼省香炉劳幻梦，落花飞絮悟空禅。独怜奉母输潘令，极目停云一惘然。

梅 花

乾坤清素削孤根，领袖东皇众卉尊。雪意满天横老干，烟痕数缕漾轻魂。荒亭古驿岩边路，茅屋斜桥水外村。共羨翛然遗世立，美人冷妙几忘言。

空山开谢寄轮囷，记取孤芳餐玉真。一片溪云低啖石，半窥檐月悄无人。高闲惜未逢宏景，标令何当擅采蘋。漫道杏花江店好，清癯先合伴吟身。

陇头折寄慰相思，逗漏春光又几枝。古寺僧归群雀散，小园风暖隔邻知。当年对客衣仍素，他日调羹味已滋。安得茗炉长坐卧，瓣香为我洗渣滓。

平生怀抱水云耽，野店山庄亦素谙。从古吟魂驰庾岭，近来清梦落江南。松苍竹翠闲相间，雪后春前试一探。多感故人书问讯，铜坑有约结茆庵。

保阳寓斋与张青谷话旧

元夕笙歌盛绮筵，汝阳高会纪从前。天涯回首惟君共，何处沧桑不可怜。

缙满征衫泪满巾，梦魂空恋帝城春。浮名几堕风前鹞，羞向青云问故人。

送人出塞

郑重君恩任所之，沙场杨柳已如丝。玉关今入舆图内，不是春光不到时。

广陵司马署中别牛师竹

叙首无多日，离魂倍黯然。布帆归九月，客路别三千。酒醒灯残夜，风高木落天。何时重握手，临眺析津边。

东柯谷

半亩秦川地，先在此寄居。抽簪托高隐，选胜结茆庐。朝庙情终切，皋夔命不如。诗篇存二十，多半泪盈裾。

重经甘别驾旧署

论诗莲幕昔纵横，人去斋空百感生。细雨潇潇春欲暮，燕泥蛛网总关情。

秦州怀古

百二秦关自此开，平襄走马一裴回。郡传非子初封地，城绕羲皇画卦台。云物青苍供拄笏，江山雄秀佐衔杯。我来先访人文胜，五字河梁千古哀。

黛柏山南散影横，慨然吊古剧关情。乘槎使者通西域，射虎将军老北平。世代几更消劫火，人民依旧绕边城。滔滔清渭流无尽，肠断秋风是此声。

驷铁车邻士气骄，兵戎割据忆前朝。朔宁遗恨公孙事，景略先亡霸业销。林木郁葱环战垒，风云慷慨驻征轺。那堪浪迹街亭遇，愁思都应把酒浇。

西来山色满乾坤，牢落登楼一酒樽。六郡羽林悬夕照，千秋军垒纪荒原。铁堂空著英雄姓，柯谷惟余诗句存。极目塞天论往事，陇泉呜咽暮烟昏。

易水官署寄虚谷叔

天涯一剑可怜生，谢傅庭阶旧有情。拜别几年才叙首，追随三月父登程。梦魂屡绕中山郡，诗酒重期易水城。弹指岁华容易过，疏疏篱菊满秋英。

作客频年唤奈何，襟期强半付流波。文渊意气羞裾曳，叔宝登临寄慨多。落叶千章秋易老，西风一鹞翻空摩。生来愧乏鸢肩相，十载烟台浪迹过。

江山放眼一登台，不尽风光得得来。时鸟漫矜芳树唤，闲花丛趁碧溪开。汝南公论曾怀古，给事无名似少才。忧乐平生原自许，素心奈已着寒灰。

清省闲窗听晓钟，嵇生入世觉疏慵。功名漫拟从军侣，沦落惭输卖菜佣。天末多情吟只雁，愁中好景指青峰。衔杯未敢舒清啸，闻说凌寒有涧松。

形影灯窗默自悲，乡园千里隔江湄。思亲不独停云处，忆妇何须织锦词。碧水丹山悬梦想，春风红杏卜归期。萍踪方寸同元直，骚屑聊吟七字诗。

盆 梅

径尺扶疏态，春光入画屏。香浮樽酒绿，魂冷篆烟青。素纸裁琼雪，孤灯晕薄暝。啁啾窗外雀，偷眼更梳翎。

绝 句

儿女情怀芳草绿，英雄魂魄夕阳红。虎丘纪游。
庭树着风秋意薄，湘帘笼月夜痕虚。闺中夜坐。
客骑寒霜催意气，画楼春梦失英雄。将之都门有感。
闲数白云去，静闻落叶飞。法明庵寓居。
白翻京口潮音怒，青落雷塘山势飞。舟发扬子。
倚窗对月情如海，卧病怀人夜似年。客夜偶成。
大地冰沙寒驻马，遥天风雪劲盘雕。冬日经芦沟桥。
鸟飞朱果落，僧住白云深。西山道中。
雾帐千年空废垒，高台百尺只神明。涿鹿怀古。
病萌入道计，贫起著书心。枯坐。
人冷雕栏余晓月，春深锦幄宛秋霜。白牡丹。

无数寒云生远岫，依然秋色满高楼。陶然亭感旧。
 空廊飞落叶，断岸打寒潮。再游香林苑。
 江云南指三千里，海色东浮十万家。登津门清虚阁。
 鱼盐半齐国，烟月小扬州。天津偶成。
 筑宫已识招贤士，报怨何堪倚酒徒。登易州塔。
 凉雨乍收闻蟋蟀，秋风刚到落槐花。易水署中。
 孤城峙山起，万户对江开。浦口。
 窗飞岳色横秦塞，树拥河声落豫州。

声和公诗

公名辰龙，字声和，号晓岩，原名士镛，承启子。乾隆五十年乙巳震泽县恩贡生，就职直隶州州判。工诗文，每试辄冠其曹。所作稿甚夥，半为友人取去。今俱散佚。

题徐孝廉晋亨折柳图即送之入陕

珊瑚七尺赠君鞭，柳影垂垂一色鲜。绛帐春风萦旅梦，铃辕旭日启宾筵。英流宏奖须前辈，才藻炳麟属后贤。从此云程展骥足，题桥应把姓名传。

雄关百二向长安，襆被登程壮志宽。远听晨鸡齐一唱，遥瞻紫气郁千盘。星河浪晓乘槎渡，华岳云开立马看。更喜青青桥畔柳，为添新色助吟鞍。

东海词宗久擅场，缥緜世业耀文昌。班齐玉笋征麟趾，谊洽金兰比雁行。欲别攀条循柳陌，相思落月照河梁。轻飙五两扬帆稳，暂缓行舟醉一觞。

丹桂堂前华萼辉，葱茏佳气溢重闱。显扬高蹶青云步，特达名看书锦衣。雁到江头频鹊噪，书传渭北共神飞。今朝挥手河桥去，杨柳春风得意归。

绍堂公诗

公名宗葵，字元贞，号绍堂，增运子。袭职云骑尉，以金华协镇致仕。工诗，遗稿散佚，间有零句见于他集，爰摘于此，以见一斑。

生 孙

汝才落地称三代，我似登楼上一层。

绍古公诗

公名宾贤，震泽县学诸生。

挽松亭叔彰化殉难

犄角移防算未神，时同城官相率移兵八卦山驻守，为犄角势，援之。然城空无兵，且非扼要之地，非计也。藩篱捍卫竟无人。孤城失守知谁咎，末秩酬恩只此身。落日平原理白骨，悲风古戍泣青燐。公遇害后，属吏暂槁葬教场浅土。事定，诸弟始扶柩归里。于今华表魂归未，浩气空存旧写真。

松陵费氏诗集卷二

善庆 谨录

二峰公诗

公名仑，号二峰，震泽籍，道光己酉，学院青取入府学岁贡生，有文誉，居至山堂，督课后辈綦严，课余以诗酒自娱。著有《小壶天诗稿》及《课余草》。

春 柳

屈指韶华到昨朝，游踪无定怯萍飘。客逢知己能垂眼，自笑依人便折腰。袅袅春风吹绿岸，丝丝纤影罨红桥。短长亭外情何限，暂借轻阴泊画桡。

柔条绾定艳阳春，泼翠重重瞥眼新。相对不嫌花似雪，横陈尤爱字如人。展眉惯翦双瞳水，弹指疑逢九烈神。一骑冲烟忙勒住，妆楼少妇粉初匀。

拇 战

揶袖双双赌老拳，分明露指有声传。功成反手夸三捷，将怯登坛厄两贤。一片豪情消块礪，几番吉语斗新鲜。何须扼腕人间世，乞与移封到酒泉。

莺湖竞渡歌

金鼓鼎沸杳不闻，画眉桥畔呼救人。此时生死争一刻，龙舟鹢首仍喧阗。人言溺者吴氏子，最堪怜悯是新昏。人追十日乐，依抱终身忧。平波台畔鬼啾啾，鸟不是鸟声声恨，柳亦非柳条条愁。劝莫愁也莫恨，万般都是命。吾辈欲涤此愁恨，莫如再鼓扁舟兴。虔心下拜元真子，即歌此歌叩前因。前因果定不由人，劝妇慎勿再悲辛。

王砚农征君访徐俟斋先生墓，得之青芝山麓，
乞左青峙邑尊立石重修。适邑尊调任濮阳，
征君即以俟斋先生画赠行题诗幀尾，即和其韵

西山薇蕨守坚贞，余事还传善画名。仅见艺文详郡志，不甘世胄继簪缨。荒原白草埋无迹，秀岭青芝茁有情。千古高人同一恸，阿谁辛苦翦榛荆。

骊歌一曲两情深，画幅聊传赠别心。展读如闻能语鹤，卧游兼抚在船琴。难留棠舍双凫迹，犹记平台六客吟。笑我羈身乡僻境，诗坛枉向梦追寻。

答赵石娱茂才

闲恨闲愁一扫空，猖狂何用哭途穷。遍尝世味千般幻，全赖心光一点通。火宅超升归净域，壶天¹跳入有仙宫。中年丝竹消悲感，鬼篆纷纷栋可充。

酬俞少甫学博时任溧阳，曾乞画《鹤壶草庐图》。

春去春来又斩新，溧阳端合住诗人。昔年东野栖迟地，风景描摹定逼真。

苦予画拙学吟诗，画在诗中亦自知。翻欲索君神妙画，当诗读去慰相思。

1 壶天，亦作“壶中天”，指仙境、胜境。

楚江公诗

公名芝沅，字瑞庭，号楚江，云倬子。震泽县学增生。试辄高等，屡蹕秋闱。性慨爽，遇事敢为，未展其志。

寿陆母沈太恭人七旬华诞

贤哉寿母，世所罕有。身励俭勤，心存宽厚。偶值岁饥，施散升斗。我乐指困，人歌盈缶。初度古稀，家储春酒。坚却奉觞，悯兹襁负。卒岁无衣，急同糊口。挟纊宜先，装绵恐后。志在寿人，遑称己寿。用训儿孙，敬辞亲友。实惠当施，虚名不受。贤哉寿母，芳型永久。

春卿公诗

公名荣增，号春卿，公彦子。震泽县学生。

题画

花容妾貌是谁工，无限春风蕴藉中。白板双扉依位处，弓鞋留认印泥红。

昔年崔护迹成空，京兆看儿入画工。锦瑟年华自珍惜，一年春事易匆匆。

硕甫公诗

公名干宸，号硕甫，功深举业，见赏于左邑尊辉春，县取第二，府试冠军，遂为震泽县诸生。

避兵村居时咸丰三年癸丑作

碧血千年色尚殷，雨花台畔泪潸潸。雨花台前，明诸臣死节处，贼兵屯此。钟声莫问南朝寺，屏障空瞻北固山。客路鱼书惩莽伏，将军虎印骇苗顽。谓向军门荣。可怜一炬惊人胆，偷

学鸡鸣度早关。

村居感咏次陆雪亭日爱韵

桃源小泊避秦舟，梦里家山吊故丘。棠棣齐开仍竞爽，蒹葭有倚转忘愁。听人臧否垂青眼，感我年华已白头。名利澄观原泡影，江湖满地一浮鸥。

长江铁锁称天堑，风鹤声传总獯豷。叹息浮生真逆旅，欲将齐物论彭殇。琴书寂寞供残蠹，松菊荒凉背夕阳。来去自怜梁上燕，衔泥空费九回肠。

八方将士如云集，更向田间破格招。收蔡武功期相度，格苗文德颂虞姚。蚩尤毕竟遭天网，螳臂何曾撼圣朝。会见河山重锁钥，铙歌声沸助江潮。

麋生公诗

公名寿曾，字建辰，号麋生，例监生潜长子。习金谷¹，慕游大江南北，名噪公卿间。善书，尤工汉隶，间作吟咏，不落恒蹊。遗稿散佚，仅存一二。

祝西芑伯七秩寿诞伯居尧峰山麓，举乡饮宾，一子一孙诞生五月。

山林寄迹鹤神清，望重宾筵实副名。孝子慈孙征后福，佛心仙骨证长生。三千桃侑瑶池宴，七十筹添海屋营。会见杖朝无量寿，阿咸诗祝计飞觥。

祝古愚世伯七旬双庆

齐眉欢笑帖书楹，诀会黄庭百炼贞。多幸木公宜纪亥，还闻金母亦同庚。胜冠茝与兰偕采，捧砚孙传子又生。几许珠玑称晋祝，蛮笺²徒愧八义成。

1 金谷，指钱财和粮食。

2 蛮笺，谓蜀笺，唐时指四川地区所造彩色花纸。

答婿谢蔗【蔗】人宝恕祝寿诗即步原韵

棣萼交辉礼意加，三月十一日，偕令兄达人远道而来，欣然喜出望外。携来诗句灿云霞。感时愿乞壶公术，问世难容处士家。承祝延龄生意满，欣聆近况慰心遐。浮生梦幻知非昔，辜负夭桃灼灼华。

莲溪公诗

公名元标，字建霞，号莲溪，敦诗三子，震泽县学生。

拟柏梁体二十韵祝西芎大伯父七秩大庆

天降南极太湖滨，一生抱璞兼含真。是翁矍铄仍精神，绿发朱颜不朽身。望重曾推乡饮宾，三老揖让咸彬彬。今届古稀寿且仁，五月正当悬弧辰。石榴吐艳景色新，宝丝续命辉纷纶。蒲酒称觞来比邻，华筵不尽山海珍。堂前莱彩戏娱亲，独秀桐荪尤绝伦。盈庭和气如长春，里敦古处风俗淳。我惭犹子居嚣尘，愧乏蟠桃席上陈。俚言只将微意伸，但愿百福长骈臻。

岐生公诗

公名凤鏊，字仪吉，号岐生，仑长子，震泽县学增广生。

祝西芎伯父七旬大庆

修短各有数，人生命在天。是翁乃矍铄，届此古稀年。隐处契山水，有时乐圣贤。里中会醪饮，礼文遵古先。三老共揖让，四豆排宾筵。

秩秩齿惟序，彬彬仪不愆。今值设弧日，亲朋襟袂连。珍羞罗席上，兰玉森阶前。并祝寿翁寿，能学仙客仙。清心远尘市，逸趣生林泉。欲步阿咸后，餐餐还卧烟。星芒指南极，笑拍老人肩。

绶堂公诗

公名卿荣，号绶堂，芝沅子，国学生。

岁在戊申仲春下浣，麋生兄来，出寿诗一章，并及岐生、硕甫两哥作，见示属和。捧读之下，或古或今，诸体悉备。自思珠玉在前，难以效颦。勉凑俚词，聊备一格。预祝三多，
即希西芑伯父綵政

城罨睥睨，爰傍湖山际。古稀寿，太平世。悬弧榴吐艳，丝恰长生系。开华筵，定逢南极星临第。鸠杖宾筵曳，桂馥兰芬继。壶公心，夙契追，追¹步阿咸辈，称觴宜一例。愿此后，年年海屋添筹计。右调《千秋岁》。

廉卿公诗

公名寿康，号廉卿，潜次子，仑从侄，国学生。弃举业，作幕宾，一时士大夫争相结纳。晚岁家居，喜画山水，兼工花卉。一室中，笔精墨良，颇饶雅致。间作诗，亦清超拔俗。

辛酉除夕舟过黄浦赋呈俞少甫学博

迢递庞湖路，时眷属居同里镇。羈栖海上身。橹声惊宿鸟，灯影伴愁人。骨肉音偏远，朋俦意转亲。残年风雪里，瞬息物华新。

寿俞少甫先生七旬诞辰

无端草木类人形，羽檄传来恨楚氛。回想娄东犹在目，红羊浩劫怕传闻。

论画风流孰似君，掀髯谈笑自超群。开樽先唱江南曲，携杖贪看北郭云。

1 按词牌，此处当有一字，疑乃漏一“追”字。

脱却朝衫守薄田，不求闻达枕书眠。先生娱老避村外，记世还存博士钱。

游西庵观古松小饮作

旧游忽忆西庵竹，放棹城西歌一曲。小村麦熟饼送香，低岸芦苗玉抽绿。颓垣古松不记年，人寿何堪及林木。兵燹余生重结欢，天教良会自知足。不然相将沟壑填，此时此地伊谁接游躅。

欢饮歌

行乐不及时，枉生天地中。杨君今年年八十，谓杨阆山。李翁之岁文潞公。谓李式如。我年最少亦古稀，乐数晨夕相依依。良会固非易，光阴不再至。乘兹雨乍晴，杖履惬吾意。幸皆精神健，加饭餐鲈莼。相邀出城路不远，柳阴唤渡来前津。迺迤舟傍太湖滨，奔腾波浪连天白。

鱼鸟各相亲，檣帆如梭织。三万六千谁计程，七十二峰点如墨。西庵在其侧，古松巍独存。屈铁耸天起，皮裂苔藓纹。殿古尚有佛，径荒已无门。蛛网结屋角，村犬吠狂奔。此间小憩好，心旷殊了了。君不见，宇宙之间虫与鸟。虫为鸟所羞，鸟犹未得饱。争逐高下间，罗网忽难保。世事尽如此，世人徒扰扰。何如我三人，与松而四永作商山皓。

呦笙公诗

公名鸿勋，字纪常，号呦笙，元标子。震泽县学生。性落拓不羁，有文名，授徒以终。

登天平山绝顶

胜游曾上最高峦，踏遍苍烟路百盘。迎面湖光千里尽，裹身云气万山寒。片时荡涤尘胸净，一幅林泉画卷看。试想下

方人望我，翛然世外等黄冠。

客 感

倾将愁思写长篇，寂寞帘栊酒盏前。明月为谁今夜好，落花已失旧时妍。事因无奈偏成懒，心到能宽不羡仙。杜宇渐催春去也，客中风景感年年。

莲舫公诗

公名馨莲，字濂馥，号莲舫，卿庭子。震泽县学诸生。少时游幕，名动公卿。后家居，性淡泊，喜围棋。

远就阁读书

秋风飒然爽，秋月皎然明。读罢夜将半，一灯倚壁青。缅怀先人业，图史左右呈。孜孜而兀兀，期克绍前型。奈何饥驱人，明日棹南行。

龙笙公诗

公名锡璋，号龙笙，应甲子。震泽县学诸生，浙江余杭县县丞。工诗善书。

秃 笔

少壮寒檠尚黑头，敢惊风雨几曾愁。自陪铁砚多年后，只对鸡窗短发羞。名负如椽嗟老大，命穷处颖耻营求。尺堪咄咄书空赠，未梦生花岂浪投。

式卿公诗

公名源长，原名廷楷。字仙根，号式卿，仑孙，凤翎子。震泽县学诸生。工诗嗜酒，自号壶中客。

感 怀

非农非贾更非儒，赋性从来本野疏。诗律未谙偏嗜好，时艰如此强舒徐。粮无鼠耗先谋酒，衣典鹑悬且买书。道向市中求活计，归来依旧守空虚。

漫道长房术不凡，有壶曾不庇华孙。干戈扰攘家何在，风雨飘飘身曷蹲。半载三迁仍莫定，一家四口计难存。从来愁绪无穷已，且自携瓢入杏村。

桂卿公诗

公名震壬，号桂卿，馨莲侄。国学生，幕游浙豫，老境坎坷，客死武林。

和绶笙弟感怀元韵

半百年华半鬓丝，从头想起问心知。浮生本是当场梦，补过全凭有退思。一榻琴书饥不救，三年烽火怅何之。桃源谩道秦堪避，其奈华夷混处时。

绶笙大弟夏初来山阴，因闻甲子补行秋试，

欲返里门，即以原韵赋赠

阴阴夏木抱围环，影落书片点翠斑。胸次珠玑拈险韵，饥驱琴剑历名山。十年学富耽辛苦，一举名成越等班。前已纳粟广文，今望秋闱获隽。此去龙门堪烧尾，归来衣锦耀乡关。

绶笙公诗

公名华宝，号绶笙，馨莲子。吴江县学附贡生，候选儒学。善棋工诗，尝游浙东、皖北，得诗甚富。

渡洪泽湖

出门惘惘生离忧，山重水复多淹留。行尽江南到江北，欲

渡不渡洪湖舟。东风一夜快帆驶，鼓棹奔流听所止。客梦迷离睡未醒，忽闻枕上涛声起。起视篷窗晓日晴，船高浪急拍天倾。汪洋浩瀚浑无际，冯夷起舞海若惊。洪波震荡奔复突，安得探取蛟龙窟。回望紫气满东来，中流砥柱表石碣。中有老子山。吁嗟！我来此处值严冬，何堪远涉迷行踪。不如归去五湖烟水里，近看七十有二芙蓉峰。

清江晓发

愁绝乡关远，天寒起朔风。一鞭频策马，千里逐征鸿。雾晓犹迷日，尘飞欲蔽空。驰驱劳仆仆，身世叹飘蓬。

重九后有皖北之行，留别山阴诸同人时张梦周廷璜宰山阴县

一棹秋风几度经，天涯浪迹等浮萍。绿环城郭波如镜，青入衙斋山作屏。好古记同探禹穴，兴怀惜未到兰亭。蠡城客里重言别，伏案琴声侧耳听。

题孙乐川先生瓢城寄鸥庐图

瓢城诗酒足风流，泛宅浮家画本留。梁上去来如客燕，天涯踪迹寄闲鸥。数年淮海成高隐，尺幅云山作卧游。回首乡关何处是，六桥风月梦归舟。

张味鲈先生以诗见示，时余将返里门，匆匆和答即以留别

山阴道上辄相随，老去精神兴未衰。千里未归高士驾，君有“张翰思莼来鼓棹”之句。一篇如读少陵诗。飞鸿印雪暂留迹，野鹤闲云不受羈。每到秋风添客思，吴江正是落枫时。

和山阴李少尉仪甫赠桂卿大兄诗原韵

丈夫岂必受人怜，倔强情深老更坚。卅载征鸿游日下，李君游幕长安卅载。一官推鹤在琴边。君甘下位沉沦久，我愧浮名岁月迁。自是短章诗律细，何当剪烛话窗前。

赠李仪甫少尉和元韵

吏隐如君洵寡俦，知音未得一樽酬。神仙此日欣逢李，诗酒频年辄对刘。萍水情怀如旧雨，草堂别梦感新愁。匆匆鼓棹松陵去，不及追随杖履游。

登清凉寺塔次孙君乐山韵

苔藓摩挲读古铭，岗峦耸翠入苍冥。半空塔影疑无际，一径云深且暂停。作赋登高供啸傲，闲行曳杖独伶仃。我来劫后凭栏望，剩有龕灯佛火青。

史君子珍以赠别诗见示倚装赋答

故人送我夕阳中，一曲骊歌听未终。甬上白云还日暮，江南黄叶落秋风。半年相叙诗兼酒，一旦分飞燕与鸿。为约游山期后日，归途千里半窗蓬。

山阴官舍留别同人作兼答李仪甫少尉

离人夜夜梦刀环，荏苒年华鬓渐斑。道远难行江上路，情深犹恋越中山。三秋每起莼鲈感，千里遥听鞍马班。分手离亭肠欲断，劝君且莫唱阳关。

送我情深似玉环，江南归去鹧鸪斑。楼中啸傲烟和雨，少尉春间署事鸳湖。道上淹留水复山。身世飘蓬逢异地，头衔苜蓿愧同班。故人昔日壮游处，匹马西来函谷关。

子实公诗

公名毓成，号子实，华宝侄。举业不售，幕游皖省。喜作韵语。

遗园吟秋小集录见《肥水唱和集》

吟情换入雨丝柔，飘泊年年不系舟。小住亭林忘作客，忽惊木叶又逢秋。鸿来燕去增新感，月落云停忆旧游。故纸钻

残君莫笑，饥驱无奈觅蝇头。

□□¹ 公诗

公名福祺，干宸长子。好学工诗。卒，无子，以福涛子鸿钧嗣。

贺蓉生表兄吉席

一阙霓裳引凤凰，风流才调羨王郎。画眉巧对初三月，抱膝新添夜半香。艳说玉人须倍惜，娇应金屋倩深藏。从今好友联闺阁，绣虎雕龙子细商。

久佩文章策众先，催妆赋就更增妍。合欢酒试新醅熟，连理花开解语鲜。著代上酬田宝愿，铭恩重拜荻丸贤。妆楼此夕谐佳约，证取京华第一仙。

顾淑人诗

淑人名含春，字雪香，封山公配，同川人。少秉兰甫先生家训，通经能诗。早岁抚孤守节，诗不多作，著有《断肠词》及《秋灯课子》《病中述怀》等诗。子寿康、寿曾装潢成册，并倩松壶叟钱杜绘图，遍征题咏，兹仅得录《课子》一首。旌表节孝。

秋灯课子

欲将双璧继前贤，锡尔熊丸剧可怜。须记病中亲课读，三更纺绩未成眠。

吟芝硕人诗

硕人名吟芝，桂卿公姊。工诗，兼写山水。适嵯尹吴君廷政，号艺菽。孝顺勤俭，克尽妇道。艺菽为古余太史，曾孙尝

1 原阙。

幕游浙省。癸丑岁，贼陷金陵，艺荪挈眷以行，硕人得旷览浙东西之胜。自是，诗画益进。著有《吟芝诗草》。女名欢，亦工诗画，适阮荔汀鹺尹。

苍山旅舍偶成

秋日园林暮，行人宿草堂。吟诗闲待月，读画静焚香。窗冷蕉披绿，篱疏菊绽黄。微风动帘角，残叶落书床。

寄 外

每望君归里，君归未有期。情深反无语，只寄两行诗。

寄怀赵纫秋姊在遂昌作

髻髻相逢姨母家，大雅堂周氏。往来闲步板桥斜。踏青记得西城去，红煞溪桃一树花。

夫婿移家远避戎，伤心闺友各西东。春来梅萼秋来菊，几度花开感别同。

嫁女婿阮荔汀

钗荆裙布朴翻妍，莫使妆奁索母前。碧水迢迢程路远，月明谁识米家船。女擅画山水。

独山犹绕昔苍苔，旧种甘棠新补栽。婿于结褵后即庖代先夫子芦沥场事。树里红旗高映日，参衙书吏又重来。